


Jusiñamui uai:
Jusiñamui jito rafue
illa rabenico



New Testament in Huitoto, Murui (PE:huu:Huitoto, Murui)

Jusiñamui uai: Jusiñamui jito rafue illa rabenico

New Testament in Huitoto, Murui (PE:huu:Huitoto, Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
145a1f66-dca1-5de3-9c00-4e533605e488

Contents

MATEO	1
MARCOS	63
LUCAS	100
JUAN	161
HECHOS	203
ROMANOS	253
1 CORINTIOS	276
2 CORINTIOS	303
GÁLATAS	318
EFESIOS	326
FILIPENSES	335
COLOSENSES	341
1 TESALONICENSES	347
2 TESALONCENSES	351
1 TIMOTEO	354
2 TIMOTEO	360
TITO	364
FILEMÓN	367
HEBREOS	369
SANTIAGO	390
1 PEDRO	396
2 PEDRO	403
1 JUAN	407
2 JUAN	412
3 JUAN	413
JUDAS	414
APOCALIPSIS	417

MATEO JESUCRISTO ENIRUEMO ILLA RAFUE CUIAFUE

Jesucristo ie usumatiai
(Lc 3.23-38)

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. ² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. ³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. ⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. ⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. ⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiña ollena, David micori Urías micorina jobaimemo orede. Jobaimemo naimie fiodailla mei, naiñaiña ote. ⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori. ⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori. ⁹ Uzías micori jitodi Jotam. Jotam micori jitodi Acaz. Acaz micori jitodi Ezequías micori. ¹⁰ Ezequías micori jitodi Manasés. Manasés micori jitodi Amón. Amón micori jitodi Josías. ¹¹ Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. ¹² Naie meinomo Jeconías micori Salatiel micorina comuitate. Salatiel micori jitodi Zorobabel micori. ¹³ Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. ¹⁴ Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. ¹⁵ Eliud micori jitodi Eleazar micori. Eleazar micori jitodi Matán. Matán micori jitodi Jacob micori. ¹⁶ Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

¹⁷ Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniammo ite nairai anamo cai jaigai illa facaisemo catorce nanoramaci mameci jiai ite. Babiloniammo ite nairai anamo cai jaigai illa facaisemona Jesús jeicia facaisemo catorce nanoramaci mameci jiai ite.

Jesús jeicia rafue
(Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiña jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiña uruesitate. ¹⁹ José micori maremie. María jai uruesillana naimie micori fidianona, naiñaiña meidaitañellena jira, naiñaiña bainino dotaacade. Jiaimie diga illamona urueside raillanona comecina facajanona, naiñaiña dotaacade. ²⁰ Naimie micori comecina

iemo facaia, naimie micorí nicairillanona, naimie micorimo Jusiñamui jaienici bairiano raite:

—José, David micorí jito, Maríana jaciruiñeno ono, o aina illena. Jusiñamui Joreño naiñaiñona jai uruesitate. ²¹ Himana jocoite. Ie cominí naimaci jeacinomona naimie jilloitajabilla jira, Jesúna o jitalle naimie mamecidi —raite. ²² Bie rafue suide, Jusiñamuidi ie lloraima micorí jai e llotataga uaina suillena. ²³ Jai e llotatate:

Himana uiñofediñaiñomo comuite uruedi.

Himana jocoite.

Emanuel ie mameci jitalle.

Bie mameci oní dobaiñuamona raite: “Jusiñamui cai diga ite”.

²⁴ José micorí casidemo, Jusiñamui jaienici lloga uaina finode. Maríana ote, ie aina illena; ²⁵ iadedi nai jitona naiñaiño nia jocoñenia, naiñaiño diga naimie micorí nia iniñede. Naiñaiño jito jeicia mei, José micorí jitade naimie mamecina Jesúna.

2

Monamo ite ramo comeciaina facauidino rafue

¹ Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micorí. Monamo ite ramo comeciaina facauidino naie facaiseconi Jerusalémo jitoma billafo dinena bitimaci. Jerusalémo itinomo jicanotimaci:

²—¿Ninomo como jeiciga omoi judíuai illaimadi? Jitoma bisoillafomo como bairede ucuduna ciodicai. Naiemona naimie jeiciana jai uiñotikai. Naimiemo iobillacinona fecallena biticai.

³ Herodes micorídi naicinona cacajanona, ie comeci jarire ite. Jaiemie naimie meifomo illana jitaiñede. Jerusalémo itinodi jiai jarire itimaci. ⁴ Ie facaise Herodes micorí judíuai illaicomínina uaiduanona, naimacimo Cristo raillamie jeiciana jicanote. ⁵ Uai otimaci:

—Judea railla eniruemo. Belémo. Iena Jusiñamui facaina micorídi jai e cueda:

⁶ Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla comínina sedaite.

Iemona Belén nairai Judea illaicomini baifemo faite

cueda. ⁷ Iena cacaja mei, Herodes micorídi monamo ite ramo comeciaina facauidino bainino uaidote. Naie ucudu bairia facaise raise uiñollena jicanote.

⁸ Naimacina Belémo orede. Llote:

—Naie uruena raise jeno. Naimiena omoi cúa mei, cuemo lluaibi, naimie dine cue jaillena. Naimiemo iobillacinona jiai fecaacadicue —llote.

—Jii —fairiotimaci. ⁹⁻¹⁰ Iena naimie micorí llua mei, jaidimaci. Ucuduna naimaci dane ciuamona, eo iobidimaci. Naimaci cúa ucududi naimacina ifuanona, monamo naie urue afemo ride. ¹¹ Fo jaillano uruena, ie ei Marí digá, ciodimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiai fecadimaci.

¹² Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micori inia anamo nicairite. Nicairillanona, Jusiñamui jaienicidi naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide. ¹⁵ Herodes micori fiodailla dinori nainomo ite. Ie muidona Jusiñamui ie facaina lloraima micori llotataga uai jai suide. Jaie lloga: “Egiptomona cue Jitona jai uaidoticue”.

Mena años itisaiai dierisedena faia rafue

¹⁶ Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite isaiai diese faetate. Belén ecimo itino uruiaina jai faetate. Naie ucudu mena años jaie nano bairena jira, mena años itisaiai dierisedena faetate. ¹⁷ Raquel micori jaie eia isoi, Belén itino birui eedimaci. Jeremías micori iena jaie cuela:

¹⁸ Ramá railla nairai dinena Raquel micori eo eiana cacadicue.

Cai usuño Raquel micori eede.

Naiñaiño micori uruiái micoriai facaina eede.

Jiaie cominimona firaduacinona jitaiñede, naiñaiño uruiái micoriai jai fiodailla jira.

¹⁹ Digaru illanona, Herodes micori fiodailla mei, Egiptomo José micori dane nicairillanona, Jusiñamui jaienicidi naimiemo bairede. ²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

²¹ Ie jira ie eniruemo naie urue diga, ie ei diga, abido jaide. ²² Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillana naimiemo llote. ²³ Nazaret railla nairai dine jaide, nainomo illena. Iemona Jusiñamui facaina lloraini micoriai jaie cuela fuaia jai suide. Cristona jaie cuetimaci: “Naimiedi Nazaret imie”.

3

Jofue iñenanomo Juan Bautista micori illa rafue (Mr 1.1-8; Lc 3.1-9, 15-17; Jn 1.19-28)

¹ Diga años illanona, Juan Bautista raillamie micoridi jofue iñenanomo illanona, cominina dafaiña, Jusiñamui rafuena naimacina llofueuide. ² Comini naimie micori dine billanona, naimacimo llote:

—Omoi jeacinona fainonocaida, omoi comeciái iuaillaí meido. Jusiñamui díbeimo omoi i. Naimie anamo omoi illana naimie jitailla jira, omoimo iena lloiticue —llote. ³ Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciái marena finuana ñaite. ⁴ Juan micoridi camello itiraiaí ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. ⁵ Diga

cominai naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. ⁶ Jusiñamui naimaci jeacinona naimaci llua meino, naimacidi Juan micori bautizaga. ⁷ Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isoidomoi. ¿Niese Jusiñamui ricaiillifuemona jilloitomoi? Cue dine omoi billena, ¿bu omoi mo llua? ⁸ Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduna uiñoiticaí. Ie mei omoi bautizallomoi. ⁹ Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui ricaiillifuemona jilloiticaí”. Ero, omoi mo lloiticue: Cue llua isoi omoi finoñenia, naimie ricaiillifuemona jilloñeitomoi. Abraham micori uruiadomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. ¹⁰ Ero, llisñede riará tiedomoi. Tia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoi na jai duere finoacade. Ie ricaiillafue anamo jai itomoi. Omoi comeciai iuai omoi meidoñenia, omoi na duere finoite. ¹¹ Jusiñamui díbeimo omoi comeciai iuai omoi meidoia, jinui diga omoi na bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie díbeimo omoi jaillamona, Jusiñamui Joreño omoi mo itataite. Omoi comeciai iuai omoi meidoñenia, omoi na duere finoite. ¹² Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailai meidotinona ie moo illanomo naimiedi ofitaite; iadedi jaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue (Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite. ¹⁴ Juan dinena naimiemo llote: —Bautizallena cuemo bitio; ia dama ite. Cuená o bautizaia, cuemona mare.

¹⁵ Jesús uai ote:

—Cuená mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. ¹⁶ Jesús bautizaja mei, jinui mona bite. Mona bojodena ciode. Jusiñamui Joreño, ucugí isoi, naimie emodomo ana billana ciode. ¹⁷ Ie facaise monamona Jusiñamui llote:

—Bimie cue eo isiruga Jito. Naimieri iobidicue.

4

Jesúna Taife ramo faia rafue (Mr 1.12-13; Lc 4.1-13)

¹ Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. ² Cuarenta dígarui Jesús guiñede. Naie facaise fuilla mei, guiñeno illamona, aimetaite. ³ Ie facaise Taife naimie dine bite. Jesús aimetaillana naimie uñuamona llote:

—Jusiñamui Jitodiodena, naimiemo lloño: “Ore Moo, cue guillesa, bie nofici llomenicono jaita”. ⁴ Jesús uai ote:

—Dama ite. O luana finoñeiticue. Jusiñamui facaina lloñaima micori iena jaie cuega: “Jaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵ Ie mei Jerusalémo Jusiñamui jofo muidomo Taife Jesúna uite. ⁶ Raite:

—Jusiñamui Jitodiodena, eniruemo mai ana uai. David micori ona jaie cuega:

Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feñoitimaci cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facañeno”. Naimie cuena raise eenuana jai uiñoticue. Jamai ebena naimiena facañeiticue. O luana finoñeiticue.

⁸ Ie mei a ite anedumo Taife naimiena uite, naie anedumona nana nairaiaina cioillena. Naie nairaiái eo ebire eruaide. ⁹ Naimiemo llote:

—Nana bie nairaiái cue anamo birui illamona, cuena o sedaia, nana bie nairaiái omo iitice. O cañici ifodo ana rainada, cuemo iobillacino o fecallena.

¹⁰ Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai. ¹¹ —Ie facaise naimiemona Taife jaide. Naimie jailla mei, Jusiñamui jaienisai Jesús dine bitimaci. Naimiena ecallena bitimaci.

Galileamo Jesús illa rafue

(Mr 1.14-15; Lc 4.14-15)

¹² Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide. ¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiai ite. ¹⁴ Nainomo Jesús jailla jira, Isaías micori jaie cuegafuiai jai suide. ¹⁵ Naimie micori naie cominina jaie cuega: Bie eniruemo diga nairai ite.

Zabulón ite. Neftalí ite.

Monailai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judiuaifedino jai itimaci.

¹⁶ Jeacino anamo naimaci illamona, naga naie eniruemo ite comini jitiredinomo itimaci isoidimaci

Jusiñamuina uiñoñoño fodaicana jaidimaci; iadedi eo mare rafue birui caaitimaci.

Naie rafue naimaci comeciaina lligaiñoite. Naie rafuena uitimie bairenite cuega. Jusiñamuina naimaci uiñoñena jira, naimacina iese cuega. Jesús nainomo birui llofuia jira, mare rafuena jai cacadimaci. ¹⁷ Galileamo rilla mei, Jesús llocana jaide. Llofujete:

—Jusiñamui dibeimo illena, omoi jeacinona fainonocaida, omoi comeciaina iuaina meido. Ie cominina omoi jaillena birui jitaide.

Ie llofueoicaiganona jaillena, Jesúsdi nagaamagamienna fetua rafue

(Mr 1.16-20; Lc 5.1-11)

¹⁸ Jaiiruido Galilea railla jorai fuemo Jesús macaritemo, menamiēna ciode. Naga ie ama iaimaiaia. Damie Simón. Jiaici naimie mamecidi Pedro. Ie ama Andrés diga ite. Llojjina fairaima iaimaiaia. Iese jaca naie iaimaiaidi maijuidiiaimaiaia. ¹⁹ Iaimaiaimo llote:

—Cue diga omico jaiocaillena, cue diga mai bi. Cue llofueganona omico jaillena jitaidicue. Lliciaina birui ocabitomico; iadedi cominina oitomico, cue dibeimo naimaci illena.

²⁰ Iena cacajanona, ieconu iaimaiaia llojjina faimonocaida, naimie diga jaidiiaimaiaia. Ie llofueganona jaillena, jaidiiaimaiaia. ²¹ Lliai bai Jesús jaidemo, jiaie menamiēna ciode. Naga ie ama iaimaiaia. Damie Jacobo. Jiaimie Juan Iaimaiaia moodi Zebedeo. Naimie diga botemo itiaimaiaia. Llojjina sigaidimaci. Jesús iaimaiaina uaidote, naimie llofueganona jaillena. ²² Teconu iaimaiaia moona faimonocaida, botemona ari billanona, Jesús diga jaidiiaimaiaia.

Jesús ailluena cominina llofuaia rafue

(Lc 6.17-19)

²³ Nana Galileamo Jesús jaide. Judiaia ofiracuaimo llofueuide. Naimie anamo comini illana Jusiñamui jitailla jira, Jesúdi Jusiñamui dibeimo naimaci comeciāia iuaina meiduana llofueite. Ie cominina naimaci illena llofueite. Naga isoide duiconu duidinona jillotate. ²⁴ Iemona nana Siria railla eniruemo naimie mameci soride. Naie comini naga isoide duiconu duidinona naimie dine atidimaci. Abi isiredinona atidimaci. Jananiai anamo illa cominina atidimaci. Naillidinona atidimaci. Niraidanidinona atidimaci. Nana naimacina jillotate. ²⁵ Ailluena comini naimiēna racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

5

Anedumo naimie ia, Jesús lloga rafue

(Lc 6.20-23)

¹⁻² Ailluena cominina Jesúsna racadimaci. Naimacina Jesús cuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote:

—Omoina Jusiñamui ie cominina sedaacana rafuena ja llofueiticue. Naimie anamo naimaci illena llofueiticue. ³ Ero, Jusiñamui naimiēna jitaidinona sedaite. Comeciāina facadimaci: “Naimie jitaillacinona danu finonidicai; ia naimie cana canuanona, iena finoiticaia”. Naimie cominina naie isoidino illamona, naimie naimacina canoite. Iemona caimare iitimaci. ⁴ Jusiñamui sunaitinona sedaite. Ailluena comini jeacino finocana jaidimaci. Iena uiañuamona, damierie sunaitimaci. Naimie cominina naie isoidino illamona, Jusiñamui naimaci comeciāina ocuifotaitaite. Iemona caimare iitimaci. ⁵ Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina ico cue sedaia, iese iite. Iemona caimare iitimaci. ⁶ Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci. ⁷ Jusiñamui cominina duenaitinona sedaite. Naimacina naimie duenaillamona, Jusiñamui naimacina ico duere finoiteite. Iemona caimare iitimaci. ⁸ Jusiñamui jeanide comeciredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci. ⁹ Jusiñamui naimie diga uri itinona sedaite. Naimie cominina naie isoidino illamona, jiaie cominina uri itatitimaci. Naie

isoidino naimie cominina jaca mamecirenitimaci. Iemona caimare iitimaci. ¹⁰ Jusiñamui jitaillacinona finuamona, damierie duere sefuitimaci. Jusiñamui naie isoidinona sedate. Naimie cominina naimaci illamona, naimie sedajanomo jaca jainaiatimaci. Iemona caimare iitimaci. ¹¹ Cuemo omoi duia, duere sefuitomoi. Jiaie comini omoina jeare ñaitimaci. Omoina duere finoitimaci. Omoi joreñaona tainona lloitimaci. Duere sefuitomoi; iadedi Jusiñamui omoina caimare itataite. ¹² Omoi isoi omoi jaiagaimona Jusiñamui facaina lloraini micoriai jiaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feñua jira, birui omoi duere sefua, iocire omoi jai.

Jesús comini illa rafue
(Mr 9.50; Lc 14.34-35)

¹³ Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai maraiñede. Iena rifañellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini maraiñede rafuena eo finoñedimaci. Sal ie caimano jai iñenia, ¿niese dane nibaiamona caimarenite? Jai maraiñede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoina duere finoite.

¹⁴ “Cuemo omoi duilla jira, jiaie cominina Jusiñamuina omoi uiñotajamona, lligaiñora isoidomoi. Anedumo ite nairai jaca bairedede. Ie illanona jaca uiñoticai. Jusiñamui jitailla isoi omoi illamona, jiaie comini naimiena uiñoitimaci. ¹⁵ Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena. ¹⁶ Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare finoca rafuena uiñoitimaci. Iemona: “Jusiñamui maremiñena” raitimaci.

Jesúdi Moisés micorina llofua rafue

¹⁷ Jesús llote:

—Jusiñamui ie cominina sedaacalle rafue nia llofueiticue. Iena cue llofua jira, omoimona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai maraiñede” raiñedicue. “Jusiñamui facaina lloraini micoriai jiaie llogacinuai maraiñede” jiaie raiñedicue; iadedi omoina naie llogacinaina raise uiñotaacadícue.

¹⁸ Biemo omoi comeciaina faca. Mona, enirue diga, nia ia, nana naie llogacinuai jaca suite. ¹⁹ Omoi einamací raitimaci: “Dajerie llogacino jiaie llogacino baifemo faite”. Cue raiticue: Naga llogacino omoi iñoñenia, naga omoi llofueñenia, nana Jusiñamui jitaillacinona finoñedomoi. ²⁰ Ero, Jusiñamui jitailla rafuedo judíuai illacomini baifemo omoi jaiñenia, Jusiñamui sedajanomo jaca iñeitomoi. Naimaci naie jiaie llogacinuai uiñoitimaci; iadedi naimaci comeciái Jusiñamui díbeimo iñedimaci.

Jesúdi iciriñena llofua rafue
(Lc 12.57-59)

²¹ Jesús llote:

—Omoi llofueraimona bie jai cacadomoi. Moisés micori omoi jaiagaimo llote: “Comena meineñeno. Comena bu meineia, jeacino jai finode. Naimie fiodaillena juez llua”. ²² Naie llogacinodo jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode.

Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iramo jaite.

²³⁻²⁴ Jerusalémo Jusiñamui jofomo omoi jeacino facaina naimiemo ra fecalena omoi jaia, omoi comini diga uri nano i. Jiaimie omoi diga icirillana omoi ubiñoia, omoi ra faionocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

²⁵ 'Omoína bu llogidoia, juez dine nia omoi riñenia, omoína llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoína oretaité. ²⁶ Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitaño. Jeacino finoñellena, jiaimie diga iciriño.

Jesúdi iima ie añede riño diga illa llua rafue

²⁷ Jesús llote:

—Omoi llofuerañimona bie jai cacadomoi. Moisés micori jaie llote: “Omoi añede riñoiaí diga iño. Omoi iniñede iñiaí diga iño”. “Iena bu finoia, jeacino jai finode” raitomoi. ²⁸ Jiaie rafue birui lloiticue. Ie añede riño mo eruailamona naiñaiño bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode. ²⁹⁻³⁰ Biena ñaiticue. Nie isoide rafue omoína jeacino finotaia, iemo eruaiño. Iena llinoño. Iemo comecina facaño. Omoi ciua rana jira, omoi jitaillamona jeacino finodomoí. Rana omoi jetaja jira, omoi jitaillamona jeacino finodomoí. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoño.

Jesúdi iima ie aina dotaja llua rafue

(Mt 19.9; Mr 10.11-12; Lc 16.18)

³¹ Jesús llote:

—Omoi llofuerañimona bie jai cacadomoi. Moisés micori jaie llote: “Ie aina bu dotaacania, naiñaiño mo dotajacanabena feca”. Iedo jai jaicabidomoi. Iena bu finoia, omoímona mare. ³² Jiaie rafue birui lloiticue. Jiaimie diga naiñaiño iñenia, ie aina bu dotajia, maraiñede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riño ia ie aina illena bu ua mei, naimiedi jeacina jai finode. Jeacino finoñellena, aina dotaño.

Jesúdi Jusiñamui mameci jamai ebena llinoñenana llua rafue

³³⁻³⁵ Jesús llote:

—Omoi llofuerañimona bie jai cacadomoi. Moisés micori omoi jagaimo llote: “Taino lloño; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi llinoñenia, omoi lloga uai omoi finoñenia, omoímona mare. “Jusiñamui caina duere finoite” raitomoi. Iemona monamo ite ra mamecina jamai ebena llinotomoi. Enruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jiaí llinotomoi. Jusiñamui mamecina jamai ebena llinoñedomoi; ia

jiaie ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi llinoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi llinoia, Jerusalén naimie nairaina jira, naimie mamecina jiai llinotomoi. ³⁶ Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogi mameci jiai llinoñeno. Dama Jusiñamui iena usere itataja jira, dama naimie iena jitire itataja jira, ifotirai mamecina omoi llinoia, Jusiñamui mamecina jiai llinotomoi. ³⁷ Ie jira Jusiñamui mameci jamai ebena llinoñeno. Jiaie ra mameci jamai ebena llinoñeno; iadedi nie isoide rafuena omoi finoia, omoi lloga uaina taino lloñeno fino. Uanaicinona jaca lloño. Uanaicinona omoi lloñenia, Taifemona omoi uaina otomoi.

Jesúdi iba oñenana llofuia rafue
(Lc 6.29-30)

³⁸ Jesús llote:

—Omoi llofuerañimona bie jai cacadomoi. Moisés micori jaie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi; ³⁹ iadedi birui omoimo lloticue: Ibana oñeno. Maraiñede rafue finodimemona omoi abina ridoñeno. Omoi cacaina naimie dutaia, naimie diga iciriñeno. Enefebeimo omoi uieco dobañiño, enefebei omoina naimie dutallesa. Naimie omoina duere finoia, ibana oñeno. ⁴⁰ Omoi iniroi bairollena omoina bu llogidoia, juez nia omoimo lloñenia, naimie jitailla iniroi baifemo naimiemo feca. ⁴¹ Daje kilómetro naimaci raruiái omoina uillana illaicomini ocuia, iena uiño. Nibai omoi comeci jitañede; ia naimacina canollena, iena mena kilómetros uiño. Naimaci ocuilla baifemo uiño. ⁴² Omoimo ite rana bu jicaia, iena caidiñeno. Omoi rana bu jamai jicuanu uia, abido atillena, iena caidiñeno feca.

Jesúdi omoina gaiñenano isiruillena llua rafue
(Lc 6.27-28, 32-36)

⁴³ Jesús llote:

—Omoi llofuerañimona bie jai cacadomoi. Llotimaci: “Omoi cominina isirui; iadedi omoi nairaiñedinona enoi”. Iedo jai jaicabidomoi. ⁴⁴ Omoimo birui lloticue: Omoi nairaiñedinona isirui. Omoi gaiñenanona isirui. Omoina duere finodino facaina Jusiñamuimo jii. Naimaci comeciái iuai meiduana naimiemo jicano. ⁴⁵ Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiai lligaiñotade. Maraiñedinone dine noci deitate. Mareuidino dine jiai noci deitate. ⁴⁶ Naimie comini omoi illamona, nana comini daje isoi isirui. Omoina isiruitinona omoi isirua, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini baifemo fañedomoi. Naimaci isoi itomoi. ⁴⁷ Dani omoi cominina omoi uaidoia, mare; ia omoina gaiñenanona omoi uaidoñenia, naimaci baifemo fañedomoi. Jusiñamuina inoñedinone baifemo fañedomoi. Naimaci isoi itomoi. ⁴⁸ Iena omoi uiñuamona, omoi Moo Jusiñamui finua isoi, mare rafuena finocana omoi jai.

6

Jesúdi mare rafue finuana llua rafue

¹ Jesús llote:

—Omoína nia llofueiticue. Jiaie comini iena cioillena, mare rafuena omoi finoiadedi, omoína: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue. ² Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci. ³ Dueredinomo rana omoi fecaia, jiaie cominimo iena lloñeno. ⁴ Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoína: “Mare” raitte.

Jesús Jusiñamuimo jña rafue

(Lc 11.2-4)

⁵ Jesús llote:

—Jusiñamuimo omoi jñia, maredinona abi caitadino isoi omoi iñeno. Ofiracomo naimacina comini cioillena, marefodo jñidimaci. Jñicabilla fa-caiseconi naisomo naimaci ia, naimacina comini cioillena, marefodo jñai jñidimaci. Naimacina: “Jusiñamuina eo sedadimaci” comini raillana jita-idimaci. Cominimona iobillacinona birui jai feiñotimaci. ⁶ Omoi jñacania, omoi jofomo fo jai. Nainomo Jusiñamuimo anado omoi jñi. Iena Jusiñamui uiñuamona, omoi jicaca rafue naimiemona feiñoitomoi.

⁷ Jusiñamuimo omoi jñia, naimiena iñoñedino isoi jamaicinona ñaiñeno. Naimaci comecina facadimaci: “Daje jñacina diga icaiño cai jña jira, ja muidomo cai Moo caina raise cacaite”. ⁸ Naimaci isoi iñeno. Nia omoi jñacania, naimie omoi jitaile rafuena uiñote. ⁹ Naimie omoi jñacania, iese jñi:
Ore Moo, monamo itio.
Comini ori iobidesa.

¹⁰ O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

¹¹ Nagarui guille caimo itata.

¹² Caina jeare jiaino finoa, iena caimona feilla isoi, cai jeacinona omona feilla jira, cai jeacinona oni dota.

¹³ Caimo ramo bu faia, caina cano, iena cai iñoi raillano. Jeacinona finuamona caina jillota.

Iese omoi jñi. ¹⁴ Omoína jiaie comini jeare finoa, iena omoi feitaia, omoi monamo ite Moo omoi jeacinona iena faitajanona, jiaie oni dotaite; ¹⁵ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesús guiñenaruina llua rafue

¹⁶ Jesús llote:

—Omoína nia llofueiticue. Raitomoi: “Jusiñamuina eo raise cai sedajana, birui cai guiñeiticai. Iemona naimie caina eo duenaite” raitomoi. Iese Jusiñamuina omoi sedajia, sunaiñeno, maredinona abi caitadino isoi. Sunaitimaci. Naimaci uieco finobicabicide. Naimaci guiñenarui facaise illana comini uiñollena, naimacina comini cioillena, iese itimaci. Naimacina:

“Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci. ¹⁷ Ero, naimaci isoi omoi iñeno; iadedi omoi guiñenarui ia, omoi abiai raise fino. ¹⁸ Iemei cominidi omoi guiñenarui illana uiñoñeitimaci. Naimacimona iobillacinona feiñoñeitomoi. Dama Jusiñamui iena uiñoite. Bainino omoi finoca rafue naimie uiñua jira, naimiemona iba feiñoitomoi.

Jesúdi Jusiñamuimo comecina facaja rafue
(Lc 12.33-34)

¹⁹ Jesús llote:

—Omoi jofomo ailluena rana eenocana uiñeno. Gñreco iena guicabite. Dajerie ra nemuide. Omoi jofomona jiaie comini iena fñiacadimaci. Ailluena ra eenuamo omoi comeciaina facañeno; ²⁰ iadedi Jusiñamui ñine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Gñrecuaimona, nemuillamona, fñirirainimona, iena nainomo fañiñeitomoi. ²¹ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi fñoia, naimiemo comeciaina facadomoi.

Jesús cai comecina llua rafue
(Lc 11.34-36)

²²⁻²³ Jesús llote:

—Cai uisi ñiga rana ciodicai. Cai uisi marañenia, rana raise cioñedicai. Ie isoide. Cai comeci marañenia, marañedicinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiena nabaiñedicai.

Jesús raruiaina llua rafue
(Lc 16.13)

²⁴ Jesús llote:

—Mena patrones ñiga daruido buna jaca maijinide. Mena ñiga bu maijiacania, ñamiema jiaimie baiñfemo gaiite. Ie gaiamie ocuica rana fñoite. Jiaimie ocuica rana raise fñoite. Ie isoide. Raruiái ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi Jusiñamui cai sedajana llua rafue
(Lc 12.22-31)

²⁵ Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoína itataja muidona, guille omoimo iite. Naimie omoi abí finua muidona, iniroidi omoimo iite. ²⁶ Silliñaiamo comecina faca. Buena riñedimaci. Ñie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baiñfemo omoi faia jira, naimie omoína canoite. ²⁷ Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoína a sairitarede. ²⁸ ¿Bue ñellena iniroimo jarire comecina facadomoi? Safiamo omoi comecina faca. ¿Ñiese sicodimaci? Maijiñedimaci. Iniroina tiferiñedimaci; ²⁹ iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baiñfemo ebire eruaide. ³⁰ Jusiñamui safiana ebiretacabide. Dallu facaise illanona, safadi ñuide. Safia baiñfemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino.

³¹ Omoï comeci jarire finoñeno. “¿Buena guiticaï? ¿Buena jitaïticaï?” raiñeno. Iemo comeciaina eo facañeno. ³² Jusinamuina inoñedino iemo comecina facacabidimaci. Nana omoï jitaillacinona omoï Moodi uñña jira, naimaci isoi iñeno. ³³ Jusiñamui anamo raise omoï i. Naimie jitaillacinona finocana omoï jai. Naimiemo omoï comeci facaia, omoï illamo omoï comecina jarire facañetomoi. Iemona guille omoïmo iite. Iniroi omoïmo iite. ³⁴ Jusiñamui omoï birui jitailla ra omoïmo iite. Iena uññuamona, jaiñruido sulle rafuemo jarire comecina facañeno. Ico omoï jitailla ra omoïmo jiaï iite.

7

Jesúdi jiaie cominina mameriñenana llua rafue (Lc 6.37-38, 41-42)

¹ Jesús llote:

—Omoïna nia llofueiacadicue. Jiaie cominina mameriñeno. Jiaie cominina omoï mameria, omoïmo ite marañede rafue facaina Jusiñamui omoïna duere finoite. ² Jiaie cominina omoï mamerilla diese Jusiñamui omoïna duere finoite. ³ Omoï ecimo itimiemo janore marañedicino illana omoï uññoia, iemo comecina facañeno; iadedi omoïmo ailluena ite marañedicinomo nano omoï comecina faca. ⁴ Omoïmo marañedicino illamona, ¿ñiese omoï ecimo itimiema mameritomoi? ⁵ Omoïmo ite marañedicinomo omoï comecina facacañena jira, maredinona abi caitadinodomoï. Omoï comeciaina nano raise fino. Iemei omoï ecimo itimiema canorenitomoi. Naimie comecina raise canorenitomoi.

⁶ Ero, eo mare rana omoï jiconiaïmo fecañeno. Eo raifide rana omoï chanchuaïmo fecañeno. Naimacimo omoï fecaiadedi, iena feiñoñetomaci. Omoïna gaiñenamona, jiconiaï omoïna ainitomaci. Chanchuai iena jamailamona, iena saitaitomaci. Ie isoide. Damierie Jusiñamui uaina uaitacabitomaci. Iena naimaci jaca feiñoñena jira, naie rafue naimacimo llocabiñeno. Naimacimo omoï llocabia, omoïna duere finoitomaci. Omoï rafuena jamaitomaci.

Jesúdi cai jitailla ra jicaja llua rafue (Lc 6.31; 11.9-13)

⁷⁻⁸ Jesús llote:

—Daje ra omoï faïña, iena jenodomoï. Raise jenoia, iena baitomoi. Damiena omoï jenoia, naimie illanomo jaidomoi. Nainomo naimiena baillamona, omoïna feiñoite. Ie isoide. Buena omoï jitaia, Jusiñamuimo jica. Iena omoï jicaja jira, iena naimie cacajamona, omoïmo iite. ⁹ Ero, omoïmona naimiemo llomeniconi ie moomo ie jito jicaia, noficina fecañede. ¹⁰ Lliciaïna jicaia, jaiona fecañede. ¹¹ Jeacinona finocabidomoi; iadedi mare ra omoï uruaïmo fecacabillana uñnotomoi. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecaite.

¹² Jusiñamui jitaillacinona omoï finuamona, jiaie cominina marena fino. Jiaie comini omoïna finuana omoï jitailla isoi, naimacina fino. Naimaci omoïna marena finuana omoï jitaia, naimacina marena fino. Naimaci omoïna marañeno finuana omoï jitaia, naimacina ie isoi marañeno fino. Moisés micoriaï ie isoidicinona jaie llofujete. Jusiñamui facaina lloraini micoriaï ie isoidicinona jaie jiaï llofuetimaci.

Jesúdi Jusiñamui dine rille llua rafue
(Lc 13.24)

¹³⁻¹⁴ Jesús llote:

—Jusiñamui dine omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca iitimaci. Naimie dine rillena eo sefuiarena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue
(Lc 6.43-44)

¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiacinodo omoi jai, Jusiñamui rafuedo raise jaiñeitomoi. ¹⁶ Naimaci lloga rafuemona naimaci Jusiñamui llorainiñenana uiñoitomoi. Ero, eecuaimona uvas railla riará oñega. Eecuaimona higos railla riará jiai oñega. ¹⁷ Mare riaramoná mare llisilla comuide. Maraiñede riaramoná maraiñede llisilla comuide. ¹⁸ Mare riaramoná maraiñede llisilla comuiñede. Maraiñede riaramoná mare llisilla comuiñede. ¹⁹ Mare llisilla comuitañena jira, naga maraiñede riará jaitaca, iena jobaillena. ²⁰ Ie isoide. Naimaci finoca rafuemoná nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusiñamui naimacina duere finoitoe.

Jesúdi ie Moo ie comini sedajanomo ille llua rafue
(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite. ²² Cominimo juez isoi Jusiñamui ico llua facaseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticaí. O uaido jananiaina oni oredicaí. O uai diga siño rafuena finodicaí” lloitimaci. ²³ Uai oiticue: “Omoína uiñoñedicue. Cue comiñedomoi. Jecino omoi comecimo nia illa jira, cuemoná oni omoi jai. Cue Moo ie comini sedajanomo jaca iñeitomoi”.

Jesúdi naimiena ñnuana ñaia rafue
(Lc 6.47-49; Mr 1.22)

²⁴ Jesús llote:

—Cue lluana cacadomoi; iadedi omoimona nana ñnoñedomoi. Cue lluana ñnotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. ²⁵ Noci deidemo, eo jinuidemo, jofomo ille toia, aifi bitemo, jofa raise finua jira, jofa goiñede. Iena faifiñede. Ie isoide. Cue lluana ñnotimie faifiñeite. ²⁶ Cue lluana ñnoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomó iena finode. Ana raiñede. ²⁷ Noci deidemo, eo jinuidemo, jofomo ille toia, aifi bitemo, jofa goillamona, jai eo judaisite. Iena faifide. Ie isoide. Cue lluana ñnoñedimie faifite —llote.

28-29 Moisés micorí rafue uiforaini isoi naimie llofueñena jira, illaimamo ite uai itimie isoi naimie llofuia jira, nainomo ite cominidi naimie luari rajicaidimaci.

8

Jesúdi efonaitimiena jillotaja rafue

(Mr 1.40-45; Lc 5.12-16)

¹ Naimie llofuia mei, anedumona Jesús ie llofueoicaigano diga ana bite. Ailluena comini naimiena racadimaci. ² Efonaitimie naimie dine billanona, naimiena raise uaiduamona, caiñici ifodo ana rainadate. Raite:

—Maestro, o jitaiadedi, cuena jillotaredio.

³ Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo. —Ieconí naimie jillode. ⁴ Jesús naimiemo llote:

—O jilluana bumó lloñeno; iadedi Jerusalémo, Jusiñamui jofomo, Jusiñamui diga ñairaima dine mai jai. O jilluana comini raise uifollena, naimiemo o abina acatajai. Moisés micorí jaié lloga rana Jusiñamuimo feca. —Iemei Jesús oni jaide.

Jesúdi capitán mullaimana jillotaja rafue

(Lc 7.1-10)

⁵ Capernaum railla nairaimo Jesús ria, capitán raillamie naimie dine bite. Naie capitán Roma railla nairaimie. Juduíñedimie. Billanona, duere llote:

⁶ —Maestro, cuena cano. Cue jofomo cue mullaíma ite. Ie abina niraidanide. Naimie abi eo isirede. Naimiena jillota.

⁷ Jesús uai ote:

—Naimie dine jaiticue, naimiena cue jilloitallena.

⁸ Naie capitán dane llote:

—Jaiñeno. Jamaí bue isoidicue. Iemo, ¿ñiese cue jofomo biitio? O uaido bene luanona cue mullaíma jilloite. ⁹ Jiaie illaicomini anamo iticue. Naimaci lloga uaina inotícue. Cue anamo jiaie soldaduai illanona, cue uaina inotimaci. Cue anamo cue mullaíma illa jira, naimiedi cue uaina inote. O anamo naie duico illa jira, o uaina o lloia, cue mullaíma jilloite.

¹⁰ Iena cacajanona, Jesús rajicaide. Naimie diga jaidinomo llote:

—Bie isoi cue uaina inotimiena jaca baiñedicue. Cai judúuai cominimona biesedimiena jaca iñede. ¹¹ Ero, Jusiñamui ie cominina sedajanomo naimaci illena, diga judúuaiñedino cue llua uaina inoitimaci. Naga nairaimimona inoitimaci. Jusiñamui cominina Abraham micorí, Isaac micorí, Jacob micorí illamona, naimaci diga Jusiñamui ie cominina sedajanomo bie judúuaiñedino iitimaci. Nainomo caimare nabaitimaci. ¹² Ailluena judúuaiñedino inoitimaci. Jusiñamui ie cominina sedajanomo duillanodi omoi judúuai. Naimiena omoi inoñena jira, omoína oni dotaite. Dotaja mei, eo duere sefuillamona eeitomoi.

¹³ Capitámo Jesús llote:

—Mai jai. Cue uai siñonana o inua jira, o jitailla rafue omo jai suide. —Ieconí naimie mullaíma jillode.

Jesús Pedro jifaiñona jillotaja rafue

(Mr 1.29-31; Lc 4.38-39)

¹⁴ Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride. ¹⁵ Naiñaiño dine jaillanona, naiñaiñoña jetade. Jeta-jamona ieconi naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mr 1.32-34; Lc 4.40-41)

¹⁶ Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. ¹⁷ Naimacina Jesús jillotajamona, Isaías micori jaie cuegafuiai iese jai suide. Naimie micori jaie cuega: “Caina jilloitajanona, cai duicono oni oretaite”.

Jesús ie llofuegamiena damie jaillana ie rafue

(Lc 9.57-62)

¹⁸ Ailluena comini naimie ecimo illana Jesús ciuanona, ie llofueoicaiganomo ruica dine jaillena llote. ¹⁹ Ieconi Moisés micori rafue llofueraima naimie dine billanona, llote:

—Maestro, o jaillinomo o diga jaiacaducue. O llofuegamiena jaiacaducue.

²⁰ Jesús uai ote:

—Janorede ocainaiadi joforedimaci. Silliñiai jillainaiaredimaci; iadedi jofoniducue. Monamona billanona, imana jaiducue; iadedi bueniducue. Jofoniducue. Cue diga o jaicania, bue isoidena cuemona oñeitio. Iemo o comecina raise faca.

²¹ Ie facaise jiaie llofuegamie Jesúsno llote:

—O diga jaitucue; ia cue moo nia fioidañena jira, o diga nia jaiñeitucue.

²² Jesús naimie uai ote:

—Cue diga idai mai bi. Cuena inoñedinodi o moona canoredimaci. Naimie fioidaia, naimiena naimaci raille. Cue rafue jiaie rafue baifemo faite. Cue diga mai bi.

Jesúdi joraina llicaitaja rafue

(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci. ²⁴ Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira, ²⁵ jaciruillamona, Jesúsna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cuena raise inoñedomoi. Jacinaiño.

Iemei Jesús naidacaillano, aifina lletade. Joraina jiai llicaitade. Ieconi llicaiide. Bagoñede. ²⁷ Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

Jesúdi Gadara railla eniruemo illa rafue

(Mr 5.1-20; Lc 8.26-39)

²⁸ Ruica dine naimaci ridemo, Gadara railla eniruemo sijidimaci. Ieconi menamie Jesús dine bitiaimaiai. Jananiai anamo ite iaimaiai. Comini raioillanomo nofie moto ifuaimona bitiaimaiai. Nai iaimaiai eo riirena jira,

jaca bu nainomo jainide. ²⁹ Jesúsna iaimaiaia ciua facaise jananiaia iaimaiaina cuiroiitate:

—Jusiñamui Jitodio. ¿Ñiese cocona nibaiaacadio? Coco duere sefeuille facaise nia iñede; iadedi birui cocona duere finuai bidio —cuiroidiaimaiaia.

³⁰ Naie bai iaire ailluena chanchuai guillano itimaci. ³¹ Jananiaia Jesúsno duere llotimaci:

—Oni caina o oretajanona, chanchuai abimo caina oreta.

³² Jesús uai ote:

—Mai jai.

Ieconí nai iaimaiaimona jananiaia oni jaillanona, chanchuai abimo jaide. Iemona iconiaido chanchuai joraimo aisicana jaillanona, corobaiside.

³³ Iena ciuanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiaia anamo illa iaimaiaia rafuena llotimaci. ³⁴ Ie jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

9

Jesús tísitaitimiena jillotaja rafue (Mr 2.1-12; Lc 5.17-26)

¹ Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride. ² Nainomo rilla mei, naimie dine comini ie bíramo bíde tísitaitimiena atide. Naimiena atidinodi Jesús naimiena jillotajana ñnote. Iena Jesús uñuanona, tísitaitimiemo llote:

—Moo, o comecina ocuño. O jeacino cue feitaja jira, iena jai oni dotadicue. Ie facai ibana jai oñeiticue.

³ Jesús dine ofidinomona dajerie Moisés micori llogacinona llofueraini itimaci. Jesús luana naimaci cacajano, Moisés micori llogacinona llofueraini comecina facadimaci: “Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁴ Naimaci comeciaina facajacinona Jesús uñuamona, Jesús dinena jicanote:

—¿Bue ñellena omoi comecina jeare facadomoi? ⁵ Bimiemo: “O jeacinona jai oni dotadicue” cue lloia, cue uai siñonana uññoñeitomoi; ia bimiemo: “Mai naidacaillanona macari” cue lloia, cue uai siñonana uññoitomoi. ⁶ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uñollena, tísitaitimiemo lloiticue: “Mai naidacai. O bíra ferianona, o jofomo mai jai”.

⁷ Iese naimie raillamona, tísitaitimie jillode. Naidacaida, ie jofomo jaide.

⁸ Comini iena ciuanona, jacinaitimaci. Bimiemo ie uaina Jusiñamui fecajana naimaci uñuamona, Jusiñamuimo iobillacinona fecadimaci.

Jesúdi Mateona fetua rafue (Mr 2.13-17; Lc 5.27-32)

⁹ Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadicue. Jesús cuemo llote:

—Cue llofuegamiema o jaillena, cue diga bi.

Naidacaida, naimie diga jaidicue.

¹⁰ Nailli cue jofomo Jesús ie llofueoicaigano diga guite. Diga gobierno ucube oraini jiai guisabitimaci. Diga Moisés micori llogacinodo jaiñedino jiai guisabitimaci. ¹¹ Nainomo fariseuai comini jamai bitimaci. Moisés

micori llogacinodo eo jaidimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Marañede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

¹² Iena cacajano, Jesús llote:

—Ecairedinodi médocna jitañedimaci; ia duidinodi médocna jitañedimaci. Ie isoide. Mareuidino cuena jitañedimaci; ia marañedino cuena jitañedimaci. ¹³ Jusiñamui facaina lloaíma micori jaie cuega rafuemo omoi comecina faca: “Jusiñamui llote: ‘Rana cuemo omoi fecajana jitañedimaci; ia comina omoi dueruillana jiañedimaci’ llote”. Comina cue dueruilla jira, Jusiñamui dibeimo naimaci illena, mareuidinona itatajaitimaci; iadedi Jusiñamui dibeimo naimaci illena, marañedinona itatajaitimaci. Omoimona marañedino diga nabairiticue; ia naimacina uaibiticue.

Jesús dine Juan Bautista llofueoicaigano billa rafue

(Mr 2.18-22; Lc 5.33-39)

¹⁴ Naie facaise Juan Bautista llofueoicaiganodi Jesús dine bite. Naimiemo llote:

—Cai einamaci llua isoi, Jusiñamuina cai raise iobitallena, guiñenaruilla illa facaiseconi guiñedimaci. Cai jeacino facaina sunaibiticai. Fariseuai comini jiañedimaci; iadedi o llofueoicaigano guitimaci. Cai einamaci llogacinodo jaidicai. ¿Bue ñellena o llofueoicaigano iedo jaiñedimaci?

¹⁵ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabairiñai sunaibedimaci. Iobillamona guitimaci. Jaiiruido jai aireiacade conirue naimaci diga iñena, naimaci comeci sunaillamona, naimaci jitaia, guiñenaruillaite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ¹⁶ Jiaie rafuedo iena lloiticue. Nia jocoñega comue iniroidi jacaie iniroimo jillinega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai marañeno cioite. ¹⁷ Jacagomona finoca bolsa como finoca vino joneñega. Jonegadana, mairiñena jira, sirillamona, igoi raire cuararite. Vino faifite. Igoi jiañedimaci. Como finoca vino comogomo jonelle. Iemei iena faifite. Ie isoide. Omoi einamaci rafue ifomo jiaie rafue birui ite. Iena omoimo llocabitimaci. Iedo jaidicai —llote.

Jesús dina duide riñona jillotaja rafue

(Mr 5.21-43; Lc 8.40-56)

¹⁸ Juan Bautista llofueoicaigano diga Jesús llotemo, jiaimie naimie dine bite. Naimiedi judiañi ofiraco sedaraima. Jesúna duere jicanollena, cañicai ifodo rainadacaida llote:

—Cue jisa como fiodaite. O onolli naiñaiñomo o jonellesa, naiñaiño jilloillesa, cue jofomo cue diga mai bi.

¹⁹ Iena cacajano, Jesús naimie diga jaide. Ie llofueoicaigano jiañedimaci.

²⁰ Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade. ²¹ “Naimie iniroi cue jetajamona jilloiticue” comecina facajamona, naiñaiño naimie iniroina jetade. ²² Ieconí Jesús dobaidacaida, abido erodatemo, naiñaiño cide. Raite:

—Ñoo, o comecina ocuiño. Cuena o ñnua jira, jai jillodio.

Ieconí naiñaiño jillode.

²³ Ofiraco sedaraima jofomo Jesús rillano, naie jofo nama jisa jai fiodailla jira, comini merire fillana cacade. Ailluena faillñaillana cacade. ²⁴ Jesús dinena raite:

—Jofomona nana omoi jino jaillana jitaide. Cuemona biñaiño fiodañedes. Jamai inide.

Iena cacajano, naiñaiño jai fiodaite uñuamona, Jesúsí jaisitimaci. ²⁵ Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide. ²⁶ Naie rafue nana naie enirue itinomo llocana jaide.

Jesúdi uisínide iaímaiaína jillotaja rafue

²⁷ Ofiraco sedaraima jofomona Jesús bai jaidemo, uisínide iaímaiai naimie jinafona jaidiaímaiai. Jesúsna ado uaidotiaímaiai:

—Cai illaíma David micori jitodio. Jusiñamuimona o billa jira, cocona duenai.

²⁸ Uai oñeno Jesús Capernaumo jaide. Naimie fo jailla mei, naimie dine bitiaímaiai. Iaímaiaimo Jesús jicanote:

—¿Omicona cue jillotajana inotomico?

Fairiotiaímaiai:

—Jii.

²⁹ Iaímaiai uisina Jesús jetajano raite:

—Cuenta omico inua diese jilloitomico.

³⁰ Ieconí iaímaiai uisídi ciode. Jesús naie rafuena lluaña eo janotade.

—Bumo lloñeno —llote; ³¹ iadedi iena llocana jaidiaímaiai. Iemona Jesús mameci nana naie eniruemo itinomo soride.

Jesús ñaiñedimiena jillotaja rafue

³² Capernaumona Jesús bai jaidemo, naimie dine Janaba anamo illamiena jiaie comini atidimaci. Janaba anamo naimie illa jira, naimie ñainide. ³³ Jesús Janabana oni orede. Oretaja mei, naie íma ñaite. Nainomo ite comini rajicaillanona raitimaci:

—Cai comini dine bie isoide íma jilluaña jaca cioñedicaí.

³⁴ Ie jira fariseuai comini dinena raitimaci:

—Taife díbeimo Janaba illamona, Jesúsí Taife uaido Janabana oni orede —raitimaci.

Jesúdi cominina duenailla rafue

³⁵ Díga nairaiaimo ie llofueoicaigano díga Jesús llocana jaide. Nainomo judíuai ofiracuaimo llofueuide. Naimie anamo comini illana Jusiñamui jitailla jira, Jesúsí Jusiñamui díbeimo naimaci comeciái íuaina meíduana llofueite. Ailluena duidinona jillotate. Naga isoide duicomona jillotate.

³⁶ Naimacina duenaite. Naimaci comeciái iticino oni duiñoitimie íñena jira, naimacina duenaite. Ailluena cominina ciode. Toica llaudaíai isoi ebe isoi jaidimaci. Naimaci comeciái ocuiñonidimaci. Jusiñamui naimacina sedaa-cana uíñoñedimaci. ³⁷ Naimacina duenaillamona, ie llofueoicaiganomo llote:

—Illimo ailluena trigo ía, íena ollena, ailluena maíjiraínina jitailla. Ie isoide. Ailluena comini ite naimacimo Jusiñamui rafuena cai llollena; iadedi naie rafuena lloraíní eo íñedimaci. ³⁸ Ie rafue naimaci llollena, ailluena cominina raire naimie oretallena Jusiñamuimo jicano.

10

Jesúdi ie doce llofueoicaiganona fetua rafue (Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Duicona oni oretallena, iena jiaí iñonocaide. ² Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaiaí Zebedeo jito iaimaiaí. ³ Felipe. Bartolomé. Tomás. Cuenajiaí uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo. ⁴ Jiaie Simón. Naimiedi cananista comini facaisemo duide. Judas Iscariote micori. Naimiedi Jesúna gaitatate.

Jesúdi ie llofueoicaiganona oretaja rafue (Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judúuaiñedino dine jaiñeno. Samaritano railla comini dine jaiñeno; ⁶ ia cai judúuai comini dine jai. Naimacimona ailluena comini Jusiñamui rafuena nia iñoñedimaci. Faificana nia jaidimaci. ⁷ Omoi jaillanona, cominimo llono: “Jusiñamui facaina jaiie lloraini micoriai llogamie jai bene ite. Naimie anamo omoi illana Jusiñamui jitailla jira, naimie díbeimo omoi comeciái uaina meido”. ⁸ Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamaí omoi feiñua jira, cominina jilloitajana ibatañeno. ⁹ Ucubena uiñeno. Guille ifo meidollena, rana uiñeno. ¹⁰ Ailluena rana omoi uiñellena, bolsana uiñeno. Abi meidolle niroyina uiñeno. Meidolle zapatona uiñeno. Omoi abi riidollena, jiguidana uiñeno. Jiaie cominina omoi canua isoi, omoína naimaci canua. Naimacimona omoi jitailla rana omoi ono. Ie jira ailluena rana uiñeno. ¹¹ Nie nairaimo omoi ria, omoi rafuena jitaídímiena jeno, naimie jofomo omoi illena. Naie jofomo omoi i, naie nairaimo omoi ille dinori. ¹² Naie jofomo omoi rillanona, naie cominina marena uaido. ¹³ Omoína naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitaíñenia: “Jusiñamui omoína canoite” naimacimo lloñeno. ¹⁴ Omoína bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina jaidino. Maraiñede rafuena naimaci finuana naimaci uiñollena, omoi eilliaína jaidino. ¹⁵ Omoimo uanaicinona lloticue. Omoína naimaci feiñoñenia, Jusiñamuidi naimacina duere finoite. Sodoma railla nairai jaiie jeacinona eo finodimaci. Gomorra railla nairai jaiie jeacinona eo finodimaci. Ie jira Jusiñamui naimacina jaiie duere finode. Omoína comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifuenal lua rafue

¹⁶ Jesús ie llofueoicaiganomo nia llote:

—Naimacina janallari fañellena, naimaci duere sefuíñellena, toica llaudaiaí raise sedajana jitaídímaci. Ie isoide. Eo maraiñede comini motomo omoína oretaiticue. Omoína duere finoacanitimaci. Raise sedajana jitaídomoi. Jaio fodiañellena, aíside. Naimiena bu meineñellena, ie abina eenollena, jaió aíside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i. ¹⁷ Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. ¹⁸ Cue rafue omoi llua muidona, omoína gaitajanona, illaicomini dine omoína

uitimaci. Omoína llogidoitinomo cue rafuena lloito moi. Naie illaicominimo iena jiaí lloito moi. ¹⁹ Naie illaicomini dine omoi ia, omoi ridollicinomo omoi comeciaina jarire facañeno. Naie facaise omoi ñaillicinona uñitomoí. ²⁰ Dani omoi comeciái icinodo ñañeitomoí; ia Jusiñamui Joreño uaido ñaitomoí. ²¹ Cuená ñinotomoí; ia ailluena cuena ñinoñeitimaci. Cuená omoi ñnua jira, omoína enoitimaci. Iemona dajerie ie amana meinetaliena, naimiēna llogidoite. Dajerie moodi ie uruena meinetaliena, naimiēna llogidoite. Dajerie uruiaidi naimaci moona, naimaci eina meinetaliena, naimacina llogidoitimaci. ²² Cue muidona ailluena comini omoína enoitimaci; iadedi cue uaina fañonocañedimie cue Moo diga monamo ja muidomo jaca iite. Naimiēna jillotaiticue. ²³ Cue rafue naimaci jitañenamona, omoína nie nairai duere finoía, ñinomona cue rafuena lloiena, jiaie nairaimo raire jai. Cue rafuena omoi lloiena, diga judiuaí illanuaimo nia jaitomoí. Nana naie comini nia ñinoñenia, Jusiñamui ñinena dane abido biiticue. ²⁴ Ero, ie llofueraima duere sefua, ie llofuegamie daje isoi duere sefuite. Ie eci illamie duere sefua, ie mullaíma daje isoi duere sefuite. ²⁵ Ie isoide. Cue cominina omoi jaillamona, cue duere sefua, jiaí duere sefuitomoí. Taife mameci jiaici llinuanona, “Beelzebúdi” jiaíno cuena raitimaci. Iese cuena naimaci jeare ñaia jira, cue cominina omoi illa jira, omoína jiaí jeare ñaitimaci.

Jesúdi jaciruiñeno llofua rafue
(Lc 12.2-9)

²⁶ Jesús nia llote:

—Cuená ñinoñedino omoína jeare ñaitimaci; ia nana cue rafuena llonana omoi jailla jira, naimacina jaciruiñeno. ²⁷ Omoímo rafuena anado jai lloticue. Iena nana cominimo marefodo llono. Ado llono. ²⁸ Omoi abina meineredimaci; ia omoi joreñoa meinenidimaci. Omoína naimaci meinea, omoi joreño Jusiñamui dine jaite. Iena uñuamona, omoi meinea-cadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. ²⁹ Omoína duere finoacadinona jaciruiñeno. Ero mena janorede sillina fecadomoína, eo janore ibaca; iadedi cai Moo Jusiñamui jitañenia, naimacimona daje fioidañede. ³⁰ Ero, niga ifotirai omoímo illana Jusiñamui uñote. ³¹ Naimiedi omoína sedajana jiaí uñote. Silliaí baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitañenia, omoímo jaca buena suiñeite.

Jesús naimiēna janoñenana llofua rafue
(Lc 12.8-9)

³² Ie llofueoicaiganomo Jesús nia llote:

—Cue rafuena omoi llouamona, jiaíno omoína duere finoitimaci. Cuená birui omoi janoñenia, nana comini Jusiñamui uicomo íco ia, nainomo omoína janoñeiticue. “Cue cominidomoi” omoína raiticue. ³³ Cuená birui omoi janoía, nana comini Jusiñamui uicomo íco ia, nainomo omoína janoíticue. “Cue cominiñedomoi” omoína raiticue.

Jesús muidona nana comini uri iñena rafue
(Lc 12.51-53; 14.26-27)

³⁴ Ie llofueoicaiganomo Jesús nia llote:

—Nana cominina uri itataliena eniruemo biñedicue. Cuená ñinoñedinodi cuena ñnotinona enoitimaci. Enoillamona cuena ñnotinona duere finoitimaci. ³⁵ Cue lloga rafuena damierie ñnua muidona, ie moo illa díbeimo ie jito iñeite. Ie ei illa díbeimo naiñaiño jisa iñeite. Ie jifaiño illa

dibeimo naiñaiño mio iñeite. Iese cominina uri itatañedicue. ³⁶ Omoi comini coninina enoitomoi. Iemona duere sefuitomoi. ³⁷ Ero, ie moona cue baifemo bu isiruiia, ie eina cue baifemo bu isiruiia, cue jitailla ra naimie finoacaiñena jira, cuemo raise duiñede. Ie uruiia cue baifemo bu isiruiia, cuemo raise duiñede. ³⁸ Cue facaina bu fiolaiacaiñenia, cuemo raise duiñede. Naimiedi cue comini naimiena lloiacaiñedicue. ³⁹ Cue facaina fiolaiacaiñedimie ja muidomo faifite. Cue diga jaca iñeite; iadedi cue facaina fiolaitimie monamo cue diga jaca iite.

Jesús Jusiñamuimona ibana feiñua llua rafue

(Mr 9.41)

⁴⁰ Jesús llote:

—Cue rafuena omoi llocana jaia, diga jofuemo riitomoi. Cue cominina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuena feiñotimiedi cuena oretatimiena jiai feiñote. ⁴¹ Naimie cue comini illamona, damierie Jusiñamui facaina lloraimana feiñotimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite. ⁴² Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena llolena, orede.

11

Jesús dine Juan Bautista micori ie llofueoicaiganona oretaja rafue

(Lc 7.18-35)

¹ Ie doce llofueoicaiganona Jesús oretaja mei, iaiei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micori Jesús finoca rafuena fidiano, iena raise uiñollena, Jesús dine ie llofueoicaiganona orede. ³ Jesúmo llotimaci: —Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uiñoiacadicai. Imieñediadena, jiaimie billemo nia ocuridicai.

⁴ Jesús uai ote:

—Cue llua cacadomoi. Cue finoca rafuena ciodomoi. Juan dine abido omoi jaillanona, iena naimiemo llono. ⁵ “Uisinidino jai ciotimaci. Ñujañujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiollaillamona damierie jai jillodimaci. Dueredino mare rafuena jai cacadimaci” naimiemo llono. ⁶ Jiai llono: “Nibai nana cue rafuena raise cacaiñedio; ia cuena jaca nia inocana o jaia, caimare itio”.

⁷ Juan llofueoicaigano abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afaí bijide. Afaina aifi billamona, raitire fuiri bijide. Naimie ie isoñede. Nie isoide rafue naimiemo ia, cue rafuena llocana jaide. ⁸ ¿Bue ñellena naimie dine jaidomoi? Mare iniroina jitadimiena cioñedomoi. Mare iniroina jitadinona omoi cioacaniadedi, illaicomini dine jaidomoi.

⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie lua jira. ¹⁰ Malaquías micori naimiena jaie cueba:

Jusiñamui raite: “Ero, o uicodo cue rafuena lllollena, damiena oretaiticue, comini comeciaina marecinona duiñollena”

cuega. Malaquías Juan Bautistana cuete. ¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi. ¹² Juan llofuia tainiamona ailluena comini cue rafuena ñnuamona, Jusiñamui dibeimo birui duere iacadimaci. ¹³ Nana Jusiñamui facaina lloraini micoriaidi cue billena jaie llotimaci. Moisés micori iena jia jaie llote. Juan facaise naie llogacino jai suide. ¹⁴ Jusiñamui facaina lloraima jaie llote: “Bie rafue sulle facaise Elías isoidimie biite”. Naimie rafuena ñnotomoidena, Juandi naimiena uñnotomoi. ¹⁵ Omoi jeforena jira, raise fueollena, cue lluomo cacarei.

¹⁶ Jesús nia llofue:

—Ero, omoína ñaiticue. Jifanote uruia isoidomoi. Uruia jifanoiacania, naimaci nabaiñiaina uaiduanona, raitimaci: ¹⁷ “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci. ¹⁸ Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uarico isoi ite” raitimaci. ¹⁹ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuena jia gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”. Iese raitomoi; iadedi Jusiñamuina ñnotinodi cue finoca rafuena marenana uñnotimaci.

*Dajerie nairai Jesúsna ñnoñena rafue
(Lc 10.13-15)*

²⁰ Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uñnotimaci; iadedi naimaci comeciái iuai meidoñedimaci. Ie jira naimacina ñaite. ²¹ Llote:

—Omoimona damerie Corazín railla illanomona bitomoi. Omoimona damerie Betsaida railla illanomona bitomoi. Cue rafuena omoi ñnoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciái eo isinotaillamona, naimaci comeciái iuai meidotimaci. Naimaci comeciái iuaina meiduna uñnotallena, ebinide ñiroina jitajanona, naimaci ifogaiimo jusefona jonetimaci. ²² Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. ²³ Omoimona damerie Capernaum railla illanomona bitomoi. Birui abina iedoiacadomoi; iadedi jairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciái iuai omoi meidoñena, monamo cue Moo diga jaca iñeitomoi; iadedi naimie omoína duere finollemona sunaitomoi. ²⁴ Jusiñamui uicomo nana comini ico ia, cue rafuena omoi ñnoñena jira, Sodoma railla nairai baifemo duere sefuitomoi —llote.

*Jesús ie Moo diga ñaia rafue
(Lc 10.21-22)*

²⁵⁻²⁶ Ie facaiseconi Jesús ie Moo diga ñaianaona raite:

—Ore Moo, oca mona Namadio. Oca enirue Namadio. Abina uiñotinona bie isoiderafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaacadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoina naimiena uiñotadicue. Ie muidona naimiena uiñotomoi. ²⁸ Omoi jeacinomona omoi jillobillena, duere jaidomoi. Omoi comeciai marena uri illena, cue dibeimo mai omoi i. ²⁹ Cue llucino anamo omoi i. Cue rinina jira, cuemona omoi fueo. Iemei omoi comeciai marena uri iite. ³⁰ Omoina cue canua jira, cue llucino anamo omoi iacanano ia, sefuinide. Omoina cue canolle jira, cue llucino finuana sefuinide.

12

*Sábadoruimo Jesús llofueoicaigano maijia rafue
(Mr 2.23-28; Lc 6.1-5)*

¹ Ie rafue lluamona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naído jaide. Ie llofueoicaigano aimetaitailla jira, trigona tijiano, golluano, guicana jaidimaci.

² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaita, ie nabaiñia: diga, Jusiñamui jofomo fo jaide. ⁴ Jusiñamuimo fecaca llomeniconuana, guitimaci. Jamai bue isoidino naie llomeniconuana guillana Jusiñamui rairuide. Dani Jusiñamui diga ñairaini iena guiredimaci. Ie nabaiñia: diga David micori iena guite; ia Jusiñamui naimacina duere finoñede. ⁵ Moisés micori llogacinomo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijiuidimaci. Jusiñamuina naimaci sedallena, ocainana fatimaci. Iraina bonodimaci. Iese maijiuidimaci; iadedi Jusiñamuimona jeacino finoñedimaci. Moisés micori jaie cufaguiaina raise cacañedomoi. Iena raise facañedomoi. ⁶ Omoimo nia lloiticue. Jusiñamui jofomo finoca rafue baifemo faiticue. ⁷ Jusiñamui facaina lloraima iena jaie cuela: “Cuemo rana omoi fecajana jitaidicue; ia omoi jitaillamona, jiaie cominina omoi duenaillacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodomoi” lloñedomoi. Cuemona cue llofueoicaigano jeacino finoñedimaci. ⁸ Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

*Jesúdi onollina idisarodimiena jillotaja rafue
(Mr 3.1-6; Lc 6.6-11)*

⁹ Bai jaillanona, nairai dine rillanona, naimaci ofiracommo Jesús fo jaide. ¹⁰ Nainommo onollina idisarodimie illanona, fariseuai dinena Jesúmmo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci. ¹¹ Jesús uai ote:

—Sábadoruimo omoimona damie ie toica llauda ifomo uaidena, nairuido arí iena ote. Naimiemo buena lloñedomoi. ¹² Ero, cominidi llauda bai femo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

¹³ Onollina idisarodimie mo lloite:

—O onolli mai oni ñuita.

Iena ñuitajamona jillode. ¹⁴ Iena cianona, fariseuai jino jaidimaci. Naimiena meinellena, coniniri siadotimaci.

Isaías micori jaie Jesúna ñaia rafue

¹⁵ Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cuenalocana jaiñeno —naimacimo lloite. Naimie mameci are sorilana jitaiñede. Fariseuai diga ie uai uaitaiacaiñede. ¹⁷ Iemona Isaías micori jaie ciegafuia; jai suide. Jusiñamui Isaías micorina jaie cuetataga:

¹⁸ Ero, cue fetoca mullaime ite.

Naimiedi cue isiruiгамie. Naimieri iobidicue.

Cue Joreño naimiemo cue fecajanona, judíuaiñedinomo naimacina cue jilloitacananal loite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiena inotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judíuaiñedinono naimiena inoitimaci.

Fariseuai Jesúna jeare ñaia rafue

(Mr 3.19-30; Lc 11.14-23; 12.10)

²² Jesús dine damieredi Janaba ie anamo illamiena atidimaci. Janaba anamo naimie illa jira, naie aticamedidi cioiñede. Jiai ñaiñede. Jesús Janabana oni oretajanona, naimiena jillotate. Naimie uaina botade. Ñaite. Ciode.

²³ Naiena ciodino rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jito mo ocuridicai.

²⁴ Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

²⁵ Naimiena naimaci enoillana Jesús uiñuanona, naimacimo lloite:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi llua isoi cue oretai, Janaba ie dibeimo itino diga jai nabairiñede. Iemona naimie comini danomo iñeitimaci. ²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena.

Iemei cue finoca rafuena uaitañeitomoi. ²⁸⁻²⁹ Ero, mairidimie ie jofomo ite rana nibai fiacadomoi. Iena fiillena, naimiena nano raise omoi maiga. Raise maia mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue llwana jai uñotomoi. ³⁰ Cue dibeimo iñedimie cuena enoide. Cue dibeimo cominina itatañedimiedi naie cominina cuena iñotañede. ³¹ Ie jira omoimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreñoña jeare ñaiacinona dotañeite. ³² “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreñoña omoi jeare ñaia, Jusiñamui iena birui feitañeite. Iena ico jaca feitañeite.

Jesúdi riará llisilla llua rafue
(Lc 6.43-45)

³³ Jesús llote:

—Llisillamona nie isoide riará illana uñoticaí. Amena ie llisilla llillamona, amena marena uñoga. Llillamona, amena marañenana jiaí uñoga. ³⁴ Ie isoide. Omoi ñaiamona omoína uñoticaí. Cuena omoi marañeno ñaia jira, omoi comeciaí iticinona uñoticaí. Omoi marañena jira, jaió nairaidomoi isidomoi. ³⁵ Mareuidimie mare ie comecimona ñaite; iadedi marañedimie marañede ie comecimona ñaite. ³⁶ Jamái ebena birui omoi ñaia, Jusiñamui uicomomo nana comini ico illa facaiseconi Jusiñamui iba oite. ³⁷ Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciaí uai meido.

Dajerie Jesús siño rafuena finuana jitailla rafue
(Mr 8.12; Lc 11.29-32)

³⁸ Naie facaiseconi dajerie Moisés micori llogacinona llofueraíni dajerie fariseuaí diga Jesúmo llotimaci:

—Maestro, o lloga uaina caí iñollena, siño rafuena o finuana cioacadicaí.

³⁹ Jesús uai ote:

—Marañedicinona finocabidomoi. Jusiñamui dibeimo iacañedomoi; iadedi siño rafuena cioacadomoi. Iena omoi jamái cioillena, siño rafuena finoñeiticue. Ero, Jonás micori jaié ite rafuena uñotomoi. Naiemo omoi comeciaina omoi faca. ⁴⁰ Darui amani aillue lliciaí jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue. ⁴¹ Lliciaí jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciaí icinuaina meidotimaci. Cue rafuena omoi cacajamona, omoi comeciaí icinuaina birui omoi meidoñena jira, Jusiñamui uicomomo ico nana comini illa facaiseconi: “Cue cominidomoi” omoína rañeiticue. Jonás micori baifemo birui uaidicue; iadedi cuena iñoñedomoi. ⁴² Ero, Saba railla nairai ie illaiño micoridi Salomón micori dine jaié aarena jaide. Naimie micori uñuacinona nairaiño micori cacareillena, aarena jaide. Salomón micori baifemo birui uaidicue; iadedi cuena iñoñedomoi. Omoi comeciaí icinuaina birui omoi meidoñena jira, Jusiñamui uicomomo nana comini ille facaiseconi nairaiño micori omoína ico ñaite: “Naimiedi siño rafue finuana ciodomoi. ¿Bue ñellena naimiena iñoñedomoi?” omoína ico ñaite.

Janaba anamo illamie rafue
(Lc 11.24-26)

⁴³ Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jiaie, jiaie illanona baillena, jofue iñenanomo jaide; iade baiñede. ⁴⁴ Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie iima comeci namanidena naimie baite. ⁴⁵ Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiai naimie baifemo maraiñedimaci. Iemona naie iima eo fodo jaide. Ie isoide birui ite maraiñede comini. Cue rafue naimaci iinoñenia, eo fodo jaitimaci.

Jesús ie comini
(Mr 3.31-35; Lc 8.19-21)

⁴⁶ Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide. ⁴⁷ Damie Jesúsno llote:

—O ei, o amatiai diga, jino ite. O diga ñaiacade.

⁴⁸ Naimiemo Jesús dinena jicanote:

—¿Bu cue ei? ¿Bu cue amatiai?

⁴⁹ Ie llofueoicaigano dine ie onolli ñuitajanona, raite:

—Jadi, cue ei, cue amatiai. ⁵⁰ Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

13

Trigo judaidimie rafue
(Mr 4.1-9; Lc 8.4-8)

¹ Nai jofomona nairui Jesús jaillanona, jorai fue dine jaide. ² Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci. ³ Ailluena rafue naimacimo llote:

—Jusiñamui omoina sedaacana omoi fueollena, bie rafuena lloiticue. Damie trigona judaiaide. ⁴ Naimie judaiaimona, naisomo janore iduai juide. Naimie bai jailla mei, silliniiai iena guisabitimaci. Ie jira sicofede. ⁵ Nofiem jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona, riara eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo cien diga llisillana ote. Jainamona sesenta diga llisillana ote. Jainamona treinta diga llisillana ote. ⁹ Omoi jeforena jira, raise fueollena, cue lluomo cacarei. Iena iino.

Jesús ie como lloga rafuena llofua rafue
(Mr 4.10-12; Lc 8.9-10)

¹⁰ Ie llofueoicaigano Jesúsno jicanuai biside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoina ie sedaacana rafuena jai uiñotade. Jiaie iena uiñofedomoi. Jiaie cominina iena nia uiñotañede. ¹² Jusiñamuina iñotimie Jusiñamui rafuena iñocana jaite. Jusiñamui naimiema uiñotaita; iadedi Jusiñamuina iñofedimie Jusiñamui rafuena uiñofecana jaite. ¹³ Ie jira bie isoidicinodo naimacimo lloticue. Cue siño finoca rafuena cioidimaci; iadedi

iena naimaci iñoñena jira, uiñoñoeno jaitimaci. Cue llofuiana jamai cacadimaci; iadedi naimaci iñoñena jira, raise cacaiñedimaci. Uiñoñedimaci.

¹⁴ Isaías micori naimacina jaie cueda rafue birui jai suide. Jaie raiter:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacacaiñedomoi.

Jai uisindomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoína cue jilloitai raillanona”.

Isaías micori Jusiñamuina iñoñedinona iese jaie cuete; ¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi iñua jira, ni ua omoi marena ille jillaci. ¹⁷ Jusiñamui facaina jaie lloraini micoriai omoi siñoña ciua rafuena jaie cioacadimaci; iadedi cioiñedimaci. Iena cacacacacimaci; ia cacaiñedimaci. Jusiñamuina jaie iñotino micoriai iena cioacadimaci; iadedi cioiñedimaci. Iena cacacacacimaci; iadedi cacaiñedimaci.

Jesúdi trigo judaidimienaa llua rafue

(Mr 4.13-20; Lc 8.11-15)

¹⁸ Jesús llote:

—Ero, omoína trigo iduaina judaidimie rafuena llofueiticue. ¹⁹ Dajerie iduai naisomo juide. Dajerie comini comeciai naie naiso isoidimaci.

Jusiñamui ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciamo cacaja uaina iñotañede.

²⁰ Jiaie iduai nofiemo juide. Dajerie comini comeciai naie nofiie isoidimaci. Jusiñamui uai nano naimaci cacaiña, iena caimare feiñotimaci. ²¹ Nofiemo riga iduai jainaonidedi raise sicoñede. Naie comini janore iñua jira, ie isoidimaci. Dallu nano iñotimaci. Jusiñamui uai muidona duere naimaci sefui, abido danomo uaidimaci. ²² Jiaie iduai eecuai illanomo juide. Naie iduai sicua mei, iena eecuai iñailla jira, raise lliñede. Dajerie comini comeciai naie illano isoidimaci. Jusiñamui uaina cacadimaci. Iñotimaci; iadedi naimaci comeciai jarire illamona, naimaci raruiña ebiruillamona, naie uai naimaci comeciamo itabiñede. Jusiñamui jitaile rafuena finocana jaiñedimaci. ²³ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaiaide. ²⁵ Naimie inia mei, ie enoidimie trigona eruaide raiticiaina bainino judaiaide. Iemei oni jaide. ²⁶ Trigo sicuamona lliside. Naie facaise naie raiticiai como raise bairedo. ²⁷ Judaidimie maijiraini iena ciuanona, naimiemo llote: “Mare iduai navui rito. ¿Niesedeta raiticiai eo sicode?” ²⁸ Uai ote: “Cuena enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaideo?” ²⁹ Uai ote: “Dama ite. Raiticiai omoi raitia, trigona jiaie jaitaitomoi. Dama iesede. ³⁰ Danomo sicoite. Ua facaiseconi cue

maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

Jesúdi mostaza ido llua rafue
(Mr 4.30-34; Lc 13.18-19)

³¹ Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riará sicode. ³² Mostaza ido eo janorede; iadedi sicua mei, eo aillue riará jaillamona, nainomo silliñiaí jicaiciaína finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofuia rafue
(Mr 4.33-34; Lc 13.20-21)

³³ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaita.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede. ³⁵ Jusiñamui facaina lloraíma micori iena jaita cuela:

Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaise mona jaca bu iena uiñoñede.

Birui naimaci uiñollena, iena lloiticue”.

Jesús trigo motomo riga raiticiaína llofuia rafue

³⁶ Comini jino faionocaida, Jesús ie risoilla jofomo abido jaita. Ie llofueoicaigano naimiemo llotimaci:

—Iena raise cai uiñollena, trigo motomo riga raiticiai rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloticue. ³⁸ Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini. ³⁹ Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisai. Trigodi cuena ñnotino. ⁴⁰ Jobaillena raiticiai ofitaja isoi, ico abido cue bia, daje isoi iite.

⁴¹ Cue jaienisaina oretaiticue, nana jeacinona finoraini diese ofitallena, cue illanomona iraimo dotallena. ⁴² Nainomo eo duere sefuillamona, eetitimaci. Subicaitimaci. ⁴³ Iemei jitoma lligaiñua isoi, Jusiñamui sedajanomo naimiema ñnotinodi marena bairenitimaci. Omoi jeforena jira, raise fueollena, cue llamo cacarei. Bie isoi omoi duere sefuñellena, cue lluaña ñno.

Jesúdi eniruemo isiruiga reica rana llofuia rafue

⁴⁴ Jesús llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai iñena jira, naie eniruena uainino ibaacadé, naie ra ollena. Ucube ollena, naie rari iobilla jira, nana naimiemo ite raruaiña fecaite. Iemei eniruena ibaite. Ie isoide. Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

Perlas railla rafue

⁴⁵ Jesús llote:

—Jusiñamui dibeimo comini jailla rafuena lloiticue. Iena omoi raise uñollena, perlas railla rana ibaraimana lloiticue. Eo mare perlas iballena jenocabide. ⁴⁶ Eo raifide perla naimie baia, naie perlana iballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

Jesús lloijina ñaia rafue

⁴⁷ Jesús llote:

—Jusiñamui dibeimo comini jailla rafuena lloiticue. Iena omoi raise uñollena, lloijina lloiticue. Joraimo lloijina comini faianona, naga isoide lliciana otimaci. ⁴⁸ Ari sonua mei, mare lliciai diese fetodimaci. Maraiñede lliciai diese oni faitimaci. ⁴⁹ Ie isoide. Ico abido cue bia, iese iite. Jusiñamuina ñnotinomona naimiena ñnoñedino diese oni fetollena, Jusiñamui jaienisai biitimaci. ⁵⁰ Temei iraimo Jusiñamuina ñnoñedinona dotaitimaci. Nainomo eo duere sefuillamona eeditimaci. Subicaitimaci.

Jesús llofueoicaiganodi mare rafuena jai uñua rafue

⁵¹ Ie llofueoicaiganomo Jesús jicanote:

—¿Nana cue lluana cacadomoi?

Uai otimaci:

—Jii, nana cacadicaí.

⁵² Naimacimo llote:

—Ie jofomo comini bia, naimacina raise nafuellena, naimacina caimare itatallena, jofu nama ie mare raruiaimona naimaci jitaila ra naimacimo fecade. Comini comeciaina lloticue. Jusiñamui facaina lloraini micoriai llogacinona uñotomoi. Cuemona Jusiñamui ie cominina sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide. ⁵⁴ Ie eniruemo rillanona, Nazaretmo ite ofiracomo llofue. Naiemona cominidi rajicaillamona raitimaci:

—¿Ñiese naimiedi eo abina uñote? ¿Ñiese siño rafuena naimiedi finode? Naimiedi jamai bue isoidimie. ⁵⁵ Naimie amederaima jito. Naimie eidi María. Naimie amatiaidi Jacobo, José, Simón, Judas. ⁵⁶ Naimie miriñotiaidi cai motomo jiai ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasifede. Jamaisite. Ie isoide. Cue cominidomoina jira, cue uaina ñnoñedomoi.

⁵⁸ Naimie uaina naimaci ñnoñena jira, Jesús ailluena siño rafue fiñoñede.

14*Juan Bautista micori fiodailla rafue*

(Mr 6.14-29; Lc 9.7-9)

¹ Naie facaiseconi Herodes railla gobernador Jesús mamecina cacade.

² Naimie ecimo maijuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Marañede rafuena finodio. Jusiñamui iena rairuide.

Herodes Juan micori lluaña gañenano, naimiena duere finode. Herodes Juan micorina gaitatajanona, cárcelmo jonetade. ⁵ Naimie micorina meinetacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite. ⁶ Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. ⁷ Ie jira naiñaiñomo llote:

—Nie isoide rana o jitaiadedi, omo iiticue. Illaima uai cuemo illa jira, iena ua finoiticue.

⁸ Naiñaiño ei naiñaiñomo lluanona, naiñaiño uai ote:

—Juan Bautista ifogi bandejamo jonecaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana llote. ¹⁰ Ie lloga uaina finollena, cárcelmo soldadona orede. Nainomo Juan micori ifogina jaitade. ¹¹ Bandejamo naimie micori ifogi jonecaida, soldado atiano, Herodías jisamo fecade. Ieconí ie eimo fecade. ¹² Iena fidiana, Juan micori llofueoicaigano naimie micori abina uaibitimaci. Iena naimaci raia mei, Jesús mo luaidimaci.

*Jesús cinco mil iñiñaina eaja rafue
(Mr 6.30-44; Lc 9.10-17; Jn 6.1-14)*

¹³ Juan micori meiniana Jesús fidiano, nainomona comini iñenanomo ie llofueoicaigano diga bodedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci.

¹⁴ Eniruemo Jesús sijia, ailluena cominina dafafide. Naimacina cianona, naimacina duenaillanona, duidinona jillotate. ¹⁵ Jitoma ana itemo, ie llofueoicaigano naimie dine luuaibitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶ Uai ote:

—Naimacina oretañeiticue. Naimacina omoi eca.

¹⁷ Uai onaisite:

—Dani caimo ite cinco llomenico, mena lliciai diga.

¹⁸ Uai ote:

—Iena cuemo ati. ¹⁹ Raitie illanomo comini ana raillesa llono —raite.

Naie cinco llomenicono naie mena lliciai diga uanona, monamo eruaillanona, Jusiñamui mo iobillacinona fecade. Iemei taillude. Ie llofueoicaiganomo fecade, cominina ecallena. ²⁰ Nana guillanona monidimaci. Monillamona, fiebide guillena iraidimaci. Doce cirigaaimo oruitatimaci. ²¹ Cinco mil iñiñai diese guitimaci. Naimaci aitiai jiai guitimaci. Naimaci uruia jiai guitimaci.

*Jesús jinui emododo macarilla rafue
(Mr 6.45-52; Jn 6.16-21)*

²² Guilla mei, botedo ie llofueoicaigano ruica dine jaillena lloste. Naie facaiseconi naimie cominina nia facadote. ²³ Cominina facadua mei, ane-duaimo dane jaide, Jusiñamui diga ñaillena. Jitibicaidemo nainomo dama ite. ²⁴ Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. ²⁵ Nia monañedemo, jinui emododo naimaci dine Jesús bite. ²⁶ Naimiena naimaci cianona, jacinailamona, raitimaci:

—¿Bu joreño caimo billana ciodica? —Jacinailamona cuiriidimaci. ²⁷ Naie dacaiño Jesús naimacimo lloste:

—Omoi joreñonicaiñeno. Cuesa. Jaciruiñeno.

²⁸ Pedro uai ote:

—Uanai cai Namadio. O dine cue billesa cuemo llono.

²⁹ Jesús uai ote:

—Cue dine bi. —Ie jira botemona jinui emodo Jesús dine Pedro macarite; ³⁰ iadedi aifi billana naimie cianona, jacinaiete. Jinuimo anabaiacade. Ado cuiroide:

—Nama, cuena cano.

³¹ Jesús ie onolli oni ñuitajanona, naimiena llinuanona, raite:

—Eo janore cue uaina ñnotio. ¿Bue ñellena eo ñnoñedio? Cuena ñnotiodena, jinui emododo cue dine niadedi ridio.

³² Botemo a iaiaiaia jaillamona, ie facaise aifi llúcaide. ³³ Ie jira botemo itino Jesús mo iobillacinona fecadimaci.

—Odi ua Jusiñamui Jitodio —raitimaci.

*Jesúdi duidinona Genesaret eniruemo jillotaja rafue
(Mr 6.53-56)*

³⁴ Ruica dine jaillanona, Genesaret railla eniruemo ridimaci. ³⁵ Jesúsna nainomo itino uifnuamona, naimie dine duidinona atillena, nana nairaimo jiaie cominina oredimaci. ³⁶ Naimie dine billanona, daní ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloiticaí” raillamo comeciaina facadimaci. Nana jutadate diese jillodimaci.

15

*Jesúdi comini comeciaina ñaia rafue
(Mr 7.1-23)*

¹ Jerusalémona fariseuai comini Jesús dine bitimaci. Moisés micori llogacinona llofueraíni jiaí bitimaci. ² Naimiemo jicanotimaci:

—¿Bue ñellena o llofueoicaigano cai einamací rafuedo jaiñedimaci? Naimaci guacania, naimaci onolli cai einamací llua isoi raise jocoñedimaci. Ie jira cai abimo jeacino finodomoí.

³ Jesús uai ote:

—¿Bue ñellena nana Jusiñamui llogacinodo jaiñedomoí? Omoi einamací llogacinodo jaidomoí; iadedi nana Jusiñamui llogacinodo raise jaiñedomoí.

⁴ Jusiñamui jaie lloste: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ⁵ Iese Jusiñamui lloste; iadedi omoi einamací llotimaci: “Jusiñamuimo cai ucubena cai fecajamona, cai moona, cai eina jai canonidicaí”. ⁶ Iese omoi finocabilla jira, omoi einamací llogacinodo omoi jaillamona, Jusiñamui uaina jamaidomoí. ⁷ Mareuidinona abi

caitauidinodomoí. Isaías micorí omoína jaie raise llote. Naimiedi Jusiñamui luana cuete:

⁸ Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci. “Ona sedadicaí” llotimaci.

Jamai ñaitimaci. Naimaci comeciaí cue dibeimo raise iñede.

⁹ Cue uai itena, jamai comini llucinaona naimaci llofuecabilla jira, taínona cuena sedadimaci.

¹⁰ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uifollena, cue llua mo cacarei. ¹¹ Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoi mo jeacino illa jira, Jusiñamuina nabaiñedomoi. Omoi comeciaí jearena jira, jeacinona finocabidomoi.

¹² Te llofueoicaigano naimiemo lluaibitimaci:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite. ¹⁴ Naimacina fainonocai. Uanaicinona naimaci uifloñena jira, uisnidino isoidimaci. Jaiimiena uisnidimie ifoia, dafomo uaidiaimai. Te isoide. Uanaicinona fariseuai uifloñena jira, uanaicinona llofuenidimaci. Uanaicinodo jaiñedimaci. Ja muidomo faifitimaci.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Niese cue lluaña jai nia cacaiñedomoi? ¹⁷ Níe isoide ra guitomoína, omoi jebemo jaide. Te mei omoi abiaimona jino bite; ¹⁸ iadedi omoi comeciaino iticinomona jearedena ñaitomoi. Omoi comeciaí jearena jira, jearede rafuena finocabidomoi. ¹⁹ Omoi comeciaino jearena jira, jeare comeciaina facabidomoi. Comena meinecabitomoi. Omoi añede riño diga icabitomoi. Omoi iniñede iima diga icabitomoi. Firicabitomoi. Taínona llogiricabitomoi. Jiaie comini joreñona jeare ñaicabitomoi. ²⁰ Bie isoidicinuai omoi comeciaino illa jira, jearede rafuena finocabidomoi; iadedi omoi einamaci llua isoi, omoi onolli jocoñenamona jeacino comuiñede.

Jesúdi judío iñaiñoñediñaiñoña jillotaja rafue

(Mr 7.24-30)

²¹ Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jai jaide. ²² Te facaiseconi naie eniruemona judiñediñaiñoñodi billanona, raite:

—Maestro, David micorí jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

²³ Jesús uai oñede. Te jira ie llofueoicaigano naimie dine billanona, duere llote:

—Naiñaiñoña abido ie jofomo oreta. Caimo duere jicanuaibitesa.

²⁴ Jesús uai ote:

—Faifcana jaillana naimaci jai jailla jira, dani cai judiuaí cominimo cue Moo cuena oretate. Naimiedi judiñediñaiñoñoño cuena oretañede.

²⁵ Te facaise naimie dine naiñaiño billanona, naimiemo iobillacinona fecalena, cañici ifodo ana rainada raite:

—Maestro, cuena cano.

²⁶ Judíuauñedinona naimie canoñenana naiñaiño uifñollena, naiñaiño Jeshús llote:

—Uruiai guillamona jiconiaina ecadicaidena, marañede.

²⁷ Naiñaiño dinena uai ote:

—Jii, maestro; iadedi jiconiaini imaci nama guillamona fiebide guillamona guitimaci. —Iese llote; ia jiaie rafuemo comecina facade. Uruiaina llote; iadedi judíuauimo comecina facade. Jiconiaina llote; ia judíuauñedinomo jiaie comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁸ Jeshús uai ote:

—Cue uaina o iinua jira, o jitailla rafuena finoiticue. —Ieconí naiñaiño jisa jillode. Janaba naiñaiñomona oni jaide.

Jeshús ailluena duidinona jillotaja rafue

²⁹ Nainomona Jeshús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei,

³⁰ ailluena comini naimie dine bitimaci. Ailluena duidinona atidimaci. Ñujañujacada macaritinona, onollina idisaruaidinona, uisnidinona, uainidinona atidimaci. Diga duidinona naimie dine atidimaci. Iemei naimacina jillotate.

³¹ Ailli uainidino jai ñaiana cacajamona, ailli onollina idisaruaidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisnidino jai ciuana ciuamona, nainomo ite comini eo rajicaidimaci. Cai Jusñamuimo iobillacinona fecadimaci.

Jeshúdi cuatro mil iñiaina ecaja rafue

(Mr 8.1-10)

³² Jeshús ie llofueoicaigano naimie dine uaiduanora, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci bai railanona. Naimacina cue duenailla jira, naimacina canoacadicue.

³³ Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

³⁴ Jeshús jicanote:

—¿Niga llomenico omoimo ite?

Uai otimaci:

—Siete. Janorede llicisiriai caimo jiaie ite.

³⁵ Comini ana raillena Jeshús llote. ³⁶ Naie llomenico llicisiriai diga uanona, Jusñamuimo iobillacino fecade. Taillanona, ie llofueoicaiganomo fecade, naie cominimo fecallena. ³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ³⁸ Nainomo cuatro mil iñiái guitimaci. Naimaci ainiai jiaie guitimaci. Naimaci uruai jiaie guitimaci. ³⁹ Iemei cominina naimaci jofuemo orede. Naimacina oretaja mei, botedo Magdala railla eniruemo Jeshús jaide.

16

Fariseuai comini Jeshúmo siño rafuena finuana jicanuano billa rafue

(Mr 8.11-13; Lc 12.54-56)

¹ Dajerie fariseuai comini jiaie bitimaci. Naimiena facacillena, dajerie saduceuai comini jiaie bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uifñoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

² Jesús uai ote:

—Jitoma sojicaidem, mona jiairenia, raitomoi: “Ico are maremonanite”.

³ Jiai raitomoi: “Jitiramo mona jiairenia, ja noci deite”. Monamo omoi eruaillamona, marena monaillana uifnotomoi; iadedi birui cue finoca rafuena raise uifnoiacaifnedomoi. Omoi motomo birui suide rafuena raise cacaiñedomoi. Abina uifnotinona abi caitadomoi. ⁴ Jeacinona finocabidomoi. Jusiñamui dibeimo raise iacaifnedomoi. Siño rafuena finoñeiticue. Jonás micorimo jaie suide rafuena uifnotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie luu mei, naimacimona Jesús ie llofueoicaigano diga oni jaide.

Jesús siritate rana llofuia rafue
(Mr 8.14-21)

⁵ Ruica dne naimaci rillanona, ie llofueoicaigano llomeniconna feillana uibiñotimaci. ⁶ Iena naimie uifnuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiaicinomona abi rairuillena ñaite. ⁷ Jesús iese luu jira, iena naimaci raise cacaiñena jira, daní coniniri siadotimaci:

—Llomeniconna cai atiñena jira, caimo iese llote.

⁸ Naimaci siaduana Jesús uifnuu jira, naimie llua naimaci nia raise cacaiñena jira, naimacimo llote:

—Cue uaina nia raise ifnoñedomoi. Omoína canoredicue. ¿Bue ñellena daní omoi llomenico ifnenana siadotomoi? ⁹ ¿Ñiese ifnoñedomoi? ¿Ñiese cue navui siño finoca rafuemo comeciaina facañedomoi? Navui cinco mil ifñiai cinco diganicodemoi guitimaci. Monillamona, guigamona fiebillamona, doce cirigaiaimo iraidomoi. ¹⁰ Jiaicaiño cuatro mil ifñiai siete diganicodemona guitimaci. Monillamona guigamona fiebillamona, siete cirigaiaimo iraidomoi. ¹¹ Omoína cue ecallena, ¿ñiese cuena birui ifnoñedomoi? Llomeniconna ailli ñaifñedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

¹² Ie facaie naimie llua jai cacadimaci. Llomenico siritate rana naimie ñaifñede; iadedi fariseuai llofuiaicinomona naimaci abina rairuillena ñaite. Saduceuai llofuiaicinomona naimaci abina rairuillena ñaite.

Pedro Jesúsna llua rafue
(Mr 8.27-30; Lc 9.18-21)

¹³ Cesarea Filipo railla eniruemo Jesús jaidemo, ie llofueoicaiganomo jicanote:

—¿Ñiese jiaie comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraima micoridio”.

¹⁵ Jesús dane jicanote:

—¿Ñiese omoi cuena raitomoi?

¹⁶ Pedro uai ote:

—Odi cai jilloitaraimadio. Cristodio. Jusiñamui facaina lloraini micoriai o billena jaie llotimaci. Cai cajede Jusiñamui Jitodio.

¹⁷ Jesús dinena uai ote:

—Simón Pedro, Jonás jitodio. Marena llotio. Comini ona iena uifnotañede; iadedi cue Moo Jusiñamui ona iena uifnotade. ¹⁸ Pedro, o comecina uifnoticue. Cuena como o lloga uaina meidoñeitio. Bie rafuena jiaie cominimo o luamona, jiai inoitimaci. Cuena inuamona, cue cominina jaitimaci. Cue dibeimo inedino iena itatanidimaci. ¹⁹ Ailluena cominimo Jusiñamui ie cominina jailla rafuena nano lloramana jaitio. O llucinodo jaitino cue cominina jaitimaci. O llucinodo jaiñeitino cue cominina jaiñeitimaci

²⁰ Iena llua mei, ie llofueoicaiganona rairuide:

—Cue Cristonana bumo nia lloñeno.

Jesús ie fiodaillena llofua rafue

(Mr 8.31–9.1; Lc 9.22–27)

²¹ Naie facaiseмона ie llofueoicaiganomo Jerusalémo naimie jaillena marefodo llotte:

—Nainomo cai judíuai illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloiticue.

²² Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

²³ Jesús jinafo dine naimiemo erodate. Raite:

—Cuemona oni jai. Iese ñañeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

²⁴ Ie llofueoicaiganomo llotte:

—Cue cominina bu jaiacania, ie jitaile rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite. ²⁵ Duere sefuillana jaciruillamona cue cominina bu jaiacañenia, ja muidomo faifite; iadedi duere sefuillana jaciruiñenamona cue cominina bu jaja, jaca faifñeite. ²⁶ Cue cominina bu jaiñenia, nibai eo duere sefuifñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñeno faifite. ²⁷ Cue jaienisa diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue comininedinona duere finoiticue. ²⁸ Uanaicinona omoimo lloiticue. Omoimona dajerie nia fiodañeitomoimo, illamana cue bairellena cioitomo.

17

Jesús abi meidocaila rafue

(Mr 9.2–13; Lc 9.28–36)

¹ Seis digarui illanona, anedumo comini inenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uifñede. ² Nainomo rilla mei, naimaci uicomo naimie abi meidoaide. Jitoma isoi naimie uieco bairecaide. Naimie iniroi naie dacaño eo userecaide. ³ Naie facaise naimacimo Moisés micori joreño. Elías diga bairede. Elíadi Jusiñamui facaina jai lloramana. Jesús diga ñañiaimaiai.

⁴ Jesúmo Pedro llotte:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llotte:

—Bimie cue isruiga Jito. Naimieri iobidicue. Naimie lluomo cacareillanona, iena ino —llotte. ⁶ Jesús llofueoicaigana iena cacajanona, eo

jaciruillanona, naimaci uieco dinena ana bitadatimaci. ⁷ Jesús naimaci dine billano, naimacina jetajanona, raite:

—Mai jaciruiñeno naidacai.

⁸ Naimaci erorillamona, dama Jesúna ciodimaci. ⁹ Anedumona bitimacimo, naimacimo Jesús llote:

—Omoí ailli cúa rafuena bumó lloñeno, cue fiodaillamona cue jillua dinori.

¹⁰ Naimiemo llotimaci:

—Moisés micori llogacinona llofueraíni birui raicabitimaci: “Elías raillamie dane biite. Ie mei cai jilloitarama biite” raitimaci. Jusiñamuimona o billana inoticaí. Odi cai jilloitaramana inoticaí. Odi cai jilloitaramadiomo, ¿bue ñelli lese raitimaci?

¹¹ Uai ote:

—Raise inotomoi. Elías isoidimie jai bite, nana Jusiñamui jitailla rafue raise lollena. Jusiñamui díbeimo naimaci illena, comíni imaci comeciaí meiduana llote. ¹² Ero, naimie jai bite; iadedí bie comíni naimiena raise uiñoñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, iimana cue jaillena; iadedí duere sefuiticue.

¹³ Ie muidona Jesús llofueoicaigano naimiedi Juan Bautista micorína ñaiana jai uiñotimaci.

Jesúdi Janaba anamo itimiena jillotaja rafue
(Mr 9.14-29; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comíni itimacimo ride. Jesús dine damie billanona, naimiena raise uaiduanona, cañicí ifodo rainadacaidá raite:

¹⁵ —Maestro, cue jítóna duenai. Janaba anamo naimie ite. Iemona naillicabide. Duere sefuide. Uai-uacabide. Jiaicaiñodedí iraimo uailanona, uside. Jinuimo jiaí uailanona, niadedí corobaite. ¹⁶ Naimiena jilloitallena o llofueoicaigano dine naimiena atidicue; iadedí naimiena jillotanidimaci.

¹⁷ Iena cacajanona, Jesús ie llofueoicaiganomo llote:

—Cue uai siñonana nia inoñedomoi. Cue mare rafuedo nia raise jiaicaiñedomoi. Omoí diga are iticue. Raise omoí inollena, ¿nie dinori omoí diga iiticue?

Naie duidimie moomo llote:

—O jito cue dine mai ati.

¹⁸ Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemoná Janaba oní jaide. Ieconí naie urue jillode.

¹⁹ Ie mei ie llofueoicaigano Jesúsno anado jicanotimaci:

—¿Bue ñellena Janabana oní oretanidicaí?

²⁰ Uai ote:

—Raise nia omoí inoñena jira, uanaicinona omoimo lloiticue. Janaba oní oretallena, cue uai navuí omoimo iticue. Biruí raise cuena omoí inoñenia, bie Janaba oní oretanidomoi. Jusiñamuina eo janore inotomoidena, diga rana finodomoi. “Oní baí jai” bie anedumo llotomoidena, omoína naimie canuamona, bie anedu oní lliái baí jaite. Jusiñamuina omoí inoia, naga rana finoredomoi. ²¹ Jusiñamuimo omoí comeciána facallena omoí guiñenamona, Jusiñamui diga omoí ñaíamona, bie isoide Janabana oní oretaredomoi.

Jesús ie fiodaillena dane llofuia rafue
(Mr 9.30-32; Lc 9.43-45)

²² Galileamo ie llofueoicaigano diga danomo ítemo, Jesús naimacimo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. ²³ Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

Jesúmo Jusiñamui jofo facaina damie ibataja rafue

²⁴ Capernaumo naimaci rilla mei, Jusiñamui jofo ucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵ Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitoniamona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitoniamona ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; ²⁷ iadedi Jusiñamui jofo ucube orainina coco icinllesca, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

18

Jesús ie llofueoicaigano moto imiena ille rafue

(Mr 9.33-37; Lc 9.46-48)

¹ Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imiena ille?

² Iena cacajanona, Jesús daje urue uaiduanona, naimaci motomo jonete.

³ Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi faimonocaiñenia, bie urue isoi omoi moto imieñedimiena illanona, Jusiñamui sedajanomo ifeitomoi. Cue cominina omoi ia, bie urue isoi iitomoi.

⁴ Bie urue isoi abi iedoñedimiedi Jusiñamui ie cominina sedajanomo imie moto naimiena ille. ⁵ Bie isoidimie cuemo duillamona, naimiena feiñotimiedi cuena jai feiñote; ⁶ iadedi cuena inotimiena jeacinona finotaiacadimie iena finoñellena, jeacinona finotaiacadimie cimaimo aillue nofici maianona joraimo corobaillena, naimiena dotacadena, cuemona mare.

Jesúdi jeacinona finoñenana llofuia rafue

(Mr 9.42-48; Lc 17.1-2)

⁷ Jesús llote:

—Ramo faitino duere sefuilleca. Diga ramo omoi faicana uitinomo riit-omoi; iadedi Jusiñamui omoi ramo faitimiena duere finoite. ⁸⁻⁹ Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona

omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jecino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jecino finoñeno.

Jesúdi naimiena ñnotinomona damie faifillana jitaiñena rafue

(Lc 15.3-7)

¹⁰ Jesús llote:

—Urue isoi omoi illena como lloticue. Iena dane lloticue. Cue Moo naimacina uiñua jira, bie urue isoidinona jamañocaiñeno. Monamo cue Moo ecimo naimaci jaienisai jaca ite, naimacina canollena. ¹¹ Jusiñamuimona cue billanona, naimiena ñnoñedinona naimaci jecinomona jilloitallena biticue. ¹² Ero, omoimo iena jiaie rafuedo lloticue. Damie mo cien diga toica llauda ite. Naiemona daje feiraite. Iena faifñellena, jiaie llaudaiaina faionocaida, iena jenuaite. ¹³ Iena baillanona, ieri iobite. Baillari oni jaiñedinori bai femo iobite. ¹⁴ Ie isoide. Jusiñamui naimiena ñnotinomona damie faifillana jitaiñede. Ie jira naimacina jecinona finotañeno.

Jesús omoi ecimo itimie omoina jeare fñuana llofua rafue

(Lc 17.3)

¹⁵ Jesús nia llote:

—O ecimo itimie ona jeare finoia, naimie dine iena lluai. Daímaiaí iena omico llono. O uai naimie fairioia, naimie o díbeimo jai iite. ¹⁶ O uai naimie fairioñenia, jiaí menamiena uiño, o llamo iaimaiaí cacareillesa. ¹⁷ O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina ññoñedimiena omoi nabaiñena isoi, Moisés llogacinodo raise jaiñedinomo omoi nabaiñena isoi, naimiena nabaiñeno. Omoi ofiracomo naimiena feiñoñeno. ¹⁸ Iese omoi finoia, omoi comeciaí daje isoi lloillamona, Jusiñamuimona mare.

¹⁹ Omoimo nia lloticue. Daje isoi comecina cue Moo Jusiñamuimo jicallena menamaiaí facajamona, cue Moomo iaimaiaí jñanona, cue Moo iaimaiaí jitaile rafuena finoite. ²⁰ Menamie cue díbeimo illamona, damie amani cue díbeimo illamona, naimaci motomo iticue.

²¹ Pedro naimie mo jicanuaíbite:

—Nama, cue ecimo itimie cuena jeare finoia, ¿niga icaiño íbana cue oñeno iena feítaiticue? Nibai siete digacaiño.

²² Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloticue.

²³⁻²⁴ Jusiñamui ie díbeimo itinona iese sedaite: Daje nairaí illaimadi ie maijiraíma uaidote, naimaci cuentas íballena. Damie eo debede. Díez mil ucubena debede. ²⁵ Naimie ucube íñena jira, naie illaimadi ie cuenta íballena, naimie ai, ie uruaí diga, nana ie raruai diga, fecallena llote. ²⁶ Iena cacajano, ie illaima uicomo caíñici ifodo raita duere jicade: “Nama, dama ite. Fecuisse omo íbaiticue”. ²⁷ Naimie duenaillamona, naie illaima llote: “Íbatañeíticue. Cuemo jai debeñedio. Mai jai”. ²⁸ Ie mei naimie jaide. Bai jaillanona, jiaie maijiraíma diga dafafide. Jai debeñedimie mo janore debede. Cien ucubena debede. Jai debeñedimie dinena ie cimaíona llinuana llote: “O debia cuemo mai íba”. ²⁹ Ie jira debeñedimie caíñici ifodo ana rainadacaida, duere jicade: “Ucube cuemo íñede; íadedi cuena duenai. Fecuisse omo íbaiticue”. ³⁰ Uai ote: “Ja raire jitaídícue”. Naimiena duenaíñena jira, cárcelmo naimiena jonetade, ie cuenta íballe dinori. ³¹ Naimie nabaiñiaí iena fidianona, sunaitimaci. Ie

jira naimaci illaïma ðine nana naie rafuena lluidimaci. ³² Naie illaïmadi nano debedimena abido uaiduano, naimiemo llote: “Maraiñedio. Navui o cuentana ibatañedicue, cuemo o duere jicanua jira. ³³ ¿Bue ñe o nabaina duenañedio, ona cue duenailla isoi?” ³⁴ Iciñillamona, naie illaïma naimiena cárcelmo jonetade, nainomo duere sefuïllena, nana ie cuenta ðballe ðinori. ³⁵ Ie isoide. Cue Moo Jusiñamui omoïna duere finoite, omoï comeciã jitaïlla-mona omoï ecimo itimie ie maraiñede finoca rafuena omoï feitañenia —llote.

19

Jesús ïma ie aina dotaja rafuena llofua rafue (Mr 10.1-12; Lc 16.18)

¹ Ie llofueoicaigano ðiga Galileamona jaïllanona, Jordán railla ille ruica ðibeïmo Judeamo Jesús jaide. ² Aïlluena comini naimiena racaðimaci Nain-omo ðuidinona jïllotate. ³ Naimiena facacïllena, dajerie fariseuai naimie ðine bitimaci. Rafuena jicanoïacaðimaci. Naimaci uai naimie raise oñenia, naimiena duere finoacaðimaci. Jicanotimaci:

—¿ïma ie aina dotajana rairuidio? ¿Ñie isoide rafue muidona ðamie ie aina dotarede?

⁴ Jesús ðinena uai ote:

—Moisés mïcori jaie cuete: “Enirue finua facaiseconi Jesiñamuidi come iaïmaïaina finode. ðimana finode. Riñona jiaï finode”. ⁵ Ie jira Jusiñamuidi jaie llote: “Ie aï ðiga illena, ïma ie moona faïnonocaite. Ie eina jiaï faïnonocaite. Ie aï ðiga illamona, menade comedi ðaamiena jai jaide” llote. ⁶ Menade come jai ðamiena jai ite. Jusiñamui iese iaïmaïaina itataja jira, ïma ie aina dotañellesa. Riño ie inina dotañellesa.

⁷ Dane jicanotimaci:

—¿Bue ñe Moisés mïcori cuete: “ïma ie aina dotaacania, dotalle rabena nano cueite. Ie mei naiñaiñona dotaite”?

⁸ Jesús uai ote:

—Jusiñamui uaina raise omoï inoñena jira, Moisés mïcori ïma ie aina dotajana rairuiñede; iadedi nano dofoconi iese iñede. ⁹ Jiaie riño ðiga naimie illena, ie aina bu dotaia, jiaie ïma ðiga naiñaiño iñenia, naimiedi jeacinona jai finode. Ie aina dotajana rairuidicue.

¹⁰ Naimiemo ie llofueoicaigano ðinena llotimaci:

—Iese ia, cai jitaïllamona aina jamaï cai dotanina jira, ðamamei ainidicai.

¹¹ Naimacïmo Jesús llote:

—Nana comini omoï como llucïnodo jainidimaci. Dani Jusiñamuina jitaïðino iedo jairedimaci. ¹² Dajerie naimaci jeiciamona aireiacaiñedimaci. Dajerie naimaci abina ðiamona aireiacaiñedimaci. Dajerie Jusiñamuina eo sedaacanano aireiacaiñedimaci.

Jesúdi naimie ðine uruiaï billana jitaïlla rafue (Mr 10.13-16; Lc 18.15-17)

¹³ Jesús ðine comini naimaci jesanidena atisite. Ie onolli naimacïmo naimie joniamona, naimaci facaina naimie Moo ðiga naimie ñaïllena atisite. “Naimcana raise cano” ie Moomo lloïllena jitaïðimaci. Ie llofueoicaigano iena rairuidimaci; ¹⁴ iadedi Jesús raite:

—Uruiaï cue ðine billesa. Naimacina rairuiñeno. Cuenã bie isoide inotïnodi Jusiñamui ie cominina sedajanomo jainaïaidimaci.

¹⁵ Ie jira ie onolli naimacïmo jonete. Naimie facaina Jusiñamui ðiga ñaite, naimaci marena illena. Ie mei ie llofueoicaigano ðiga naimie oni jaide.

Ucuberedimie Jesús diga ñaia rafue

(Mr 10.17-31; Lc 18.18-30)

¹⁶ Jesús oni jaillanona, conirue Jesús ñine bite. Jicanote:

—Maestro, Jusiñamui diga cue jaca illena, ¿ñie isoide mare rafuena finoiticue?

¹⁷ Jesús ñinena uai ote:

—¿Bue ñe cuemo mare rafuena finuana jicantio? Dama ñamie mareñie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina ñinocana jai.

¹⁸ Uai ote:

—¿Ñie llogacinuaina ñinotitue?

Jesús ñinena uai ote:

—Comena meineño. O añede riño diga iño. Fiiño. Jiaimena o llogidoia, tainona lloño. ¹⁹ O moo uaina ñno. O ei uaina ñno. O abina o isiruilla isoi, nana cominina isirui.

²⁰ Naie conirue uai ote:

—Nana iena jai ñnotitue. ¿Ñie isoide rafuena ñia finoiticue?

²¹ Jesús ñinena uai ote:

—Jusiñamui jitaillacinodo o jaiacania, o raise marebicaiaania, omo ite raruaiña feca. Naie ucubena dueredinomo feca. Cueno o ñnuamona, monamo ico jaca iitio. Cue llofuegamiña o illena, mai cue diga bi.

²² Iena ñaimie cacajano, sunaite. Naimiemo eo ailluena ra illa jira, iena fecaacaiñede. ²³ Jesús ie llofueoicaiganomo llote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite. ²⁴ Iena ñia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinocaidi Jusiñamui cominina jaitica?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶ Naimacimo eruailanona, Jesús raite:

—Nana comini ñani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana fañonocaida, o diga jaicabidicai. ¿Ñiese Jusiñamuimona ibana feiñoitica?

²⁸ Jesús ñinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, ñainomo omoi illanuai jiai iite, ñainomona omoi judiuaí doce ñairaiana omoi sedallena. ²⁹ Cueno ñaimie isiruillamona, ie jofona bu fañonocaia, ie amataina bu fañonocaia, ie miriñuaina bu fañonocaia, ie moona bu fañonocaia, ie eina bu fañonocaia, ie uruiana bu fañonocaia, ie eniruena bu fañonocaia, Jusiñamuimona ailluena ibana feiñoite. Monamo ico caimare iocire jaca iite. Ñainomo benomo baifemo iocire caimare iite. ³⁰ Jamai bue isoidomoi. Omoimona jiaño jamai bue isoñedimaci; ia ñaimie cominina ñaimaci jaillamona, Jusiñamuimona ñaimaci diga daje isoidomoi. Ñaimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uifollena, bie rafuedo iena lloiticue. Jitiramo daje patrón ie illimo majillena, majiuidinona jenuaide. ² Dajeriena baillanona, “Omoimo daberie ibaiticue” llote. “Jee” raitimaci. Ieconí ie illimo majillena, naimacina orede. ³ Jitoma nia oni daidemo, mercadomo naimie jiaínona ciode. Jamai itimaci. ⁴ Te jira naimacimo llote: “Cue illimo majijai. Raise ibaiticue” llote. ⁵ Te mei jaidimaci. Jitoma naidai ia, jiaínona ciuanona, naimacimo majillena llote. Jitoma oni caidemo, jiaínona ciuanona, naimacimo majillena jiai llote. ⁶ Jitoma jasici muido itemo, jiaínona ciuanona, jicanote: “¿Bue ñellena namonana jamai itomoi?” ⁷ Uai otimaci: “Jaca caimo majijille rana budi lloñede”. Te jira naimacimo llote: “Mai. Cue illimo majijai” llote. ⁸ Jitoma edaciidemo, naie patrón ie mullaímamo llote: “Majirainina uaido. Jinafona majiiaidinona raire nano iba. Te mei jitiramo majiiaidinona jinafo iba” llote. ⁹ Te jira jinafona majiiaidinona nano ibade. Dabe ibade. ¹⁰ “Naimaci baifemo feiñotica?” raillamo jitiramo majiiaidino comeciaina facadimaci; iadedi iese feiñofedimaci. Nana daberie feiñotimaci. ¹¹ Te jira naie patrón joreñona jeare ñaitimaci: ¹² “Jinafona majiiaidino dallu majidimaci. Ecasilla facaise majiñfedimaci; iadedi namonana majidicai. Dani cai ibaja isoi ibadio” ñaitimaci. ¹³ Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. ¹⁴ O ucubena jai o feiñua jira, mai jai. Cue jitailla jira, da o ibaja isoi dallu majiiaidinona ibadicue. ¹⁵ Cue ucubena jira, cue jitailla isoi cue ibaia, ¿niese cuena jeare ñaitomoi? Jiaínona cue duenaillanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uifollena, bie rafue jai lloticue. ¹⁶ Jamai bue isoidomoi. Omoimona jiaíno jamai bue isoiñfedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

Jesúdi ie fiodaillena dane llua rafue

(Mr 10.32-34; Lc 18.31-34)

¹⁷ Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite. ¹⁸ Raite:

—Ero, Jerusalémo jai jaidicai. Monamona billanona, iimana jaidicue; iadedi omoi illaicomini cuena gaitaitimaci. Gaitaja mei, cue meinelena lloitimaci. ¹⁹ Judíuaiñedino illaicominimo cuena fecaitimaci. Cueri jifanoitimaci. Cuena faitimaci. Te mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

Jesús dine Jacobo Juan iaímaiai ei billa rafue

(Mr 10.35-45)

²⁰ Naie facaise Jesús dine Jacobo, Juan iaímaiai ei diga, bitiaímaiai. Iaímaiai moodi Zebedeo. Jesús dine iaímaiai ei rillanona, naimiena raise uaidollena, caíñici ifodo ana rainadacaida llote:

—Omo daje rafue jicanoiacadicue.

²¹ Naiñaiño mo Jesús dinena jicanote:

—¿Bue ñiaíbitio?

Naiñaiño uai ote:

—Illaimana o jailla mei, cue jito iaímaiai o ecimo illana o llua jitaicue. Damie o nabeimo. Jiaímie o jarifebeimo. —Jiaíno baifemo iaímaiai illena, naiñaiño iese llote. ²² Naimacimo eruaillanona, Jesús dinena uai ote:

—O jitaillacinona raise uifñoñedio. Cue duere sefuiticue.

Naiñaiño jito iaiaiaimo jicanote:

—¿Ie isoi duere sefuicadomico?

Uai otiaiaiaia:

—Jii.

²³ Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, naino-
mo iitino iena.

²⁴ Iena jiaie llofueoicaigano cacajano, naie iaiaiaiairi iciritimaci. ²⁵ Jesús nana naimacina uaiduanona, raite:

—Nana illacomini naimaci anamo itinona ocuicabidimaci; ²⁶ iadedi omoi dine iese ifena. Omoimona bu imiena iacania, omoi mullaimana naimie jaisoillasa. ²⁷ Omoimona bu imiena iacania, omoina naimie canocana jaisoillasa. ²⁸ Cuemona fueo. Biñedicue cominina cue ocuillena; iadedi cominina canuaibidicue. Cue jitailla jira, nana comini facaina fi-
daisaibiticue. Naimaci jeacinomona naimaci jillobillena, fi-daisaibiticue. Ailluena comini cuena inuamona jilloitimaci. Coninina omoi canua —llote.

Jesús mena uisidiaiaiaia jillotaja rafue

(Mr 10.46-52; Lc 18.35-43)

²⁹ Jericó railla nairaimona jaidimacimo, ailluena comini naimaci jinafona racadimaci. ³⁰ Ie facaiseconi mena uisidiaiaiaia nai fuemo raidiaiaiaia. Jesús naiedo jaillano cacajano, naimiena ado uaidotiaiaiaia:

—David micori Jitona o illamona, Jusifnamuimona o billa jira, cocona duenai. Cocona cano.

³¹ Iaimaiaia lliicaillena, Jesús diga jaidino iaiaiaiaia lletade; iadedi eo cuirioidiaiaiaia:

—Maestro, David micori Jitona o illamona, cocona duenai.

³² Iaimaiaia Jesús cacajano, ieconai naidadajana, iaiaiaiaia uaidote. Jicanote:

—¿Niese omicono cue nibaiana jitaicomico?

³³ Uai otiaiaiaiaia:

—Maestro, coco uisina o cioitajana jitaicococo.

³⁴ Iaimaiaia duenaillanona, iaiaiaiaia uisina jetade. Ieconai iaiaiaiaia uisidi ciode. Iaimaiaia jai cuanona, ie llofueganona iaiaiaiaia jaillena, Jesús diga jaidiaiaiaiaia.

21

Jesús illaia isoi Jerusalémo jailla rafue

(Mr 11.1-11; Lc 19.28-40; Jn 12.12-19)

¹ Oni jaillanona, Jerusalémo iaieicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiena orede. ² Raite:

—Bie nairai illa uicomao mai omico jai. Nainomo cuinaca burrana baitomico. Ie ecimo ie uruena baitomico. Naie iaiaiaiaiaia suiñuano bene ati.

³ Omicomao “¿Bue ñellena bie suiñodomico?” bu jicanoia, llono: “Coco Nama naie iaiaiaiaiaia jitaide. Nailli naimie iaiaiaiaiaia raie abido oretaite” —raite.

⁴ Jusifnamui facaina lloraima micori jaie llua isoi, bie rafue suide. ⁵ Naimie micori jaie cuete:

Jerusalén itinomo llono:

“Ero, omoi illaiaia omoina sedallena biite.

Abi iedoñeno biite.

Burra urue emododo naimie biite”

cuete. ⁶ Iaimaiaia jaillanona, Jesús llua isoi finodiaimaiaia. ⁷ Burra ie urue diga atidiaimaiaia. Burra urue emodomo naimie llofueoicaigano naimaci iniroina jobianona, ie emodomo Jesús rainadate. ⁸ Naimiena iobitallena, illaia isoi naimie jaillena, ailluena comini imaci iniroi diga, naiso motomo jobedimaci. Jiaino raforono uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuirisite:

—¿Cai Jilloitaraima billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caina jilloitajasa!

¹⁰ Jerusalémo naimie ridemo, nana nainomo itino naie rafuena uñoiacadimaci.

—¿Buta bite? —¿icanotimaci. ¹¹ Jesús diga bitino dinena uai otimaci:

—Jesús bite. Naimiedi Jusiñamui facaina lloraima. Galileamo ite Nazaret imie.

Jesúdi Jusiñamui jofomona damieriena dotaja rafue

(Mr 11.15-19; Lc 19.45-48; Jn 2.13-22)

¹² Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiaia diga, damierie fecaidimaci. Iena Jesús cianona, naimaci mesaiaina oni caicode. Ucugina fecaidino rairacuai jiai oni caicode. ¹³ Naimacimo llote:

—Ie facaina lloraima Jusiñamui llogacino jaie cuega: “Cue jofo ite, nainomo cuemo comini jillena” cuega. Ero, ailluena omoi ibataja jira, naimie jofona fiiruidino jofona omoi finoca.

¹⁴ Ie faise uisinidino Jusiñamui jofomo naimie dine bitimaci. Ñujañujacaida macaritino jiai bitimaci. Naimaci billanona, Jesús naimacina jillotote. ¹⁵ Nainomo Jesús diga mare rafuena finode. Diga cominina jillotote. Iena cianona, nainomo ite uruiaia ado cuirisite:

—David micori Jitori iobidicai. Jusiñamui lloraini micoriaia jaie llua isoi, cai jilloitaraima jai ite.

Iena cianona, iena cacajanona, judíuai illaicomini iciritimaci.

¹⁶ Naimiemo jicanotimaci:

—¿Bie uruiaia cuirillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomoi? Naimie cuete:

Naimiemo Jusiñamuidi uruiaina mare iobillacinona fecataite.

¹⁷ Naimacina fainonocaida, Betaniamo Jesús jaide, nainomo inillena.

Jesús higuera railla riarana faidua rafue

(Mr 11.12-14, 20-26)

¹⁸ Ie areruido Jerusalémo abido ie llofueoicaigano diga Jesús bia, aimetaite.

¹⁹ Nai fuemo higuera railla riarana cianona, iena jibuide. Naiemo naie llisilladi iñede. Dama ie ibena cide. Ie jira naie amenana llote:

—Biemona jaca llisíñeite. —Iese railla dacaño naie riaradi duide. ²⁰ Ie llofueoicaigano iena cianona, raijicaillamona raitimaci:

—¿Niese naie riara raire duide?

²¹ Jesús dinena uai ote:

—Uanaicinona omoimo lloiticue. Cue Moona raise omoi ñnoia, bie isoide rafuena finoitomoi. Raise omoi ñnoia, omoi começi igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitailla rana finoite. ²² Naimie iena finuana omoi ñnuamona, ñie isoide rafue cue Moomo omoi jicajia, iena naimie finoite.

Jesúdi ie ñño uaina llua rafue
(Mr 11.27-33; Lc 20.1-8)

²³ Jerusalémo rillanona, Jusiñamui jofomo Jesús fo jailla mei, nainomo ite cominina llofuete. Judíuai illaicominini naimie dine billanona, jicanotimaci:

—¿Ñie isoide uaido o finoca rafuena finodio? ¿Bu omo iga uai diga o finoca rafuena finodio?

²⁴ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ²⁵ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuello —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluaña ññoñedomoi?” ²⁶ “Comini” cai fairioia, bene itino caina ñibai meineitimaci, Juan micoridi Jusiñamui facaina lloraíma naimaci railla jira.

²⁷ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo ñie isoide uai illana omoimo lloñeiticue.

Jesúdi mena jito iaímaiaí illa llua rafue

²⁸ Judíuai illaicominimo Jesús llote:

—Bie rafuemo omoi começiaína faca. Damiemo mena jito ite. Nano doforamiemo llote: “Moo, cue illimo birui maijiaí”. ²⁹ Uai ote: “Jaiacañedicue” llote. Dallu illanona, ie começina dane facajano, maijiaide. ³⁰ Jiaie jitomo daje isoi llote. Naimie uai ote: “Jíí, maijiaitícué” llote. Iese llote; iadedi maijiaíñede. ³¹ ¿Ñie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoína ñaitícué. Omoimona marañedimaci; iadedi Jusiñamui cominina naimaci jaiillamona, gobierno ucube oraini Jusiñamui illanomo iitimaci. Callirediñaiñuaidi nainomo jiaí iitimaci; iadedi nainomo jaca iñeitomoi. ³² Marena omoi começiaína itatallena, Juan micorí navui bite; iadedi naimie micorina ññoñedomoi. Ucube oraini naimie micorí rafuena ñnotimaci. Callirediñaiñuái naimie micorí rafuena ñnotimaci. Iena uiñotomoi; iadedi omoi começiaí iuailaína meidoiñedomoi. ññoñedomoi.

Jesúdi marañede maijiraíni rafuena llua rafue
(Mr 12.1-12; Lc 20.9-19)

³³ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ñbatajanona jianomofecade. Ie mei jiaie eniruemo jaide. ³⁴ Uvas jai einaila facaise riaraiaina sedaraini dine naie patrón janore mullaiaína orede, naimie facaise iedinona naimie feiñollena; ³⁵ iadedi naie sedarainidi ie mullaiaína

duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci. ³⁶ Ie mei patrón jiaie mullaiaina orede. Naimacina jiai duere finodimaci. ³⁷ Ja muidomo ie jitona orede. “Cue jitona jaciruitimaci. Naimie uaina inoitimaci” comecina facade. ³⁸ Riaraiaina sedaraini naimiena cianona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. ³⁹ Naimiena jino dotajanona, naimiena meinetimaci. ⁴⁰ Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono — llote.

⁴¹ Judíuai illaicomini uai otimaci:

—Naie marañedinona dueruñeno meineite. Ie mei jiaie cominimo naie illi fecaite, iena sedallena, naiemona riarana feñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraíma micori omoína jaiie cuete. Ie cuegafuena raise facañedomoi. Naimie micori cuega:

Jofo finoraini jitaíñena noficidi nana naie jofomo ite nofici baifemo jai uaide. Jusiñamui iena finotate.

Iena cai uiñuamona, “Eo mare” raiticai

cuega. Jusiñamui cominina damerie jaillana naimie micori cuete. Jusiñamui oretagamiena damerie jitaíñenamona, naimie cominina jaiñeitimaci; iadedi Jusiñamui oretagamiena ailluena inuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaíñena jira, naimie cominina jaiñeitomoi.

⁴³ Jusiñamuidi ie cominina sedajanomo omoína itatañeite; iadedi jiaie cominina nainomo itataite, naimie jitailla rafuena naimaci finua jira.

⁴⁴ Jesús llote:

—Naie noficina dane ñaiticue. Noficimo bu eicaitaia, bofedaite; ia naie nofici bumona ana uai, naimiena saitaite. Ie isoide. Cue lluana omoi jamaia, duere sefuitomoi. Iena omoi inoñenia, ja muidomo faifitomoi.

⁴⁵ Jesús lluana naie judíuai illaicomini cacajanona, naimiedi naimacina ñaiana jai uiñotimaci. ⁴⁶ Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraímana railanona.

22

Jesúdi illaíma ie jito aína ua llua rafue

¹ Jusiñamui jofomo Jesús nia illanona, nainomo itinona llofuede:

² —Jusiñamui dibeimo comini jailla rafuena omoímo lloiticue. Iena omoi uiñollena, bie rafuedo iena lloiticue. Illaímadí ie jito ai ua rafue finode.

³ Naimie ie mullaini orede, rafuemo llogano uaidollena; iadedi nai llogano biacaiñedimaci. ⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. Firetaiai, farediretaiai diga, jai faga. Jai nana fuite. Rafuemo mai bi’”. ⁵ Naimaci cacarefiacaiñede. Damie ie illimo jaide. Jiaimie ie chinganamo jaide. ⁶ Jiaíno mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. ⁷ Ie jira naie illaíma eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate. ⁸ Ie meinocni ie fiebide mullainimo llote: “Rafue guille jai nana finoca; ia llogano marañedimaci.

⁹ Naiso bojicaillanomo jai. Nana o ciolle diese llono: ‘Rafuemo bi’ llono”. ¹⁰ Ie jira ie mullaini jai naisona jaide. Marañedino baillanona diese ofitatimaci.

Jiai maredino diese ofitatimaci. Rafue finua jofo naie llogano diga oruide. Illaïma nainomo fecaca iniroina jitatimaci. ¹¹ Illaïma fo bia, mesamo itino jibuillena, dinomo daje ïma rafue ie mare iniroina jitañenana ciode. ¹² Naimiemo jïcanote: “Nabai, ¿niese bene rafue ie mare iniroina jitañeno bitio?” jïcanote. Naimie uainicaide. ¹³ Ie jira naie illaïma ie mullaiaïmo llotie: “Naimie cuena ïnoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llotie. ¹⁴ Ero, naie rafuemona omoi fueo. Illaïma ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

Jesúmo gobiernomo ucubena fecajana jïcanua rafue

(Mr 12.13-17; Lc 20.20-26)

¹⁵ Naimacimo Jesús lua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci. ¹⁶ Ie jira naimie dine naimaci cominimona dajerie oredimaci. Herodianuai railla cominina jiai jaidimaci. Jesús dine rillanona, raitimaci:

—Maestro, uanaicinsona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. ¹⁷ Omo rafuena jïcanoiacadicaï. Dani Jusiñamuina sedadicaï; iadedi romanos railla nairaï anamo birui cai illa jira, ¿naimaci illaïma Césarmo ucubena cai fecajana rairuidio? Caimo llono —lloitimaci.

¹⁸ Naimaci comeciaina marañedicinona facajana Jesús uifñuamona, uai ote: —¿Bue ñellena cuena facacitomoi? Maredinona abi caitadomoi. ¹⁹ Ucube cuemo acata —lote. Ie jira acatatimaci.

²⁰ Jesús dinena jïcanote:

—¿Bu ie joreño nainomo ite? ¿Bumo jainaiaide bie cuega radi?

²¹ Uai otimaci:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

²² Naimie lluana cacajano, rajicaidimaci. Naimie jeare uai oñena jira, naimie dinomona oni jaidimaci.

Jesús dine saduceuai railla comini billa rafue

(Mr 12.18-27; Lc 20.27-40)

²³ Naie facaise saduceuai railla comini naimie dine bitimaci. Fiodaillamona jaca buna jilloñellena ïnotimaci. Jesúmo lloitimaci:

²⁴ —Maestro, Moisés micori jaie cuega: “Fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁵ Ero, cai motomo siete amatiaï ite. Nano doforamie ie aina ote. Naimie nia uruiaïnide fiodailla. Ie emodo imie ie ama feciñona ote. Uruiaïnide jiai fiodailla. ²⁶ Naie siete digamedemona iese sefuide. ²⁷ Ja muidomo naie riño jiai fiodaite. ²⁸ Fiodaillamona, ico naimaci jilloiadedi, ¿bu naie riño ienite? Nainiño siete digamiena inirede —lloitimaci.

²⁹ Jesús uai ote:

—Moisés micori cuegafuiaïna raise omoi uifñoñena jira, Jusiñamui uaina raise omoi uifñoñena jira, bie isoide rafuena raise uifñoñedomoi.

³⁰ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaïenisai ainidimaci. Ininidimaci. Ie isoi iitimaci.

³¹ Fiodaitino jilluana omoïmo lloiticue. Jusiñamui omoi jaiagaimo jaie llogacinona ïnoñedomoi. Naimie llotie: ³² “Abraham ie Jusiñamuidicue.

Isaac ie Jusiñamuidicue. Jacob ie Jusiñamuidicue” llote. Jai fioidaitimaci; ia naimaci joreñuái nia itimaci. Jusiñamuidi dani cajedino imaci Jusiñamuina jira, naimaci joreñuái naimie dine itimaci. Ico naimaci abiaína jiai jillotaite —llote. ³³ Nainomo ite comini iena cacajano, naimie llofuári rajicaidimaci; ia saduceuái dinena uainicaidimaci.

Jesús nanoca llogacinona llofuía rafue
(Mr 12.28-34)

³⁴ Saduceuái comini uainicaillana fariseuái jai fidiano, Jesús dine ofidimaci. ³⁵ Naimacimona damiedi Moisés micori jaiie llogacinona eo uñote. Jesúna facacillena, naimiemo jicanote:

³⁶ —Maestro, Moisés micori jaiie llogacinuaimona, ¿nie llogacino ua nanoca llogacinona?

³⁷ Jesús dinena uai ote:

—Moisés micori jaiie cueba: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”. ³⁸ Bie ua nanoca llogacino. ³⁹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. ⁴⁰ Bie mena llogacinomona nana jaiie llogacinuái comuide. Nana Moisés micori llogacinuái naiemona comuide. Nana Jusiñamui facaina lloraini micoriai llogacinuái naiemona comuide —llote.

Jesús dinena fariseuái cominimo jicanua rafue
(Mr 12.35-37; Lc 20.41-44)

⁴¹ Naimie dine nia fariseuái comini ia, Jesús naimacimo llote:

⁴² —Jusiñamui lloraini micoriai jaiie raitimaci: “Jusiñamuidi Cristo raillamiena oretaite, ie cominina sedallena”. ¿Niese naimiema raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

⁴³ Jesús dinena jicanote:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai.

Ona ññoñedino o anamo itataiticue”.

⁴⁵ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23

Jesúdi judíuái illaicominina ñaia rafue
(Mr 12.38-40; Lc 11.37-54; 20.45-47)

¹ Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo llote:

² —Moisés micori llogacinuaina llofuerañidi naie rafuedo jai jaicabidimaci. Fariseuái comini iedo jiai jaicabidimaci. ³ Naimaci llofuaiacino omoi jai. Naimaci llofuiana omoi cacarefi; iadedi naimaci illa isoi omoi ñeno, naimaci llofuaiacino naimaci jaiñena jira. ⁴ Omoi einamaci llogacinuaido raise omoi jaillena, diga rafuena omoi finuana jitaídímaci; iadedi iedo omoi jaillena, omoína jaca canoñedimaci. “Jusiñamuina eo raise

sedadicaí” comecina facadimaci. Iemo naimaci comecina facajamona, ⁵ iena omoi cioillena, nana naimaci finua rafuena marefodo finodimaci. Jiaie cominimo ite Jusiñamuimo jiarabe baifemo faitibena uiacacabidimaci. Iniroi fuedadi aillofena jonegana gaidimaci. ⁶ Rafue ia, naimaci jamai bue isoñedinomo comecina facajanona, rafue nama ecimo raicadimaci. Ofiracomo uicomo raicadimaci, comini naimaciri acarillena. ⁷ Nine naimaci jiaia, nana comini naimacina uaiduana gaidimaci. Maestrodicinona uaiduana jiai gaidimaci. ⁸ Jusiñamuina eo raise naimaci sedajana omoi uñuana jitaidimaci. Naimaci isoi iñeno. Omoi damacina jira, omoi mona damie omoi baifemo faiamo comecina facañeno. Naimiena maestraona rañeno. Omoi baifemo cue illanona, omoi maestrodicue. ⁹ Omoi Moo Jusiñamui monamo illanona, dama naimiena seda. Jiaimiena sedañeno. Jusiñamui isoi jiaimiena “Moo” rañeno. ¹⁰ Omoi damacina jira, omoi mona damiena “Cai illaima” rañeno. Omoi illaimana jai iticue. ¹¹ Omoi mona bu imiena jaicania, omoi mullaimana naimie nano jaillamona, omoi na naimie canua. ¹² Jusiñamuidi “Jiaino afemo iticue” raillano comecina facadimiena jamai bue isoñedimiena itataite; ia Jusiñamuidi “Jiaino afemo iñedicue” raillano comecina facadimiena jamai bue isoñedimiena itataite.

¹³ Naie facaise Moisés micori llogacinona llofuerainidi fariseuai comini diga illanona, Jesús naimacimo llote:

—Jusiñamui omoi na duere finoite. Mareuidinona abi caitadinodomo. Jusiñamui dibeimo comini illana jitaiñedomo. Naimie dibeimo omoi illana jiai jitaiñedomo. Ie muidona Jusiñamuimona duere sefuitomo. ¹⁴ “Jusiñamuina eo sedadimaci” omoi comini comecina facajana jitaidomo. Ie jira are jidomo; iadedi iese iñedomo. Maraiñede rafuena finocabidomo. Jifuianona feciñuai rana bairocabidomo. Ie jira Jusiñamui omoi na eo duere finoite. ¹⁵ Damiena omoi dibeimo itatallena, omoi isoi Jusiñamui rafuendo naimie jaillena, diga rafuena finodomo. Omoi dibeimo illa mei, omoi baifemo omoi einamacillogacinodo naimie jaillana jitaidomo. Omoi diga ico naimie ua faifite. Cominina uanañedicinodo jaitatomo. Iese omoi illa jira, duere sefuitomo.

¹⁶ Omoi llofuiacino diga cominina canoñedomo. Mareuidinona abi caitadinodomo. Raicabitomo: “Cai lloga uai cai finollena jiai comini uiñollena, Jusiñamui jofomo ite oro mamecina llinotica; iadedi Jusiñamui jofu mamecina cai llinoia, cai lloga uaina cai finoñenia, caimona mare. Jusiñamuimona duere sefuiñeticai” raicabitomo. ¹⁷ Abi uiñoñedomo. Omoi llofuiacino diga cominina canoñedomo. Jusiñamui jofomo naie oro jainaiaila jira, naie orodi mare; iadedi naie oro naie jofu baifemo uaiñede. Abina omoi uiñoñena jira, Jusiñamui omoi na duere finoite. ¹⁸ Jiai raitomo: “Jusiñamuimo faga toica ocaina jobaisoillano mamecina cai llinoia, cai lloga uaina cai finoñenia, caimona mare; iadedi Jusiñamuimo fecaca toica ocaina mamecina cai llinoia, cai lloga uaina jaca finoitica”. ¹⁹ Abi uiñoñedomo. Omoi llofuiacino diga cominina canoñedomo. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede. ²⁰ Ero, Jusiñamuimo ocaina jobaisoillano mamecina omoi llinoia, nainomo ite ocaina mamecina jiai llinotomo. ²¹ Jusiñamui jofu mamecina omoi llinoia, Jusiñamui nainomo illa jira, naimie mamecina jiai llinotomo. ²² Monamo ite ra mamecina omoi llinoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomo. Omoi luu rafuena omoi finoñenia, Jusiñamui omoi na duere finoite.

²³ 'Mareuidinona abi caitadinona omoi illamona, omoimo nia lloiticue. Nana omoi illimo ite ramona, nana omoimo ite ucubemona Jusiñamui mo janore jisa fecacabidomoi. Nana comini omoi isoi illena jitaidomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñenia, Jusiñamui omoina duere finoite. ²⁴ Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioiñeno namo gutadomoi. Ie isoide. Omoi llofuaiacino diga cominina canoñedomoi. Jusiñamui ie eo jitailla rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

²⁵ 'Omoimo nia lloiticue. Omoi einamací llogacínodo eo jaidomoi; iadedi omoi comeciaina raise finoñedomoi. Eo fídomoi. Jífuianona comini rana bairodomoi. Jeacinona finocana jaidomoi. ²⁶ Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise finoñedomoi. Nano omoi comecina raise fino. Mare rafue finocana jai. Omoi einamací rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoina duere finoite.

²⁷ 'Omoimo nia lloiticue. Marena finoca raiafo isoidomoi. Jinofe marena eruaide; iadedi nainomo mare ra iñede. Comini illaici jamai ite. Jai marañede. ²⁸ Ie isoidomoi. Marena eruaidomoi; iadedi maredinona abi eo caitadomoi. Omoi comeciái eo maraisiñede. Omoi comecina raise omoi finoñenia, Jusiñamui omoina duere finoite.

²⁹ 'Omoimo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi, ³⁰ raillano: "Cai jaiagai Jusiñamui facaina lloraini micoriaina meinetimaci. Naie facaiseconi iticaidena, naimaci isoi finoñedicaí. Cai jaiagai isoi birui iñedicaí" raitomoi; ³¹ iadedi omoi llamona Jusiñamui facaina lloraini micoriai meinetino uruiaí omoína uiñoticaí. ³² Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. ³³ Omoi marañena jira, jalo nairai isoidomoi. Ja muidomo iraimona jillobiñeitomoi. Nainomo duere sefuitomoi. ³⁴ Cue rafuena lloillena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraíni omoi dine jiai oretaiticue. Dajeriena meineitomoi. Naimacina coraítomoi. Omoi ofiracomo dajeriena faitomoi. Diga nairaimo naimacina duere finoitomoi. ³⁵ Abel micori jaié ite. Naimie maremie. Ie ama naimiena meinete. Naimie facaise mona omoi jaiagai ailluena mare cominina meinetimaci. Ie mei omoi jaiagai Zacariána meinetimaci. Naimiedi Berequíás jito. Jusiñamui jofomo Jusiñamui mo toica ocaina jobaisoillano ecimo naimiena meinetimaci. ³⁶ Uanaicino omoimo lloiticue. Naimacina omoi jaiagai meinia muidona, omoimona Jusiñamui birui ibana oite. Naimaci isoi marañede rafuena finocana jaidomoi. Jusiñamui omoína duere finoite.

*Jesús Jerusalémo itinomo lua rafue
(Lc 13.34-35)*

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruiaí sedaja isoi, diga icaíño cue anamo omoína uaidoiacadicue; iadedi omoi dinena cuena jitaiñedomoi. ³⁸ Iemona Jusiñamuidi omoi illanona jai faínonocai. ³⁹ Cue Moo dine jaiticue. Cue jailla mei, cuena cioñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

24

Jesúdi Jerusalémo ite Jusiñamui jofu judaiana llua rafue
(Mr 13.3-23; Lc 17.22-24; 21.5-24)

¹ Jusiñamui jofomona ie llofueoicaigano diga Jesús jino jaidemo, Jesúna nai jofona eruaitatimaci. ² Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiái ico judaísite —llote. ³ Ie mei Olivos railla anedu dine rillanona, Jesús naie muidomo raidemo, ie llofueoicaigano naimiemo iena anado llotimaci:

—Jusiñamui jofu judaiana omo jicanoiacadicaí. ¿Niruido iena suite? Caimo llono. O abido billirui iairei ia, ¿nie isoide rafue suite, o abido billiruina cai uiñollena?

⁴ Uai ote:

—Omoína bie rafuena bu jifueñellena, omoi abina rairui. ⁵ Ailluena comini cue mamecido billanona: “Cristodicue” raitimaci. Diga cominina jifueitimaci. Iemona omoi abina rairui. ⁶ Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue. ⁷ Daje nairai jaie nairai diga jobairitimaci. Daje gobierno jaie gobierno diga jobairite. Diga illanuaimo comini aime gutimaci. Diga illanuaimo ñuisañuai suite. ⁸ Iese suia, omoi duere sefuillifue omoimo suite.

⁹ Cuen a inoñedino omoína gaitatajanona, omoína meineitimaci. Cue cominina omoi illamona, nana nairaiái omoína enoitimaci. ¹⁰ Naie facaise cue díbeimo itinomona ailluena abido danomo jaitimaci. Iemona duere omoi sefuillena, omoína janoñeitimaci; iadedi omoína enoillamona, omoína llogidoitimaci. ¹¹ Naie facaise diga comini raitimaci: “Jusiñamui facaina llorainidicaí”; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci díbeimo itataitimaci. ¹² Jeacino eo comuicana jailla jira, ailluena comini conini isiruiñeitimaci; ¹³ iadedi cuena faínonocaiñedimie ja muidomo monamo jaca iite. Naimiema jillotaiticue. ¹⁴ Diga cominidi Jusiñamui díbeimo comini ille rafuena nana nairaimo lloitimaci, nana nairaiái iena cacaillena. Ie mei abido biiticue.

¹⁵ Cue llamo cacarei. Daniel micori Jusiñamui facaina lloraima. Naimie micoridi jaímie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, ¹⁶ naimemona omoi jillobillena, duere omoi sefuíñellena, Judeamo omoi illamona, aneduai dine omoi aisi. ¹⁷ Jofu emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. ¹⁸ Aneduai dine raire rillena, illimo omoi ia, abido jofomo biñeno, omoi inroi omoi diga uillena. ¹⁹ Naie rafueмона jillobillena, naie facaise urueside riño duere sefuite. Uruena nia jirode riñodi jiaí duere sefuite. ²⁰ Eo duere sefuíñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo

bie rafue suiñellena, Jusiñamuimo jicano. ²¹ Naie facaise comini eo duere sefuitimaci. Enirue finua facaise mona iese comini nia duere sefuiñedimaci. Ico iese eo duere sefuiñeitimaci. ²² Naie facaise ianori fo Jusiñamui ofñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²³ 'Ie facaise omoimo bu raia: "Jadi, Jusiñamui facaina lloraïma benomo birui bairede. Naimiedi Cristo", iena ñnoñeno. Jiaimie raia: "Oni batine Cristo birui bairede", iena ñnoñeno. ²⁴ Cristona abi caitadino biitimaci. Jusiñamui facaina llorainina abi caitadino jiaï biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²⁵ Ero, bie rafue nia suiñenia, iena omoimo jai lloticue. ²⁶ Omoimo naimaci raia: "Ero, batine jofue iñenanomo Cristodi ite", nainomo jaiñeno. Naimaci raia: "Ero, bene bie jofomo Cristo ite", iena ñnoñeno. ²⁷ Mona borillamona mona jillacidi usere ciode. Nana cominimo bairede. Ie isoide. Cue abido bia, nana comini iena uiñoitimaci. ²⁸ Urujaisai rifaide ramo ofillana uifua isoi, nana cuena ñnotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

²⁹ Jesús llote:

—Naie duere sefuilla facaise meinoconi jitoma lligaiñoñeite. Fivui jiaï lligaiñoñeite. Monamona ucuai llujite. Nana naie radi jaidisite. ³⁰ Ie mei monamo baireiticue. Iecon nana nairaijai jarire iitimaci. Jacainaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue. ³¹ Cue jaienisaina cue ecimona oretaiticue. Ado trompeta ficiretajano, cue fetocano diese naganomona ofitaitimaci.

³² 'Higuera railla riaromona omoi fueo. Bie eniruemo naie riaru firuillamona, fiemona raire illana uiñotomoi. ³³ Ie isoide. Bie rafue ico suia, cue billirui iaïrei illena uiñotomoi. ³⁴ Uanaicinsona omoimo lloticue. Nana bie rafue suille facaiseconi bie nairai nia iite. ³⁵ Mona enirue diga fuite; iadedi cue lloga uai jaca suite. ³⁶ Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiaï uiñoñedicue. Dama cue Moo iena uiñote. ³⁷ Abido cue billirui iaïrei ia, Noé micori facaiseconi itino isoi comini iitimaci. Naimaci duere sefullemono Noé micori facaise itinodi comeciaina facañedimaci. ³⁸ Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. ³⁹ Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ⁴⁰ Naie facaiseconi menamie illimo danomo iitaiamaiai. Damie Jusiñamui dine jaite. Jiaimie fiebillanona, Jusiñamuimona duere sefuite. ⁴¹ Mena riño danomo doberititaiñuui. Dañaiño Jusiñamui dine jaite. Jiaïñaiño fiebillanona, Jusiñamuimona duere sefuite. ⁴² Cue billirui omoi uiñoñena jira, iemo ocuiri. ⁴³ Bie rafuemo omoi comeciaina omoi faca. Jofu namadi fiiriraima nie naiona billena uiñotena, ie rana faifñellena, ie jofona raise sedade. ⁴⁴ Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nagaru ocuiri.

Jesúdi patrón ie mullaimana ie jofona sedataja llua rafue
(Lc 12.41-48)

45 Jesús llote:

—Cue billena omoï raise cacaillena, jiaie rafuedo iena lloiticue. Patrón daje mullaïmana ie jofona sedatate. Naie mullaïma ïnogamie. Abina uiñotimie. Nainomo itinona raise ecacabide. Naie mullaïmana ie jofona sedataja mei, naie patrón oni jaide. 46 Patrón ico abido bia, ie jofona ie mullaïma raise sedaia, mullaïmari naimie iobillamona, ie mullaïma marena iite. 47 Iobillamona, patrón ie mullaïmana nana ie raruiaina sedatataite; 48 iadedi ie mullaïma maraiñenia, ie comecina facaite: “Cue patrón are biñeite. Naimie lloga uaina finoñeiticue”. 49 Ie comecina iese facaja jira, naimie anamo ite mullaïaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. 50 Ie ocuirïñena facaie ie patrón abido billanona, naimiena duere finoite. 51 Ie isoide. Cue abido bia, cuena ïnotinori iobiticue; ia cuena ïnotinona abi caitadino dine cuena ïnoñedinona dotaiticue. Nainomo duere sefuillano eetitmaci.

25

Jesúdi diez jitaiñuaina llua rafue

1 Jesús llote:

—Abido cue bia, Jusiñamui ie cominina sedaite. Cue billemo ocuiritinona sedaite. Naie facaie ite cominidi diez jitaiñuaimo ite rafue isoidimaci. Naiñaiñuai lampariniai llinuanona, iima ie aina ua meinomo finoca rafuemo jaiacadimaci. 2-4 Lampariniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci. 5 Iima diga ie rafue dine jaillemo ocuiridimaci. Iima are biñena jira, ïnidimaci. 6 Daje dberuisse damie ado lluana cacadimaci. Llote: “Jadi, naie ïmadi jai bite. Mai bi, naimie uicomo naimiemo cai dafaiñillesa”. 7 Casillanona, naie jitaiñuai lampariniai unedimaci. 8 Abi uiñoñediñaiñuai dinena abi uiñotiñaiñuaimo jicadimaci: “Farena caimo fecca. Cai lampariniai boacaiñedesca”. 9 Uai otimaci: “Fecaacaiñedicaï. Omoïmo cai feccaïadedi, caimo baiñeite. Omoï jitaia, chinganomo ïbajai”. 10 Naiñaiñuai ïbajaila mei, naie iima ride. Naimiemo ocuiridiñaiñuai diese naimie diga nainomo guillena, rafuemo jaidimaci. Naimaci fo jailla mei, nase naie iima ïbaide. 11 Ie mei naie farena ïbajaidiñaiñuai abido billano, raitimaci: “Nase econo”. 12 Naie iima uai ote: “Uanaicinona omoïmo lloiticue. Omoïna uiñoñedicue. Econoñeiticue”. 13 Ie isoide. Cue billiruina omoï uiñoñena jira, nagarui cuemo omoï ocuiri.

Jesúdi patrón ie mullaïaimo ucubena fecaja llua rafue

14 Jesús llote:

—Abido cue bia, Jesiñamui ie cominina sedaite. Naie facaie ite comini daje patrómo ite rafue isoide. Patrón jiaie enirue jaiacana jira, ie mullaïaina ie ucubena eenotade. 15 Damiemo cinco diga ucubena fecade. Jiaimieemo menacubena fecade. Jiaimieemo dacubena fecade. Nagamie ie maijille ïnori fecade. Ie mei oni jaide. 16 Cinco diga ucubena feiñotimie jaillanona, iena fecallena, rana ïbade. Iemona jiaie cinco diga ucubena ote. 17 Menacubena feiñotimie iena fecallena, rana ïbade. Iemona jiaie menacubena ote. 18 Dacubena feiñotimie eniruemo naie ucube eenote. Iena fecallena, rana ïbañede. Iemona buena oñede. 19 Digarui illanona, naie patrón abido bite. Naimaci cuentas siadollena, ie mullaïaina uaidote. 20 Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo

fecadio. Jiaie cincona oticue”. ²¹ Patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”. ²² Menacubena feiñotímie bite. Raite: “Patrón, cuemo menacubena fecadio. Iemona jiaie menacube oticue”. ²³ Naimie patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”. ²⁴ Dacubena feiñotímie bite. Raite: “Patrón, o riirenana uiñoticue. O mullaíai maijiamona ganacabidio. ²⁵ Ucubena cue faifiñellena ona jaciruiticue. Ie jira eniruemo o cuemo iga ucubena eenoticue. Jadi, iena jai abido atidicue”. ²⁶ Patrón uai ote: “Maraiñedio. Rairaiedio. Cue mullaíai maijiamona cue ucube uana uiñotio. ²⁷ Bancono naie ucubena jonetiodena, naie ucubemona jiaie ucube janore uamona, abido cue bia, iena feiñoticue”. ²⁸⁻³⁰ Ie mullaíaimo llote: “Naimiemona ie ucubena bairo. Diez ucube illamiemo iena feca. Bie maraiñede mullaíma jítiredinomo cuemona oni dota. Nainomo comini duere sefuillanona eetitacaci”. Jusiñamui ie jitailla rafuena finodinona: “Mare” raite; iadedi ie jitaile rafuena finoñedinona duere finoite. Jusiñamui omoína duere finoñellena, cue abido billirui omoi uiñoñena jira, Jusiñamui jitaillacinona finocana omoi jai.

Jesúdi cominina duere finolle llua rafue

³¹ Jesús llote:

—Omoína nia llofueiticue. Abido cue bia, nana cue jaienisaí diga biiticue. Illaímana ico cue bia, illaíma illa ifomo iiticue. Eo siño uaido biiticue. ³² Cue uicomona nana nairaiái ofitimaci. Toica llauaíai sedaraima ie chivos motomona ie llauaíai oni fetua isoi, naimacina fetoiticue. ³³ Cue jitaillacinona finodino diese cue fetuanona, cue nabeimo itataiticue. Jie jitaillacinona finoñedino diese cue fetuanona, cue jarifebeimo itataiticue. ³⁴ Cue illaímana jira, cue nabeimo itinomo lloiticue: “Cue Moo omoi iobillanona, omoína jai caimare itatate. Cue Moo cominina omoi illa jira, cue sedajanomo mai bi. Nainomo duidomoi. ³⁵ Cue jitaillacinona omoi finuamona navui aimetaiticue, cuena ecadomoi. Jiroacadicuemo, jinui cuemo fecadomoi. Omoi nairai dine cue macaria, cuena omoi uiñoñeno omoi jofomo cuena feiñotomoi. ³⁶ Iniroinidicuemo, iniroi cuemo fecadomoi. Duidicuemo, cuena canollena, cuena jibuisaibidomoi. Cárcelmo iticue, cuena canollena, cuena jibuisaibidomoi”. ³⁷ Cue jitaillacinona finodino dinena cuemo jicanoitimaci: “Nama, ¿Niruido aimetaitiomo, ona ecadicaí? ¿Niruido jiroacadiomo, jinui omo fecadicaí? ³⁸ ¿Niruido ona ciodicaí, cai jofomo ona feiñollena? ¿Niruido iniroina omo fecadicaí? ³⁹ ¿Niruido duidiomo, ona jibuisaidicaí? ¿Niruido cárcelmo itiomoi, ona jibuisaidicaí?” ⁴⁰ Uai oiticue: “Uanaicinona omoimo lloiticue. Cuena inotinomona jamai bue isoidimena canodomoi, cuena jiaí canodomoi” lloiticue.

⁴¹ Temei cue jarifebeimo itinomo lloiticue: “Cuemona oni mai jai. Cue cominiñedomoi. Jai faifidomoi. Duere omoi sefuillena, iraimo mai jai. Naie irai jaca duiñede. Jusiñamuidi naiena Taife iena jai finode. Jusiñamuidi Taife comini iena jiaí jai finode. ⁴² Cue jitaillacinona omoi finoñenamona, navui aimetaiticue, cuena ecañedomoi. Jiroacadicuemo, jinui cuemo fecañedomoi. ⁴³ Omoi nairai dine cue macaria, omoi jofomo cuena feiñoñedomoi. Iniroinidicuemo, iniroi cuemo fecañedomoi. Duidicuemo, cuena canollena, cuena jibuisaibiñedomoi. Cárcelmo iticue, cue canollena, cuena jibuisaibiñedomoi”. ⁴⁴ Cuemo jicanoitimaci: “¿Niruido aimetaitiomo, ona ecañedicaí? ¿Niruido jiroacadiomo, jinui omo fecañedicaí? ¿Niruido ona

ciodicai, cai jofomo ona feiñollena? ¿Ñiruido iniroinidïomo, omo fecañedicai? ¿Ñiruido duidïomo, ona jibuisaiñedicai? ¿Ñiruido cárcelmo itïomo, ona jibuisaiñedicai?”⁴⁵ Uai oiticue: “Uanaicinona omoïmo lloiticue. Diga comini cuena ñnotimaci. Naimacimona jamai bue isoidimiena omoï canoñena jira, cuena canoñedomoï” lloiticue.⁴⁶ Naimaci jaca isi cacaitimaci; iadedi cue jitaillacinona finodino cue Moo sedajanomo jaca itimaci.

26

Judíuai illaicomini Jesúna gaitallena siadua rafue (Mr 14.1-2; Lc 22.1-2; Jn 11.45-53)

¹ Ie llofueoicaiganona llofuia mei, naimacimo Jesús llote:

²—Pascua railla rafue illena, menarui fiebide. Iena uñnotomoi. Monamona jaie cue billamona, iimana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote.³ Naie facaiseconï Jusiñamui diga nanoca ñairainidi, jiaie illaicomini diga, nanoca ñairaima jofomo ofidimaci Nanoca ñairaimadi Caifás.⁴ Jesúna jifuiano gaitallena coniniri siadotimaci. Naimiena meinellena jiai siadotimaci.⁵ Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaitañenamona, comini cai diga fuiritimaci. Nia sedaiticai.

Jesúmo riño caimare soride ra totaja rafue (Mr 14.3-9; Jn 12.1-8)

⁶ Betania railla nairaimo Jesús jaillanona, Simón jofomo jaide. Simódi jaie efonaitimie.⁷ Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.⁸ Jesús llofueoicaigano iena cüanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide.⁹ Iena fecacadena, eo ailluena raifide. Naie ucube dueredinomo fecadena, caimona mare.

¹⁰ Naimaci ñaiana Jesús uñua jira, naimacimo llote:

—¿Bue ñellena naiñaiñoña jeare ñaitomoi? Mare rafuena cuemo finode.¹¹ Omoï diga dueredino jaca itimaci; iadedi omoï diga jaca iñeiticue.¹² Cue abimo bie caimare soride ra naiñaiño totajamona, cue fiodaillirui facaina naiñaiño iese finode.¹³ Omoïmo uanaicinona lloiticue. Ninomo cue mare finoca rafuena bu lloia, naiñaiñoña uibiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue (Mr 14.10-11; Lc 22.3-6)

¹⁴ Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide.¹⁵ Naimacimo jicanote:

—Omoïmo Jesúna cue fecaia, ¿niña ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci.¹⁶ Naie facaiseconimona Jesúna gaitatallirui naimie ocuiride.

Jesúdi ie fiodaile rafuena llua rafue (Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pascua railla rafue ia, siritaga rana guiñedimaci. Dani llomenicono guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

¹⁸ Uai ote:

—Jerusalémo omoï jaillanona, omoïmo cue llogamiena omoï ciuanona, naimiemo llono: “Cai llofueraïma fiodable facaise iaïrei ite. O jofomo ie llofueoicaigano diga pascua rafuena finoacade” llono.

¹⁹ Ie muidona ie llofueoicaiganodi ie lluaana finodimaci. Pascua railla rafue guille finodimaci. ²⁰ Nairui jítoma ana ítemo, Jesús ie doce llofueoicaigano diga nainomo guisaide. ²¹ Naimaci mesamo guitimacimo, Jesús llote:

—Omoïmona damie cuena gaitataite —llote. ²² Iena cacajanona, eo sunaitimaci. Damierie naimiemo jicanoside:

—¿Cuena ñaitio?

²³ Uai ote:

—Omoïmona damie bie platomo cue diga llomenico diga mutade.

²⁴ Jusiñamui facaina lloraima cuenga isoi, monamona jai billamona fi-daiticue; iadedi cuena gaitataitimie eo duere sefuite. Naimie jeiciñegadena, cuemona mare.

²⁵ Jesúsna gaitataitimiedi Judas micori. Naimie jicanote:

—Maestro, ¿ona íese finotaiticue?

Uai ote:

—Jii, íese finotaitio.

²⁶ Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoï comecina facajano, iena guiño.

²⁷ Ie mei naimie jiroracono jiaï llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoï jiro. ²⁸ Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoïmo jiaïe rafue birui itatajanona, omoï jeacino oni dotajana jai llote. Bie vinodi naie rafue facai ie. Cue llua isoi bie vinona omoï jiruamona, cue fiodaillamo omoï comeci. ²⁹ Omoïna bene dane íese caïmare nabaiñeiticue. Cue Moo sedajanomo omoï diga cue ia, nainomo omoïna dane íese caïmare marena nabaiticue. —Iena jirodimaci.

Jesúdi Pedro naimiena januana llua rafue

(Mr 14.26-31; Lc 22.31-34; Jn 13.36-38)

³⁰ Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. ³¹ Jesús naimacimo llote:

—Cuemo suille rafue muidona, ja naïo cuena faïnonocaitomoi. Jusiñamui facaina lloraima micori iena jaïe cuenga: “Toica llaudaïai sedaraïmana meine-taiticue. Naimie toïnaï uaficaïda jaitimaci” cuenga. Naimie micori caïna cuete. ³² Ero, fiodaillamona cue jillua mei, omoï uicodo Galileamo jaiticue, nainomo omoï diga dafaiïllena.

³³ Pedro uai ote:

—O finolle rafue muidona nana jiaïno ona faïnonocaïa, ona jaca faïnonocaiñeiticue.

³⁴ Jesús dinena raite:

—Unai omo lloiticue. Ja naïo íitava nia ñaiñenia, dacaiño amani cuena janoitio.

³⁵ Pedro uai ote:

—O diga cue fiodaïadedi, ona janoñeiticue.

Nana ie llofueoicaigano daje uaido jiaï raitimaci.

Jesúdi Getsemanímo Jusiñamuimo jña rafue
(Mr 14.32-42; Lc 22.39-46)

³⁶ Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

³⁷ Pedrona uite. Zebedeo ie jito iaímaiaína jiaí uite. Naimie sunaicaide. Ie comeci uri iñede. ³⁸ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁹ Naimie janore bai jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jiide. ⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicane:

—¿Niese raire inidio? daje hora nia iñedemo. ⁴¹ Iniñeno. Taife ramo omoína fai raillano, iena omoi iñoñellena, Jusiñamuimo jii. Omoi comeci mare rafuena finoacade; iadedi omoi comeci daní ocuiñoñede. Ie muidona Jusiñamuimo jii, omoína naimie ocuiñotallena —llote. ⁴² Ie mei dane jüllena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi lliroilla jira, naimaci inisitemo ride. ⁴⁴ Abido jaillanona dane jiide. Ailli daje isoidiuaido jiide. ⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fiodaiticue. Cuena ja gaitajanona, Jusiñamui jitailla jira, naimiena iñoñedino anamo ja iiticue. ⁴⁶ A naidacai. Maíña. Cue gaitataitimie jai bite.

Jesúna gaitalle rafue
(Mr 14.43-50; Lc 22.47-53; Jn 18.2-11)

⁴⁷ Jesús nia ñaitemo, ieconi Judas micorí bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiaí atidimaci. Jusiñamui diga nanoca ñairainimona bitimaci. Einamací dinena jiaí bitimaci. ⁴⁸ Jesús dine naimaci nia riñenia, Judas micorí naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita —llote. ⁴⁹ Jesús dine naimaci rillanona, Judas micorí Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. ⁵⁰ Jesús dinena raite:

—¿Bue ñiaibitio?

Ie mei Judas micorí diga bitinodi Jesúna gaitadimaci. ⁵¹ Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaima ie mullaíma jefona jaibonote. ⁵² Jesús naimiemo llote:

—O fuiriacania, o jiaí fiodaitio. O lloebi dane eeno. Cue riiduanona, fuiriñeno. ⁵³ Cuena riidollena, cue Moomo cue jicaia, eo ailluena jaienisai cue dine naimie oretaitaite; ⁵⁴ iadedi iese cuena riidoia, Jusiñamui facaina lloraini micoríai cuegafuiai suiñete. Cue fiodaille rafuena cuetimaci —llote. ⁵⁵ Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiaí bitomoi. Fuiriraimadicueta cuena omoi gaitajaibilla. Jusiñamui jofomo nagarui

llofuecabitucue; iadedi cuena gaitañedomoi. ⁵⁶ Nana bie rafue suide, Jusiñamui facaina lloraini micoriai cuegafuiai suillena —llote. Ie facaise nana naimie llofueoicaigano naimiena fainonocaillano, aisidimaci.

Jesúdi judiuaí illaicomini dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesúna gaitadinodi Caifás jofomo Jesúna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamaci jiai ofidimaci. ⁵⁸ Jesús jinafona Pedro aarena jaide. Caifás jofo nairaibirimo jaide. Naie rafue fuiduana naimie uifollena, nainomo ite jofomo maijiraini diga raide.

⁵⁹ Naimiena meinellena, nana naie illaicomini Jesúmo nicino illana uifoiacadimaci. ⁶⁰ Iena coniniri siadotimaci; iadedi naimiemo jaca nie isoide marañede rafue illana uifoiñedimaci. Diga comini Jesúna ñaitimaci; iadedi taino llotimaci. Ie mei menamie bitiaimaiaia. ⁶¹ Raitiaimaiaia:

—Bimie llote: “Jusiñamui jofona judaiedicue. Judaia mei, darui amani illanona, iena dane finoredicue” —lloitiaimaiaia.

⁶² Jusiñamui diga nanoca ñairaima Jesúmo jicanote:

—¿Niese iaimaiaia uai oitio? ¿Nie isoide rafue ona llogidotiaimaiaia?

⁶³ Jesús uai ofiede. Naie ñairaima dinena llote:

—Cai Jusiñamui cajede. Naimie caina uifua jira, uanaicinona cai lloñenia, caina duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

⁶⁴ Jesús dinena uai ote:

—Jii, naimiedicue. Iena raise llotio. Monamona jaie cue billamona, imana jaidicue; iadedi ico jiairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiai cioitimaci.

⁶⁵ Iena cacajanona, naimiemona Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitaifedicaia. Ie ñaiaimona dama naimie abina llogidote. ⁶⁶ ¿Niese naimiena raitomoi?

Jiai illaicomini dinena uai otimaci:

—Naimie fiodaillesa.

⁶⁷ Ie mei naimie uiecona tuallaitimaci. Naimiena ducoidimaci. Jiai bucoidimaci. ⁶⁸ Raitimaci:

—O Cristodiodena, ¿bu o bucoia? caimo llono.

Jesús uai ofiede.

Pedrodi Jesúna janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofo nairaibirimo ite. Naie jofo nama mullaño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite.

⁷⁰ Nana nainomo itinomo Pedro llote:

—O lluana uifoiñedicue.

⁷¹ Nase fuemo Pedro jaidemo, naimiena jiaie mullaño ciuanona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uifote. O llogamiena uifoiñedicue.

⁷³ Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

⁷⁴ Uai ote:

—Uanai cue lloñenia, Jusiñamui cuena duere finoite. Uanaicinsona cue llwana naimie uiñote. Ero, Jesúsna uiñoñedicue. —Iecon iitava ñaite. ⁷⁵ Iena cacajano, Pedro Jesús llwana uibiñote. Jaive Jesús Pedromo llote: “Itava nia ñañenia, dacaiño amani cuena janoitio” llote. Iena uibiñuanona, Pedro jino jaillano, sure eede.

27

Pilato dine Jesús illa rafue (Mr 15.1; Lc 23.1-2; Jn 18.28-32)

¹ Monaidemo, nana Jusiñamui diga nanoca ñairainidi, nana einamací diga, Jesúsna siadotimaci. Naimiena meinellena siadotimaci. ² Siadua mei, Jesúsna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fodailla rafue

³ Judas micori Jesúsna jai gaitatate. Naie illaicomini Jesúsna meiniana llwana naimie micoridi uiñuamona, ie comeci uaina meidote. Illaicominimo ie treinta diga ucubena abido atide. ⁴ Raite:

—Jesús marañede rafuena jaca finoñede. Naimie fiodaiñeite. Naimiena cue gaitatajama, marañedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵ Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llirinote raona. ⁶⁻⁷ Jusiñamui diga nanoca ñairaini naie ucubena iraiá mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicaí. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci. ⁸ Naie ucube muidona damie fodailla jira, birui naie enirue mamecidi dirue ie enirue. ⁹ Iemona Jeremías micori jaie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damierie railla jira, naimiena meinellena, treinta ucubena fecaitimaci. ¹⁰ Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

Pilato dine Jesús illa rafue (Mr 15.2-5; Lc 23.3-5; Jn 18.33-38)

¹¹ Pilato railla gobernador uicomo Jesúsna atia mei, Pilato Jesúsno jicanote:

—¿Judíuai comini illaimadio?

Jesús uai ote:

—Jii. Raise llotio.

¹² Ie mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Ie abina riidoñede. ¹³ Ie muidona Pilato naimiemo llote:

—Diga rafuena ona llogidotimaci. ¿Ni ese uai oñedio?

¹⁴ Jesús nia uai oñede. Ie jira Pilato uainicaide.

*Pilatodi Jesús fiodaillana llua rafue
(Mr 15.6-20; Lc 23.13-25; Jn 18.38-19.16)*

¹⁵ Naga año pascuá railla rafue facaiseconi cárcelmo itinomona Pilatodi comini jicacamiéna jamai jino orede. ¹⁶ Bie año cárcelmo Barrabás raillamie ite. Naimie mameci eo are soride. ¹⁷ Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiaí ite. Naimiedi Cristona jiaí mameciredé.

¹⁸ Iese jicanote; iadedi naimiedi Jusiñamui diga nanoca ñairaini Jesúri uradoillana uifote. Naimaci Jesúna meineiacanana jiaí uifote. ¹⁹ Ie majiracomu naimie nia illanona, naie facaise Pilato ai naimie dine rabe orede. Cuete: “Bimiedi marañede rafuena jaca finofede. Naimiéna duere finofeno. Jaive naio cue nicairillano, naimie muidona cue comeci jarire ite”. ²⁰ Ailluena comini Pilato dine ofillanona, Jusiñamui diga nanoca ñairainidi, einamaci diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —llotimaci. ²¹ Comini ofilla mei, naimacimo Pilato dane jicanote:

—¿Nimie cue jino oretajana jitaidomoi?

Uai otimaci:

—Barrabás.

²² Pilato dinena jicanote:

—¿Niese Jesúna cue finuana jitaidomoi? Naimiedi Cristona jiaí mameciredé.

Nana uai otimaci:

—Naimiéna cruzmo corai.

²³ Pilato dane jicanote:

—¿Nie isoide marañede rafuena finode?

Naimaci dinena ado ibi llonoidimaci:

—Naimiéna corai.

²⁴ Jesúna jino oretajana jitaiñedimaci. Iena Pilato uifnuamona, comini jai uri ifenana naimie ciuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

²⁵ Uai otimaci:

—Dama iesede. Naimie fiodaite cai muidona. Jiaí cai uruiaí muidona.

²⁶ Ie mei Pilatodi Barrabás naimaci jitailla jira, jino orede; iadedi Jesúna sechedotajanona, naimiéna coraillena orede. ²⁷ Dajerie soldaduaidi Pilato jofomo Jesúna uite. Nana soldaduái nainomo ofidimaci. ²⁸ Naimie iniroi duiñuano, naimiemo jiduirede iniroina jítadimaci. ²⁹ Eecuaimona niga nuiciraina naimie ifogimo jítadimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judíuai illaima. —Iese raillanona naimiéna jifanododimaci.

³⁰ Naimiéna tuallaítimaci. Naimie onollimo ite radosina naimaci llinocaida, naiedo naimie ifogina buta-butadimaci. ³¹ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiéna coraillena oni uitimaci.

*Jesúna coraia rafue
(Mr 15.21-32; Lc 23.26-43; Jn 19.17-27)*

³² Jerusalémona naimaci jaillanona, Cirene railla eniruemona bitimiemo dafaifidimaci. Naimie mameci Simón. Naimiena Jesús uiga cruzna rocatatimaci. ³³ Gólgota raillanomo jaidimaci. Ifocoraina eruaila jira, iese mameciredede. ³⁴ Nainomo rillanona, ie abi isirena cacaiñellena, vinomo eriredede rana faianona, naimiemo fecadimaci; iadedi iena naimie facajano, iena jiroñede. ³⁵ Naimie coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uifollena, jifanododimaci. ³⁶ Ie mei ana raidimaci, naimiemo eruaillena. ³⁷ Naimie ifogi afebeimo ie llogiduafuena jonetimaci. Iese cuega: “Bimiedi Jesús. Judíuai comini illaíma”. ³⁸ Ie mei mena firiruide iaímaiaina coraidimaci. Damie Jesús nabeimo coraica. Jiaimie Jesús jarifebeimo coraica. ³⁹ Naisodo jamai jaidino Jesúsna mameritimaci. Mamerillamona, ifogiaina jaididimaci. ⁴⁰ Raitimaci:

—Navui raisoidio: “Jusiñamui jofona judaíticue. Darui amani illanona, iena dane fnoíticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

⁴¹ Ie facaise Jusiñamui diga nanoca ñairaini naimiena mameritimaci. Moisés micori llogacino llofueraini naimiena jiai mameritimaci. Einamaci naimiena jiai mameritimaci. Raitimaci:

⁴² —Jiaie cominina jillotate; iadedi dama naimie abina jilloitanide. Naimiedi cai judíuai comini illaíma raillamiedena, cruzmona naimie ana niade billasa. Ie mei naimiena inoíticai. ⁴³ “Jusiñamui Jitodicue” naimie railla jira, naimiedi Jusiñamuina ja inotena, Jusiñamui jitaia, Jusiñamui naimiena jillotaite. —Iese naimiena mameritimaci. ⁴⁴ Naimie diga coraica iaímaiai daje isoi naimiena mameritíiaímaiai.

Jesús fiodailla rafue

(Mr 15.33-41; Lc 23.44-49; Jn 19.28-30; Heb 9)

⁴⁵ Jitoma naidai itemona, daje amani horas mona jitibicaide. ⁴⁶ Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena faínonocaidio?” raite.

⁴⁷ Iena cacajano, nainomo jamai itinomona damierie raitimaci:

—Naimie jaié Jusiñamui facaina lloraina Elíana uaidote —raitimaci. ⁴⁸ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. ⁴⁹ Ieconí jiaíno raitimaci:

—Ina nai. Dallu seda. Elías naimiena jilloitajaíbillena sedaiticai.

⁵⁰ Ieconí Jesús dane ado cuirioita, fiodaite.

⁵¹ Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconí ñuisaño suide. Iemona nofie oni bojode. ⁵² Diga raiafuaí econote. Jesús jillua mei, raiafomona, fiodaillamona, ailluena Jusiñamuina inotinodí jillodimaci. ⁵³ Ie mei Jerusalémo naimaci jaillanona, diga comini naimacina ciodimaci. ⁵⁴ Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena ciuanona, eo jacinailamona, naimie raite:

—Uanai bimiedi Jusiñamui Jito.

⁵⁵ Ailluena riñoniai naie rafuena aarena ciodimaci. Naimiena canollena, Galileamona Jesús diga navui bitimaci. ⁵⁶ Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruiai ei jiai ite.

Jesús raiafomo jonia rafue
(Mr 15.42-47; Lc 23.50-56; Jn 19.38-42)

⁵⁷ Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús dibeimo jaidimie. ⁵⁸ Jesús abina jicallena, Pilato dine jaide. Pilato “Jee” raillanona, Jesús abina naimie ollena llote. ⁵⁹ Ie mei Jesús abina cruzmona ana José uanona, jeanide mare userede iniroi diga naimie abina ferinote. ⁶⁰ Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide. ⁶¹ María Magdalena raiafo uico dine jiaie María diga rainadatiiañuaí.

Soldaduai Jesús raiafo sedaja rafue

⁶² Ie areruido, pascua railla rafue illarui, dajerie judíuai illaicomini Pilato dine jaidimaci. ⁶³ Raitimaci:

—Ero, naie abi caitadimie nia fioidañenia, navui llote: “Cue fiodaillamona, darui amani illanona, jilloiticue”. ⁶⁴ Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi ari oi raillano. Naimie abina naimaci fñanona lloitimaci: “Naimie jai jillode”. Iese suia, cominina eo jifueitimaci.

⁶⁵ Pilato uai ote:

—Soldaduai omoído oreiticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise ibaidimaci. Naiena sedallena, soldaduaína nainomo fañonocaidimaci.

28

Jesús fiodaillamona jillua rafue
(Mr 16.1-8; Lc 24.1-12; Jn 20.1-10)

¹ Sábado fuilla mei, monaiaçania, María Magdalena, jiaie María diga, raiafona jibuisaidiiañuaí. ² Ieconí ñuisaño suide. Monamona billanona, Jusiñamui jaienici raiafomo ibaica noficina oni ñuitade. Naie noficimo raide. ³ Eo queniredena eruai. Naimie iniroi eo userede. ⁴ Nainomo ite soldaduai naimiena eo jacinallamona, abi docaidimaci. Iemona fioidaitino isoi dallu itimaci. ⁵ Ie facaise naie jaienici di ñinena naie riño iañuaímo llote:

—Jaciruiñeno. Coraica Jesúsna omuiño jenuana uifotícue. ⁶ Naimie bene ñede. Naimie llua isoi, fiodaillamona naimie jai jillode. Naimie ifo jeraimo bñillano mai jibuisaibi. ⁷ Ie mei ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoí uicomo naimie jaite” llono. Bie rafue omuiño jai llotícue —llote. ⁸ Ie jira raiafomona rajjicaillanona, eo iobillanona, raire jaidiiañuaí. Ie llofueoicaigano dine aisidiiañuaí. ⁹ Ie llofueoicaigano dine iañuaí nia riñenia, Jesús iañuaímo dafaifillano, raite:

—Itomuiño. —Naimie dine iañuaí rillanona, naimiena sedallena, naimie eillina llinotiiañuaí. ¹⁰ Jesús ñinena raite:

—Jaciruiñeno. Cue llofueoicaiganomo llono: “Galileamo jai. Nainomo omoína cioiticue” llono.

Soldaduai raiafona sedademo suide rafue

¹¹ Jaidiiañuaímo, nainomo ite soldaduaímona dajerie Jerusalémo jaide, nanoca Jusiñamui diga ñairainimo nana naimacimo suide rafue llollena. ¹² Iena cacajano, einamací diga iena siadotimaci. Ie mei naie soldaduaímo ucubena fecadimaci. ¹³ Raitimaci:

—Jiaie cominimo llono: “Cai inia mei, ie llofueoicaigano ie abina fiano uitimaci” llono. ¹⁴ Iena cai gobernador fidia, naimie diga ñaiticai, omoina naimie duere finoñellena —raitimaci. ¹⁵ Ie jira naie ucubena feiñuanona, cominimo illacomini llua isoi llotimaci. Naie rafue uiñocana jaide. Birui nia iena uiñocana jaide.

*Jesús ie llofueoicaiganomo iracaiño lloga rafue
(Mr 16.14-18; Lc 24.36-49; Jn 20.19-23)*

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci. ¹⁷ Naimiena naimaci ciuanona, naimiena sedadimaci; iadedi dajerie Jesús jilluana raise nia inoñedimaci. ¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. ¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie joreño anamo naimaci illamona, naimacina bautiza. ²⁰ Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue joreño jaca iite —llote. Mai. Macaibaite. Mateodicue.

MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micorì illa rafue
(Mt 3.1-12; Lc 3.1-9, 15-17; Jn 1.19-28)*

¹⁻² Jesucristo rafuena omoïmo lloiacadicue. Naimiedi Jusiñamui Jito. Naimie rafue mare. Isaías micorì Jusiñamui facaina jaie lluamona, Juan Bautista micorì llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micorì cuete:

“Ero, o uicodo cue rafuena llollena, damiena oretaiticue” Jusiñamui raite.

³ Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

⁴ Isaías micorì llua isoi, Juan Bautista raillamie micorìdi Jusiñamui rafuena jofue iñenanomo llofuecana jaide. Cominina dafafia, naimacimo llote:

—Omoï jeacinona fainonocaida, Jusiñamui dibeïmo omoï comeciai uaiillai meido. Iemona omoï jeacinona feitaite. Omoï comeciai uaiillai omoï meidoia, cominina iena uiñotallena, mai omoï bautizallomoi.

⁵ Diga comini naimie micorì dine jai jaisoidimaci. Jerusalémoma, nana Judeamona, nana Jordán fuemona jai jaisoidimaci. Jusiñamuïmo naimaci jeacinona naimaci llua meino, naimacìdi Juan micorì bautizaga.

⁶ Juan micorìdi camello itiraijai ie nilla iniroina jitade. Igoi iena ie moiligaina jitade. Fioduaina rite. Ciifona mete. Jamai rana guite. ⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue. ⁸ Jusiñamui dibeïmo omoï illamona, jinui diga omoïna bautizadicue; ia naimie bia, naimie dibeïmo omoï jaillamona, Jusiñamui Joreña omoïmo itataite.

*Jesús bautizaja rafue
(Mt 3.13-17; Lc 3.21-22)*

⁹ Jordán dine Juan micorì nia ia, Galileamona, Nazaretmona naimie dine Jesús bite. Nainomo Jesúsdi Juan bautizaga. ¹⁰ Bautizaja mei, jinui mona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode. ¹¹ Monamona Jusiñamui llote:

—Cue isiruiga Jitodio. Ori iobidicue.

*Jesúna Taife ramo faia rafue
(Mt 4.1-11; Lc 4.1-13)*

¹² Jesús bautizaja mei, Jusiñamui Joreño jofue iñenanomo naimiena uite. ¹³ Comini nainomo iñede. Difai ocainajai itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienísai naimiena sedadimaci.

*Galileamo Jesús illa rafue
(Mt 4.12-17; Lc 4.14-15)*

¹⁴ Naie facaise Juan Bautista micorìna Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. ¹⁵ Llote:

—Jusiñamui birui omoina sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fainonocaida, omoi comeciai uaina meido. Bie rafuena mai omoi ino.

Ie llofueoicaigano jaillena, Jesúdi nagaamagamiena fetua rafue
(Mt 4.18-22; Lc 5.1-11)

¹⁶ Jaiiruido Galilea railla jorai fuemo Jesús macaritemo, menamienda ciode. Naga ie ama iaimaiaia. Damie Simón. Jiaimie Andrés. Llojjina fairaia iaimaiaia. Iese jaca naie iaimaiaiaidí maijuidiaiaiaiaia. ¹⁷ Iaimaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitaidecue. Lliciaina birui ocabitomico; iadedi cominina oitomico, cue dibeimo naimaci illena.

¹⁸ Iena cacajanona, ieconí iaimaiaia llojjina fainonocaida, naimie diga jaidiaiaiaiaia. Ie llofueganona jaillena, jaidiaiaiaiaia. ¹⁹ Lliai bai Jesús jaidemo, jiaie menamienda ciode. Naga ie ama iaimaiaia. Damie Jacobo. Jiaimie Juan. Iaimaiaia moodi Zebedeo. Botemo iaimaiaia llojjina sigaidiaiaiaiaia. ²⁰ Jesús iaimaiaia uaidote, ie llofueganona jaillena. Ie maijiraini diga iaimaiaia moona fainonocaida, botemona arí billanona, Jesús diga jaidiaiaiaiaia.

Jesúdi Janaba anamo itimie jillotaja rafue
(Lc 4.31-37)

²¹ Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judiaia ofiracomo jaide. Nainomo llofue. ²² Moisés micori llogacino llofueraia isoi llofueñede. Illaia uai isoi naimie llofuia jira, nainomo ite comini naimie llofuiamona rajicaidimaci. ²³ Janaba anamo illamie nainomo ite. ²⁴ Jesús llofuiana cacaita, Janabadi imana ado curioitate:

—Odi Nazaret ie Jesús. ¿Bue ñeacadio cai diga? Caina duere finuaibidio. Ona uiañoticue. Odi Jusiñamui ie mare fetocamiedio.

²⁵ Jesús naimiema lletade:

—Llicai. Naimiema oni jai.

²⁶ Janaba naimiema docaitajanona, ado curioillanona, naimiema oni jaide. ²⁷ Iena cianona, nana nainomo itino rajicaidimaci. Coniniri siadotimaci:

—¿Niese ite? Bimie jiaie uaido llofue. Janabamo naimie llua mei, imamona Janaba oni jaide. Janaba Jesús uaina inote.

²⁸ Iema nana Galilea eniruemo Jesús mameci are soride.

Jesús Pedro jifaiña jillotaja rafue
(Mt 8.14-15; Lc 4.38-39)

²⁹ Ofiracomona Jesús jaillanona, ie llofuegano diga, Simón jofomo jaide. Andrés nainomo jiaia jainaiade. Jacobo, Juan diga jiaia fo jaide. ³⁰ Ie facaise Simón jifaiña duide. Abi cuaride. Nainomo itino Jesúsimo naiñaiña duillana llote. ³¹ Iena cacajanona, naiñaiña dine jaillanona, Jesús naiñaiña onollina lline. Naiñaiña naidacaitade. Ieconí abi cuarilla fainonocaide. Guille finuanona, ie jofomo itinona ecade.

Jesúdi ailluena duidinona jillotaja rafue
(Mt 8.16-17; Lc 4.40-41)

³² Navuida, jitibicaidemo, Jesús dine comini ailluena duidinona atidimaci. Janaba anamo itinona jiaia atidimaci. ³³ Nana Capernaum comini naie jofu

nasemo ofidimaci. ³⁴ Jesúsdi diga duiconona ailluena duidinona jillotate. Ailluena comini Janaba anamona jillotate. Naimiena jananiai uifua jira, Jesús naimaci ñaiana rairuide.

Galileamo Jesús llofuia rafue
(Lc 4.42-44)

³⁵ Ie areruido nia monañenia, Jesús casillanona, Capernaumona comini iñenanomo Jesús jaide. Nainomo Jusifamui jüide. ³⁶ Monaia, casidemo, jofomo Jesús iñena jira, Simón, ie nabaiñiai diga, Jesúsna jenuaide. ³⁷ Baillanona, raite:

—Nana comini ona jenodimaci.

³⁸ Jesús uai ote:

—Jiaie nairaiäi dine mai cai jailli. Nainomo llofueiacadicue. Ie jira Capernaumona jino biticue.

³⁹ Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

Jesúdi efonaitimiena jillotaja rafue
(Mt 8.1-4; Lc 5.12-16)

⁴⁰ Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaia dedi, cuena jillotaredio.

⁴¹ Naimiena duenailamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadicue. Mai o jillo. ⁴² —Iecon naimie jillode. ⁴³ Ie facaise Jesús naimiena oretaiacanano, naimiemo riire llote:

⁴⁴ —O jilluana bumolloño; iadedi Jerusalémo Jusifamui jofomo Jusifamui diga ñairaima dine mai jai. O jilluana comini raise uifollena, naimiemo o abina acatajai. Moisés micori jaielloga rana Jusifamui feca.

⁴⁵ Iese Jesús naimiemo llote; iadedi Jesús finoca rafue locana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

2

Jesús tisitaitimiena jillotaja rafue
(Mt 9.1-8; Lc 5.17-26)

¹ Nigarui illanona, Capernaumo Jesús dane abido ride. Comini iena fidianona, ² ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusifamui rafuena llofue. ³ Cominina Jesús llofuetemo, naimie dine nagaamagamie ie biiramo biide tisitaitimiena atidimaci. ⁴ Ailluena comini illa jira, Jesús dine naimaci rinidimaci. Naie jofobibanilla jira, jofomodomo a jaidimaci. Jofobeicimo ite tidabacuido a jaidimaci. Jofomodo econuano, Jesús ecimo naimiena ie biiramo biide diga, rao diga, ana ñuitadimaci. ⁵ Iena Jesús ciuanona, tisitaitimie jilluana naimaci inuana Jesús uifote. Tisitaitimie llote:

—Nabai, o jeacino cue feitaja jira, iena jai oni dotadicue. Ie facai ibana jai ofeiticue.

⁶ Nainomo itinomona damierie Moisés micori llogacinona llofueraini nainomom raidimaci. Comecina facadimaci: ⁷ “¿Ñiese bimiedi iese llote? Dama Jusifamui jeacina dotarede. Bimie Jusifamuiñede; ia Jusifamui ifomo

iacade. Jusiñamuina jai jeare ñaite”. ⁸ Naimaci comeciái facajacinona Jesús uñuanona, naimacimo jicanote:

—¿Bue ñellena omoi comeciaina iese facadomoí? ⁹ Bimiemo: “O jeacinona jai oni dotadícue” cue lloia, cue uai siñonana uññoñetomoi; ia bimiemo: “Mai naidacaillanona, o biira ferinocaida, mai macari” cue lloia, cue uai siñonana uññoitomoi. ¹⁰ Monamona jaié cue billanona, imana jaidícue. Ie jira jeacino oni dotaja uai cuemo ite. Iena omoi uññollena, tisitaitimie lloiticue: ¹¹ “Mai naidacái. O biira ferianona, o jofomo mai jai”.

¹² Iese naimie raillamona, tisitaitimie jillode. Naidacaida, ie biira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedícai.

Jesúdi Levína fetua rafue
(Mt 9.9-13; Lc 5.27-32)

¹³ Jiairuido jorai fuemo Jesús dane jaide. Ailluena comini naimie dine ofillanona, naimacina llofuede. ¹⁴ Llofuia mei, Jesús bai macaritemo, Leví raillamiéna ciode. Levídi Alfeo jito. Gobierno ucube ouillanomo naimie maijiuide. Nainomo raídéna Levína ciode. Naimiemo llote:

—Cue llofuegamiéna o jaillena, cue diga bi. —Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraíni nainomo guisaibitimaci. Moisés micori llogacinodo raise jaiñédino jiai guisaibitimaci. ¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraíni diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci.

¹⁷ Iena cacajano, Jesús llote:

—Ecairedinodi médicona jitaiñédimaci; ia duidinodi médicona jitaídímaci. Ie isoide. Mareuidino cuena jitaiñédímaci; ia maraiñédino cuena jitaídímaci. Jusiñamui díbeimo mareuidinona uaibiñédícue; iadedi maraiñédinona uaibiticue. Omoimona maraiñédino diga nabairiticue; ia naimacina uaibiticue.

Jesúmo comini guiñenana jicanua rafue
(Mt 9.14-17; Lc 5.33-39)

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamaci llua isoí, Jusiñamuina naimaci raise iobitallena, guiñenaruillai illa facaiseoni Juan Bautista llofueoicaigano guiñédímaci. Naimaci jeacino facaina sunaicabitimaci. Fariseuai llofueoicaigano iedo jiai jaidímaci; ia o llofueoicaigano jaca guitimaci. ¿Bue ñellena cai einamaci rafuedo jaiñédímaci?

¹⁹⁻²⁰ Jesús uai ote:

—Jaié rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñédímaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire

itímaci. Ico cue jaille mei, sunaitímaci. Ie muidona birui cue llofueoicaigano guicabitímaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jillíñega. Jilliadi jocua mei, comue iniroi jacaie iniroimona fo lllirite. Eo fodo cuararite. Jai maraiñeno cioite. ²² Jacagomona finoca bolsa como finoca vino joneñega. Jonegadena, mairiñena jira, sirillamona igoí raire cuararite. Vino faifite. Igoí jiaí faifite. Como finoca vino comogomo jonelle. Iemei iena faifiñeite. Ie isoide. Omoi einamaci rafue ifomo jiaie rafue birui ite. Iena omoimo llocabitícue. Iedo jaidicai —llote.

*Sábadoruimo Jesús llofueoicaigano maijia rafue
(Mt 12.1-8; Lc 6.1-5)*

²³ Jiairuido sábadoruimo Jesús, ie llofueoicaigano diga, trigo illa illi motodo joide naisonaa jaide. Ie llofueoicaigano trigona tijiano, guicana jaidímaci. ²⁴ Dajerie fariseuai iena ciuano, llotímaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidímaci. Iese cai abimo jeacinona jai finodímaci.

²⁵ Ie llofueoicaiganona riiduano, Jesús uai ote:

—Cuemona jeacino finoñedímaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jaila mei, Jusiñamuimo fecaca llomenicona uanona, guitímaci. Jamai bue isoidino naie llomenicona guillana Jusiñamui rairuide. Dani Jusiñamui diga ñairaini iena guiredímaci. Ie nabaiñiai diga, David micori iena guite; ia Jusiñamui naimacina duere finoñede. ²⁷ Jusiñamui sábadona finuamona, sábadó ite, nairui illamona comini caimare illena; ia omoi llofuiamona, iese iñedímaci. Nairuimo rairuica rana finoñellena, comini iese illena llofuecabitomoi. ²⁸ Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

3

*Jesúdi onollina idisarodimiena jillotaja rafue
(Mt 12.9-14; Lc 6.6-11)*

¹ Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite. ² Nainomo itino Jesús eruaidímaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadímaci. Sábadoruimo bu maijia, naimacimona jeacino finode. ³ Onollina idisarodimiemo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuena birui omoi meineiadedi, birui marañede rafue finodomoí. Sábadoruimo, ¿nie isoide rafue finuana rairuidomoi?

Comini dinena uai oñedímaci. ⁵ Naimie uaina naimaci inoñena jira, riicaillanona, Jesús naimacimo erodate. Duidimiemo llote:

—O onolli mai oni ñuita.

Iena oni ñuitajamona jillode. ⁶ Iena ciuanona, fariseuai jino jaidimaci. Naimiena meinellena, illaïma Herodes ðibeimo itinona baïllanona, naimaci ðiga coniniri siadotimaci.

Jorai fuemo Jesús ði ailluena cominina llofuia rafue

⁷ Naie nairaimona jorai fuemo Jesús, ie llofueoicaigano ðiga, oni jaide. Galilea railla eniruemona ailluena comini naimie ðine bitimaci. Judea mona jiaïno bitimaci. ⁸ Jerusalémona, Idumeamona, Jordán ruicafabellemona, Tiro jinofemo ite eniruemona, Sidón jinofemo ite eniruemona ailluena bitimaci. Nana naimie siño finoca rafuena cacajanona, naimiena cioacadimaci. ⁹ Comini naimiena meetasi raïllanona, ie llofueoicaiganomo daje botemo naimie jaïllena eenogana llotte. ¹⁰ Ailluena duidinona naimie jai jillotaja jira, nana duidino naimiemo riacadimaci. Jilloïllena naimiena jetaacadimaci. Iemona naimie illa bote eenuana jitaide. ¹¹ Jananiai anamo itino Jesúsna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui Jitodio. ¹²—Ia Jesús naimiena naimaci lluana rairuide.

Jesús ði ie doce llofueoicaiganona fetua rafue

(Mt 10.1-4; Lc 6.12-16)

¹³ Naie facaise anedumo Jesús jaide. Ie jitaïllano ðiese naimie ðine uaidote. Naimie ðine billa mei, ¹⁴ doce ðigamiëna fetode. Naimie ðiga jaicabïllena, naimacina fetode. Ie rafuena lloïllena, naimacina oretaiacade. ¹⁵ Janaba anamo itinomona Janabana oni oretallena, ie uai naimacimo ite. ¹⁶ Iese mameciredimaci: Simón; naimie mameci jiaicidi Jesús jítaca Pedrona. ¹⁷ Jacobo, Juan; iaimaia; Zebedeo jito iaimaia. Jiaie mameci iaimaiaïna Jesús jonete Boanergesna. Naie mameci oni ðobaiñuamona mona guruama. Icïruruilla jira, iese mamecirediaïmaia. ¹⁸ Andrés, Felipe, Bartolomé, Mateo, Tomás, jiaie Jacobo; naimie ði Alfeo jito. Tadeo, jiaie Simón; naimie ði cananista comini facaisemo ðuide. ¹⁹ Judas Iscariote micori; naimie ði Jesúsna gaitatimie.

Fariseuai Jesúsna jeare ñaia rafue

(Mt 12.22-32; Lc 11.14-23; 12.10)

²⁰ Ie llofueoicaiganona fetua mei, ie risoïlla jofomo naimaci ðiga Jesús abido jaide. Ailluena comini naimie ðine billa jira, naimie guïllena, naimie abe juanide. ²¹ Naimiena ie comini fidiano: “Naimie ði jai uairico isoi iacide” raïllanona, começina facadimaci. Ie jira naimiena ie ei jofomo isaïbiacadimaci. ²² Jerusalémona Moisés micori llogacinona llofueraini naie facaise billanona, raitimaci:

—Beelzebú ði Janaba comini. Beelzebú anamo Jesús illamona, Beelzebú uaido Janaba illa cominimona Jesús ði Janabana oni oretate —raitimaci.

²³ Naimaci raïllana naimie cacajanona, naimie ðine Jesús naimacina uaidote. Llotte:

—Janaba ðibeimo Beelzebú illamona, dama ie abina oretanide. ²⁴ Ero, daje isoi começiaïna lloïñenamo daje nairai facañenia, danomo maijinidimaci. Oni jaidimaci. ²⁵ Daje isoi começiaïna lloïñenamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaïna omoi llua isoi cue oretai, Janaba ie ðibeimo itino ðiga jai nabairiñede. Iemona naimie comini danomo iñeitimaci. Ie uai ieconi saite. ²⁷ Ero, mairidimie ie jofomo ite rana nibai fiñacadomoi. Iena fiïllena, naimiena nano raise omoi maiga. Raise maiga mei, ie rana fiñedomoi. Ie

isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. ²⁸ Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; ²⁹ iadedi naimiedi ie Joreñona jeare ñaiacinona jaca dotañeite. Jusiñamui iena jaca feitañeite —llote.

³⁰ —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

Jesús ie comini
(Mt 12.46-50; Lc 8.19-21)

³¹ Jesús comini naimie dine rillanona, naimie diga ñaiacanano jino naidaidimaci. ³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

³³ Jesús dinena uai ote:

—¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

—Jadi, cue ei, cue amatiai. ³⁵ Jusiñamui jitaillacinona finodimie cue amana, cue miriñona, cue eina. Imaci ua cue cominina.

4

Jesúdi trigona judaidimiena llua rafue
(Mt 13.1-9; Lc 8.4-8)

¹ Jaiaruido jorai fuemo dane jaillanona, ailluena comini naimie dine ofillamona, Jesús naimacina llofuede. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci. ² Ailluena rafuena naimacina llofuede. Raite:

³ —Omoi fueollena, bie rafuemo raise cacarei. Damie trigona judaiaide.

⁴ Naimie judaiamona, naisomo janore iduai juide. Naimie bai jailla mei, silliniái iena guisabitimaci. Ie jira sicoñede. ⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona riarra eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo treinta diga llisillana ote. Jiaianamona sesenta diga llisillana ote. Jiaianamona cien diga llisillana ote. ⁹ Omoi jeforena jira, raise fueollena, cue lluomo cacarei. Iena iino.

Jesús ie como lloga rafuena llofuiia rafue
(Mt 13.10-23; Lc 8.9-15)

¹⁰ Ailluena cominimona jailla mei, naimie diga jaisoidinodi, ie doce llofueicaigano diga, Jesúmo ie llofuiiana jicanotimaci. ¹¹ Uai ote:

—Jusiñamuidi omoína ie sedaacana rafuena jai uiñotade. Jiaie iena uiñofedomoi. Jiaie cominina iena nia uiñotañede. ¹² Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci iñoñena jira, uiñoñoño jaitimaci. Cue llofuiiana jamai cacadimaci; iadedi naimaci iñoñena jira, raise cacaiñedimaci. Uiñoñedimaci. Jusiñamui ðibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. ¹³ Cue como llofuiacinona omoi raise cacaiñenia, dane cue llofuiia, iena jai raise nibai cacaiñeitomoi; ¹⁴ ia iena omoína llofueiticue. Trigona

judaídímiedi Jusiñamui rafue lloraima isoide. ¹⁵ Dajerie iduai naisomo juide. Dajerie comini comeciai naie naiso isoidímaci. Jusiñamui uaina cacadímaci; ia Taife naimaci comeciaimo cacaja uaina ñnotañede. ¹⁶ Jiaie iduai nofiemo juide. Dajerie comini comeciai naie nofie isoidímaci. Jusiñamui uai nano naimaci cacaia, iena caimare feiñotímaci. ¹⁷ Nofiemo riga iduai jainonidedi raise sicoñede. Naie comini janore ñnua jira, ie isoidímaci. Dallu nano ñnotímaci. Jusiñamui uai muidona duere naimaci sefua, abido danomo uaidímaci. ¹⁸ Jiaie iduai eecuai illanomo juide. Naie iduai sicua mei, iena eecuai ibailla jira, raise llisñede. Dajerie comini comeciai naie illano isoidímaci. Jusiñamui uaina cacadímaci. ñnotímaci; ¹⁹ iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedímaci. ²⁰ Jiaie iduai mare eniruemo juide. Dajerie comini comeciai naie enirue isoidímaci. Jusiñamui uaina cacajano, iena raise feiñotímaci. Eo lliside isoidímaci. Jusiñamui jitaille rafuena finocana jaidímaci. Dajerie janore jaidímaci. Dajerie eo jaidímaci. Dajerie ua eo raise jaidímaci. Iese omoi jai.

Jesúdi lamparina ñaia rafue
(Lc 8.16-18)

²¹ Jorai fuedo Jesúdi cominina nia llofuete:

—Jai uneca lamparín jiaie illanomona atia mei, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. ²² Ie isoide. Cue rafue llocana jaia, comini comeciai iticinona uiñotade. Unaicino naimaci cacajamona, damierie ñnotímaci. Damierie ñnoñedímaci. ²³ Omoi jeforena jira, raise fueollena, cue lluomo cacarei. Iena ñno.

²⁴ Cue lluomo raise cacarei. Omoi cacaja diese Jusiñamui omoína uiñotaite.

²⁵ Iena omoi ñnoia, Jusiñamui omoína canoite. Omoína uiñocana jaitaite. Jiaimie iena janore cacajamona, iena ñnoñenia, Jusiñamui naimiena fañfitaite.

Jesúdi Jusiñamui ie cominina sedaacana llofua rafue

²⁶ Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide. ²⁷ Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñofede; ²⁸ ia eniruemona nano sicode. Monaila mei, lliside. Iemona naicuai comuide. ²⁹ Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

Jesúdi mostaza ido llua rafue
(Mt 13.31-35; Lc 13.18-19)

³⁰ Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitímaci. ³¹ Jiaie rafuedo iena omoimo lloiticue. Damie mostaza idona rillamona, naiemona eo aillue riarar sicode. Mostaza ido eo janorede; ³² iadedi sicua mei, eo aillue riarar jaillamona, ie onogailla; jegairiena jira, icairo anamo manaidinomo silliniñai jicaiciaina finodímaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitímaci.

³³ Naie isoide rafuaido Jesúdi Jusiñamui ie cominina sedaacana rafuena cominimo lloste. ³⁴ Naimaci cacaja diese lloste. Naimacimo jiaie rafuedo lloñede; ia ie llofueoicaiganomo iena eneno llofuede.

Jesúdi jorai baguana llicaitaja rafue
(Mt 8.23-27; Lc 8.22-25)

³⁵ Ailluena comini llofuia mei, jitoma jai sojicaidemo, ie llofueoicaiganomo Jesús lloste:

—Ruica enefebeimo mai cai jailli.

³⁶ Cominina fañonocaida, botemo naimie jai illamona, naimie llua isoí, oni jaidimaci. Jiaie botes jiai jaide.

³⁷⁻³⁸ Bai jaillanona, jillacimo Jesús inide. Ie ifogi almohadamo biide. Ie facaie aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinailamona, Jesúna casitatimaci. Raitimaci:

—Maestro, ¿niese itio inioilla? Caina cano. Jai buisaidicai. Corobaisaidicai.

³⁹ Naimie casillano, aifina lletade. Jinui baguana llicaitade. Ieconí aifi llicaitade. Bagoñede. ⁴⁰ Ie llofueoicaiganomo jicanote:

—¿Bue ñellena jacinaitomoi? ¿Niese cuena raise inoñedomoi?

⁴¹ Uai oñeno eo rajjicaidimaci. Coniniri ñaitimaci:

—Bimiedí ¿nie isoidimie? Aifi naimie uaina innote. Jorai naimie uaina jiai innote. —Bai jaillanona, ruica ñine ridimaci.

5

Jesúdi Gadara railla eniruemo illa rafue
(Mt 8.28-34; Lc 8.26-39)

¹ Ruica ñine naimaci ridemo, Gadara railla eniruemo sijidimaci. ² Botemona ari Jesús jaidemo, naimie ñine damie bite. Naimiedí Janaba anamo itimie. ³ Comini raioillanomo noñie moto ifuaimo naimie i-isoide. Janaba anamo naimie illamona, comini diga marena jaca irainide. ⁴ Diga icaiño lloeo diga ie onollidí maiga; iadedí oni ecocaida, lloeoña ticonote. Ie eilli jiai maiga; iadedí saitaicaida, lloeoña ticonote. Ie jira buna naimiena raise mañide. ⁵ Nagarui noñie motomo ite. Anedumo jaisoide. Cuirí-cuirisoide. Dama ie abina noñicí diga jaidode. Iese naimie isoide. ⁶ Noñiemona Jesúna ciuanona, aisicana Jesús ñine bite. Naimiena sedallena, ie cañicí ifodo ana rainadate. ⁷⁻⁸ Jesús lloste:

—Janaba, bimiemona oni jai.

Janabadi imana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoñeno.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

¹⁰ Bie illanomona naimacina oretañellena Jesúmo duere jicanotimaci.

¹¹ Naie facaie nainomo ite anedumo ailluena chanchuai itimaci. ¹² Chanchuai abimo naimaci jaillena Jesúmo duere jicanotimaci. ¹³ Jesús ñinena:

—Jee —raite. Ieconí iima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconí jillacimo joraimo chanchuai aisiano corobaisidimaci.

¹⁴ Iena ciuanona, chanchuai sedarainí naimaci nairai ñine aisicana jaidimaci. Naie rafuena llocana jaidimaci. Ie jira diga comini jaide, naie

rafuena raise fidillena. ¹⁵ Jesús dine naimaci ridemo, jaive Janaba anamo illamiéna Jesús ecimo raillana ciódimaci. Naimie iniroina jai jitade. Naimie jai uairicoñede. Iena cuanona, Jesúsna jaciruitimaci. ¹⁶ Naie rafuena ciódiño jaive Janaba anamo illamie jilluana llotimaci. Chanchuaímo suide rafuena jiai llotimaci. ¹⁷ Naie enirue itinodi Jesúsno naimaci eniruemonona oni jaillena duere jicannotimaci.

¹⁸ Botemo Jesús jaiacania, jaive Janaba anamo illamie Jesúsno jicante, naimie diga jaillena; ¹⁹ ia Jesús raite:

—Dama ite. O nabaiñiai dine jai. Nana Jusíñamui omo finoca rafuena naimacimo llono. Jusíñamui ona duenaillana naimacimo llono.

²⁰ Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini raijicaidimaci.

Jesúsdi mena duide riñona jillotaja rafue
(Mt 9.18-26; Lc 8.40-56)

²¹ Ruica díbeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia, ²² Jai rona mameciredimiedi Jesús dine bite. Naimiedi judíuai rafue ofiraco sedaríma. Jesúsno duere jicantollena, ana bitadate. ²³ Duere jicante:

—Cue jisa jai fiódaicade. Cue jofomo cue diga bi, o onolli naiñaiñomo o jonellena, naiñaiño jilloillena.

²⁴ Iena cacajano, ie llofueoicaigano diga, naimie diga Jesús jaide. Ailluena comini Jesúsno ñaijillanona jaidimaci. ²⁵ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. ²⁶ Diga manorainimona duere sefuide. Jilloñede; ia fodo jaide. Nana ie ucube jiai fuite. ²⁷ Jesús duidinona jilluana naiñaiño fidiamona, jinafo dinena billanona, naimie iniroina jetade. ²⁸ “Naimie iniroi cue jetajamona jilloiticue” comecina facajamona, naiñaiño naimie iniroina jetade. ²⁹ Ieconí diailladi faionocaide. Ie abi jilluana naiñaiño jai uíñote. ³⁰ Ie abimona ie uai oni jaillana Jesús uíñuanona, dobaicaide. Cominimo jicante:

—¿Bu cue iniroina jetade?

³¹ Ie llofueoicaigano dinena uai otimaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

³² Raise uíñollena, Jesús ie ecimo itinomo erodate. ³³ Duidiñaiño ie jilluana uíñua jira, Jesús dine jacirucana bite. Naimie uicomo ana bitadajanona, nana naiñaiñomo ite rafuena llote. ³⁴ Naiñaiño Jesús llote:

—Ñoo, cuena o ñnua jira, jai jillodio. Mai marena o jai. O duicomona jai jillobidio.

³⁵ Naiñaiño diga Jesús nia ñaitemo, Jairo jofomona jiaíno bite. Jairo mo llote:

—O jisa jai fiódaite. Maestrona ñaidoñeno.

³⁶ Iena cacajano, Jairomo Jesús llote:

—O comeci jarire iñeno; ia cuena nia ñno.

³⁷ Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. ³⁸ Jairo jofomo rillanona, nainomo itino eecuinaillana cacade. Failliñaiñana cacade. ³⁹ Jesús fo jailla mei, nainomo itinomo jicante:

—¿Ñiese itomoi eecuinailla? Cuemona naiñaiño fiódaíñedesá. Jamai inide.

⁴⁰ Iena cacajano, naiñaiño jai fiódaite uíñuamona, Jesúsni jaisitimaci. Naimacina Jesús jino oretaja mei, nai jitaíño moo diga, naiñaiño ei diga,

ie llofueoicaigano diga, naiñaiño ecimo Jesús jaide. ⁴¹ Naiñaiño onollina llinocaida, judíuai uaido raite:

—Talita, cumi. —Iena oni dobañuamona: “Jitaibici, mai naidacai” raite.

⁴² Ieconí jilluanona naidacaide. Jai jilluano macarite. Naiñaiño mo doce aña jai ite. Nana nainomo itino ieri eo rajicaidimaci.

⁴³ —Bumo bie rafuena lloñeno —naimacimo Jesús llote. Guillena naiñaiño ecajana jiai llote.

6

Nazaretmo Jesús illa rafue

(Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano diga Nazaretmo ride. ² Rilla mei, sábadoruimo nainomo ite ofiracommo llofue. Iena cacañanona, nainomo itino rajicaidimaci. Raitimaci:

—¿Niese eo abina uñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie. ³ Naimiedi amederaima. María jito. Ie amataidi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.

⁴ Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotate; ⁶ ia naimaci ñnoñenari rajicaide. Ie mei diga nairaimo Jesús llofuecana jaide.

Jesúdi ie llofueoicaiganona oretaja rafue

(Mt 13.53-58; Lc 4.16-30)

⁷ Ie doce llofueoicaiganona Jesús uaiduanona, naimacimo ie uai ñnocaide, jananiai anamona cominina jilloitallena. Ie rafuena lloñena, jiaie illanuaimo naimacina menamierie oretaiacade. ⁸ Raite:

—Ailluena rana uñeno. Omoi abi riidollena, jiguidana uñeno. Llomeniconu uñeno. Ailluena rana omoi uñellena, bolsana uñeno. Ucubena uñeno. ⁹ Zapatona jitajano jai. Abi omoi meidolle iniroina uñeno. ¹⁰ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i. ¹¹ Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uñollena, omoi eilliaina jaidino.

¹² Jesús naimacimo llua mei, jaidimaci.

—Omoi jeacinona fainonocailanona, Jusiñamui díbeimo omoi comeciái iuai meiduana omoi jai —llofuecana jaidimaci. ¹³ Janaba anamo ite cominimona Janabana oredimaci. Duidino abimo farena gia mei, naimacina jillotate.

Juan Bautista micori fiodailla rafue

(Mt 14.1-12; Lc 9.7-9)

¹⁴ Jesús mameci are sorilla jira. Herodes railla gobernador Jesús finoca rafuena fide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

15 Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

16 Jesúna fidiano, Herodes comecina facade: “Juan micori ie ifogina navui jaitaticue. Fiodaillamona naimie jai jillode”.

17-18 Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

19 Ie muidona Herodías dinena Juan Bautista micorina jearuide. Naimiena meinetaiacade; 20 ia finonide, Juan Bautista micorina Herodes jaciruilla jira. Naimiedi Juan micorina mareuidimiena uñote. Naimie Juan micori Jusiñamui rafuendo jaillana jiai uñote. Ie muidona naimie Juan micorina raise eenote. Diga icaiño naimie micori lluaana cacade. Iena gaide; ia iena raise cacaiñede. Ie muidona Herodías naimie micorina meinetanide; 21 ia ja muidomo naiñaiño sedallirui ride. Herodes cumpleños ie rafuena finode. Ailluena illaicominina ie rafuemo uaidote. Eo ucuberedinona jiai uaidote. 22 Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. 23 Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

24 Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

25 Herodes dine raire abido billanona, llote:

—Juan Bautista ifogi bandejamo ja jonecaida, cuemo ine.

26 Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacañede. 27 Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. 28 Bandejamo naimie ifogi jonecaida, iena atiano, Herodías jisamo fecade. Ieconi ie eimo fecade. 29 Iena fidianona, Juan micori llofueoicaigano naimie micori abina uai bitimaci. Iena raitimaci.

*Jesús cinco mil iñiaina eaja rafue
(Mt 14.13-21; Lc 9.10-17; Jn 6.1-14)*

30 Jesús llofueoicaigano abido bia, Jesúmo nana naimaci finoca rafuena llotimaci. 31 Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

32 Ie muidona botedo comini iñenanomo dani jaidimaci. 33 Ailluena comini naimaci oni jaillana ciodimaci. Naimacina uñuamona, diga nairaiamona aisicana jaidimaci. Jesús nia riñenia, uicodo ie jaillanomo ridimaci. 34 Jesús sijianona, ailluena cominina ciede. Naimacina sedallena bu iñena jira, toica llauadaiana sedaraima iñena isoi, isoidimaci. Iena uñuamona, Jesús naimacina duenaite. Ailluena rafuena naimacina llofue. 35 Jitoma ana itemo, ie llofueoicaigano naimie dine llua bitimaci. Raitimaci:

—Jofue bene iñede. Jaca buedi iñede. Jai navuiacade. ³⁶ Comini mai abido oreta. Ianori ite nairaiamo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

³⁸ Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

³⁹ Iena cacajano, cominimo raitie illanomo dajerise ana raillena Jesús llote. ⁴⁰ Naimaci cien digamierie ana raisite. Jiaino cincuenta digamierie ana raisite. ⁴¹ Naie cinco llomenicon, naie mena lliciai diga, Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade. ⁴² Nana guillanona monidimaci. ⁴³ Monillamona, fiebide guillena iraidimaci. Doce cirigaiamo oruitatimaci. ⁴⁴ Cinco mil iñiaiai diese guitimaci. Naimaci ainiai, imaci uruiaiai diga, jiai guitimaci.

Jesús jinui emododo macarilla rafue

(Mt 14.22-27; Jn 6.16-21)

⁴⁵ Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote. ⁴⁶ Cominina facadua mei, aneduaimo dane jaide, Jusiñamui diga ñaillena. ⁴⁷ Jitibicaidemo, nainomo dama ite. Ie llofueoicaigano jorai motomo jai itimaci. ⁴⁸ Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide; ⁴⁹ ia naimiena naimaci ciuanona, comecina facadimaci: “¿Bu joreño caimo billana ciodicai?” ⁵⁰ Naimiena ciuamona, nana jacinuillamona cuirioidimaci. Naie dacaiño Jesús naimacimo llote:

—Omoi joreñonicañeno. Cuesa. Jaciruiñeno.

⁵¹ Botemo Jesús jaide. Ie facaise aifi lliciaide. Ieri eo rajicaidimaci.

⁵² Janore guillemona ailluena cominina naimie ecajana jaive ciodimaci; ia naimie uai siñonana nia raise uiñoñedimaci. Naimiena nia raise inoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci. ⁵⁴ Botemona ari jaidemo, nainomo itino Jesúsna uiñotimaci.

⁵⁵ Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atiuuidimaci. ⁵⁶ Diga nairaiamo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

7

Jesúdi comini comeciaina ñaia rafue

(Mt 15.1-20)

¹ Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiai bitimaci. ² Jesús llofueoicaiganomona

damierie naimaci isoi guiñenana ciodimaci. ³⁻⁵ Fariseuai dinena Jesúmo jicanotimaci:

—¿Bue ñellena omoi llofueoicaigano cai einamaci rafuedo jaiñedimaci? Naimaci guiacania, naimaci onolli cai einamaci llua isoi, raise jocoñedimaci. Ie jira cai abimo jeacino finodomo.

Iese jicanotimaci, naimaci einamaci rafuedo naimaci jailla jira. Maraiñede rafue naimacimo suiñellena, iese ailluena judíuai jaidimaci. Naimaci guiacania, naimaci einamaci llua isoi, onollina diga icaiño jocuano, guitimaci. Mercadomona bia, naimaci einamaci llua isoi, abina lleredimaci. Naimaci einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona maraiñede. Naimie caina duere finoite”. Jearede rafue naimaci abimo ofñellena, iese finoidimaci.

⁶ Jesús uai ote:

—Mareuidinona abi caitauidnodomo. Isaías micori jaie omoina raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicaí” llotimaci.

Jamai ñaitimaci. Naimaci comeciai cue dibeimo raise iñede.

⁷ Cue uai itena, jamai comini llucina naimaci llofuecabilla jira, tainona cuena sedadimaci

cuete. ⁸ Isaías micori llua isoi itomoi. Jusiñamui llogacinona fainonocaida, omoi einamaci rafuedo jaidomoi. ⁹ ¿Bue ñellena nana Jusiñamui llogacinodo jaiñedomoi? Omoi einamaci llogacinodo jaidomoi; iadedi nana Jusiñamui llogacinodo raise jaiñedomoi. ¹⁰ Moisés micori jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ¹¹⁻¹² Iese Moisés micori llote; iadedi omoi einamaci llotimaci: “Jusiñamuimo cai ucubena cai fecajamona, cai moonona, cai eina jai canonicadicaí”. ¹³ Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

¹⁴ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue llamo cacarei. ¹⁵ Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi. ¹⁶ Omoi jeforena jira, raise fueollena, cue llamo cacarei. Iena ñno.

¹⁷ Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci. ¹⁸ Uai ote:

—¿Ñiese cue llua jiai nia cacaiñedomoi? Ñie isoide ra guitomoina, omoi comeciaino jeare iñede. ¹⁹ Omoi comeciaino jaiñede; ia omoi jebemo jaide. Ie mei omoi abiamona jino bite.

Jesús llua mona, nana guille radi mare uiñoticai. ²⁰ Jesús llote:

—Omoi comeciaina jearena jira, jearede rafuena finocabidomoi. ²¹ Omoi comeciaina jearena jira, jeare comeciaina facacabidomoi. Omoi aiñede riño diga icabitomoi. Omoi iniñede ñima diga icabitomoi. Fñricabitomoi. Cominina meinecabitomoi. ²² Jiai comini rana nicidocabitomoi. Jearede

rafuena finocabidomoi. Iena ebiruitomoi. Jifuericabidomoi. Abina uradoicabidomoi. Jiaie comini joreñona jeare ñaicabitomoi. Abina iedocabitomoi. Ebena jaicabidomoi. ²³ Bie isoidicinuai omoi comeciaino illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuiñede.

Jesúdi judío iñaiñoñediñaiñoña jillotaja rafue
(Mt 15.21-28)

²⁴ Nainomona Jesús jaillanona, Tiro railla eniruemo jaide. Sidón railla eniruemo jiai jaide. Nainomo jofomo jaillanona, iena buna fidiana jitaiñede; ia iena janonide. ²⁵⁻²⁶ Ie facaise judío iñaiñoñediñaiño ñaño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidiana, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade. ²⁷ Judíuaiñedinona naimie canoñenana naiñaiño uiñollena, naiñaiño mo Jesús llote:

—Uruiai guillamona jiconiaina ecadicaidena, maraiñede. Uruiai nano ecadicaí.

²⁸ Naiñaiño ñinena uai ote:

—Jii, maestro; iadedi jiconiaidi uruai guillamona fiebide guillemona guitimaci. —Iese llote; ia jiaie rafuemo comeciaina facade. Uruiaína llote; iadedi judíuaimo comeciaina facade. Jiconiaina llote; ia judíuaiñedinomo jiai comeciaina facade. Comeciaina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁹ Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa biramo biidena ciode. Janaba naiñaiño mona oni jaillana jai uiñote.

Jesús jefona cacaiñedimiena jillotaja rafue

³¹ Tiro railla eniruemonona Jesús oni jaide. Jaillanona, Sidón railla eniruemo jaide. Decápolis railla eniruemo jiai jaide. Ja muidomo Galilea railla jorai fuemo ride. ³² Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci. ³³ Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade. ³⁴ Jusíñamui dine monamo eruaita, naimiena duenaillamona, jafaicína faite. Judíuai uaido naimiemo llote:

—¡Efata! —Oni dobaíñuamona: “¡Ecorical!” raité.

³⁵ Ieconí ie jefodi ecoricaide. Jai raise cacade. Jai raise ñaite. ³⁶ Cominimo:

—Bimie jai jilluana bumo lloño —Jesús diga icaiño llote; ia naimie uaina iñoñedimaci. Iena llocana uitimaci. ³⁷ Naimieri eo raijicaidimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

8

Jesúdi cuatro mil iñiaina ecaja rafue
(Mt 15.32-39)

¹ Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raité:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue,

naisomo naimaci baii raillano. Naimacina cue duenailla jira, naimacina canoiacadicie.

⁴ Jicanotimaci:

—¿Niese naimacina bene ecaiticai? Jofue iñenanomo iticai.

⁵ Jesús jicanote:

—¿Niga llomenico omoimo ite?

Uai otimaci:

—Siete.

⁶ Comini ana raillena Jesús lloste. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. ⁷ Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús lloste. ⁸ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ⁹ Nainomo cuatro mil iñiaiai guitimaci. Naimaci ainiaiai, imaci uruiaiai diga, jiaiai guitimaci. ¹⁰ Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

Fariseuai comini Jesúsno siño rafuena finuana jicanuano billa rafuena

(Mt 16.1-4; Lc 12.54-56)

¹¹ Dajerie fariseuai comini Jesús dine bitimaci. Naimie uaina uaitaia-cadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

¹² Sunaillanona, Jesús jafaicai faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

¹³ Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

Jesús siritate rana llofuiia rafue

(Mt 16.5-12)

¹⁴ Ruica dine rilla mei, Jesús llofueoicaigano llomeniconona feillana uibiñotimaci. Naimacimo daje llomenico ite. ¹⁵ Iena naimie uiñuamona, naimacimo Jesús lloste:

—Fariseuai siritate ramona abina rairui. Illaima Herodes siritate ramona abina rairui. —Iese Jesús lloste; iadedi naimaci llofuiacinomona abi rairuil-lena ñaite.

¹⁶ Jesús iese llua jira, iena naimaci raise cacaiñena jira, dani coniniri siadotimaci:

—Llomeniconona cai atañena jira, caimo iese lloste.

¹⁷ Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Niese cuena iñoñedomoi? Cuemo siño uai illana nia raise cacaiñedomoi. ¹⁸ Uisiredomoi. Jeforedomoi. ¿Niese cue navui siño finoca rafuemo comeciaina facañedomoi? ¹⁹ Navui cinco mil iñiaiai cinco diga llomeniconona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

²⁰ Jesús lloste:

—Jiaicaiño cuatro mil iñiaie siete diga llomenicono guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

²¹ Jesús dinena jicannote:

—¿Niese cuena nia raise iñoñedomoi? Siño uai cuemo illana nia raise iñoñedomoi.

Jesús uisnidimiena jillotaja rafue

²² Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisnidimiena atide. Naimiena jilloitallena, naimiena jetallena, Jesúmo jicannote. ²³ Iena Jesús cacajanona, ie onollina linuanona, nairai illa jinofemo uisnidimiena uite. Ie mei ie uisina tuade. Ie uisina jiaie jetade. Naimiemo jicannote:

—¿Buena ciodio?

²⁴ A eruaillanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

²⁵ Ie uisina Jesús dane jetade. Iemona oni eroçailamona, jai jillode. Jai raise ciode. ²⁶ Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñeno; ia nainomo jaiñeno o jofomo mai abido jai.

Pedro Jesúsna llua rafue

(Mt 16.13-20; Lc 9.18-21)

²⁷ Cesarea Filipino eniruemo ite nairaiaimo Jesús jaidemo, ie llofueoicaiganomo jicannote:

—¿Niese jiaie comini cuena raitimaci?

²⁸ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jiaie ite llorainimona damie jai jillode. Imiedio”.

²⁹ Jesús dane jicannote:

—¿Niese omoi cuena raitomoi?

Pedro uai ote:

—Odi cai jilloitaramadio. Jusiñamui facaina lloraini micoriaie o billena jiaie llotimaci

³⁰ Jesús iena bumo lluaana rairuide.

Jesús ie fiodaillena llofuia rafue

(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofuete. Llote:

—Cai judiuaie illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

³² Iena marefodo naimacimo llote. Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

³³ Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

³⁴ Naimie dine ailluena comini uaidua mei, ie llofueoicaigano nainomo jiaie illanona, naimacimo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese

jaiacania, cue dibeimo naimie iite. ³⁵⁻³⁷ Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruiñenamona, cue cominina bu jaia, jaca faifñeite. Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, çniese cue Moo dine riite? Nainomo naimie riñeno faifite. ³⁸ Birui ite comini Jusiñamuina jitaifñedimaci. Naimiena jai faionocaidimaci. Jeacinona finocana jaidimaci. Cuena bu meiruaia, cue rafuena bu meiruaia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisaia diga, cue Moo dinena, monamona ico biiticue. Cue Moo uai cuemo illanona, ebire biiticue.

9

¹ Omoimo uanaicinona lloticue. Omoimona dajerie nia fioidañeitomoimo, illaimana ebire cue bairillena cioitomoio.

Jesús abi meidocailla rafue
(Mt 17.1-13; Lc 9.28-36)

² Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uifñede. Nainomo rilla mei, naimaci uicomo naimie abi meidocaide. ³ Naie dacaiño naimie iniroi eo quenirecaide. Eo userecaide. Cai iniroimo jítoma lligaiñuamona ie isoi usere jaca jaiñede. ⁴ Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiaimaiaia. ⁵ Iaimaiaia jaiacania, Pedro Jesúmo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

⁶ Eo jaciruilla jira, naimie ñaia rafuena raise uifñoñeno jamai ebena ñaite.

⁷ Ie facaise uillie billamona, naimacina ibaide. Uilliemona Jusiñamui llote: —Bimie cue isiruga Jito. Naimie llumo cacareillanona, iena ino —llote.

⁸ Iecononi erodajanona, dama Jesúna cioidimaci. Jiaionona cioifñedimaci.

⁹ Anedumona bitimacimo, naimacimo Jesús llote:

—Omoi ailli ciua rafuena bumo lloñeno, cue fioidaillamona cue jillua dinori. ¹⁰ Jesús llua isoi finodimaci. Iena bumo lloñedimaci; ia fioidaillamona naimie jilluana naimaci raise nia cacaiñena jira, iemo comecina facadimaci.

¹¹ Naimiemo llotimaci:

—Moisés micori llogacinona llofueraini birui raicabitimaci: “Elías railamie dane biite. Ie mei cai Jilloitaraíma biite” raitimaci. Jusiñamuimona o billana inoticaia. Odi cai Jilloitaraímana inoticaia. Odi cai Jilloitaraímadíomo, çbue ñelli iese raitimaci?

¹² Uai ote:

—Raise inotomoio. Elías isoidimie jai bite, nana Jusiñamui jitailla rafue raise lollena. Jusiñamui dibeimo naimaci illena, comini imaci comeciaini meiduana llote. Jusiñamui facaina lloraini micoriaia cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca. ¹³ Elías isoidimie jai bite; iadedi Jusiñamui facaina lloraima micori jaie cuega isoi, naimaci jitailla jira, naimiena jai meinetimaci.

Jesúdi Janaba anamo itimiena jillotaja rafue
(Mt 17.14-21; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comini itimacimo ride. Moisés micori llogacinona llofueraini dinena

ie llofueoicaigano uaina uaitaside. ¹⁵ Jesús billana comini ciuanona, jacinaisidimaci. Naimiena feñollena, naimie dine aisida jaidimaci. ¹⁶ Moisés micori llogacinona llofuerainimo Jesús jicanote:

—¿Niese cue llofueoicaigano uaina uaitatomoí?

¹⁷ Uai oñedimaci; ia cominimona damie uai ote:

—Maestro, Janaba anamo cue jito illa jira, o dine naimiena atidicue. Cue jito Janaba anamo illamona ñainide. ¹⁸ Nagarui Janaba bille diese, naimiena eniruemo uaitate. Iemona fueði mullede. Ie isidodi murude. Ie abi jaiare jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micori llogacinona llofueraini bie rafuena, o llofueoicaigano diga, uaina uaitatimaci.

¹⁹ Iena cacajanona, Jesús ie llofueoicaiganomo llote:

—Cue uai siñonana nia iñoñedomoi. Omoi diga are iticue. Raise omoi iñollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

²⁰ Naie urue Jesús dine atianona, Janaba naimiena naillitate. Iemona urue eniruemo uaide. Jabi-jabide. Fue mullede. ²¹ Jesús dinena naie urue moomo jicanote:

—¿Nie dinori o jitodi bie isoi ite?

Uai ote:

—Naimie uruenamona. ²² Janabadi, diga icaíño iraimo usillena, naimiena uaitate. Corobaillena, diga icaíño jinuimo jiai uaitate. Janaba oni o oretarenia, cocona duenaillamona, cocona cano.

²³ Jesús uai ote:

—“O oretarenia” raitio. Ero, o jito jillotaredicue. Cuen a o iñoia, o jito jilloite.

²⁴ Naie urue moo ieconi llote:

—Ona iñotícue. Raise nia cue iñoñenia, cuena raise iñota.

²⁵ Naie facaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie dine dane biñeno.

²⁶ Ado cuirioillanona, naimiena eo riire naillitajanona, Janaba oni jaide. Iemona naie urue fiodaitimie isoi ero caide. Naimiena ciuanona, nainomo itino raitimaci:

—Naimie jai fiodaite; ²⁷ —ia Jesús naimie onollina llinocaida, naimiena a naidanete.

²⁸ Iemona oni jaillanona, damie jofomo Jesús nailli ria, naimiemie ie llofueoicaigano anado jicanotimaci:

—¿Bue ñellena Janabana oni oretanidicai?

²⁹ Jesús uai ote:

—Jusiñamuimo omoi jiamona, naimiena raise omoi iñuamona, bie isoide Janabana oretaredomoi. Naimiena omoi raise iñoñena jira, bie uruemona Janabana oni oretañedomoi.

Jesús ie fiodaillena dane llofuia rafue

(Mt 17.22-23; Lc 9.43-45)

³⁰⁻³¹ Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

³² Ie llofueoicaigano iena raise cacaiñedimaci; ia naimiemo iena jicanuana meiruitimaci.

Jesús ie llofueoicaigano moto imiēna ille rafue

(Mt 18.1-5; Lc 9.46-48)

³³ Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

³⁴ Uai oñedimaci. Naimaci moto imiēna illena, naisodo siadocana bitimaci. Meirullanona, uai oñedimaci.

³⁵ Naimie ana rainadaja mei, ie ecimo naimacina uaidote. Raite:

—Omoi moto imiēna bu iacania, jamai bue isoidimiēna naimie illa. Omoi muillaimana naimie jailla isoilla.

³⁶ Iena naimaci raise uñollena, nainomo ite cominimona daje urue bai jainanocaida, naimaci motomo naimiēna jonete. Naimiēna menioita, naimacimo llote:

³⁷ —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiēna feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

Jesúdi ie dibeimo itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiēna ciodicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiēna rairuiñeno. Cue mamecido siño rafuena bu finoia, cuena jeare raise ñaiñeite. ⁴⁰ Cai dibeimo itimiedi cai facaisena ite. ⁴¹ Ero, cuemo omoi duillamona, omoi na bu janore canoia, Jusiñamuimona ibana feiñoite. Omoi nōbai jamai jinuina fecaite; iadedi omoi na naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

Jesúdi jeacinona finoñenana llofuia rafue

(Mt 18.6-9; Lc 17.1-2)

⁴² Jesús nia llofuete:

—Cuena como inotinona jeacinona finotaiacadimie iena finoñellena, naimie cimaiomo aillue nofici maianona, joraimo corobaillena naimiēna dotacadena, mare. ⁴³⁻⁴⁸ Biena ñaiticue. Nie isoide rafue omoi na jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi cūa rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino finoteno. Naimacimo ite aiai fiodañena jira, naie irai jaca duiñenamona, nainomo itino jaca duere sefuitimaci.

⁴⁹ 'Ero, birui omoi duere sefuillamona, cue cominina jai jaidinona uiñoiticue. ⁵⁰ Guille caimaretallena, sal mare; iadedi ie caimano jai iñenia,

iena dane caimaretañedicaí. Ie isoide. Jeacino omoi finoia, omoi comeciaí caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

Jesús iima ie aina dotaja rafuena llofua rafue (Mt 19.1-12; Lc 16.18)

¹ Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica dibeimo jaide. Ailluena comini naimie dine ofillamona, naimie llofueuilla isoi, naimacina llofue. ² Naimiena facacillena, dajerie fariseuai naimie dine bitimaci. Rafuena jicanoiciadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³ Uai ote:

—¿Niese Moisés micori llote?

⁴ Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñona dotaite”.

⁵ Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuiñede; ⁶ iadedi nano dofoconi iese iñede. Enirue finua facaiseconi Jusiñamuidi come iaímaiaína finode. Fimana finode. Riñona jiai finode. ⁷ Ie jira Jusiñamuidi jai llote: “Ie ai diga illena, iima ie moona faínonocaite. Ie eina jiai faínonocaite. Ie ai diga illamona, menade comedi daamiena jai jaide” llote. ⁸ Menade come jai daamiena jai ite. ⁹ Jusiñamui iese iaímaiaína itataja jira, iima ie aina dotajana rairuidicue. Riño ie inina dotajana rairuidicue.

¹⁰ Jofomo ie llofueoicaigano diga, naimie nailli illanona, naimiemo bie rafuena jicanotimaci. ¹¹ Jesús dinena llote:

—Jiai riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. ¹² Ie inina faínonocaillanona, jiaimiena nie riño uamona, naiñaiño jeacino jai finode.

Jesúdi naimie dine uruai billana jitailla rafue (Mt 19.13-15; Lc 18.15-17)

¹³ Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Ie llofueoicaigano iena rairuidímaci; ¹⁴ iadedi iena cacajano, Jesús icirite. Jesús raite:

—Uruai cue dine billesa. Naimacina rairuiñeno. Cuen a bie isoi innotinodi Jusiñamui cominidimaci. ¹⁵ Bie uruai abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

¹⁶ Naie uruai dasarie meni-menioicaida, naimaci ifogimo ie onollina joneta:

—Jusiñamui omoína canoite —llote.

Ucuberedimie Jesús diga ñaia rafue (Mt 19.16-30; Lc 18.18-30)

¹⁷ Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie cañici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

¹⁸ Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. ¹⁹ Moisés micori llogacinuaina inocana jai. Jaie cuete: “Comena meineño. O aiñede riño diga iño. Fiiño. Jiaimiena o llogidoia, tainona lloño. O moo uaina iño. O ei uaina iño”.

²⁰ Uai ote:

—Maestro, uruena cue illa facaisemona nana bie llogacinuaina inoticue.

²¹ Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebaicacania, omo ite raruiaina feca. Naie ucubena dueredinomo feca. Cuena o inuamona, monamo ico jaca iitio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie feaacaiñena jira, sure jaide. ²³ Naimie jailla mei, ie llofueoicaigano eruaillanona, naimacimo llote:

—Ucuberedinodi Jusiñamui cominina jaillena eo sefuiruitimaci.

²⁴ Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁶ Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaidi Jusiñamui cominina jaitica?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodicaí. Nana cai rana fainonocaida, o diga jai jaicabidicaí.

²⁹ Jesús uai ote:

—Uanaicino lloiticue. Cuena naimie isiruillamona, cue rafuena naimie llumona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, ³⁰ Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie miriñuai, ie eitái, ie uruiái, ie enirue birui iite. Monamo naimie ico caimare iocire jaca iite. ³¹ Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoñedimaci; ia Jusiñamuimona ico jamai bue isoitimaci Jiaínomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoñeitimaci.

Jesús ie fodaillena dane llua rafue

(Mt 20.17-19; Lc 18.31-34)

³² Jerusalémo nia jaillanona, Jesús uicodo jaide. Nainomo naimie jaciruiño jaillamona, ie llofueoicaigano raijicaidimaci. Naimaci diga jaidino jaciruoicaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:

³³ —Ero, Jerusalémo jai jaidicai. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinel-lena lloitimaci. Judiaifinedino illaicominimo cuena fecaitimaci. ³⁴ Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue —llote.

Jesús dine Jacobo Juan iaïmaiaï billa rafue
(Mt 20.20-28)

³⁵ Naie facaise Jesús dine Jacobo, Juan diga bitiaïmaiaï. Iaïmaiaï moodi Zebedeo. Raitiaïmaiaï:

—Omo coco jicalle rafue cocoenafinuana jitaïdicoco.

³⁶ Jesús uai ote:

—¿Nie isoide rafuena jitaïdomico?

³⁷ Uai otiaïmaiaï:

—Illaimana o jailla mei, o ecimo coco illena o lluaana jitaïdicoco. Damie o nabeimo. Jiaïmie o jarifebeimo. —Jiaïno afemo iaïmaiaï illena, iese llotiaïmaiaï.

³⁸ Jesús dinena llote:

—Omico jicanuana raise uiñoñedomico. Cue eo duere sefuiticue. Llegi cacaiticue. ¿Ie isoi duere sefuiacadomico? ¿Ie isoi llegi cacaiacadomico?

³⁹ Uai otiaïmaiaï:

—Jii. Sefuiacadomico.

Jesús dinena raite:

—Cue isoi duere sefuitomico. Llegi cacaitomico; ⁴⁰ iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

⁴¹ Tena jiaïe llofueoicaigano cacajano, naie iaïmaiaïri iciritimaci. ⁴² Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci; ⁴³ iadedi omoi dine iese iñena. Omoïmona bu imiëna iacania, omoi mullaïmana naimie jaisoïllasa. ⁴⁴ Omoïmona bu imiëna iacania, omoïna naimie canocana jaisoïllasa. ⁴⁵ Cuenamona fueo. Biñedicue, cominina cue ocuïllena; iadedi cominina canuaïbidicue. Cue jitailla jira, nana comini facaina fiodaisaïbiticue. Naimaci jeacinomona naimaci jillobillena, fiodaisaïbiticue. Ailluena comini cuena ñnuamona, jilloitimaci. Coninina omoi canua —llote.

Jesúdi Bartimeona jillotaja rafue
(Mt 20.29-34; Lc 18.35-43)

⁴⁶ Oni jaïllanona, Jericó railla nairaïmo Jesús ride. Naimemona ie llofueoicaigano diga jaïllanona, ailluena comini Jesús jinafona racadimaci. Naie facaise nai fueomo uisimidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena. ⁴⁷ Nazaret ie Jesús jaïllana naimie cacajano, ado cuirioides:

—David micori Jitona o illamona, Jusiñamuimona o billa jira, cuena duenai. Cuena cano.

⁴⁸ Naimie llïcaïllena, Jesús diga jaidino naimiëna lletade; iadedi eo cuirioides:

—Maestro, David micori Jitona o illamona, cuena duenai.

⁴⁹ Naimiëna cacajano, Jesús naidadajanona, llote:

—Naimiëna cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

⁵⁰ Iena cacajano, ie emodomo itiroina duiñuanona, raire naidacaida, Jesús dine bite. ⁵¹ Naimiemo Jesús jicante:

—¿Niese ona cue nibaiana jitaideo?

Uai ote:

—Maestro, cioacadicue.

⁵² Jesús dinena uai ote:

—Cuena o inua jira, jai jillodio. Mai jai. —Ieconí naimie jai cide. Jesús diga jaidino diga naimie jai jaide.

11

Jesús illaíma isoi Jerusalémo jailla rafue

(Mt 21.1-11; Lc 19.28-40; Jn 12.12-19)

¹ Oni jaillanona, Jerusalémo iaieicaidimacimo, Betfagé railla nairaimo ie llofueoicaigano diga Jesús ride. Betania nainomo jai ite. Olivos railla anedumo naga nairai iaimaiaí ite. Ie llofueoicaiganomona Jesús menamiéna orede. ² Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. ³ Omicomo: “¿Bue ñellena iena suiñodomico?” bu jicanoia, lono: “Coco Nama iena jitaide. Nailli iena raire abido oretaitelote”.

⁴ Naimie llua isoi, jaidiaimaiaí. Naisomo jofo nasemo burritona bailanona, iena suiñodiamaiaí. ⁵ Ie facaise nainomo itino jicante:

—¿Bue ñellena burritona suiñodomico?

⁶ Jesús llua isoi uai otiaimaiaí. Ie muidona:

—Jee —raitimaci.

⁷ Burritona atidiaimaiaí. Ie emodomo naimie llofueoicaigano naimaci iniroi jobianona, ie emodomo Jesús rainadate. ⁸ Naimiéna iobitallena, illaíma isoi naimie jaillena, diga comini, imaci iniroi diga, naiso motomo jobedimaci. Jiaíno nai fueмона raforona uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado curiisite:

—¡Cai Jilloitaraíma billa! Jusiñamui mamecido bitimie eo mare. ¹⁰ Cai illaíma David micori ifomo caina sedallena, damie billemo birui ocuridicai. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

Jesús higuera railla riarana faidua rafue

(Mt 21.18-19)

¹² Ie areruido Betaniamona Jerusalémo abido ie llofueoicaigano diga Jesús bia, aimetaite. ¹³ Arena higuera railla riarana cuanona, iena jibuide. Como firuide; ia naie llisilladi ñede. Ie llisilla facaise nia ñede. ¹⁴ Ie jira naie riarana lote:

—Biemona jaca llisiñeite. —Ie llofueoicaigano naimie llua cacadimaci.

Jesúdi Jusiñamui jofomona damieriena dotaja rafue

(Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaína fecallena, naimiemo toica llaudaiaína fecallena, nainomo comini jaisoidimaci.

Naie cominina ibatajanona, ofomaiaina, toica llaudaia digá, damierie fecaidimaci. Iena Jesús ciuanona, naimaci mesaiaina oni caicode. Ucugina fecaidino rairacuai jiai oni caicode. ¹⁶ Jofó facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. ¹⁷ Naimacina llofueite:

—Ie facaina lloraima micorí Jusiñamui llogacino jaié cuela: “Cue jofó ite, nainomo nana comini cuemo jüllena” cuela. Ero, ailluena omoi ibataja jira, naimie jofona firiruidino jofona omoi finoca.

¹⁸ Judíuai illaicomini naimie finoca rafuena fidianona, naimiena meinelena, coniniri siadotimaci. Ailluena comini naimie llofuiana ebiruillanona, raijicaidimaci. Ie jira judíuai illaicomini naimiena jaciruillamona, naimiena nia meinenidimaci. ¹⁹ Nairui navuida ie llofueoicaigano digá, Jerusalémona Jesús oni jaide.

Jesús faidoca riará duilla rafue

(Mt 21.20-22)

²⁰ Ie are ie llofueoicaigano digá, Jerusalén dine Jesús jaillanona, higuera railla riará duillana cioidimaci. Nana ie jainao digá duillana cioidimaci.

²¹ Jesús navui are lluana Pedro ubiñuanona, naimiemo llote:

—Maestro, ero. O faidoca higuera jai duide.

²² Jesús uai ote:

—Jusiñamuina inocana jai. ²³ Unaicinona omoimo lloiticue. Jusiñamui lluana raise bu inoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite. ²⁴ Nie isoide rafue Jusiñamuimo omoi jicajia, naimie iena finuana omoi inuamona, iena naimie finoite. ²⁵ Jusiñamuimo o jiacania, jiaimie digá o rafue ia iena feita. Ie isoi cai Moo Jusiñamui omoimo ite jeacino jiai feitaite; ²⁶ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui digá nanoca ñairaini. Naimacidi Moisés micorí llogacino llofueraini. Naimacidi einamaci. Dese billanona, ²⁸ jicanotimaci:

—¿Nie isoide uaido o finoca rafuena finodio? ¿Bu omo iga uai digá o finoca rafuena finodio?

²⁹ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ³⁰ Juan Bautista micorídi cominina navui bautizade. ¿Bu naimie micorína orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micorí lluana inoñedomoi?” ³² “Comini” cai fairioia, bene itino caina nibai meineitimaci, Juan micorídi Jusiñamui facaina lloraima naimaci railla jira.

³³ Ie jira fairiotimaci:

—Uñoñedicai.

Jesús dinena raite:

—Ie muidona cuemo nie isoide uai illana omoimo lloñeiticue.

12

Jesúdi marañede majiraini rafuena llua rafue
(Mt 21.33-46; Lc 20.9-19)

¹ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jiaínomo fecade. Ie mei jiaie eniruemo jaide. ² Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riara llisilla ollena; ³ iadedi naie sedarainidi ie mullaimana fatimaci. Ie mei naimiemo riara fecañeno naimiena abido oredimaci. ⁴ Ie mei patrón jiaie mullaimana orede. Naimie ifogina bofedimaci. Naimiena jeare finodimaci. ⁵ Ie mei patrón jiaimiena orede. Naimiena meinetimaci. Ie mei ailluena mullaiaina orede. Damieriena fatimaci. Damieriena meinetimaci. ⁶ Patróno ie isiruiga jito ite. “Cue jitona jaciruitimaci. Naimie uaina ñinoitimaci. Naimiena oretaiticue” patrón comecina facade. ⁷ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. ⁸ Naimaci dine naimie rilla mei, naimiena meinetimaci. Ie mei ie abina illimona jino dotadimaci. ⁹ Iena fidia mei, ¿niese naie patrón nibaáite? Ero, naimie billanona, ie illina sedarainina fuidoite. Ie mei jianona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isoidomoi. Jusiñamui facaina lloraíma micorí omoína jiaie cuete. Ie cuegafuena raise facañedomoi. Naimie micorí cuega: Jofo finoraini jitaíñena noficidi nana naie jofomo ite nofici baifemo jai uaide. Jusiñamui iena finotate. Iena cai uíñuamona: “Eo mare” raiticai cuega. Jusiñamui cominina damierie jaillana naimie micorí cuete. Jusiñamui oretagamiena damierie jitaíñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, Jusiñamui facaina lloraíma micorí caina cuete. Naie jofona finoraini isoidomoi. Naie nofici isoidicue. Cue rafuena omoi jitaíñena jira, naimie cominina jaiñeitomoi.

¹² Judíuai illaicomini iena cacajanona, Jesús naimacina ñaiana naimaci uíñuamona, naimiena gaitacadimaci; ia cominina jaciruitimaci. Ie jira naimiemona oni jaidimaci.

Jesúmo gobiernomo ucubena fecajana jicaua rafue
(Mt 22.15-22; Lc 20.20-26)

¹³ Judíuai illaicomini jailla mei, dajerie fariseuai cominina Jesús dine oredimaci. Illaíma Herodes dibeimo itinona oredimaci. Naimie raise uai ofenia, naimiena duere finollena, Jesúsna facaciacadimaci. ¹⁴⁻¹⁵ Naimiemo llotimaci:

—Maestro, unaicinona llofuecabitio. Jusiñamui rafuedo cai marena jailana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí; iadedi romanuai railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uíñuamona, naimacimo llote:

—¿Bue ñellena cuena facacitomoi? Ucube cuemo acata.

16 Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiaide bie cuega radi?

Uai otimaci:

—César.

17 Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaana cacajano, naimie raise uai ua jira, ieri rajjicaidimaci. Naimie iese llua jira, naimiena duere finonidimaci.

Jesús dine saduceuai railla comini billa rafue

(Mt 22.23-33; Lc 20.27-40)

18 Naie facaise saduceuai railla comini naimie dine bitimaci. Fiodaillamona jaca buna jilloñellena inotimaci. Jesúmo llotimaci:

19 —Maestro, cai facaina Moisés micori jaie cuega: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. 20 Bie rafuena uiñoiacadicaí. Siete amatiái ite. Nano doforamie ie aina ote. Naimie nia uruiainide fiodailla. 21 Ie emodo imie ie ama feciñoana ote. Naimie uruiainide jiaí fiodailla. Naie siete digamiedemona iese sefuide. 22 Uruiaínide nana fiodailla. Ja muidomo naie riño jiaí fiodaite. 23 Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

24 Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. 25 Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisai ainidimaci. Ininidimaci. Ie isoi naie siete amatiái iitimaci. 26 Fiodaitino ico jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. 27 Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaína jiaí jillotaite. Fiodaillamona jilluana omoi raise uiñoñedomoi —llote.

Jesús nanoca llogacinona llofuia rafue

(Mt 22.34-40)

28 Naie facaise Moisés micori llogacinona llofueraíma Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacinuaimona, ¿nie llogacino ua nanoca llogacinona?

29 Jesús dinena uai ote:

—Moisés micori jaie cuega: “Israel comini, bie rafuemo cacarei. Cai Nama Jusiñamui jaca dajede. 30 Omoi jitailla jira, nana omoi comeciái diga, cai Nama Jusiñamuina isirui. Naimiemo omoi comeciaina eo faca”. 31 Ie emodomo ite llogacino janore daje isoide: “Dani omoi abí omoi isiruilla isoi, omoi ecimo itinona jiaí isirui”. Bie mena llogacino jiaie llogacinuai baifemo faite.

32 Naie llofueraíma dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede.

33 Cai jitailla jira, nana cai comeciái diga naimiena cai isiruia, naimiemo cai comeciaina eo facaía, cai abina cai isiruilla isoi cai ecimo itinona cai isiruia,

Jusiñamuina raise sedadicaí. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o inocana jaia, Jusiñamui jitailla isoi, ie cominina raire jaitio. —Ie facaisemona buna naimiema facaciaibiñede.

Jesús dinena fariseuai cominimo jicanua rafue

(Mt 22.41-46; Lc 20.41-44)

³⁵ Jusiñamui jofomo Jesús jailla mei, nainomo itinomo jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci? ³⁶ Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote: “Illaimana o illamona, cue nabei dine ana rai. Ona inoñedino o anamo itataitice”.

³⁷ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama. —Nainomo itino naimie llofuiana iocire cacareidimaci.

Jesúdi judíuái illacominina ñaia rafue

(Mt 23.1-36; Lc 11.37-54; 20.45-47)

³⁸ Jusiñamui jofomo Jesús nia llofuianona, raite:

—Moisés micori llogacinona llofuerainimona abina rairui. Illacominina naimaci itimacidená, naimacina comini cioillena, eo mare iniroina jitaacacabidimaci. Nine naimaci macaria, naimaci jamai fue isoñedimona itimacidená, comini naimacina uaiduana gaidimaci. ³⁹ Comini naimacimo acarillena, ofiracomo uicomo raiacadimaci. Rafue ia: “Jamai fue isoñedicaí” raillamo comecina facajanona, rafue nama ecimo raiacadimaci.

⁴⁰ Feciñuaimona rana ocabillanona, naiñaiñuaina duere finodimaci. Naimiema eo sedadimacidená, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

⁴¹ Jusiñamui jofomo Jesús nia ia, ucube fecarano uicomo ana raide. Nainomo comini ucubena joniam eruaide. Ailluena ucuberedito ailluena ucubena jonetimaci. ⁴² Ie facaise eo duerede feciño menaruñu jonete. ⁴³ Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete.

⁴⁴ Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaino baifemo jonete.

13

Jesúdi Jerusalémo ite Jusiñamui jofo judaiana llua rafue

(Mt 24.1-2; Lc 21.5-6)

¹ Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúsno damie raite:

—Maestro, bie jofomo ite noticiaí co ebirede. Bico eo ebire ciede.

² Jesús dinena uai ote:

—Bie jofo birui eo mare; ia nana bie jofomo ite noticiaí ico judaísite—llote.

³ Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴ —Jusiñamui jofo judaisillana omo jicanoiacadica. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵ Uai ote:

—Omoína bie rafuena bu jifueñellena, omoi abina rairui. ⁶ Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui. ⁷ Jobaimiaie illena fidiitomo; iadedi jaciruiñeno. Iese suite; iadedi abido nia biñeticue. ⁸ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime guitimaci. Iese sua, omoi duere sefuillifue omoimo suite. ⁹ Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloito-
¹⁰ Diga comini cue rafuena nana nairaimo lloitimaci, nana nairai iena cacaillena. Ie mei abido biiteticue. ¹¹ Naie illaicomini dine omoi ia, juez dine omoi ia, omoi abi ridollicinomo omoi comeciaina jarire facañeno. Naie facaise omoi ñaillicinona uifñoitomo. Dani omoi comeciaino ñañeñitomo; ia Jusiñamui Joreño uaido ñaitomo. ¹² Cuen a inotomo; ia ailluena cuena inoñeitimaci. Cuen omoi inua jira, omoína enoitimaci. Iemona dajerie ie amana meinatallena, naimiena llogidoite. Dajerie moodie ie uruena meinatallena, naimiena llogidoite. Dajerie uruai die naimaci moona, naimaci eina meinatallena, naimacina llogidoitimaci. ¹³ Cue cominina omoi illamona, nana nairai omoína enoitimaci; iadedi cuena faimonocañedimie ja muidomo monamo jaca iite. Naimiena jillotaiteticue. ¹⁴ Cue llamo cacarei. Jusiñamui facaina lloraimadi jiaimie jearede rafue finollena jaie llote. Naie rafue sua, Jusiñamui jofomo Jusiñamuina sedañeñitomo. Nainomo ite jearede rafue finuana omoi ciuanona, naimemona omoi jillobillena, duere omoi sefuiñellena, Judeamo omoi illamona, aneduai dine omoi aisi. ¹⁵ Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uifñeno. ¹⁶ Aneduai dine raire rillena, illimo omoi ia, abido jofomo biñeno, omoi iniroi omoi diga uillena. ¹⁷ Naie rafuemo jillobillena, naie facaise urueside riño duere sefuite. Uruena nia jirode riñodi jiaie duere sefuite. ¹⁸ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. ¹⁹ Naie facaise comini eo duere sefueitimaci. Jusiñamuidi enirue finua facaise mona iese comini nia duere sefuiñedimaci. Ico iese eo duere sefuiñeitimaci. ²⁰ Naie facaise ianori fo Jusiñamui oñeñena, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹ Ie facaise omoimo bu raia: “Jadi, Jusiñamui facaina lloraima benomo birui baireda. Naimiedi Cristo”, iena inoñeno, Jiaimie raia: “Oni batine Cristo birui baireda”, iena inoñeno. ²² Cristona abi caitadino biitimaci. Jusiñamui facaina llorainina abi caitadino jiaie biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²³ Ie jira omoi abina rairui. Ero, bie rafue nia suiñenia, iena omoimo jai lloteticue.

Jesús abido ie bille rafue
 (Mt 24.29-35, 42-44; Lc 21.25-36)

24 'Naie duere sefuilla facaise meinocni, jitoma lligaiñoñeite. Fivui jiai lligaiñoñeite. 25 Monamona ucuai ana llujite. Nana naie radi jaidisite. 26 Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. 27 Cue jaienisaina cue ecimona oretaiticue. Cue fetocano diese naganomona ofitaitimaci.

28 'Higuera railla riaromona omoi fueo. Bie eniruemo naie riaru firuillamona, fiemona raire illana uiñoitomoi. 29 Ie isoide. Bie rafue ico suia, cue billirui iaiei illena uiñoitomoi. 30 Uanaicinona omoimo lloiticue. Nana bie rafue suille facaiseconi bie nairai nia iite. 31 Mona enirue diga fuite; iadedi cue lloga uai jaca suite. 32 Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñoñote. 33 Abina rairuicana jai. Naimie omoina canollena, Jusiñamuimo jiai jicabi. Cue billirui omoi uiñoñena jira, iemo ocurri.

34 'Iena omoi raise uiñoñllena, bie rafuena lloiticue. Patrón jiaie eniruemo jaide. Nia jaiñenia, ie mullaiaina ie jofona sedatate. Nagamie ie maijille ocuide. Jofo nasena sedadimemo naimie billemo raise ocurillena lloite. 35 Naie patrón abido billena naimaci uiñoñena jira, naga hora iemo ocuritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. 36 Ebena naimie biite. Inidimacimo naimaci baisaibi raillanona, naimaci jaca ocurilla. 37 Ie isoide. Ebena biiticue. Cue abido billirui omoi uiñoñena jira, iemo jaca omoi ocurri.

14

Judiuai illaicomini Jesúna gaitallena, siadua rafue (Mt 26.1-5; Lc 22.1, 2; Jn 11.45-53)

1 Naie facaise pascua railla rafue illena, menarui fiebide. Naie facaise llomeno guille rafue jiai ite. Naie rafue ia, siritaga rana jaca guiñedimaci. Egiptomona naimaci jaigai jillobillana começillena, naie rafue ite. Judiuai illaicomini Jesúna jifuiano gaitaacadimaci. Naimiena meineiacadimaci. Iena siadua mei, 2 raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaitenamona, comini cai diga fuiritimaci. Nia sedaiticai.

Jesúmo riño caimare soride ra totaja rafue (Mt 26.6-13; Jn 12.1-8)

3 Betania railla nairaimo Jesús jaillanona, Simón jofomo jaide, Simódi jaiie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. 4 Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide. 5 Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. — Naiñaiñoña iese ñaitimaci.

6 Naimaci ñaiana Jesús uiñua jira, naimacimo lloite:

—Dama ite. ¿Bue ñellena naiñaiñoña jeare ñaitomoi? Mare rafuena cuemo finode. 7 Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. 8 Cue facaina naiñaiñoño finoacana diese jai finode. Nia fodiñedicue; ia cue fodiñirui facaina naiñaiñoño iese finode. 9 Omoimo unaicinona lloiticue. Ninomo cue mare finoca rafuena bu loia, naiñaiñoña ubiñoñllena, nana cominimo naiñaiñoño finoca rafuena lloite.

Judas micorí raillamie Jesúsna gaitataiacana rafue

(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micorí raillamiedi Jesúsna gaitatallena, Jusiñamui diga nanoca ñairaini dine jaide. ¹¹ Iena cacajano, iobidimaci.

—Iena o finoia, omo ucubena fecaiticai —llo timaci. Iemona Jesúsna gaitatalliruimo Judas ocuiride.

Jesúdi ie fiódaille rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judíuai comini toica llauaiaína fajarui illanona, Jesúmo ie llofueoicaigano jicanote:

—¿Ñinomo pascua railla rafue ie guille finuana jitaidio?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca. ¹⁴ Naimie jailla jofo namamo llono: “Coco llofueraima cocona omo jicanotade: ‘¿Ñimai cue guiraco? ¿Ñinomo guiticue, cue llofueoicaigano diga?’ ” ¹⁵ Ie mei omicommo afebebamo ite aillue cuartona acataite. Na raruiai diga ite. Nainomo cai guille fino.

¹⁶ Jesús llua isoi jaidiaimaiaia. Jerusalémo rilla mei, naimie llua isoi baitiaimaiaia. Pascua rafue guille finodiaimaiaia. ¹⁷ Nairui jitoma ana itemo, ie llofueoicaigano diga, Jesús nainomo guisaide. ¹⁸ Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

¹⁹ Iena cacajanona, sunaitimaci. Damierie naimiemo jicanoside:

—¿Cuena ñaitio?

²⁰ Uai ote:

—Omoimona damie bie platomo cue diga llomenico diga mutade.

²¹ Jusiñamui facaina lloraíma micorí cuega isoi, monamona jai billamona, fiódaiticue; iadedi cuena gaitataitimie eo duere sefuite. Naimie jeiciñegadena, cuemona mare.

²² Naimaci nia guitimacimo, llomenicono Jesús llinuana, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoí comecina facajano, iena guiño.

²³ Ie mei naimie jiroracono jai llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci.

²⁴ Naimie raite:

—Cue fiódailamona, dama cue diailamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie. ²⁵ Omoína bene dane iese caimare nabaiñeiticue. Cue Moo sedajanomo omoí diga cue ia, nainomo omoína dane iese caimare marena nabaiticue.

Jesúdi Pedro naimiena januana llua rafue

(Mt 26.30-35; Lc 22.31-34; Jn 13.36-38)

²⁶ Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. ²⁷ Naimacimo llote:

—Cuena faínonocaitomoi. Jusiñamui facaina lloraíma micorí iena jaie cuega: “Toica llauaiaia sedaraimana meinetimaci. Naimie toíniaia uaficaida jaitimaci” cuega. Naimie micorí caina cuete. ²⁸ Ero, fiódailamona cue jillua mei, omoí uicodo Galileamo jaiticue, nainomo omoí diga dafai fillena.

²⁹ Pedro uai ote:

—Nana jiaño ona fainonocaia, ona jaca fainonocaiñeiticue.

³⁰ Jesús dinena raite:

—Uanaí omo lloiticue. Ja naio itava menacaiño nia ñaiñenia, dacaiño amani cuena janoitio.

³¹ Pedro dinena riire llote:

—O diga cue fiodaiadedi, ona janoñeiticue.

Nana ie llofueoicaigano daje uaido jiai raitimaci.

Jesúdi Getsemanímo Jusiñamuimo jia rafue

(Mt 26.36-46; Lc 22.39-46)

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Benó ana raí. Omoimona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede. ³⁴ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia inñeno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jii de:

³⁶—Ore Moo, nana rana finoredio. Cuena legi cacaitaño. Cue jitailla isoi cuena finoño; iadedi o jitailla isoi cuena fino.

³⁷ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo. ³⁸ Inñeno. Taife ramo omoína fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoína naimie ocuiñotallena—llote.

³⁹ Ie mei dane jii llena jaide. Ailli naimie jia isoi, dane jii de. ⁴⁰ Ie llofueoicaigano dine dane billanona, naimaci uisi lliñoilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. ⁴¹ Dane jia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodaille facaise jai ite. Jusiñamui jitailla jira, cuena ja gaitajanona, naimiēna inoñedino anamo ja iiticue. ⁴² A naidacai. Maiña. Cue gaitaitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaral-luna jiai atidimaci. Jusiñamui diga nanoca ñairainimona bitimaci. Moisés micori llogacinona llofueraimona bitimaci. Naimaci einamacimona bitimaci. ⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiēna llibanoiticue. Ie mei naimiēna gaita. Naimiēna raise maianona, naimiēna oni uiño.

⁴⁵ Jesús dine naimie rillanona, Judas Jesús dine raire jaide. Naimiēna uaidote:

—Maestro, jai biticue. —Ieconi naimiēna llibanote. ⁴⁶ Ie jira Jesúna gaitadimaci.

⁴⁷ Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaïma jefona jaïbonote. ⁴⁸ Naimïena gaitadinomo Jesús llote:

—Omoï lloebïna atidomoi. Omoï butaralluna atidomoi. Cuenã gaitallena, fiïriraimadicueta cuemo omoï billa. ⁴⁹ Jusiñamui jofomo nagarui llo-fuecabiticue. ¿Bue ñe nainomo cuena gaitañedomoi? Cuenã jai omoï gaitajamona, Jusiñamui facaina lloraini micoriai cuegafuiai suite.

⁵⁰ Ie facaise nana naimie llofueoicaigano naimïena faïnonocaillano, aisidimaci.

Jesús jinafona conirue racaja rafue

⁵¹ Ie facaise daje conirue Jesús jinafona racade. Jamaï abïmo inïroi ferinocaida racade. Naimïena ciuanona, comïni naimïena gaitadimaci; ⁵² ia ie inïroina faïnonocaillanona, taimïena aiside.

Jesúdi judïuai illaïcomïni ñine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

⁵³ Jesúna gaitaja mei, Jusiñamui diga nanoca ñairaima ñine naimïena uitimaci. Nana judïuai illaïcomïni itimaci. Nanoca ñairaini itimaci. Einamaci jiai itimaci. Moisés micori llogacinona llofueraïni jiai itimaci. ⁵⁴ Pedro naimaci jinafona aarena racade. Jusiñamui diga nanoca ñairaima nairairimo jaide. Jofono sedadïno diga nainomo ite iraimo agaide.

⁵⁵ Naimïena meinellena, nana naie illaïcomïni Jesúmo nicino illana uiñoïacadimaci. Iena coniniri siadotimaci; iadedi naimïemo jaca nie isoide marañede rafue illana uiñoñedimaci. ⁵⁶ Diga comïni Jesúna llogidotimaci; ia tainona llotimaci. Daje isoi lloñedimaci. ⁵⁷ Damierie billanona, tainona llogiduanona, raite:

⁵⁸ —Bimie lluna cacadicaï. Jusiñamui jofona jeare ñaite. Naimie llote: “Jusiñamui jofona comïni finodimaci; ia iena cue judaïanona, darui amani illanona, jiaie finoiticue. Comïni iena finoñeitimaci”. ⁵⁹ —Iese llotimaci; ia daje isoi lloñedimaci.

⁶⁰ Naimaci motomo Jusiñamui diga nanoca ñairaima naidadajanona, Jesúmo jïcanote:

—¿Niese uai oitio? ¿Nie isoide rafue ona llogidotimaci?

⁶¹ Jesús ñinena uai ofede. Naie ñairaima jïcanote:

—¿Odi Cristodio? ¿Odi Jusiñamui Jitodio?

⁶² Jesús uai ote:

—Jï, naimiedicue. Monamona jiaie cue billamona, iïmana jaidicue; ia ñico jairuido illaimana cue illena, Jusiñamui ecimo cue raïllena, omoï nairai cioïtimaci. Mona uillïemo cue abïdo billena jiai cioïtimaci.

⁶³ Iena cacajanona, icirillanona, naie nanoca ñairaima dama ie inïroina cuaranote. Raite:

—Jiaïno naimïena llogidollena jai jitañedicaï. ⁶⁴ Jusiñamuina naimie jeare ñaïana jai cacadomoi. ¿Niese naimïena raitomoi?

Jiaie illaïcomïni ñinena:

—Naimie fiodaillesa —llotimaci.

⁶⁵ Ie facaise damierie naimïena tuallaïtimaci. Ie uiecona ñbaïlla mei, naimïena ducoïdimaci. Raitimaci:

—Bu o ducoïa caïmo llono.

Naimïena gaitadïno ñinena naimïena jiai ducoïdimaci.

Pedrodi Jesúna janua rafue

(Mt 26.69-75; Lc 22.56-62; Jn 18.15-18, 25-29)

66 Naie facaise Pedro nairairimo ite. Naie nanoca ñairaima mullaiñuaimona dañaiño nainomo billanona, 67 Pedro agaillana ciode. Raite:

—Nazaret ie Jesús cominidío.

68 Pedro iena januano, raite:

—O lluana uiñoñedicue. Iena raise cacaiñedicue.

Ie mei nase fuedo jaide. Naie facaise iitava dacaiño ñaite. 69 Naie mullaiño naimiena dane cuanona, nainomo jamai itinomo llote:

—Bimiedi Jesús ie llofueoicaigano imie.

70 Iena Pedro dane janote. Dally illanona, nainomo jamai itino Pedromo llote:

—Odi Galilea imiedío. Jesús diga jaicabidío.

71 Uai ote:

—Uanai cue lloñenia, Jusiñamui cuena duere finoite. Uanaicinona cue llua naimie uiñoñote. Ero, omoi llogamiēna uiñoñedicue.

72 Ieconí iitava dane ñaite. Iena cacajano, Pedro Jesús llua uibiñote. Jaive naio Jesús Pedromo llote: “Iitava menacaiño nia ñaiñenia, dacaiño amani cuena janoitío”. Iena uibiñuamona, Pedro eo eede.

15

Pilato dine Jesús illa rafue

(Mt 27.1, 2, 11-14; Lc 23.1-5; Jn 18.28-38)

1 Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofuerañi jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador. 2 Pilato naimiemo jicanote:

—¿Judíuai comini illaimadio?

Jesús uai ote:

—Jii.

3 Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode —llotimaci.

4 Pilato dinena naimiemo jicanote:

—¿Niese uai oñedio? Ona eo llogidotimaci.

5 Jesús nia uai oñena jira, Pilato uainicaide.

Pilatodi Jesús fiodaillana llua rafue

(Mt 27.15-31; Lc 23.13-25; Jn 18.38-19.16)

6 Naga año pascua railla rafue facaiseconi cárcelmo itinomona Pilatodi comini jicacamiēna jamai jino orede. 7 Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite. 8 Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. 9 Pilato jicanote:

—¿Bu jino cue oretallena jitaidomoi? Omoi judíuai railla illaimana nibai jitaidomoi.

10 Iese jicanote; iadedi naimiedi Jusiñamui diga nanoca ñairaini Jesúsni uradoillana uiñoñote. Naimaci Jesúsna meiniacanana jiai uiñoñote. 11 Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. 12 Iena cacajano, Pilato naimacimo jicanote:

—¿Niese bimiena cue finuana jitaïdomoi? Naimiedi omoi judíuai illaïma raillamie.

¹³ Ado llotimaci:

—¡Naimiena corai!

¹⁴ Pilato dane jicanote:

—¿Nie isoide maraiñede rafuena finode? —Iena cacajano, ado ibi llonoidimaci:

—¡Naimiena corai!

¹⁵ Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiena coraïllena orede.

¹⁶ Soldaduai naimiena gobernador jofo fo uïllanona, nana soldaduai nain-omo ofidimaci. ¹⁷ Jiduirede iniroi naimiemo jitaïdimaci. Eecuaïmona niga nuiciraina naimie ifogimo jitaïdimaci. ¹⁸ Naimiena jifanoduanona, naimiena uïdotimaci:

—¡Jadi, judíuai illaïma!

¹⁹ Radosi diga ie ifogimo buta-butadimaci. Naimiena tuallaïtimaci. Naimie illaïmana itena, naimiena sedallena, caiñici ifodo raïedimaci. ²⁰ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitaïdimaci. Ie mei naimiena coraïllena oni uïtimaci.

Jesúna coraïa rafue

(Mt 27.32-44; Lc 23.26-43; Jn 19.17-27)

²¹ Jerusalémona naimaci jaïllanona, jamai bitimiemo dafaïfidimaci. Naimiedi Simón. Cirene railla enirue imie. Naimie jito iaïmaïaïdi Alejandro iaïmaïaï Rufo diga. Jerusalén onifemona naimie billanona, naimiemo dafaïfidimaci. Naimiena Jesús uiga cruzna rocatatimaci. ²² Gólgota raïllanomo jaidimaci. Ifocoraina eruaiïlla jira, iese mamecïrede. ²³ Nainomo rïllanona, ie abi isirena cacaiñellena, vinomo erïrede rana faïanona, Jesúmo fecadimaci; iadedi naimie iena jiroñede. ²⁴ Ie mei naimie cruzmo coraïa mei, cruzna naidania mei, naie soldaduai naimie iniroi dani coninïmo fecasite. Naie iniroi bu uille raïllanona uïñollena, jifanododimaci.

²⁵ Jitoma nia fuiri daïdemo, naimiena coraidimaci. ²⁶ Cruzmo ie llogïduafuena jonetimaci. Jai cuega: “Judíuai comini Illaïma”. ²⁷ Ie mei mena fiïrïruide iaïmaïaina coraidimaci. Damie Jesús nabeïmo coraïca. Jiaïmie Jesús jarifeïmo coraïca. ²⁸ Iemona Jusiñamui facaïna lloraïma micori jaiïe cuegafue suide. Cueva: “Maraiñedino isoi naimie jai ite”.

²⁹ Naisodo jamai jaidino Jesúna mameritimaci. Mamerillamona, ifogiaïna jaididimaci. Raitimaci:

—Navui raisoidio: “Jusiñamui jofona judaïiticue. Darui amani illanona, iena dane finoïticue” raisoidio. ³⁰ Ie muidona dama o abina mai jillota. Cruzmona ana bi.

³¹ Ie facaïse Jusiñamui diga nanoca ñairaini naimiena jifanododimaci. Moïses micori llogacino llofueraïni naimiena jai jifanododimaci. Raitimaci:

—Jiaïe cominina jillotate; ia dama naimie abina jillotanide. ³² Naimiedi Cristodena, naimiedi cai judíuai comini illaïma raïllamïedena, dama nïadedi cruzmona ana ie billa. Iena cai cioïa, naimiena inoïticaï. —Iese naimiena jifanododimaci. Naimie diga coraicamie iaïmaïaï naimiena jiaï jeare ñaitiaïmaïaï.

Jesús fiodaïlla rafue

(Mt 27.45-56; Lc 23.44-49; Jn 19.28-30)

33 Jitoma naidai itemona, daje amani horas mona jitibicaide. 34 Ie meinomo judiuaí railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaíñuamona raite: “Cue Jusiñamui, cue Jusiñamui, ¿bue ñellena cuena faínonocaidio?” raite.

35 Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci.

36 Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. Raite:

—Dallu sedaiticai. Elías naimiema jillotajabillena uíñoiacadicaí.

37 Ie facaise ado cuirioita fiodaite. 38 Naie facaise Jusiñamui jofomo ie fetaca iniroife ana anaba jillacimo motodo menafe cuararide. 39 Jesúna sedallena, nainomo capitán ite. Jesúmo eruailanona, Jesús fiodaillana ciode. Raite:

—Uanai bimiedi Jusiñamui Jito.

40 Dajerie riñoniaí naie rafuena aarena cioidimaci. Naimaci motomo María Magdalena ite. Jiaie María jiaí ite. Naiñaiñodi Jacobo ei. Naimiedi jamamie. Naiñaiñodi jiaí José ei. Salomé jiaí ite. 41 Galileamo Jesús navui illa facaise naie riñoniaí naimie diga jaisoidimaci. Naimiema canouidimaci. Jerusalémo Jesús billanona, ailluena riñoniaí naimie diga jiaí bitimaci. Ie fiodaillana jiaí cioidimaci.

Jesús raiafomo jonia rafue

(Mt 27.57-61; Lc 23.50-56; Jn 19.38-42)

42 Jitoma ana itemo, sábado rille jai iaírei illanona, 43 Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie comina íco sedajanomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade. 44 Iena cacajano, Pilato Jesús fiodaillana raise uíñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

45 —Jesús jai fiodaite —capitán railla mei, Pilato Jesús abina Josémo fecalena llote. 46 José mare userede iniroi íbaja mei, cruzmona Jesús abí ana ua mei, naie iniroi diga ie abina ferinote. Nofici motomo finoca raiafomo jonete. Naifona íbaillena, aillue nofici nainomo bai ñuitade. 47 María Magdalena, jiaie María diga, naimie raiana ciode. María José ei.

16

Jesús fiodaillamona jillua rafue

(Mt 28.1-10; Lc 24.1-12; Jn 20.1-10)

1 Sábadoruimo jitoma sojicaidemo, María Magdalena caimare soride rana íbade. Jacobo ei, María jiaí íbade. Salomé jiaí íbade. Jesús abimo jonellena, ie abina raise finollena naimaci einamaci finocabilla isoi, naiñaiñuái iena íbade.

2 Domingo jítiramo jitoma como bairedemo, Jesús raiafo dine naiñaiñuái jaide. 3 Jaillanona, coníñuái mo jicanote:

—¿Bu noficina caína oni ñuitalle raiafomona?

4 Raiafo dine rillanona, iemo eruailanona, nofici oni ñuitacana ciode. Naie nofici eo aillue. 5 Raiafomo jaillanona, naiñaiñuái coniruena eruaidimiena nabeimo raillana ciode. Naimie are userede iniroina jítade. Naimiedi Jusiñamui jaienici. Naiñaiñuái jacinaite. 6 Nainomo itimie dinena raite:

—Jacinaíñeno. Nazaret ie Jesúna jenodomoí. Naimiema coraidimaci; ia fiodaillamona naimie jai jillode. Bene jai íñede. Naimie jonianomo mai

eroda. ⁷ Naimie llofueoicaiganomo iena lluai. Ua Pedromo llono. Galileamo omoi uicomo naimie jaita. Omoimo naimie llua isoi, naimiena cioitomoí.

⁸ Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bumo lloñede.

Jesús María Magdalenamo bairia rafue
(Jn 20.11-18)

⁹ Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede. ¹⁰ Naiñaiño naimie bairia mei, naimie diga jacobidinomo iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai ciodicue —naimacimo naiñaiño llua mei, iena ñnoñedimaci.

Mena llofueoicaiganomo Jesús bairia rafue
(Lc 24.13-35)

¹² Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iaimaiái naisomo macaria, iaimaiaimo bairede. ¹³ Jerusalémo abido iaimaiái rilla mei, jiaie llofueoicaiganomo iena llotiaimaiaí; ia ñnoñedimaci.

Jesús ie once llofueoicaiganomo bairia rafue
(Mt 28.16-20; Lc 24.36-49; Jn 20.19-23)

¹⁴ Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote.

¹⁵ Naimacimo llote:

—Nana nairaiaimo jai. Nana cominimo cue mare rafue llocana jai.

¹⁶ Cuena ñnuamona, bautizagano diese Jusiñamui mona duere sefuiñeitimaci; iadedi Jusiñamui cuena ñnoñedinona duere finoite. ¹⁷ Cuena ñnotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. ¹⁸ Jaiona naimaci llinoa, naimacina niese nibaiñeite. Bainode ra naimaci jiroía, naimacina niese nibaiñeite. Duidinona naimaci jetajamona, jilloitimaci.

Jesús monamo jailla rafue
(Lc 24.50-53)

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide. ²⁰ Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cuela rafue jai fuite. Marcodicue.

LUCAS JESUCRISTO EN RUENO ILLA RAFUE CUIAFUE

Lucas Teófilo cartana orede

¹⁻⁴ Teófilo, cue isiruiga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciodimaci. Iena llocana jiai jaidimaci. Naimacimona bie rafue raise uñoticue. Bie rafuena fodianona, damierie iena jai cuetimaci. Bie rafuena jiai jai cacadio. Bie rafuena cue raise uñua jira, uanaicinona o raise uñollena, bie cartana jai cueticue. Iese birui cue comeci jitaide.

Jusiñamui jaienici Juan Bautista micori jeicillena llua rafue.

⁵ Jesucristo nia jeicifenia, Zacarías illa facaise Herodena mameciredede illaimadi. Judea railla enruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijiuide. Naimie aidi Elisabet. Naiñaiño jaiete usumadi Aarón micori. Aarón micoridi Jusiñamui diga nano ñairaima. ⁶ Jusiñamuimona iaimaiaia mare, nana naimie lloga uaina raise iaimaiaia inua jira. ⁷ Naiñaiño oiniñona jira, uruenidiaimaiaia. Jiai jai uaicima iaimaiaia.

⁸ Zacarías facai ite comini maijia facaise ia, Jusiñamui jofone naimie maijiaide. ⁹ Nainomo naimie maijia, caimare soride ra fo jobaillena, naimiena fetodimaci. Naimaci finouilla isoi, jobaillanona dani Jusiñamui diga ñairaini naimiena fetodimaci. Iemei naimie fo jaide. ¹⁰ Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofone ecimo itimaci. ¹¹ Teconi cai Nama Jusiñamui jaienicidi naie ra boano nabeimo Zacaríaso bairede. ¹² Naimiena cuanona, Zacarías jacinote. ¹³ Jaienici naimiemo llote:

—Zacarías, jacinaiño. Jusiñamui o jiacinona jai cacade. Iemona o ai uruesite. Imana jocoite. Juan o jitalle naimie mamecidi. ¹⁴ Iemona o comeci caimare ite. Iobitio. Ailluena comini naimie jeiciari iobitimaci. ¹⁵ Jusiñamuimona naimie jamai fue isoifeitimiena jaite. Jifaitate rana jiroñeite. Naimie jeiciamona Jusiñamui Joreño naimiena namataite. ¹⁶ Cai Nama Jusiñamui dibeimo ailluena Israel cominina naimie itaite. ¹⁷ Jusiñamui jitaillacinona finocana jaite. Eliamo Jusiñamui Joreño jaiete siño uai illa isoi, naimiemo iite. Jusiñamui rafuena naimie llumona, damierie, naimaci jaiagai isoi, Jusiñamuina inoitimaci. Ailluena Jusiñamui uaina jai inoñedimaci; ia damierie birui inoitimaci. Naimaci comeci Jusiñamui dibeimo meidoitimaci. Iemona cai Nama Jesucristo bia, naimiena inoitimaci.

¹⁸ Zacarías dinena jicanote:

—¿Niese o llua suillena uñoticue? Jai uaicimadicoco.

¹⁹ Jusiñamui jaienici dinena uai ote:

—Gabrieldicue. Jusiñamuimona biticue. Cuena oretate, bie mare rafuena omo llorena. ²⁰ Ero, cue uaina o inoñena jira, uainitio, o jito jeicille dinori. Jaiaruido bie rafue suite.

²¹ Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira,

raijcaidimaci. ²² Naimie jino bitemo, naimaci diga jai ñainide. Ie onolli diga facajamona, Jusiñamui jaienicí naimiemo jai lluana uiñotimaci. Naimie ñaiñeno ite. ²³ Jusiñamui jofomo naimie maijia facaise fuilla mei, ie jofomo abido jaide. ²⁴ Digarui illanona, ie aidi urueside. Ie jira jofomo naiñaiño cinco fivui fiebide, comecina facajanona: ²⁵ “Cue uruesilla jira, iena nia buna lloiacaiñedicue. Cue Nama cuena jai duenaillana uiñotícue. Navui cue urue iñena jira, meiruitícue. Jai meiruiñeitícue. Comini cue joreñona jai ñaiñeitimaci”.

Jusiñamui jaienicí Jesús jeicillena llua rafue

²⁶⁻²⁷ Elisabet seis fivui uruesilla mei, Jusiñamuidi Galileamo ie jaienicí Gabrielna orede. Nazaretmo María dine naimiena orede. María nia ininide; ia jai José jicanogañaiño. Naimie usumadi David micori.

²⁸ Rillanona, naiñaiñomo llote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

²⁹ Tena cacajanona, naiñaiño jacinaite. Iena naiñaiño raise cacaiñena jira, iemo comecina facade. ³⁰ Gabriel dinena llote:

—Jacinañeno. Jusiñamui ona duenaite. ³¹ Birui uruesitio. Himana jocoitio. Naimie mamecina jítaitio Jesúsna. ³² Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itataite. ³³ Illaimana illamona, Israel railla nairaina jaca sedaite. Naimie ifomo jiamie jaca iñeite.

³⁴ María uai ote:

—Hima diga nia iñedicue. ¿Niese bie nibaille?

³⁵ Gabriel llote:

—Jusiñamui Joreño omo ite. Ie siño uai diga iena finoite. Jusiñamui marena isoi naimie jiaí marenite. Naimiedi Jusiñamui Jito. ³⁶ O comini iñaiño, Elisabet, ie uaicitaila facaise jiaí jai urueside. Naiñaiño jai jionaide; ia jai seis fivui naiñaiño uruesilla ite. ³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo itícue. O llucino cuemona mare.

Ie facaise Gabriel naiñaiñomona oni jaide.

Maríadi Elisabet dine jailla rafue

³⁹ Ie facaiseconi María aneduai dine Judea railla eniruemo Zacarías illanono raire jaide. Elisabetna cioillena, jaide. ⁴⁰ Zacarías jofomo rillano:

—Itio —raillanona, Elisabetna uaidote. ⁴¹ Elisabet naiñaiño uaina cacajano, ieconi naiñaiño jeraimo ite urue iena jiaí uiñuamona, niraide. Ie facaise Jusiñamui Joreño anamo Elisabet jai ite. ⁴² Iese illamona, María uruesillana uiñote. Naiñaiño ado llote:

—Jusiñamui ona eo marena canoite. O uruena marena itataite. ⁴³ Jamai bue isoidícue; ia, odi cue Jilloitaraima ei illanona, cue dine bitio. Iena cuemo nia lloñedio; ⁴⁴ ia, cuena o uaiduanona, iobillamona cue jeraimo ite uruedi niraide. ⁴⁵ Cai Nama omo llotataga uaina suillana o inua jira, Jusiñamui ona eo marena canoite. —Jusiñamui Joreño naiñaiñomo illamona, iena llote.

⁴⁶ María dinena uai ote:

Caiñai Nama eo mare. Naimiemo iobillacinona feaacadicue.

⁴⁷ Naimiedi cue Jilloitaraimana jira, naimieri iobidícue.

⁴⁸ Jamai bue isoidícue; iadedi cuena fetode.

Ie jira biruimona nana comini cuena marena ñaitimaci.

49 Naimiedi siño. Naimiedi mareuidimie. Cue facaina eo mare rafuena finode.
 50 Naimiena inotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena inotinona duenaite.
 51 Diga siño rafuena finoite. Abi iedotino comeciai facajacinona llicaitaite.
 52 Naimiedi illaicomina oni dotaite; ia jamai bue isoidinona jamai bue isoinedinona itataite.
 53 Dueredinona eo canoite; ia duenidinomo buena fecañeite.
 54 Duenaimona, cai Israel comina feitañeite.
 55 Cai jaiagaimo naimie jaie llua isoi, birui caina canoite.
 Abraham micorimo jaie llote: “Ona duenaiticue. O comina jaca duenaiticue”
 María llote. 56 Elisabet diga davui amani naiñaño fiebide. Ie mei ie jofomo abido jaide.

Zacarías jito jeicia rafue

57 Elisabet jocularui jai ridemo, imana jocode. 58 Naiñaño ecimo ite comini, naiñaño comini diga, iena fidiamona, cai Nama naiñañona eo duenaillana uinotimaci. Naiñaño diga iobidimaci. 59 Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci; 60 iadedi Elisabet llote:

—Dama ite. Jitainedicue. Naimie mamecidi Juan cai jitalle.

61 Uai otimaci:

—¿Bue ñellena iese raitio? O cominimona jaca bu Juan mameciredimiena inede.

62 Jefona cacaiñena jira Zacarías onolli diga jicannotimaci, ie jito mamecina jitallena. 63 Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jitade?” comeciaina facadimaci. 64 Ieconj Zacarías jai dane ñaite. Ie jira Jusiñamuimo iobillacino fecade. 65 Nana iaiaiaia ecimo itino rajicaidimaci.

—Jusiñamui muidona naie rafue suide —llo timaci. Bie rafuena fidiano, nana Judea railla aneduaimo itinodi iena ñaoidimaci. 66 Iena cacajano, comeciaina facadimaci: “Bimie jamai bue isoineitimiena jaite”. Cai Nama naimiena marena jaca canua jira, iese llotimaci.

Zacarías Jusiñamuimo iobillacinona fecaja rafue

67 Ie facaise Jusiñamui Joreño Zacarías llotatajanona, Zacarías llote:

68 Cai Nama Jusiñamuidi mare.

Cai Israel comini dine biite, caina jilloitallena.

69 David micori Jusiñamuina jaie sedade.

David micori cominimona siño Jilloitaraimana cai dine oretaite.

70 Ie facaina llorañido naimie jaie llua isoi, cai Jilloitaraimana oretaite,

71 Taifemona, Janabamona cai jilloillena.

72-73 Cai usumatiai micoriaimo: “Omoina duenaiticue” llote.

Cai usuma Abraham micorimo jaie llogacinona feitañede.

74-75 Taifemona cai jilloillena, cai Jilloitaraimana oretaite.

Nana cai ille dinori Jusiñamuina jaciruiñeno sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaraimana oretaite.

76 Cue jito, ona lloiticue. Jusiñamui ie lloraimana jaitio.

Cai Nama uicomo jaitio, comini comeciai o raise finollena.

77 Ie cominimo jeacinomona jilluacinona lloitio.

Iena naimaci ñnoia, Jusiñamui naimaci jeacinona feitaite.

⁷⁸⁻⁷⁹ Jeacino anamo jai cai illa jira, jitiredinomo iticai isoidicai.

Jusiñamuina cai nia ñnoñenia, fiodaillana jaciruiticai.

Naimie caina duenaillamona, cai Jilloitaraima billena o llofuellena, ona oretaite.

Naimiena cai ñnoia, jitiredinomo ññeiticai; ia Jusiñamui diga cai comeciai uri iite.

⁸⁰ Zacarías jito sairide. Jusiñamuina ñnocana jaide. Cominimo naimie nia marefodo lloñenia, jofue ññenanomo ite.

2

Jesús jeicia rafue

(Mt 1.18-25)

¹⁻² Jesús jeicia facaise César Augusto anamo ailluena nairaiái ite. Romamona naimacina sedauide. Naie facaise Siria railla enirue gobernadorci Cirenio. César Augusto, nie diese comini naga nairaimo illana naimie uiñollena, nana comini mameciai cuellena ocuide. Jaca bu iese jaie finoñede.

³ Naimaci jaiagai illanomo mameciai cuiana ocuide. ⁴ Ie jira José Galileamona Nazaretmona jaide. Judeamo Belémo jaide. David micorí cominimo naimie jainaiáilla jira, David micorí illanomo jaide. ⁵ Ie ai María diga jaide. Naiñaiño fenaí jai eo aillue. ⁶⁻⁷ Belémo iaímaiaí rillanona, naie facaise comini jofomo inillino ññena jira, jurareta jofomo ridiaímaiaí. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisai toica llaudaiaí sedaraini dine jailla rafue

⁸ Jesús jeicia facaise naie naio Belén ecimo ite pastomo damierie toica llaudaiaína sedaraini itimaci. Naimaci toiniaína sedadimaci. ⁹ Ieconí cai Nama Jusiñamuimona daje jaienicí naimacimo ebena bairede. Jusiñamui ie siño uai diga naimacina quetiñote. Jacinaitimaci. ¹⁰ Jaienicí llote:

—Jacinaiñeno. Mare rafue lloiacadicue. Nana cominina iobitallena, iena lloiacadicue. ¹¹ David micorí illanomo damie como jeiciga. Jusiñamui facaina lloraini micoriai naimie billena jaie llouidimaci. Naimiedí Cristo cai Nama. Naimie omoi Jilloitaraima. Jeacinomona omoina jillotaite. ¹² Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue lluana uanaicinona uiñoitomoi —llote.

¹³ Ie facaise naie jaienicí dine ailluena jaienisai bitimaci. Jusiñamuimo iobillacinona fecajano rotimaci:

¹⁴ Monamo Jusiñamui illanona, naimiemo iobillacinona feaacadicaí.

Cominina naimie duenaillamona, naimie diga uri iitimaci rotimaci. Ie mei abido jaidimaci.

¹⁵ Monamo jaienisai jailla mei, toica llaudaiaí sedaraini coniniri ñaitimaci:

—Belémo mai cai jailli, cai Nama caimo como lloga rafuena cai jibuisaillena.

¹⁶ Ieconí raire jaidimaci. María José diga baitimaci. Iaímaiaí urue jurareta ecaranomo billana cioidimaci. ¹⁷ Naimiena ciua mei, nana naimacimo jaienicí lloga rafuena llotimaci. ¹⁸ Nana naie rafuena cacadinodí ieri rajjicaidimaci. ¹⁹⁻²⁰ Iaímaiaí uruena ciua mei, llaudaiaí sedaraini imaci toiniaí dine abido jaidimaci. Naimacimo jaienicí llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri

Jusiñamuimo iobillacinona fecadimaci. María naie rafuena feitañede; ia iena comecina facauide.

Jerusalémo Jusiñamui jofomo Jesúna iaímaiai uilla rafue

²¹ Ocho digarui illanona, naie urue abina dete. Ie ei jeraimo naimie nia comuñenia, Jusiñamui jaiñeni; naimie lloga mamecina jítade. Jusiñamui jaiñeni llua isoi, Jesúna ie mamecina jítade.

²²⁻²⁴ Moisés micori jaie llua isoi Jerusalémo Jesúna uitiaímaiai. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaima iena faja mei, riño facaina Jusiñamuimo jobaica”. Jíai cuete: “Naga nano doforamedí Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaímaiai.

²⁵ Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inocana jaide. Naimie cominina Cristo jilloitalena, Cristo billemo ocuride. Naie facaise Jusiñamui Joreño anamo naimie ite. ²⁶ Iemona Jusiñamui Joreñodi, naimiena Cristona cioillena, navui uicodo uiñotade. O nia fiodañenia, Cristona cioitio raillanona llote. ²⁷ Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón cide. ²⁸ Naimaci dine jaillanona, Jesúna meniñote. Jusiñamuimo iobillacinona fecajano jide:

²⁹ Nama, o anamo iticue.

Cuemo o lloga uai jai suilla jira, uri fiodaiticue.

³⁰ O oretaga jilloitaraimana jai ciodicue.

³¹ Naimiena oredio, nana comini jilloillena.

³² Naimiedi judíuaíñedinona uanaicínona uiñotaite.

O cominina iobitaite

jide. ³³ Iena cacajamona, iaímaiai jítana lloga uairi rajicaidiaímaiai.

³⁴⁻³⁵ Simeón iaímaiaimo camaredicínona llote:

—Jusiñamui omoína raise canoite—llote.

Maríamo llote:

—Ero, ie rafuena llollena, Jusiñamui o jítana jai fetode. Naimie illamona, comini comeciaina facajacinona uiñotaite. Naimiemo suille rafuemono o comeci sure iite. Cai cominimona ailluena naimiena jítaiñeitimaci. Ailluena jítaitimaci.

³⁶ Nairuido Jusiñamui jofomo Ana railla feciño ite. Jusiñamui naiñaiñomo lloga rafuena llouide. Naiñaiño moo Fanuel micori. Naiñaiño nairaidi Aser. Jítaiño facaise mona ie ini diga siete años illanona, naimie fiodaite.

³⁷ Naiñaiño jai eo uaiñiño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedaide.

³⁸ Simeón ñaiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ocurilla jira, naiñaiño naimaci jilloitaraimana nainomo itinomo llocana uite.

Nazaretmo abido naimaci jailla rafue

³⁹ Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaímaiai. ⁴⁰ Nainomo Jesús sairicana maíricana jaide. Eo abina uiñote. Naimieri iobillamona, Jusiñamui naimiena canouide.

Jerusalémo Jusiñamui jofomo Jesús illa rafue

⁴¹ Naga año Jerusalémo pascua railla rafue dine Jesús moo iaímaiaí jaisoidiaímaiaí. Egiptomona naimaci jaiagai jillobillana comecillena, naie rafue ite. ⁴² Naimiemo doce años illa facaise Jerusalémo iaímaiaí jaisoilla isoi, jaidiaímaiaí. Naimie doce años illa jira, Jesúsna uitiaímaiaí. ⁴³⁻⁴⁴ Rafue fuilla mei, abido bitiaímaiaí. Ailluena comini jiaí billa jira, Jesús billana raise uifnoñediaímaiaí. “Cai comini diga naimie bite” raillanona comecina facadiaímaiaí; ia Jesús Jerusalémo fiebide. Darui raifi billa mei, iaímaiaí cominimo naimiena eo jenodiaímaiaí. ⁴⁵ Baiñena jira, inia mei, Jerusalémo darui jaillanona, abido jaidiaímaiaí. ⁴⁶ Ie are Jusiñamui jofomo naimiena baitiaímaiaí. Moisés micori llogacinona llofueraíni motomo naimie ite. Naimaci llofuiana cacade. Iena naimaci diga jiaí siadote. ⁴⁷ Nana cacadino naimie uifnogacinori rajicaídímaci. Naimie raise siadogacinori jiaí rajicaídímaci. ⁴⁸ Naimiena iaímaiaí baia, rajicaídíaímaiaí. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

⁴⁹ Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Niése bene cue illana uifnoñedomico?

⁵⁰ Naimie lluana raise cacañediaímaiaí. ⁵¹ Iemei iaímaiaí diga Nazaretmo naimie abido jaide. Iaímaiaí uai inuanona, iaímaiaí anamo ite. Ie ei María nana naie rafue ie comecimo facauide. ⁵² Naimie sairicana abina uifocana jaide. Jusiñamui naimieri iobide. Comini dinena naimiena jiaí gaidímaci.

3

Jofue iñenanomo Juan Bautista micori illa rafue (Mt 3.1-12; Mr 1.1-8; Jn 1.19-28)

¹⁻² Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaímana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla enirue diga, gobernadori Felipe. Abilinia railla enirue gobernadori Lisantias. Jusiñamui diga nanoca ñairaiíma iaímaiaídi Anás, Caifás diga. ³ Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fainonocaida, Jusiñamui dibeimo omoi comeciaí iuai meido. Iemona Jusiñamui omoi jeacinona feitaite. Omoi comeci iuai omoi meidoia, comini iena uifollena, mai omoi bautizallomoi.

⁴ Isaías micori ie rabemo naimiena jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite. Naimie jaillino atona fino.

⁵ Nana iconi oruita.

Naga aneduai diese eniruena judai.

Neicairuai joide naisona atona fino.

Naimo itaicuai illa diese eniruena oruita, daje facai illena.

⁶ Nana comini Jusiñamui naimacina jillotaiacanana uifnoitímaci”

cuete; ia naimaci comeciaina ñaite. Cai Namana inuana ñaite. Abina iedoñenana ñaite. Jeacino finocana jaiñenana ñaite. Cai Nama Jesús bia, Jesús uaina naimaci feiñollena, naimaci comeciaí marena finuana ñaite.

7 Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jaio nairai isoidomoi. ¿Niese jilloitomoi? Cue dine omoi billena, ¿bu omoimo lloga? 8 Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticaí. Ie mei bautizallomoi. Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui ricaiillifuemona jilloiticaí”. Ero, omoimo lloiticue: Cue llua isoi omoi finoñenia, naimie ricaiillifuemona jilloiteitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. 9 Ero, lliñede rira tiedomoi. Tia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoína jai duere finoacade. Ie ricaiillafue anamo jai itomoi. Omoi comeciai iuai omoi meidoñenia, omoína duere finoite.

10 Iena cacajanona, comini dinena naimiemo jicanotimaci:

—Cai bautizaja mei, ¿niese iticaí? ¿Ñie isoide mare rafuena finoiticaí?

11 Juan uai ote:

—Ailluena iniroiredimiedi iniroinidimiemio iniroina feca. Guilleredimiedi guillenidimiemio guillena feca.

12 Naimacina bautizallena, gobierno ucubena oraini jiai bitimaci. Jicanotimaci:

—Llofueraíma, cai bautizaja mei, ¿niese iticaí? ¿Ñie isoide mare rafuena finoiticaí?

13 Uai ote:

—Gobierno facaina omoi ibataia, cominimona gobierno llua baifemo oñeno.

14 Naimie dine billanona, soldadaui jicanotimaci:

—Cai bautizaja mei, ¿niese iticaí? ¿Ñie isoide mare rafuena finoiticaí?

Uai ote:

—Cominimona rana bairoñeno. Riicinodo rana oñeno. Tainona llogiduamona, cominimona rana oñeno. Omoi ucube illa die se feiño. Ie baifemo ucubena nicidoñeno.

15 Juan llofuamona naie facaise cominidi Cristo billemo ocurilla jira, “Juandi ñibai Cristo” raillanona, Juanmo comeciaina facauidimaci. 16 Iena fidiano, Juan lloite:

—Cristoñedicue. Jusiñamui dibeimo omoi illamona, jinui diga omoína bautizadicue. Cai baifemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoimo itataite. Omoi comeciai iuai omoi meidoñenia, omoína duere finoite. 17 Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciai iuailai meidotinona ie Moo illanomo ofitaité; iadedi jiaie cominina duere finoite. Iraimo dotaite. Naie irai jaca duñede —llote.

18 Bie isoidicinodo cominimo ie mare rafuena llofueuide. 19 Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade.

20 Maraiñede rafuena Herodes finocana jaillamona, Juan cárcelmo jonetade.

Juandi Jesúna bautizaja rafue
(Mt 3.13-17; Mr 1.9-11)

²¹ Ailluena cominina Juan bautizaja facaise, Jesúna jiai bautizade. Bautizaja mei, Jesúdi ie Moo diga ñaianona, mona bojode. ²² Ieconí Jusiñamui Joreño ucugina eruauillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

Jesucristo ie usumatiai
(Mt 1.1-17)

²³ Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Elí micori jito. ²⁴ Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. ²⁵ José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. ²⁶ Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. ²⁷ Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito. ²⁸ Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. ²⁹ Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. ³⁰ Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. ³¹ Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito. ³² David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. ³³ Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito. ³⁴ Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. ³⁵ Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. ³⁶ Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. ³⁷ Lamec micori Matusalén micori jito. Matusalén micori Enoc micori jito. Enoc micori Jared micori jito. Jared micori Mahalaleel micori jito. Mahalaleel micori Cainán micori jito. ³⁸ Cainán micori Enós micori jito. Enós micori Set micori jito. Set micori Adán micori jito. Adándi Jusiñamui comuitagamie.

4

Taife ramo Jesús faia rafue
(Mt 4.1-11; Mr 1.12-13)

¹ Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede. ² Nainomo

cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. ³ Jesús aimetaillana Taife uiñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomeniconajaita”.

⁴ Jesús uai ote:

—Iena lloñeiticue. Jusiñamui facaina lloraíma micori iena jaie cuela: “Jiaie rafuedi llomenico guilla baifemo faite”.

⁵ Ie mei a ite anedumo Taife Jesúsna uillano, dallu illanona, naimiemo nana nairaiaína acatate. ⁶⁻⁷ Llote:

—Nana bie nairaiaí cue anamo ite. Iena cue iacagamiemo itataredicue. Cuena o sedajamona, iobillacinona cuemo o fecaña, nana bie nairaiaí omo fecaiticue. Bie nairaiaí illaímana jaitio.

⁸ Jesús uai ote:

—Dama ite. Ona sedañeiticue. Moisés micori jaie cuela: “Cai Nama Jusiñamuína seda. Dama naimiemo iobillacinona feca”.

⁹ Ie mei Jerusalémo Jusiñamui jofo muidomo Taife Jesúsna uite. Raite:

—Jusiñamui Jitodiodena, eniruemo mai ana uai. ¹⁰⁻¹¹ David micori ona jaie cuela:

Ona eenollena Jusiñamuidi ie jaienisaímo llote.

Eniruemo o uaiñellena, o abi bodefaiñellena, ona feiñoitimaci

cuela. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominímo Moisés micori jaie cuela: “Cai Nama Jusiñamuína facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluaña finoñeiticue.

¹³ Taife naimiena ramo faia mei, naimiemona ie jitaille dñori oni jaide.

Galileamo Jesús ie rafue llole jillaci

(Mt 4.12-17; Mr 1.14-15)

¹⁴ Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. ¹⁵ Ailluena judíuái ofiracuáimo naimie llofueuide. Iena cacajanona, cominí: “Naimie llofuaciño mare” raitimaci.

Nazaretmo Jesús illa rafue

(Mt 13.53-58; Mr 6.1-6)

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomona jaide. Jaie cuelaíuái adofacallena, naimie a naidadate. ¹⁷ Naie lloraco nama mullaímadí Isaías micori jaie cuelaíuái jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸⁻¹⁹ Jusiñamui Joreño cuemo ite.

Dueredíno mare rafuena llollena, cuena fetode.

Taife anamo ailluena cominí illa jira, Jusiñamui naimacina jillotaíacana uiñoñedimaci.

Jusiñamui rafuena ailluena cominí uiñoñena jira, naimie illanomo rillena uiñoñedimaci.

Jecaino anamo naimaci illa jira, Jusiñamui naimacina jillotaíacana uiñoñedimaci.

Naimie naimacina duenaillana birui uiñuana jitaide.

Naimacimo mare rafue llollena, cuena jai oretate.

²⁰ Naie rafue facaja fuillamona, cuegafuiai abido fecade. Naimacina llofu-ellena, dane ana raide. Nana nainomo ite comini naimiemo eo eruaidimaci.

²¹ Iemei naimie naimacina llofujete. Raite:

—Omoi como cacaja cuegafuiai omoi motomo jai suide. Cuenā ñaite.

²² Naimie lluana comini cacajano, coninina raitimaci:

—Naimie fue mare. Naimie marena llofujete. —Iemona rajicaillamona, coniniri raitimaci—, Naimiedi jamai José jito. ¿Ñiese naie rafue birui suide?

²³ Iena uñuamona, Jesús dinena llote:

—Cue lluana ñnoñedomoi. Comeciaina facadomoi: “Capernaumo naimie siño finoca rafuena fidiñicai. Siño rafuena cai motomo naimie jiai finoia, naimiēna ñnoitñicai. ‘Ua médico duia, ie abina dama jillotarede’ cai einamacī raisoidimaci. Ie isoide. Naimie llua isoi naimie ia, siño rafue cai motomo ñnorede” comeciaina facadomoi. ²⁴ Uanaicinona omoimo lloiticue. Naimie comini nairaimo Jusñamui facaina lloraima ia, ie comini naimie uaina feññoiacasñede. Iena jamaisite. Ie isoide. Cue nairaimo cue illa jira, cue uaina ñnoñedomoi. ²⁵ Jaie ie isoide. Elías facaiseconi daje amani años abimo atomonado noci deññede. Aime guitimaci. Naie facaiseconi bie enñruemo cai comini dine ailluena feciñuiai itimaci; iadedi omoi jaiagai Jusñamui uaina ñnoñedimaci. ²⁶ Jusñamuidi Elíana cai comini dine oreñede; iadedi jiaie enñruemo ite feciño dine naimiēna orede. Sarepta railla nairaimo orede. Sidón railla enñruemo naie nairai ite. Cai cominiñede feciñomo orede. ²⁷ Jiaie rafuena lloiticue. Eliseo micoridi Jusñamui facaina jaiē llote. Eliseo micorī facaiseconi bie enñruemo diga efonaitino ite; iadedi naimacimona Jusñamui buna jillotañede. Omoi jaiagai Jusñamui uaina ñnoñena jira, Eliseo micorī duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla enñruemo duide. Ie isoídomoi. Cue uaina ñnoiacaññedomoi —llote.

²⁸ Jesús lluana cacajano, naie ofiracomo itino eo iciritimaci.

²⁹ Naidacaillano, naimiēna jino uitimaci. Naie illanodi iconimo ite. Nainomo naimiēna uillanona, iconimona naimiēna ana dotaacadimaci. ³⁰ Naimiēna meineiacadimaci; iadedi naimaci motomo naimie jaillanona, naimacimona naimie jillobillano oni jaide.

Jesúdi Janaba anamo itimie jillotaja rafue (Mr 1.21-28)

³¹ Jesús Capernaumo jaide, Galilea railla enñruemo ite. Nainomo naimie ia, sábadoruimo judíuai ofiracomo jaide. Nainomo llofujete. ³² Illaíma uai isoi naimie llofuia jira, nainomo ite comini naimie llofuiaimona rajicaidimaci.

³³ Janaba anamo illamie nainomo ite. Jesús llofuiana cacaita, Janabadi iimana ado cuirioitate:

³⁴ —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uññoticue. Odi Jusñamui ie Mare Fetocamiedio.

³⁵ Jesús naimiēna lletade:

—Lliñicai. Naimiēmona oni jai. —Iena cacajanona, naimaci motomo Janaba iimana ana dotade; ia naimiedi bofedaiñede. Ie mei Janaba naimiēmona oni jaide. ³⁶ Iena cianona, nana nainomo itino rajicaidimaci. Coniniri siadotimaci:

—¿Ñie isoide Jesús uai? Janabamo naimie llua mei, iimamona Janabadi oni jaide.

³⁷ Jesús finoca rafue muidona, naimie mamecidi nana naie enñruemo soride.

Jesúdi Simón Pedro jifaiñoa jillotaja rafue
(Mt 8.14-15; Mr 1.29-31)

³⁸ Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiñoa jilloitallena, nainomo itino Jesús jicanote. ³⁹ Naiñaiñoa dine Jesús jaillanona, ie uai llua mona, naie duicodi oni jaide. Ieconí naiñaiño jillode. Abi cuarife. Naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue
(Mt 8.16-17; Mr 1.32-34)

⁴⁰ Nairuido jítoma ana ítemo, comíni ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate. ⁴¹ Jananiaia jiai oni oretajano, jananiai dinena raite: —Odi Jusiñamui Jitodio. —Naimiena naimaci uíñua jira, Jesús naimaci ñaiana rairuide. Naimiedi Jusiñamui Jítoma uíñotimaci.

Judeamo Jesús llofuia rafue
(Mr 1.35-39)

⁴² Ie areruido jítiramo jofue íñenanomo Jesús jaide; iadedi comíni naimiena jenuaidimaci. Baillanona, naimaci motomona naimie jaiñellena jicanotimaci.

⁴³ Naimacimo llotte:

—Jiaie nairaimo cue mare rafuena lloiacadicue. Naimie anamo comíni illana Jusiñamui jitailla jira, naimacimo iena lloiacadicue. Ie mare rafuena lollena, Jusiñamui cuena orede. Oni jaiticue. Omoi diga fiebiñeiticue.

⁴⁴ Ie mei Judeamo ite ofiracuaimo Jesús llocana jaide.

5

Jesús muidona, naimaci ailluena lliciaina ua rafue
(Mt 4.18-22; Mr 1.16-20)

¹ Jaiiruido Genesaret railla jorai fuemo Jesús ia, ailluena comíni naimie dine bitimaci. Ie rafue raise cacaillena, coníni oni ñuicocana naimie ecimo bitimaci. ² Ie facaise jorai fuemo Jesús mena sijide botena ciode. Naimaci llojjina naimaci jocua jira, naie botemo lloiji fairaini íñede. ³ Comíni ie llofuiaínona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raíta, botemona comínina llofuete. ⁴ Llofuia mei, Simómo llotte: —Aforedinomo jai. Nainomo omoi llojjina faino.

⁵ Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicaí. ¿Ñiese ja oiticaí? Iadedi o llua jira, llojjina faiticue.

⁶ Iena naimaci faia mei, ailluena lliciaina jítatimaci. Ie jira naimaci lloiji cuaranoiacade. ⁷ Iena ciuano, onollí diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruítate. Eo oruilla jira, buiacade. ⁸ Iena ciuano, Simón Pedro Jesús mo íobillacino fecallena, caíñici ífodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jeaínona finuidimiedicue.

⁹ Ailluena lliciaina naimaci ua jira, naimaci rajicaillamona, iena naimie llotte. ¹⁰ Naimie nabaiñiaimona Zebedeo jito iaímaiaí ite. Juan diga Jacobo iaímaiaí. Simómo Jesús llotte:

—Cuená jaciruiñeno. Lliciaina birui ocabitomoi; iadedi cue díbeimo naimaci illena, biruimona comínina oitomoi.

11 Eniruemo sijiano, naimaci raruiai fainonocaida, Jesús diga jaidimaci.

Jesúdi efonaitimiena jillotaja rafue
(Mt 8.1-4; Mr 1.40-45)

12 Jiairuido Jesúsdi jiaie nairaimo ia, efonaitimie naimie dine bite. Naimie eo fodo jaide. Jesúsna naimie ciuano, naimiena raise uaiduamona, ana bitadate. Lote:

—Maestro, o jitaia dedi, cuena jillotaredio.

13 Jesús ie onolli oni ñuitajanona, naimiena jetade. Raite:

—Ona jillotaiacadicue. Mai o jillo. —Ieconi jillode.

14 Jesús naimiemo llote:

—Omo suide rafue jaca bum o lloñeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micori jaie lloga rana feca Iemona comini o jilluana uifioitimaci.

15 Iese Jesús naimiemo llote; iadedi Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comini naimie dine bitimaci. 16 Bitimaci; iadedi Jusiñamui diga ñaillena, jofue iñenanomo Jesús jaide.

Jesúdi tisitaitimiena jillotaja rafue
(Mt 9.1-8; Mr 2.1-12)

17 Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate. 18 Ie facaise ie biramo bide tisitaitimiena Jesús dine damerie atidimaci; 19 iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie biramo bide diga, comini motomo Jesús ecimo ana ñuitadimaci. 20 Iena Jesús ciuana, tisitaitimie jilluana naimaci inuana Jesús uifote. Tisitaitimiemo llote:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

21 Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”. 22 Naimaci comeciaina facajacinona Jesús uifuanona, naimacimo jicante:

—¿Bue ñellena omoi comeciaina iese facadomo? 23 Bimiemo: “O jeacinona jai oni dotadicue” cue lloia, cue uai siñonana uifioñeitomoi; ia bimiemo: “Mai naidacaillanona macari” cue lloia, cue uai siñonana uifioñeitomoi. 24 Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uifollena, tisitaitimiemo lloiticue: “Mai naidacai. O bira ferianona, o jofomo mai jai”.

25 Iese naimie raillamona, tisitaitimie jillode. Ieconi naimaci motomo naimie naidaide. Ie bira feriano, Jusiñamuimo iobillacino fecajano, ie jofomo jaide. 26 Nana naiena ciolino eo rajicadimaci. Iemona Jusiñamuimo iobilacinona fecadimaci. Eo rajicaillamona, raitimaci:

—Bie isoide siño comena jaca cioñedicaí.

*Jesúdi Levína fetua rafue
(Mt 9.9-13; Mr 2.13-17)*

²⁷ Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiena o jaillena, cue diga bi.

²⁸ Naidacaida, Jesús diga jaillanona, ie maijana faionocaide. ²⁹ Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci. ³⁰ Nainomo fariseuai cominidi, Moisés micori llogacino llofueraini diga, jamai bitimaci. Jesúna ciuanona, ie llofueoicaiganomo jicanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jicanotimaci. ³¹ Jesús iena caca-jano, llote:

—Ecairedino médicono jitaiñedimaci; iadedi duidinodi médicono jitaídımaci. ³² Jusiñamui díbeimo mareuidinona uaiñedıciue; iadedi maraiñedinona uaiñıciue.

*Jesúmo comini guiñenana jicanua rafue
(Mt 9.14-17; Mr 2.18-22)*

³³ Naie facaise fariseuai dinena Jesúmo llote:

—Cai einamacı llua isoı, Jusiñamuına cai raise iobıtallena, guiñenaruıllai illa facaiseconı guiñedıcai. Jusiñamuımo jııcabıdıcai. Cai jeacino facaina sunaıcabıtıcai. Cai einamacı rafuedo Juan Bautista llofueoıcaıgano jaidımaci. Cai llofuegano iedo jiai jaidımaci; iadedi o llofueoıcaıgano jaca guitımaci. ¿Bue ñellena cai einamacı rafuedo jaiñedımaci?

³⁴ Jesús uai ote:

—Jiaie rafuedo iena lloıtıciue. Conıruedi ie aina uarui ia iobıllı jira, ie nabaiñıai sunaiñedımaci. Iobıllımona guitımaci. ³⁵ Jıaiıruıdo jai aireıacade conıruıe naimacı diga iñenia, naimacı comeci sunaıllımona, naimacı jıtaıa, guiñenaruıllıdı iıte. Ie isoıde. Cue comini diga bıruı cue illa jira, iocıre itımaci. İco cue jaille meı, sunaitımaci. Ie muidona bıruı cue llofueoıcaıgano guıcabıtımaci. ³⁶ Jıaie rafuedo iena lloıtıciue: Nıa jocoñega comue inıroidı jacaie inıroımo jıllıñega. Jıllıadı jocua meı, comue inıroı jacaie inıroımona fo llırite. Eo fodo cuararite. Jai maraiñeno cioıte. ³⁷ Jacagomona fınoça bolsa como fınoça vıno joneñega. Jonegadena, mairiñena jira, sırıllımona ıgoı raıre cuararite. Vıno faıfıte. İgoı jıai faıfıte. ³⁸ Como fınoça vıno comogomo jonelle. İemeı iena faıfıñeıte. ³⁹ Navui fınoça vıno jırua meı: “Navui fınoça vıno nıa mare” raıllımona, como fınoça vıno buna jıroacıñede. Ie isoıde. Omoı einamacı rafue fıfomo jıaie rafue bıruı ite. İena omoımo llocabıtıciue. İedo jaidıcai; ia omoı einamacı rafueımo omoı fıbıllı jira, jıaie rafuedo bıruı jıacıñedomoı —llote.

6

*Sábadoruımo Jesús llofueoıcaıgano maijıa rafue
(Mt 12.1-8; Mr 2.23-28)*

¹ Jıaiıruıdo sábadoruımo Jesús, ie llofueoıcaıgano diga, trıgo illa illı motodo joıde naisona jıade. Ie llofueoıcaıgano trıgono tıjıano, gollıano, guıcana jaidımaci. ² Dajerıe fariseuai iena ciıano, llotımaci:

—Rairuica rana finosite. Moisés micorí rairuilla jira, sábadoruimo maijinidicai; iadedi trigona naimaci tijamona, caimona jai maijidimaci. Caimona jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micorí jaie finoca rafuemo omoi comeciai raise facañedomoi. David micorí guille ifenia, naimie aimetaia, ie nabaiñiaí diga Jusiñamui jofomo fo jaide. ⁴ Jusiñamui fecaca llomeniconona uanona, guítimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. David micorí iena guite; ia Jusiñamui naimacina duere finoñede. ⁵ Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

Jesúdi onollina idisarodimiena jillotaja rafue
(Mt 12.9-14; Mr 3.1-6)

⁶ Jiaie sábadoruimo judíuai ofiracomo Jesús jaillanona, llofujete. Ie facaise nainomo nabellimo idisarodimie ite. ⁷ Moisés micorí llogacinona llofueraini, fariseuai diga, Jesúsno eruaídímaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode. ⁸ Naimaci comeciaina facajacinona Jesús uifnuamona, onollina idisarodimiemo llote:

—Cue ecimo naidada. —Iemei Jesús ecimo naidadate.

⁹ Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jil-lotaiadedi, birui mare rafuena finodicue. Cuenaa birui omoi meineiadedi, birui marañede rafue finodomoí. Sábadoruimo ¿nie isoide rafue finuana rairuidomoi?

¹⁰ Naimacimo eruaillanona, duidimiemo llote:

—O onollí mai oni ñuita. —Iena ñuitajanona jillode. ¹¹ Nainomo itino iena ciuanona, eo iciritimaci.

—¿Niese Jesúsna nibaítica? —naimona coniniri siadotimaci.

Jesúdi ie doce llofueoicaiganona fetua rafue
(Mt 10.1-4; Mr 3.13-19)

¹² Nairui aneduaímo Jesús jaide, Jusiñamui diga ñaillena. Namona naio jüde. ¹³ Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode. ¹⁴ Iese mameciredimaci: Simón; naimie mameci jiaicidi Jesús jítaca Pedrona. Andrés; naimiedi Pedro ama. Jacobo, Juan, Felipe, Bartolomé, ¹⁵ Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide. ¹⁶ Judas; naimiedi Jacobo jito. Judas Iscariote micorí; naimiedi Jesúsna gaítatatimie.

Jesúdi ailluena cominina llofuia rafue
(Mt 4.23-25)

¹⁷ Aneduaímona siniaídinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monaillai fuemo ite. Sidón monaillai fuemo jiaí ite. Naimie llamo cacareillena bitimaci. Naimaci duicomona jiaí jilloiacadimaci.

18 Jananiai anamo itinomona Jesús jananiaina oni orede. 19 Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

Jesús lloga rafue

(Mt 5.1-12)

20 Ie llofueganomo eruaillanona, Jesús llote:

—Naimie anamo omoi jai illamona, Jusiñamui omoina sedaacana rafuena omoina llofueiticue. Naimiena jitaidomoina, omoina sedaite. Comeciaina facadomoi: “Jusiñamui jitaillacinona dani finonidicai; ia Jusiñamui caina canuamona, iena finoiticai”. Naimie comini omoi illamona, naimie omoina canoite. Iemona caimare iitomoi. 21 Naimie jitaillacino omoi finuamona, Jusiñamui omoina sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoina sedaite. Ailluena comini jeacino finocana jaidimaci. Iena uiñuamona, sunaitomoi. Naie isoidino omoi illamona, Jusiñamui omoi comeciaina ocuifotaite. Iemona iocire iitomoi. 22 Cuemo omoi duia, duere sefuitomoi. Jiaie comini omoina enoitimaci. Omoina oni dotaitimaci. Omoina jeare ñaitimaci. Cuemo omoi duilla jira, omoina jamaitimaci; ia Jusiñamui omoina caimare itataite. 23 Omoi isoi omoi jaiagaimona Jusiñamui facaina lloraini micoriai jiaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefua, iocire omoi jai. 24 Iese iitomoi; ia Jusiñamuina jitaifedino ico duere sefuitimaci. Comeciaina facadimaci: “Jusiñamuina jitaifedicai. Marena birui iticai. Nana cai comeciari jitaillacino birui caimo ite”. Iese birui itimaci; ia Jusiñamui naimacina ico duere finoite. 25 Jusiñamuimona buena birui jitaifedino ico duere sefuitimaci. “Nana cai comeciari jitailla rafue caimo birui illa jira, Jusiñamuimona buena jitaifedicai” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeciaina iocire itatallena, Jusiñamuina jitaifedicai” damierie birui raitimaci. Naimaci jeacino facaina sunaifedimaci. Birui ite rafuena ebiruitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci. 26 Naimaciri iobillamona, omoi jaiagaidi Jusiñamui facaina llorainina abi caitadinona marena ñaitimaci. Damierie birui daje isoidimaci. Jusiñamuina iobitaiacaiñedimaci; ia cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

Jesúdi iba oñenana llua rafue

(Mt 5.38-48; 7.12)

27 Jesús llote:

—Cue lluana cacajamona, iena ñno. Finuamona omoina enoidinona isirui. Naimacina cano. 28 Omoi jeare ñaitinona marena ñaino. Omoina jeare finodino facaina Jusiñamuimo omoi jii. 29 Omoi cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoi iniroina bu bairoiacania, omoimo naimie nia jicañenia, naimie jitailla iniroi baifemo naimiemo feca. 30 Omoimo ite rana bu jicaia, iena caidiñeno feca. Omoimona rana bu bairoia, iena abido jicañeno. 31 Jusiñamui jitaillacinona omoi finuamona, jiaie cominina marena fino. Jiaie comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. O finoacaga ra isoi jiaie cominimo fino. 32 Naimie cominina omoi illamona, nana comini daje isoi isirui. Omoina

isiruitinona omoi isiruaia, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baiñefo faiñedomoi. Naimaci isoi itomoi. ³³ Naimie cominina omoi illamona, nana comini daje isoi cano. Omoina canodinona omoi canoia, mare; iadedi omoina canoñedinona omoi canoñenia, Jusiñamui omoina: “Mare” raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baiñefo faiñedomoi. Naimaci isoi itomoi. ³⁴ Naimie cominina omoi illamona, nana cominimo daje isoi rana feca. Omoimo ra fecadinomo rana omoi fecajia, mare; iadedi omoimo rana fecañedinomo rana omoi fecañenia, Jusiñamui omoina: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoi fecañenia, maraiñede rafuena finoraini baiñefo faiñedomoi. Naimaci isoi itomoi. ³⁵⁻³⁶ Omoina gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuriñeno; ia Jusiñamui omoi raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona, maraiñedinodi naimie cominina omoi illana uñoitimaci. Jusiñamuidi cominina duenailla isoi, cominina omoi jiai duenai.

Jesúdi jiaie cominina mameriñenana llua rafue
(Mt 7.1-5)

³⁷ Jesús llote:

—Duenaillacinona nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoina duere finoite. Omoimo maraiñede rafuena bu finoia, iena feita. Iena omoi feitañenia, Jusiñamui omoimo ite maraiñede rafuena feitañeite. ³⁸ Jiaie rafuedo iena lloiticue. Rana omoi fecaia, iena raise omoi gaieia, ico ibana omoi oia, raise gaiecana feiñoitomoi. Ie isoide. Jiaimono maraiñede rafuena finoñeno; ia naimacina duenaillamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoi.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoi illamona, bie rafuena cacarei. Uanaicnodo omoi jaiñenia, uisinidimie isoi itomoi. Uisinidimie jiaie uisinidimiena ifonide. Ifo iade, nagamaiai dafomo uaidiaimaiai. ⁴⁰ Fueotimie ie llofueraima baiñefo uaiñede; iadedi naimie raise fueoia, ie llofueraima isoi jaite. Raise fueollena, cue uaimo cacarei. ⁴¹ Omoi ecimo itimie janoie maraiñedicino illana omoi uñioia, iemo comecina facaño; iadedi omoimo ailluena ite maraiñedicinomo nano omoi comecina faca. ⁴² Omoimo maraiñedicino illamona, ¿niese omoi ecimo itimiena mameritomoi? Omoimo ite maraiñedicinomo omoi comecina facaaciñena jira, maredinona abi caitadinodomoi. Omoi comeciaina nano raise fino. Iemei omoi ecimo itimiena canorenitomoi. Naimie comecina raise canorenitomoi.

Jesúdi riarra llisilla llilla llua rafue
(Mt 7.17-20; 12.34-35)

⁴³ Jesús nia llofueite:

—Mare riarra maraiñede riarra isoi llisiñede. Maraiñede riarra mare riarra isoi jiai llisiñede. ⁴⁴ Llisillamona nie isoide riarra illana uñoticai. Amena ie llisilla llillamona amena marena uñoga. Llillamona, amena maraiñenana jiai uñoga. Ecuaimona uvas railla riarana oñedica. Monaigimona higos railla

riarana jiai oñedicaí. ⁴⁵ Ie isoide. Naimaci comeciáimo iticinomona comini ñaitimaci. Mare comeci iticinomona maremiedi mare rafuena finocabide. Marañede comeci iticinomona marañedimie marañede rafuena finocabide.

Jesúdi naimiena ñnuana ñaia rafue

(Mt 7.24-27)

⁴⁶ Jesús nia llofuede:

—Omoimona damierie cuena: “Cai Nama” raitomoi; iadedi cue llogacinona finoñedomoi. ⁴⁷ Diga comini cue dine bitimaci. Cue uaina cacadimaci. ⁴⁸ Cue uaina ñnotimie jofona raise finodimie isoide. Jofona raise finodimiedi ie jofona finodemo, jofona goñellena, nofici illa dinori eo ana raite. Noci deidemo, eo jinuidemo, jofomo ille toia, jofo raise finua jira, jofo goñede. Iena faifñede. Ie isoide. Cue lluaña ñnotimie faifñeite. ⁴⁹ Cue uaina ñnoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana rañede. Noci deidemo, eo jinuidemo, jofomo ille toia, jofo goillamona, jai eo judaisite. Iena faifide. Ie isoide. Cue lluaña ñnoñedimie faifite —llote.

7

Jesúdi capitán mullaimana jillotaja rafue

(Mt 8.5-13)

¹ Ie lua fuillamona, Jesús Capernaumo jaide. ² Nainomo romanos railla nairaimo duide illaíma ite. Cien soldaduaina sedauide. Naimiedi capitán. Judíuñedimie. Ie mullaíma eo duide. Niade fiodiacade. Capitán naimiena eo gaide. ³ Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaímana jillotajai billena jitaide. ⁴ Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caimona maremiena jira, naimiena o canuana jitaídicaí. ⁵ Cai nairaina isiruite. Ie ucube diga cai ofiracona finotate.

⁶ Iena cacajamona, Jesús naimaci diga jaide. Capitán jofomo iaírei Jesús ria, capitádi Jesús dine ie nabaiñaína orede, Jesúmo lllonna:

—Maestro, biñeno. Jamai bue cue isoilla jira, cue jofomo biñeno. ⁷ Jamai bue cue isoilla jira, o dine jiai jaiñedicue. O illanomona o uaido cue mullaíma jilloita. ⁸ Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina bene o lloia, cue mullaíma jilloite.

⁹ Iena cacajano, Jesús rajicaide. Oni doбайдajano, naimie diga jaidinomo llote:

—Bie isoidimie cue uaina ñnotimiena jaca baiñedicue. Cai judíuai cominimona bie isoidimiena jaca ñede. Maí abído jai.

¹⁰ Capitámona bitino abído capitán jofomo rillano, mullaíma jai jilluana ciodimaci.

Jesúdi feciño jitona jillotaja rafue

¹¹ Jiaíruído Naín railla nairaimo Jesús jaide. Ie llofueoicaigano jiai jaidimaci. Ailluena comini jiai jaidimaci. ¹² Naie nairai ie nasemo naimie iaíreicaia, jai fiódaitimiena comini jino atiana ciode. Naie fiódaitimiedi conirue. Ie eidi feciño. Dajede ie jitodi jai fiodaite. Ailluena Naín itino naie feciño diga jaidimaci. ¹³ Jesús naiñaíñaona ciuanona, naiñaíñaona duenaite. Naiñaíñaona raite:

—Mai eeñeno.

¹⁴ Fiodaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fiodaitimie mo Jesús llote:

—Mai a rainada.

¹⁵ Iena Jesús llua mei, naie fiodaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite. ¹⁶ Naieri nana jacainaitimaci. Jusiñamui iobillacinona fecadimaci. Raitimaci:

—Jusiñamui facaina lloraïma cai motomo ite. Naimie uai eo siño. Naimiena Jusiñamui oretaja jira, Jusiñamui caïna birui canoacana jira, iobidicai.

¹⁷ Nana Judeamo itino Jesús finoca rafuena fidiðimaci. Judea enirue fuemo ite nairaiaidi jiai fidiðimaci.

*Jesús dine Juan Bautista micori ie llofueoicaiganona oretaja rafue
(Mt 11.2-19)*

¹⁸ Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menamiena uaidote. ¹⁹ Llote:

—Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie bille mo nia ocuiriticaï?” naimie mo jicano.

²⁰ Jesús dine iaïmaïaï rillano, Jesúmo llotiaïmaïaï:

—Juan Bautista cocona orede. Jofue iñenanomo navui naimie ia: “Jusiñamui mona damie biite” naimie llofuecabiticue. Juan llofuegamiena o illana uñoiacadicai. Imieñediodena, jiaimie bille mo nia ocuiriticaï. Cocomo llono.

²¹ Jesús dine iaïmaïaï billa facaiseconi, Jesús diga isoide duicuai illanona jillotate. Jananiaï anamo itinomona jananiaïna oni jiai orede. Uisiniðinona uisina dane ciotate. ²² Ie jira Jesús iaïmaïaï mo llote:

—Cue lluna cadomoco. Cue finoca rafuena ciodomoco. Juan dine abido omico jaillanona, iena naimie mo llono. “Uisiniðino jai ciodimaci. Ñujañujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci”. Iese naimie mo llono. ²³ Jiai llono: “Ñibai nana cue rafuena raise cacaiñedio; ia cuena jaca nia inocana o jai, caimare iitio”.

²⁴ Iaïmaïaï abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena começina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoïñede. Nie isoide rafue naimie mo ia, cue rafuena llocana jai.

²⁵ ¿Bue ñellena naimie dine jaidomoi? Mare iniroina jitaðimiena cioiñedomoi. Mare iniroina jitaðinona omoi cioacaniadedi, illaicomini dine jaidomoi. Naimie mo ailluena ra ite. ²⁶ Jusiñamui facaina lloraïmana ciodomoi. Naimie Jusiñamui facaina llocabiticue. Jiaie lloraïni baifemo faite, cue billena omoïmo naimie llua jira. ²⁷ Malaquías micori naimiena jai euega: “Jusiñamui raite:

‘Ero, o uicodo cue rafuena llollena, damiena oretaiticue, comini começina marecinona duñollena’ ” euega. Malaquías Juan Bautistana euega. ²⁸ Juan Bautista nana Jusiñamui facaina lloraïni baifemo faite; iadedi Jusiñamui cominina birui bu illamona, Juan baifemo birui faite. Juan cue billena

llofuede; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baiñemo faitomoi.

²⁹ Naimacina navui Juan bautizaja jira, nainomo ite comini iena cajano, Jusiñamuimo iobillacinona fecadimaci. Gobierno ucube orainidi jiai fecadimaci; ³⁰ iadedi fariseuai iobillacinona fecañedimaci. Moisés llogacinuaina llofueraini jiai fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede. ³¹ Jesús llote:

—Cuen a iinoñedinona lloiticue: Ero, omoina ñaiticue. ³² Jifanote urui ai isoidomoi. Uruiai jifanoiacania, naimaci nabaiñiaina uaiduanona, raitimaci: “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci. ³³ Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci. ³⁴ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuen a jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimiedio”. ³⁵ Iese raitomoi; iadedi Jusiñamuina iñotinodi cue finoca rafuena marenana uifnotimaci.

Jesús Simón jofomo illa rafue

³⁶ Jiairuido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite. ³⁷ Jesús guitemo, daje riño fo jaide. Naiñaiñodi maraiñede rafuena finoraiño. Naicomo Jesús guillana fidiano, naiñaiño fo jaide. Noficimona finoca frasca atide, na soride ra illa diga. ³⁸ Judíuai aciaita jaca guisoidimaci. Jinafo dine eilli jonesiuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillnociai diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascaomona soride rana totade. Naimiena naiñaiño isiruillamona, iese naiñaiño finode. ³⁹ Iena cuanona, Simón dama comecina facade: “Bimie Jusiñamui facaina lloraimadena, nie isoide naimiena jetade riñona niade uifnote. Naimiedi naiñaiño maraiñede rafuena finoraiño uifnote. Iena naimie uifnuamona, naiñaiño jino raire orede. Naimiedi Jusiñamui facaina lloraimañede”. ⁴⁰ Jesús naimie comecina facajacinona uifnuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damie mo quinientos diga ucubena fecade. Jiaimie mo cincuenta diga ucubena fecade. ⁴² Ie iade, naiena abido meidonidiaimaiai. Ie jira ucubena fecadimiedi raite: “Dama omico meidoñega. Naiena jai faitaticue”. Ero, Simón, çnimieca ucubena fecadimiena eo isiruite?

⁴³ Simón dinena uai ote:

—Cue comeci raite: Ailluena ucube faitaja jira, eo ailluena ucubena igamie.

Jesús dinena raite:

—Raise cue uaina fairiotio.

⁴⁴ Temei Jesúdi riño dine dobaidajanona, Simómo llote:

—Biñaiñoa ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocolena, comini finocabilla isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote. ⁴⁵ Naiñaiño cue ecimo fo billanona, cue eillina diga icaiño llibanote. ⁴⁶ Naiñaiño cue eillimo soride rana totade. ⁴⁷ Naiñaiño mo eo jeacino ite; ia cuena naiñaiño eo isiruillamona, nana ie jeacina jai oni dotajana uñoticaí. “Jeacino cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiño mo llote:

—O jeacino jai oni dotaca. Iena jai feitaticue.

⁴⁹ Jiaíno nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riño mo llote:

—Cuena o inua jira, o jeacinomona jai jillodio. Mai uri o jaillano o i.

8

Dajerie riñoñai Jesúna canua rafue

¹ Ie facaie diga nairaimo Jesúdi mare rafuena llocana jaide. Naimie anamo comini illana Jusiñamui jitailla jira, Jesúdi Jusiñamui díbeimo naimaci comeciai iuaina meiduana llofue. Ie doce llofueoicaigano naimie diga jaidimaci. ² Dajerie riñoñai jai jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate. ³ Juana ite. Naiñaiño inidi Chuza. Herodes railla illaíma ecimo naimie maijuijude. Susana ite. Jiaie riñoñai jai itimaci. Naiñaiñuai ramona Jesúna canouidimaci.

Jesúdi trigona judaidimiena llua rafue

(Mt 13.1-9; Mr 4.1-9)

⁴ Diga nairaiamona ailluena comini Jesús dine billanona, naimacimo llote:

—Jusiñamui omoína sedaacana omoi fueollena, bie rafuena lloiticue.

⁵ Damiedi trigona judaiaide. Naimie judaíamona naisomo janore iduai juide. Comini nainomo jaillano, iena saitadimaci. Bai jailla mei, silliniñai iena jiaí guisaibite. Ie jira sicoñede. ⁶ Nofiemo jiaie iduai juide. Sicode; iadedi jinui raise iñena jira, duide. ⁷ Ecuai illanomo jiaie iduai juide. Eecuai sicuamona, riar eecuai ibaica. Ie jira lliñede. ⁸ Mare enruemo jiaie iduai juide. Sicode. Llisillamona danademo cien diga lliisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluomo cacarei. Iena ino.

Jesús ie como lloga rafuena llofua rafue

(Mt 13.10-23; Mr 4.10-20)

⁹ Jesúmo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

¹⁰ Uai ote:

—Jusiñamuidi omoína ie sedaacana rafuena jai uñotade. Jiaie iena uñofedomoi. Jiaie cominina iena nia uñotañede. Ie jira bie isoidicinodo

naimacimo lloticue. Cue siño finoca rafuena cioidimaci; iadedi iena naimaci ñinoñena jira, uiñoñeno jaidimaci. Cue llofuiana jamai cacadimaci; iadedi naimaci ñinoñena jira, raise cacaiñedimaci. Uifñedimaci.

¹¹ Omoína cue como lloga rafuena llofueiticue. Naie iduai: Jusiñamui uai. ¹² Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naiemona jilloi raillanona, Taife naimaci comeciaimo cacaja uaina ñnotañede. ¹³ Jiaie iduai nofimo juide. Dajerie comini comeciai naie nofie isoidimaci. Jusiñamui uai nano naimaci cacaiia, iena caimare feiñotimaci. Nofimo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci. ¹⁴ Jiaie iduai eecuai illanomo juide. Naie iduai sicua mei, iena eecuai ibaila jira, raise llisñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina eburillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci. ¹⁵ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciaimona ñnocana jaidimaci. Eo lliside isoidimaci. Jusiñamui jitaille rafuena sefuiruiñoeno ñnocana jaidimaci.

Jesús ie rafue llocana jailla llua rafue
(Mr 4.21-25)

¹⁶ Jesús nia llote:

—Lamparín bu unia meinoconi, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainaca. ¹⁷ Ie isoide. Cue rafue llocana jiaia, comini comeciai iticinona uifñotade. Uanaicino naimaci cacajamona, damierie ñnotimaci. Damierie ñnoñedimaci. ¹⁸ Cue lluomo raise cacarei. Iena omoi ñnuamona, Jusiñamui omoína canoite. Omoína uifñocana jaitaite. “Jusiñamui rafuena uifñoticue” raitimiedi ñnoñenia, Jusiñamui naimiëna faifitaite.

Jesús ñibeimo itinona ñaia rafue
(Mt 12.46-50; Mr 3.31-35)

¹⁹ Cominina Jesús nia llofuia, naimie ñine Jesús ei, ie amataia diga bitimaci; ia ailluena comini illa jira, naimiemo riñedimaci. ²⁰ Nainomo itino naimiemo llote:

—O ei, o amataia diga jino naidaidimaci. O diga ñaiacadimaci.

²¹ Jesús uai ote:

—Jusiñamui uaina cacajamona, iena ñnotino ieca cue eidi, cue amataiaidi.

Jesús ñ jorai baguana llñcaitaja rafue
(Mt 8.23-27; Mr 4.35-41)

²² Jiairuido botemo Jesús jailla mei, ie llofueoicaiganomo llote:

—Ruica ñibeimo mai cai jailli. —Ie mei jaidimaci. ²³ Naimaci jaidemo, Jesús ñinde. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci. ²⁴ Jesúna casitajano, naimiëna raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llñcaitade. Ieconí aifi llñcaide. Bagoñede. ²⁵ Naimacimo jicanote:

—¿Bue ñlлена cuena ñnoñedomoi? —Naimiëna jacinaillamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

Jesúdi Gadara railla eniruemo illa rafue
(Mt 8.28-34; Mr 5.1-20)

²⁶ Ruica dibellemo ridemo, Gadara railla eniruemo sijidimaci. Galilea facaisemo ite. ²⁷⁻²⁹ Botemona arí Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo nofie moto ifuaímo i-isoide. Ebena cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie cüanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusíñamui Jitodio. ¿Niese cuena nibaíacadio? Cuena duere finoñeno.

Iese raite, Janaba naie ñimamona oni jai oretajana Jesús llua jira. ³⁰ Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. ³¹ Jesúmo duere jicanoside, iraimo naimacina nia oretañellena. ³² Naie facaise nainomo ite anedumo ailluena chanchuai itimaci. Chanchuai abímo naimaci jaillena Jesúmo duere jicanotimaci. Jesús dinena:

—Jee —raite. ³³ Ieconí ñimamona jaidemo, chanchuai abímo jaidimaci. Iena suidemo, iconí jillacímo joraimo chanchuai aisidimaci. Dínomo corobaiside.

³⁴ Iena cüanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. ³⁵ Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo il-lamiena Jesús ecimo raillana cioidimaci. Naimie iniroina jai jitade. Naimie jai uairicoñede. Iena cüanona, Jesúna jaciruitimaci. ³⁶ Naie rafuena cioidinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica díbeimo abído jaillena. ³⁸ Ieconí jaive Janaba anamo illamie Jusúmo jicanote, naimie diga jaillena; iadedi Jesús raite:

—Dama ite. ³⁹ Mai o jofomo o jai. Nainomo itinomo nana Jusíñamui omo finoca rafuena lloño.

Ie mei jaide. Nana naimie nairaimo Jesús naimiemo finoca rafuena llocana jaide.

Jesúdi mena duide riñona jillotaja rafue
(Mt 9.18-26; Mr 5.21-43)

⁴⁰ Ruica díbeimo Jesús abído ria, naimie abído billemo naimaci ocurilla jira, ailluena comini naimiena feiñotimaci. ⁴¹ Jairona mameciredimiedi Jesús dine bite. Naimiedi judíuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote. ⁴² Dañaiñode ie jisa. Doce años naiñaiñodi ite. Niadedi fiodaicade. Ie jira Jesúmo jicanuaíbite. Iena cacajano, naimie diga Jesús jaide. Ie llo-fueoicagano jiai jaidimaci. Jesús jaillano, diga comini naimiemo ñaijisaide.

⁴³ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiño jaca buna jillotanide. ⁴⁴ Jinafo dinena billanona, Jesús iniroi fueda jetade. Iemona diailladi fañonocaide. Jillode.

⁴⁵ Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicaí.

Ie nabaiñai diga Pedro dinena raite:

—Maestro, ailluena comini o ecimo jaidimaci. Omo ñaijidimaci.

⁴⁶ Jesús uai ote:

—Damie cuena jetade. Cue abimona cue uai jaillamona, naimie jai jillode.

⁴⁷ Jaive duidiñaiñodi Jesús naiñaiño uñuana uñote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño ieconi jilluana llote. ⁴⁸ Jesús dinena naiñaiño raite:

—Ñoo, cuena o ñnua jira, jai jillodio. Mai jaillanona, uri o i.

⁴⁹ Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoñeno.

⁵⁰ Iena Jesús cacajano raite:

—O comeci jarire iñeno; ia cuena nia ñno. Naiñaiño jilloite.

⁵¹ Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. ⁵² Nana nainomo itino ecuinaidimaci. Faillñaidimaci. Jesús dinena raite:

—Omoi eeñeno. Cuemona naiñaiñodi fiodañedesa. Jamai inide.

⁵³ Jai fiodaite: “¿Bue ñelli inide raitio?” raillanona jaisitimaci. ⁵⁴ Jesús fo jailla mei, naiñaiño onollina llinocaida, raite:

—Jitaibici, mai naidacai.

⁵⁵ Ieconí naiñaiño joreño abido bite. Naidacaide. Jesús llote:

—Guillena naiñaiño eca. ⁵⁶—Naiñaiño moo, ie ei diga, rajicaidiiaimaiaí.

Jesús iaiaiaimo llote:

—Bie rafuena bumoo lloñeno.

9

Jesúdi ie llofueoicaiganona oretaja rafue

(Mt 10.5-15; Mr 6.7-13)

¹ Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiaina anamona cominina jilloitallena. Duicuaína oni oretallena, iena jiaí iñonocaide. ² Naimacimo llote:

—Omoi jaillanona, cominimo llono: “Jusiñamui facaina jaie lloraini micoriaí llogamie jai bene ite. Naimie anamo omoi illana Jusiñamui jitailla jira, naimie díbeimo omoi comeciaí iuaina meido”. Duidinona jillota. ³ Omoi jaia, buena uñeno. Omoi abina riudollena, jiguidana uñeno. Ailluena rana omoi uñellena, bolsana uñeno. Llomenicono uñeno. Ucubena uñeno. Guille ifo meidollena, rana uñeno. Meidolle iniroina uñeno. ⁴ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i. ⁵ Omoína comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uñollena, omoi eilliaína oni jaidino.

⁶ Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

Juan Bautista micori fiodailla rafue
(Mt 14.1-12; Mr 6.14-29)

⁷ Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri ifeide. ⁸ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraïma micori jai jillode.

⁹ Jesúsna fidiano, Herodes comeci uri ifeide. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uifollena, Jesúsna cioacade.

Jesús cinco mil iñiaïna ecaja rafue
(Mt 14.13-21; Mr 6.30-44; Jn 6.1-14)

¹⁰ Jesús llofueoicaigano abido bia, Jesúsno naimaci finoca rafuena llotimaci. Ie mei danï ie llofueoicaigano diga Jesús Betsaida railla nairai ñine jaide; ¹¹ iadedi comini iena fidianona, naimiena racadimaci. Naimie ñine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui ñibeïmo naimaci comeciai iuaina meiduana llofue. Duidinona jiaï jillotate.

¹² Jitoma ana itemo, ie doce llofueoicaigano naimie ñine billanona, raitimaci:

—Jofue bene ifeide. Bene jaca buedi ifeide. Ianori ite nairaiïmo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Danï caïmo ite cinco llomenico mena lliciai diga. Nana naimaci guillena, ¿guille cai ñballena ñibai jitaïdio?

¹⁴ Cinco mil iñiaï nainomo illa jira, ailluena guille jitaïllana uifotimaci. Naimaci ainiaï, imaci uruiaï diga, jiaï itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

¹⁵ Iena finodimaci. ¹⁶ Naie cinco llomenicono, naie mena lliciai diga Jesús unona, monamo eruaïllanona, Jusiñamuïmo iobillacinona fecade. Iemei taillude. Ie llofueoicaiganomo fecade, cominina ecallena. ¹⁷ Nana guillanona monidimaci. Monillamona, fiebide guillena iraidimaci. Doce cirigaïmo oruitatimaci.

Pedro Jesúsna llua rafue
(Mt 16.13-19; Mr 8.27-29)

¹⁸ Jiaïruido Jesús ie Moomo jïa facaiseconi, ie llofueoicaigano naimie diga illanona, naimacimo jïcanote:

—¿Ñiese cominidi cuena raitimaci?

¹⁹ Uai otimaci:

—Damierie raitimaci: “Juan Bautista micoriïdio”. Damierie raitimaci: “Odi Eliaïdio”. Jiaino raitimaci: “Jusiñamui facaina jaie ite lloraïmona ñame jai jillode. Imiedio”.

²⁰ Jesús naimacimo jïcanote:

—¿Ñiese omoï cuena raitomoï?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci. Jusiñamui ona orede.

Jesús ie fiodaillena llofuia rafue

(Mt 16.20-28; Mr 8.30-9.1)

²¹ Jesús naimaci como llogacino bummo luana rairuide. ²² Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

²³ Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaicania, cue dibeimo naimie iite. ²⁴ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifiteite. ²⁵ Cue cominina bu jaiñenia, nibai eo duere sefuíñeite. Nibai aillena ra naimiemo iite; ia, ¿ñiese cue Moo dine riite? Nainomo naimie riñeno faifite. ²⁶ Cuena bu meiruia, cue uaina bu meiruia, dane cue bia, naimiema meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai siño uai illanona, cue Moo dinena monamona ico biiticue. Cue Moo uai cuemo illanona, ebire biiticue. ²⁷ Uanaicinsona omoimo lloticue. Omoimona dajerie nia fiodaiñeitomoimo, illaimana cue bairellena cioitomo.

Jesús abi meidocailla rafue

(Mt 17.1-8; Mr 9.2-8)

²⁸ Ocho digarui illanona, Jusiñamuimo jüillena, anedumo Jesús jaide. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uñede. ²⁹ Naimie jüamona naimie abi meidocaide. Naimie ñiroi naie dacaño eo userecaide. ³⁰ Ieconí menamie bairiano, Jesús diga ñaitiaimaia. Moisés micori joreño íte. Elías jiai íte. ³¹ Ebire bairediaimaia. Jesús Jerusalémo fiodaille rafuena ñaitimaci. ³² Ie facaiseconí Pedro ie nabaiñiaia diga jai inidimaci; ia casillamona, Jesús ebirenana ciodimaci. Jesús ecimo itiaimaiaina jiai ciodimaci. ³³ Iaimaiaia jaiacania, Pedro Jesúsomo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori íe, jiaie Elías íe. —Iese raite; ia íe ñaia rafuena raise uíñoñoena jamai ebena ñaite.

³⁴ Iena naimie nia lluanona, uillie billamona, naimacina ibaide. Uillie ibaibillaconi jacinaitimaci. ³⁵ Uilliemona Jusiñamui naimacimo llote:

—Bimiedi cue Jito. Naimiema fetodicue, cue jitaille rafue finollena. Naimie lluaña omoi cacareillanona, iena ñno —llote.

³⁶ Jusiñamui llua meí, dama Jesúsna dane ciodimaci. Jesús diga itino naimaci ciua rafuena naie facaiseconí jaca bummo lloñedimaci.

Jesúdi Janaba anamo itimiena jillotaja rafue

(Mt 17.14-21; Mr 9.14-29)

³⁷ Ie areruido anedumona ana bitimacimo, ailluena comini naimacimo dafafide. ³⁸ Cominimona damie ado llote:

—Maestro, cue dajede cue jito duillana jibuisaibi. ³⁹ Janaba naimie anamo illamona, cue jito curitate. Cue jitona naillitacabite. Iemona íe fue mullecabide. Naimiema bofedaicabite. Naimiemona oni jaiacaiñede. ⁴⁰ Janabana oni oretallena, o llofueoicaiganomo jicanoticue; ia oretanidimaci.

⁴¹ Iena cacajanona, Jesús íe llofueoicaiganomo llote:

—Cue uai siñonana nia iñoñedomoi. Cue mare rafuedo nia raise jaiacañedomoi. Omoi diga are iticue. Raise omoi inollena, ¿nie dinori omoi diga iticue? —Naie duidimie moomo llote—, O jito cue dine mai ati.

⁴² Naie urue billano, Janaba naimiena eniruemona ana dotade. Naimiena naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiena fecade. ⁴³ Comini iena ciuanona, Jusiñamui siño uai naimiemo illari rajjicaidimaci.

Jesús ie fiodaillena dane llofuia rafue
(Mt 17.22-23; Mr 9.30-32)

Naimaci nia rajjicaia, Jesús ie llofueoicaiganomo llote:

⁴⁴ —Cue llwana feitaño. Monamona billanona, imana jaidicue; ia Jusiñamui jitailla jira, jiairuido illaicomini cuena meineitimaci.

⁴⁵ Jesús llwana raise cacañedimaci. Naimie iena llofueña jira, iena raise uiñoñedimaci. Naimiemo iena jicanuana jiaí meiruitimaci.

Jesús ie llofueoicaigano moto imiema ille rafue
(Mt 18.1-5; Mr 9.33-37)

⁴⁶ Ie facaise Jesús llofueoicaigano conini uaitajanona raitimaci:

—¿Bu cai moto imiema ille?

⁴⁷ Jesús naimaci começai facajacinona uiñuamona, nainomo ite cominimona daje urue bai jainanocaida, naimaci motomo naimiema jonete.

⁴⁸ Raite:

—Comini dinena bie urue jamai bue isoide; ia bie isoidimie cuemo duillanona, naimiema feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiaí jai feiñote. Jamai bue isoidimiedi omoi moto imiema ille.

Jesúdi ie dibeimo itinona llua rafue
(Mr 9.38-40)

⁴⁹ Naie facaise ie llofueoicaiganomona Jesúmo Juan llote:

—Maestro, o mameçido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

⁵⁰ Jesús dinena uai ote:

—Naimiema rairuiño. Cai dibeimo itimiedi cai facaisena ite. Ie jira naimie isoidinona rairuiño.

Jesús dinena Jacobo, Juan iaímaiaí lletaja rafue

⁵¹ Monamo abido Jesús jaillirui iaírei ia, Jerusalémo jaiacanamo naimie começina facade. ⁵² Ie jira dajeriena uicodo oretate. Ie inillnona jenollena, Samaria railla nairaímo jaidimaci; ⁵³ iadedi Jerusalémo naimaci jailla jira, judíuafñedinona samaritanodi gaiñena jira, Jesús llofueoicaiganona feiñoiacañedimaci. ⁵⁴ Iena fidianona, Jacobo, Juan diga, Jesúmo jicanotiaímaiaí:

—Nama, ¿bie comini jobaillena, monamona irai billena Jusiñamuimo coco jicanuana jitaídió?

⁵⁵ Iaímaiaímo eruailanona, Jesús dinena iaímaiaímo raire lletade:

—Dama ite. Iena jitaínedicue.

⁵⁶ Ie mei inillena jiaie illanomo jaidimaci.

Jesús ie llofuegamiena damie jaillena ie rafue
(Mt 8.19-22)

⁵⁷ Naisona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadicue. O llofuegamiena jaiacadicue.

⁵⁸ Jesús uai ote:

—Janorede ocainaiaidi joforedimaci. Silliñiai jillainiaredimaci; iadedi jofonidicue. Monamona billanona, iimana jaidicue; iadedi buenidicue. Jofonidicue. Cue diga o jaiacania, bue isoidena cucemona oñeitio. Iemo o comecina raise faca.

⁵⁹ Jiaimie mo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaiticue; ia cue moo nia fiodañena jira, o diga nia jaiñeiticue.

⁶⁰ Jesús naimie mo dane llote:

—Dama ite. Cue diga mai bi. Cuen a iñoñedinodi o moona canoredimaci. Naimie fiodaia, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie dibeimo naimaci comecia iuaina meidua n llocana cue diga mai o bi.

⁶¹ Jiaimie Jesús mo llote:

—O llofuegamiena jaiacadicue: iadedi cue jofomo nano jaiacadicue, cue cominina facadollena.

⁶² Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

10

Ie rafuena lollena, Jesús setenta digamiena oretaja rafue

¹ Ie llofueganona llofuia mei, naimacimona Jesús setenta digamiena fetode. Naga naimie jaiacana nairaiaimo menameriena oretate. ² Naimacimo llote:

—Diga comini ite, naimacina Jusiñamui rafuena iñotallena; iadedi eo janore lloraini ite. Jusiñamuimo jicano, jiaie llorainina naimie oretallena.

³ Mai jai; iadedi abi rairuicana jai. Toica llaudaia; janallari illanomo illa isoi, omoina oredicue. ⁴ Ucubena uiñeno. Ailluena rana omoi uiñellena, bolsana uiñeno. Meidolle zapatona uiñeno. Naisomo bu omoimo dafaifia, are ñaiñeno.

⁵ Bu ie jofomo omoi ria, jofomo itinomo marena uaido. ⁶ Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimie mo lloñeno. ⁷ Nie nairaimo omoi ria, dacomo omoi ri. Omoi ecalte rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno. ⁸ Nie naira omoi ria, omoina naimaci feiñoia, omoi ecalte rana uaitañeno guiño.

⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie dibeimo omoi comecia iuaina meido”. ¹⁰ Nie nairaimo omoi ria, omoina naimaci feiñoñenia, ie naiso motomo jaillanona llono: ¹¹ “Omoi naisomo cai eillimo ite jearacuai jai jaidinotica; marañede rafue omoimo illana omoi uiñollena. Jusiñamui omoina sedaacade; ia iena jitañedomo” llono. ¹² Sodoma naira; jiaie eo marañede. Jusiñamui iena jiaie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla naira; baifemo duere finoite.

Jesús ie iñoñedinona llua rafue

(Mt 11.20-24)

¹³ Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiaie iticue. Naimaci dine diga siño rafuena finodicue; iadedi iñoñedinomaci. Ico

duere sefuitimaci. Tiro railla nairaimo, Sidón railla nairaimo naie isoide siño rafuena fnoticuena, naimaci comeciai eo isinotallamona, naimaci comeciai iuai meidotimaci. Naimaci comeciai iuai meiduana jiaie comini uñotallena, ebinide iniroina jitajanona, jusefo naimaci ifogiaimo jonetimaci. ¹⁴ Jusiñamui uicomona nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. ¹⁵ Capernaumo itino jiai duere sefuitimaci. Birui abina iedoiacadimaci; iadedi jiairuido sure itimaci. Monamo cue Moo diga jaca iñeitimaci; iadedi naimie naimacina duere finollemona, sure itimaci. ¹⁶ Omoi lluana naimaci cacaacania, cuena cacadimaci. Omoi lluana naimaci jitañenia, cuena jitañedimaci. Cuena jitañedinodi cuena oretagamiëna jiai jitañedimaci. —Jesús naie fetocanomo iese llua mei, oni jaidimaci.

Je setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana cidicue. Iemona cue uai naimie uai baifemo faiana uñoticue. ¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedino omoi anamo jai itataticue. Omoina niese nibaiñeitimaci; ²⁰ iadedi omoi uaina jananiai inua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

Jesús ie Moo diga ñaia rafue

(Mt 11.25-27; 13.16-17)

²¹ Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uñotinona bie isoide rafuena uñotañedio; iadedi jamaí bue isoidinona iena uñotadio. O jitailla jira, iese uñotadio. Ie jira iobillacinona omo fecaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uñote. Dama cue Moona raise uñoticue. Cue jitaillie diese omoina naimiëna uñotadicue. Ie muidona naimiëna uñotomoi.

²³ Ie llofueoicaigano diga eneno ia, naimacimo llote:

—Cue finoca rafuena omoi cúa jira, ni ua omoi marena illino jillaci.

²⁴ Jusiñamui facaina jaie lloraini micoriai omoi siñona cúa rafuena jaie cioacadimaci; iadedi cioñedimaci. Iena cacaacadimaci; ia cacaiñedimaci. Jusiñamuina jaie inotino micoriai iena cioacadimaci; iadedi cioñedimaci. Iena cacaacadimaci; iadedi cacaiñedimaci.

Jesús cai ecimo itimiëna isiruillana llua rafue

²⁵ Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Niese Moisés micori llogacinuai iena raite?

²⁷ Uai ote:

—Moisés micori jaie cuela: “O jitailla jira, o comecina facajamona, cai Nama Jusiñamuina nana o comeci jitaillamona naimiëna eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoia, Jusiñamui illanomo jaca iitio.

²⁹ Naie llofueraima Jesúmo dane jicanote:

—¿Bu cue ecimo itino?

³⁰ Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiena fatimaci. Niade ie meinianona ie ecimona jaisite. ³¹ Dallu illanona, Jusiñamui diga ñairaima naie naisona jaide. Fagamiena ciode; iadedi ecido jaide. ³² Dallu illanona, Jusiñamui jofomo maijiraíma jiai jaide. Fagamiena cianona, ecido jiai jaide. ³³ Ja muidomo Samaria nairai imie jaide. Naie nairaina enoidomoi. Fagamiena naimie cianona, naimiena duenaitie. Iemona naimie canoacade. ³⁴ Naimie dine jaillano, ie bofellañona manode. Jiai maitade. Ie burro emodomo jonecaida, naimiena uite. Inillinomo rilla mei, nainomo naimiena sedade. ³⁵ Ie areruido ie inia jofu namamo janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide. ³⁶—Naie llofueraímamo Jesús dinena jicanote— ¿Fagamie ecimo itimiedi bu?

³⁷ Uai ote:

—Fagamiena duenaitimie.

Jesús raite:

—Jai raise uñotio. Mai jai. Ie isoi finocana o jai.

Jesúdi Marta iaiñuái María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiena feiñote. ³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacareilena; ⁴⁰ iadedi Martamo maijille eo illa jira, naiñaiño naimie llofuiacinona cacarefiñede. Ie jira Jesúmo llote:

—Nama, cue euiño cuena canoacaiñena jira, daño maijidicue. “O euiñona cano” naiñaiño llono.

⁴¹ Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca. ⁴² María iemo comecina jai facade. Naiñaiño cue llofuiana nano cacaiacade. Ona canollena naiñaiño lloñeiticue.

11

Jusiñamuimo Jesús jia rafue (Mt 6.9-15; 7.7-11)

¹ Jiairuido ie Moo diga Jesús ñaia, ie llofueganomona damie naimiemo llote: —Nama, jiana caina llofue, ie llofueoicaiganona Juan Bautista micori llofua isoi.

² Jesús uai ote:

—Omoi jiaia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai ñnoñellena.

⁵ Iena naimacina nia llofuellena, Jesús jiaie rafuena llote:

—Naiona mona moto llomenicona jicallena, o nabai dine o jaia, ado lloitio: “Nabai, daje amani llomenicona jitaidicue. ⁶ Jiaie nabai cue jofomo como ride. Jaca cuemo buedi iñede, naimiena cue ecallena”. ⁷ Ie jofu jeraimona o nabai fairioite: “Cuena uaidoñeno. Cue nasedi jai cue ibaicasa. Cue uruia jai inidimaci. Jiai inidicue. Llomenicona omo fecallena casiacañedicue”. ⁸ Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitailla rana fecaite. ⁹⁻¹⁰ Daje ra omoi faifia, iena jenodomo. Raise jenoia, iena baitomo. Damiena omoi jenoia, naimie illanomo jaidomo. Nainomo naimiena baillamona, omoia feñioite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite.

¹¹ 'Ero, omoimona ie moomo llomenicona ie jito jicaia, noficina fecañede. Lliciaina jicaia, jaiona fecañede. ¹² Jigina jicaia, acaidona fecañede. ¹³ Jeacinona finocabidomo; iadedi omoi uruiaimo mare rana fecacabillana uifotomo. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreña itataite.

*Comini Jesúna jeare ñaia rafue
(Mt 12.22-30; Mr 3.19-27)*

¹⁴ Jiairuido Janaba anamo illamiemona Jesús Janabana oni orede. Janabana nia oretañenia, Janaba anamo naimie illamona, naie ima ñainide. Janaba oni jailla mei, naimie ñaite. Ie jira comini rajicaidimaci; ¹⁵ iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

¹⁶ Jiaimo naimiena facaciacasite. Raitimaci:

—Siño uai omo ia, Jusiñamuina siño rafuena finota.

¹⁷ Naimaci comeciaina Jesús uifua jira, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainainidimaci. Oni jaidimaci. ¹⁸ Ie isoide. Beelzebú uaido jananiaina, omoi llua isoi, cue oretaña, Janaba ie dibeimo itino diga jai nabairiñede. Iemona naimie comini danomo iñeitimaci. ¹⁹ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uifollena. Iemei cue finoca rafuena uaitañeitomoi.

²⁰⁻²² Jiaie rafuedo iena lloiticue. Ero, ie rana raise riiduamona, mañidimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana finide; iadedi naimie baifemo mañidimie bia, naimiena emodofillamona, ie rana fiñede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaña, Jusiñamui rafuena cue llua uifotomoi.

²³ 'Cue dibeimo iñedimie cuena enoide. Cue dibeimo cominina itañedimiedi naie cominina cuena inotañede.

*Janaba anamo illamie rafue
(Mt 12.43-45)*

²⁴ Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide;

iade baiñede. Baiñena jira, naimie comecina facade: “Navui cue anamo il-lamie dine abido jaiticue”.²⁵ Abido naimie bia, naie iima comeci namanidena naimie baite. ²⁶ Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiai naimie bai femo maraiñedimaci. Iemona naie iima eo fodo jaide. Ie isoide birui ite maraiñede comini. Cue rafue naimaci inoñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona dañaiño Jesús mo llote:

—O ei caimare illesa. Naiñaiño mona comuido. Naiñaiño mono jirodio. Naiñaiño caimare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena inuamona, jiaino eo caimare iitimaci.

Dajerie Jesús siño rafuena finuana jitailla rafue

(Mt 12.38-42; Mr 8.12)

²⁹ Ie facaise diga comini Jesús dine biñoidimaci. Naimacimo llote:

—Birui ite cominidomoi maraiñedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca. ³⁰ Naimiemo suide rafuemoni Nínive railla nairaidi Jusiñamui naimiema oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñoitimaci. ³¹ Ero, Saba railla nairai ie illai micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori bai femo birui uaidicue; iadedi cuena inoñedomoi. Omoi comeciaina icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiema inoñedomoi?” omoina ico ñaite. ³² Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciaina icinuaina meidotimaci. Cue rafuena omoi cacajamona, omoi comeciaina icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoina raiñeiticue. Jonás micori bai femo birui uaidicue; iadedi cuena inoñedomoi.

Jesús comini illa rafue

(Mt 5.15; 6.22-23)

³³ Jesús llote:

—Lamparín bu unia mei, jofo anamo bainino rainañega. Cirigai anamo rainañega. Ie rairanomo rainaca, comini nainomo bia, jofo jerai lligaiñollena.

³⁴ Omoi uisi diga rana ciodomoi. Omoi uisi maraiñenia, rana raise cioñedomoi. Ie isoide. Omoi comeci maraiñenia, maraiñedicinona finocana jaidomoi. Jusiñamuina uiñoñedomoi. Ie rafuena jiaie uiñoñedomoi. ³⁵ Ie jira omoi comeciaina raise fino, cue rafuena omoi raise inollena. ³⁶ Nana omoi comeciaina marena ia, cue rafuena inocana jaitomoi. Iena raise uiñoitomoi. Jofomo lamparín raise lligaiñua isoi, cue rafuena raise uiñoitomoi.

Jesúdi judiua illaicomini ñaia rafue

(Mt 23.1-36; Mr 12.38-40; Lc 20.45-47)

³⁷ Cominina Jesús llofuia mei, daje fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide. ³⁸ Naimie nia guiñenia, naimaci einamaci llogacinodo naimie jaiñenamona, Jesús ie onollina jocoñede. Ie jira naie fariseo imie rajjicaide. Ie comecina facade: “Naimie eo mare llofueraima. ¿Niese cai einamaci llogacinodo jaiñede?” ³⁹ Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciai jearede. ⁴⁰ Abi uiñoñedomoi. Jusiñamui omoi abiaina omoi comeciai diga finode. Omoi finoca rafuena uiñote. Omoi comeciaina facajacinona jiai uiñote. ⁴¹ Omoi comeciai marena ia, jiaie cominina canodomoi. Iemona Jusiñamuimona omoi abi jiai mare. ⁴² Fariseuai, omoimo rafuena lloiticue. Nana omoi illimo ite ramona Jusiñamuimo janore jisa feca-fecacabidomoi; iadedi jiaie cominimo mare rafuena raise finoñedomoi. Jusiñamuina jiai raise isiruiñedomoi. Nana naie isoide rafuena omoi jiai finua. ⁴³ Comini omoiiri acarillena, ofiracomo uicomo raiacadomoi. Nine omoi macaria: “Jamai bue isoñedica!” omoi comeciaina facajamona, jiaie comini omoina uaiduana gaïdomoi. Iese omoi jailla jira, Jusiñamui omoïna duere finoite. ⁴⁴ “Bainino ite raiäfo emodomoi comini uiñoñeno macarillamona, naimaci abi jai jearede” raitomoi. Bainino ite raiäfo isoidomoi. Omoi diga jiaie cominidi omoimo ite jeacinona uiñoñeno nabairillamona, jeacinona jiai finodimaci. Iese omoi finocana jaia, Jusiñamui omoïna duere finoite.

⁴⁵ Naie facaise Moisés llogacinuaina llofueraimona damie Jesúmo llote:

—Iese o lloia: “Jecino finodomoi” caina jiai llotio.

⁴⁶ Jesús uai oite:

—Jusiñamuimona jiai duere sefuitomoi. Omoi einamaci llogacinuaido raise naimaci jaillena, diga rafue comini finuana jitaïdomoi; iadedi iedo naimaci raise jaillena, naimacina jaca canoñedomoi. “Jusiñamuina eo raise sedadica!” comecina facadomoi. ⁴⁷ Omoi jaiagaidi Jusiñamui facaina llorainina meinetimaci. Naie lloraini micoriai raiäfuai birui marena finodomoi; ⁴⁸ iadedi naimaci micoriai llogacinuaido omoi birui jiai jaiñena jira, omoi jaiagai finoca radi: “Mare” raitomoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoïna duere finoite. ⁴⁹ Omoïna Jusiñamui abi uiñuamona jai llote: “Cue rafuena llollena, naimaci ñine cue facaina llorainina oretaiticue. Cue rafuena eo uiñotinona jiai oretaiticue. Dajeriëna meinetimaci. Jiaïnona duere finoitimaci”. ⁵⁰ Enirue finua facaisemona ailluena Jusiñamui facaina llorainina meinetimaci. Omoïmona Jusiñamui iba oite. ⁵¹ Abel micori jiaie ite. Ie ama naimiëna meinete. Naimie facaisemona omoi jaiagaidi diga llorainina meinetimaci. Zacariäna jiai meinetimaci. Jusiñamui jofomo Jusiñamuimo toïca ocaina jobaisoillano motomo naimiëna meinetimaci. Omoïmona Jusiñamui birui iba oite. ⁵² Omoi llofuiamona comini Jusiñamui rafuena uiñoñedimaci. Jusiñamui rafuena raise uiñoñedomoi. Jiaïno iëna raise uiñuana jitaïñedomoi. Iese omoi jailla jira, Jusiñamui omoïna duere finoite.

⁵³ Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraïni daje isoi uai uaitatimaci. ⁵⁴ Naimie raise uai oñedena, naimiëna duere finoacadimaci.

12

Jesúdi mareuidinona abi caitadinona llofuia rafue

¹ Ie facaiseconi eo ailluena comini Jesús dine ofidimaci. Ailluena illa jira, conini eilliaimo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicai” raitimaci; iadedi mareuidinona abi caitadimaci. Naimacimona abina rairui. ² Naimaci birui fino ca rafuena birui bainino finodimaci; ia Jusiñamui naimaci comeciai iticinona ico uiñotaite. ³ Ero, cue rafuena birui anado llocana jaidomoi; ia ico marefodo iena llocana jaitomoi.

Jesúdi jaciruiñeno llofuia rafue

(Mt 10.28-31)

⁴ Ie llofueganomo Jesús llote:

—Cue nabaiñiaidomoi. Omoina meineiacadinona jaciruiñeno. Omoi abina meineredimaci; ie iadedi omoi joreña meinenidimaci. Omoina naimaci meinia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. ⁵ Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiema jacirui. ⁶ Ero, dabecuiro janorede sillina fecadomoi, eo janore ibaca. Silliñiai eo janore raifide; iadedi Jusiñamui naimaci illana uiñote. ⁷ Ero, niga ifotirai omoimo illana Jusiñamui jiai uiñote. Naimiedi omoina sedajana jiai uiñote. Silliñiai baiñemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

Jesús naimiema janoñenana llofuia rafue

(Mt 10.32-33; 12.32; 10.19-20)

⁸ Ie llofueoicaiganomo Jesús nia llote:

—Cue rafuena omoi llua mona, jiaino omoina duere finoitimaci. Cuena birui omoi janoñenia, nana comini Jusiñamui jaienisa; uicomo ico ia, nainomo omoina janoñeiticue. “Cue cominidomoi” omoina raiticue. ⁹ Cuena birui omoi janoia, nana comini Jusiñamui jaienisa; uicomo ico ia, nainomo omoina janoiticue. “Cue cominiñedomoi” omoina raiticue. ¹⁰ Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreña jeare ñaitimie jeacinona feitañeite. ¹¹ Cue rafuena omoi llua muidona, duere sefuitomoi. Illaicomini dine omoina llogidollena comini uia, omoi abi riidollicinomo omoi comeciaina jarire facañeno. ¹² Naie facaiseconi Jusiñamui Joreño omoi abi riidollicinona uiñotaite.

Jesúdi rarui; eo uamona abi rairuillana llofuia rafue

¹³ Nainomo ite cominimona damie Jesús mo llote:

—Maestro, cue moo jai fiodailla mei, cue ama doforamie cue facaina ite rana cuemo iacañede. Naimiemo llono, cuemo illena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi. ¹⁶ Iena omoi raise uiñollena, jiaie rafuedo iena lloiticue. Ucuberedimiedi ie illimona ailluena rana ote. ¹⁷ Ie jira comeciña facade: “Cue illimona ailluena rana oticue; iadedi ñinomo iena enoiticue?” ¹⁸ Birui cuemo ite eenoracona judaiticue. Ie mei aillue eenoracona finoiticue. Nainomo cue rana enoiticue”. ¹⁹ Ie comeciña facaite: “Cuemo ailluena

ra jai ite. Diga años nia iiticue. Jamai iiticue. Marena guiticue. Caimare iiticue”.²⁰ Iese comecina facade; iadedi Jusiñamui naimiemo llotte: “Abi uifioñedio. Cue llua jira, ja naiona fiodaitio. Ie mei omo ite ra omo fiebiñeite”.²¹ Dama ramo ie comecina bu facaia, Jusiñamui jitaillacinomo ie comecina bu facañenia, faifite.

Jesúdi Jusiñamui cai sedajana llua rafue
(Mt 6.25-34)

²² Ie llofueoicaiganomo Jesús llotte:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno.²³ Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite.²⁴ Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoína canoite.²⁵ Omoimona, ¿bu ie comeci jarire facajamona a sairite? Iese jaca buna a sairifede. Dama Jusiñamui omoína a sairitarede.²⁶ Omoi comeciaina facajamona omoi a sairifena jira, jiaie ramo omoi comeciaina jarire finoñeno.²⁷ Safiamo omoi comeciaina faca. ¿Niese sicodimaci? Maijifñedimaci. Iniroina tñforifñedimaci; iadedi Salomón micori naimaci isoi jaie ifñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.²⁸ Jusiñamui safiana ebiretacabide. Dally facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino. Jusiñamuina eo janore inotomoi.²⁹ Omoi comeciaina jarire icana jaiñeno. “¿Buena guiticaí?” raiñeno. Iemo comeciaina eo facañeno.³⁰ Jusiñamuina inoñedino iemo comecina facacabidimaci. Nana omoi jitaillacinona omoi Moo Jusiñamuidi uifñua jira, naimaci isoi ifñeno.³¹ Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jiai iite.

Jesúdi Jusiñamuimo comecina facaja rafue
(Mt 6.19-21)

³² Jesús llotte:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoína itatajamona, omoína sedaite.³³ Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifñeitomoi. Firiraima nainomo jaiñede. Gireco nainomo jiai ifñede.³⁴ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

Jesús ie abido billemo ocurillana llofuia rafue

³⁵⁻³⁸ Jesús nia llofueete:

—Monamona ico cue abido billemo ocuri. Iena omoi raise cacailena, bie rafuedo iena lloiticue. Damie ie nabai ie ai ua rafue dine naiona jaide. Ie mullaiaí naimie abido billemo ocurillana ocuide. Naimie billemo naimaci raise ocuria, iniroina jítajanona, lamparíniaí unianona, ocuritimaci. Iese naimaci ia, nasena naimie tuia, iena raire econoitimaci. Nie hora naimie

abido bia, naimiena naimaci inieno ocurria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uifoenena jira, jaca ocurricana naimaci illa. ³⁹ Ero, firiraima bille facaiseconi jofo namadi uifotena, nia caadote, ie ra faifi raillanona. ⁴⁰ Monamona ico abido biiticue. Omoi ocuriñena facaisemo biiticue. Ie jira cue billemo raise ocuri.

Jesúdi patrón ie mullaimana ie jofona sedataja llua rafue
(Mt 24.45-51)

⁴¹ Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

⁴² Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiaie ecade. ⁴³ Ie mei patrón oni jaide. Jofomo abido naimie bia, ie nanoca mullaima raise maijana fidiia, naimiena raise ibaite. ⁴⁴ Iobillamona, nana ie raruiaina sedataite; ⁴⁵ iadedi naie mullaima maraiñenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁴⁶ Ie ocuriñena facaise ie patrón abido billanona, naimiena meinetaite. Ie uaina inoñedino isoi, duere finoite. ⁴⁷ Naie mullaima ie patrón jitailla rafuena finuana uifote; iadedi iena finoñede. Ie jira eo duere sefuite; ⁴⁸ iadedi marañede rafuena raise uifoeneno jiaie mullaima finoa, janore duere sefuite. Ie isoide. Jusiñamui rafuena raise uifotino iedo raise jaiñenia. Jusiñamui naimacina eo duere finoite. Iena janore uifotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

Jesús muidona nana comini uri iñena rafue
(Mt 10.34-36)

⁴⁹ Jesús llote:

—Cuenta naimaci inollena, eniruemo comini dine biticue. Cuenta dajerie inuamona, cue cominina jaitimaci. Cuenta jiaino inoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue. ⁵⁰ Cue nia eo duere sefuiticue. Iena raire suillena jitaidicue. ⁵¹ Nana cominina uri itallena eniruemo biñedicue. Cuenta inoñedinodi cuenta inotinona enoitimaci. Enoillamona, cuenta inotinona duere finoitimaci. ⁵² Cue billamona, daje jofomo itino diese danomo iñeitimaci. Dabecuiro comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite. ⁵³ Cue lloga rafuena damierie inua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

Jesúdi monamo ite rana llofua rafue
(Mt 5.25-26; 16.1-4; Mr 8.11-13)

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi cúa meinomo, ua noci deide. ⁵⁵ Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite. ⁵⁶ Abina

uiñotinona abi caitadinodomoí. Monamo eruailamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi. ⁵⁷ Iemo omoi comeciaina raise facañedomoi. ⁵⁸ Ero, omoína bu llogidoia, juez dine nia omoi riñenia, omoína llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoína jonetaite. ⁵⁹ Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

13

Jesúdi comeciái iuai meiduana dana llua rafue

¹ Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori soldaduaina orede, naie cominina fallena.

² Jesús uai ote:

—¿Niese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi. ³ Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoídi jiaí faifitomoi. ⁴ Siloé railla tidacana navui ana goillamo, dieciocho digamie saitabidimaci. Iena fididomoi. ¿Niese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi. ⁵ Iese omoi comeciaina facañeno; ia omoi comeciái iuai meiduamo comeciaina faca. Omoi comeciái iuai omoi meidoñenia, omoídi jiaí faifitomoi.

Jesúdi ie Moo comini comeciái iuai meiduamo fecuise ocurilla llua rafue

⁶ Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede. ⁷ Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”. ⁸ Ie illina sedaraima uai ote: “Dama ite. Daje año nia seda. Riarana abina caigaiticue. Eniruena caimaretaiticue. ⁹ Jiaie año llisia, mare. Llisiñenia, iena tieiticoco”. Ie isoide. Jusiñamui omoi comeciái iuai meiduamo are ocurrite; ia meidoñenia, omoína duere finoite.

Jesúdi jicaidiñaiñona jillotaja rafue

¹⁰ Jiaruido sábadoruimo judíuai ofracomo Jesús llofuede. ¹¹ Nainomo duidiñaiñodi ite. Janaba anamo naiñaiño illa jira, naiñaiño jicaide. Atona naidainide. ¹² Naiñaiñona Jesús ciuanona, naiñaiñomo llote:

—Ñoo, o duicomona jai jillodio. ¹³ —Ie mei naiñaiñona jetade. Ieconí naiñaiño atona naidadate. Ie jira Jusiñamuimo iobillacinona fecade. ¹⁴ Naie ofraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis digarui ite maijillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo maijiñedicai.

¹⁵ Jesús uai ote:

—Maijiñedinona abi caitadinodomoí. Sábado iruimo maijicabidomoi. Sábado iruimo omoi toiniaina imaci illanomona suiñodomoí, jinui illanomo naimaci jiruaillena. Naie isoide maijia omoimona mare. ¹⁶ Ie isoide. Bie

riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñoña canollena, sábado iruimo naiñaiñoña Taife anamona cue jillotaia, cuemona mare.

¹⁷ Iena Jesús lluamona, nana naimie dibeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue

(Mt 13.31-32; Mr 4.30-32)

¹⁸ Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. ¹⁹ Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo aillue riaradi sicode. Ailluena jira, nainomo silliñai jicaiciaina finodimaci.

Jesús siritate rana llofuia rafue

(Mt 13.33)

²⁰ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. ²¹ Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue locana jaite.

Jesúdi Jusiñamui dine rille llua rafue

(Mt 7.13-14, 21-23)

²² Jesús diga nairaimo llofuecana jaide. Jerusalén dine jaide. ²³ Jesús oni jaillanona, damie naimiemo jicanote:

—Nama, ¿niga comini o uaina inoitimaci? —Jesús uai ote:

²⁴ —Monamo cue Moo dine jaille nasedi janorede isoide. Naie nasedo lliicana o jai. Ailluena comini naiedo jaiacanitimaci; iadedi fo jaitimaci. ²⁵ Naie jofu nama nase ibailla mei, ¿niese fo jaitomoi? Jino naidailamona, nasena tutajanona, raitomoi: “Nama, o nase econo”. Naimie uai oite: “Omoina uiñoñedicue”. ²⁶ Dane lloitomoi: “O diga navui guiticaí. Cai illanomo llofuetio”; ²⁷ iadedi naimie uai oite: “Omoina uiñoñedicue. Cue cominiñedomoi. Jeacino omoi comecimo nia illa jira, mai jai”. ²⁸ Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micorina cioitomoi; ia omoi jino illamona, duere sefullamona, eeitomoi. ²⁹ Diga comini Jusiñamui illanomo iitimaci. Ailluena judiuañedino naga nairaiamona Jusiñamui illanomo biitimaci. Nainomo coninina caimare nabaitimaci. ³⁰ Naga nairaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abi edoño cuena inocana omoi jailla.

Jesús Jerusalémo itinomo llua rafue

(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaíma Herodes ona meineiacade.

³² Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecaidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite. ³³ Nia oni jaiticue. Ailluena Jusiñamui facaina lloraini micorai nainomo jai fiodailla isoi, Jerusalémo cue rafue jiai raire fuite” llono.

³⁴ Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruiái sedaja isoi, diga icaiño cue anamo omoína uaidoiacadicue; iadedi omoi dinena cuena jitaiñedomoi. ³⁵ Temona Jusiñamuidi omoi illanona jai fainonocaide. Cue Moo dine jaiticue. Cue jailla mei, cuena cioiñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

14

Jesúdi abina siridimiena jillotaja rafue

¹ Jiairuido sábadoruimo Jesúdi rafuse imie jofomo guisaide. Naie fariseo imiedi illaicomini. Nainomo itino Jesúsimo eo eruaidimaci. ² Guille facaise naie jofomo duidimie bite. Naimie abina siridimie. ³ Nainomo itinomona damieredi fariseuai comini. Moisés micori llogacinuaina llofueraíni jiaí itimaci. Naimacimo Jesús jicánote:

—Sábadoruimo comena cue jillotaia, ¿omoimona jeacino finodicue? ¿Niese Moisés micori llogacinuai iena llote?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede. ⁵ Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare. Bimiéna cue jillotaja jira, ¿niese cuena jeare ñaitomoi? ⁶ Iena cacajanona, uainicaidimaci.

Jesúdi guillena uaidoganona llua rafue

⁷ Jesúsdi naimaci guisai billana ciode. Jiaíno baifemo illena, jofo nama abímo nana raicadimaci. Iena ciuamona, naimacimo Jesús rafuena llofue:

⁸ —Rafue dine guillena omoína bu uaidoia, jofo nama abímo raíño, omoi baifemo itimie bi raillano. ⁹ Jofo nama abímo omoi raia, omoi baifemo itimie bia, jofo nama omoimo lloite: “Bimiémo omoi raillanona feca”. Meidailanona, oni raínadaitomoi. ¹⁰ Ie jira rafue dine omoína uaidoia, naie jofomo omoi ria, oni raí. Ie mei jofo nama jitaia, omoimo lloite: “Cue abímo raí”. Ie mei nana naie itino omoi iobillana cioitimaci. ¹¹ Ie isoide. Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite.

¹² Naimiena uaidotimie mo Jesús llote:

—Guille rafuena o finoia, naga icaiño o nabaiñiaína uaidoño. Naga icaiño o cominina uaidoño. Naga icaiño o ecimo itino ucuberedinona uaidoño. Naimacina o uaidotona, jiairuido guillena ona uaidoitimaci, naie iba o ollena; ¹³ ia rafuena o finoia, dueredinona uaido. Ñujañujacada macaritinona uaido. Uisinidinona uaido. ¹⁴ Naimacimona iba ico o oñenamona, Jusiñamui ona caimare itataite. Jiairuido fiodaillamona mareuidino jilloia, monamo Jusiñamui ona ibaite.

Jesúdi ailluena guille finoca rafuena llua rafue

¹⁵ Jesús abímo itinomona Jesús llua na damie cacajano, raite:

—Monamo Jusiñamui illanomo itimiedi marena iite.

¹⁶ Jesús uai ote:

—Iena omoi raise uifollena bie rafuena lloiticue. Damie aillue rafuena finode. Ailluena cominina uaidote. ¹⁷ Rafue illaruimo ie mullaimana orede, cominina dane uaidollena. Raite: “Mai bi. Nana guille finuadi jai fuite”; ¹⁸ ia biacaiñedimaci. Damie llote: “Eniruena como ibadicue. Iena jibuisaiadicue. O rafuemo jaiñeiticue. Ie jira cue joreñona icifeitiosa”. ¹⁹ Jiaimie llote: “Diez diga juraretana como ibadicue. Naimacina jibuisaiadicue. O rafuemo jaiñeiticue. Ie jira cue joreñona icifeitiosa”. ²⁰ Jiaimie llote: “Riño como oticue. Ie jira o rafuemo jaiñeiticue”. ²¹ Ie nama dne naie mullaima abido jaide. Comini biacaiñenana llote. Iena cacajano, rafue namadi icirite. Ie mullaimamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisinidinona uaido”. ²² Ie mei naie mullaima jaide. Abido naimie bia, ie namamo llote: “O lluaa finodicue. Ailluena comini jai bitimaci. O jofomo illino nia ite”. ²³ Rafue namadi uai ote: “Naisomo itinona bene atillena, cue jofona oruitallena, cai nairaimona jino jai. ²⁴ Cue nano uaidogano cue guillena guiñeitimaci”. Ie isoide. Jusiñamui rafuena feifotino monamo Jusiñamui illanomo ico iitimaci; ia naimie rafuena jitaiñedino nainomo ico iñeitimaci.

Jesúdi naimie llofueganona jaiacadino rafue

²⁵ Naie facaise ailluena comini Jesús diga jai jaisoidimaci. Naimacimo llote:

²⁶—Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiái baifemo isiruilla. Cuena ie amatiai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide. ²⁷ Cue llofuegamiena bu jaillamona, duere sefucana jaite. Nibai naiemona fiodaite. Bu iese jaiacaiñenia, cue llofuegamiena naimie raise jainide.

²⁸ ‘Ero, jiaie rafuedo iena lloiticue. Jofona bu finoacania, ie ucubena bailla diese uifollena: “¿Niga raifite?” comecina nano facade. ²⁹ Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. ³⁰ Raitimaci: “Ie jofo finua tainede; iadedi fuidonide”.

³¹ ‘Ero, jiaie rafuedo iena lloiticue. Illaima jobaimena finoacania, nano comecina facade: “Cuemo ite diez mil soldaduái. Cue bacauaimo ite veinte mil soldaduái. ¿Niese emodofiticue?” Comecina facaja mei: “Emodofiticue” naimie comecina facajia, ³² nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacaiñedicue; ia o diga bie rafuena raise finoacadicue”. ³³ Biemo comecina omoi faca. Ie raruaimo bu comecina eo facaia, cue llofuegamiena jainide.

³⁴ ‘Sal mare; iadedi ie caimano jai iñenia, ¿dane niese nibaiamona caimarenite? ³⁵ Jai marañede. Eniruemo jonegadena, jiai marañede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluaamo cacarei. Iena ñno.

15

Jesúdi naimiena ñnotinomona damie faifillana jitaiñena rafue

(Mt 18.10-14)

¹ Naimaci bisoilla isoi ie rafuena cacaillena, diga gobierno ucubena oraini Jesús dne ofidimaci. Jusiñamui llogacinona raise jaiñedino jiai ofidimaci.

² Iena ciuano, fariseuai cominidi, Moisés micori llogacinuaina llofueraini diga, Jesús joreñona ñaitimaci:

—Bimie marañedicinona finorainina feiñote. Naimaci diga jiai guite.

³Naimaci ñaiana uiñuanona, Jesús naimacimo bie rafuena llote:

⁴—Omoimona damiemo cien toica llaudaiaia nibai ite. Naimacimona daje feiraitte. Ie noventa y nueve llaudaiaiana fañonocaida, iena jenuaite, ie baille ñinori. ⁵Baillanona, ie fecanico rocanocaida, iobicana biite. ⁶Jofomo naimie ria, ie nabaiñiaiana uaidoite. Ie ecimo itinona jiai uaiduanona, raite: “Cue diga iobi. Cue feiraitte llaudana jai baiticue”. ⁷Ie isoide. Cue rafuena cue llumona, damie ie comeci jeacinona fañonocaillamona, ie comeci iuai meiduamona, monamo itino eo iobitimaci; iadedi noventa y nueve comini marena illamona, janore iobitimaci.

Jesúdi faífide ucubena bailla llua rafue

⁸Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faífa, lamparín unianona, ie jofona gallaite. Eo jenoite, ucube ie baille ñinori. ⁹Iena naiñaiño baia, ie nabaiñiaiana uaidoite. Ie ecimo itinona jiai uaiduanona, raite: “Cue diga iobi. Cue faífide ucubena jai baiticue”. ¹⁰Ie isoide. Cue rafuena cue llumona, damie ie comeci jeacinona fañonocaillamona, ie comeci iuai meiduamona, Jusiñamui jaienisai eo iobidimaci.

Jesúdi damie ie moo fañonocailla llua rafue

¹¹Jesús llote:

—Jiaie rafuena omoimo lloiticue. Damiemo mena jito ite. ¹²Ie moomo jamamie llote: “Moo, o fiodailla mei, o raruaiamona janore feiñoiticue. O fiodaillana sedaacaiñedicue. O raruaiaina cue facaina birui jitaídicue. Cuemo ine”. Ie jira ie moo naimiemo fecade. ¹³Ie mei nano nie ñinori illamona, nana ie raruiai iraianona, jiaie eniruemo jaide. Nainomo ie ucube jamai buruemo faiaide. ¹⁴Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite. ¹⁵Ie jira nainomo ite patrón ñine maijaide. Naie patrón ie chanchuaina sedallena naimiena orede. ¹⁶Naimiena jaca buna ecarainina jira, chanchuai guillemona guiacade. ¹⁷Iese naimie duere sefuilla jira, ja muidomo abina uiñocaillamona, comecina facade: “Cue moo jofomo nana naimie mullaiaia raise guitimaci. Guille fiebicabite; iadedi bene aimeri fiodaíticue. ¹⁸Cue moo ñine abido ja jaiticue. Naimiemo lloiticue: Jusiñamuimo jeacinona finodicue. Omo jeare jiai finodicue. ¹⁹Odi: ‘Cue jito’ cuena raíñeno. O mullaiaia illa isoi, cuena abido feiño”. ²⁰Ie facaise ie moo ñine jai jaide. Nia aare naimie ia, ie moo naimiena ciode. Ie jitona duenaillanona, naimie ñine aiside. Naimiena caimadote. Jiai llibanote. ²¹Ie jito naimiemo llote: “Moo, Jusiñamuimo jeacinona finodicue. Omo jeacino jiai finodicue. Odi: ‘Cue jito’ cuena raíñeno”. ²²Ie moo iena cacajano, ie mullaiaimo llote: “Cue jitona naimie eruailena, eo mare iniroina ati, naimie jitallena. Cue jitona naimie illa jira, iena jitallena, anillona ati. Naimie jitallena, zapatona jiai ati. ²³Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticaia. ²⁴Navui cuemona cue jito fiodaite isoide. Caje cuemo dane abido rilla. Navui cuemona naimiedi faífide; iadedi birui naimiena dane ciodicue”. Naimie llua isoi, rafuena finodimaci. ²⁵Naie facaise nano doforamie illimo ite. Jofomo abido naimie bia, comini iraisillana cacade. ²⁶Daje mullaimana uaiduanona, naie rafuena jicanote. ²⁷Naie mullaima uai ote: “O ama abido jai bite. O ama ramo jiriñeno abido billa

jira, o moo ie janoreta farediretana jai fatatate”.²⁸ Iena cacajano, icirite. Fo jaiacaiñede. Ie jira ie moo jino bite. Naimiena fo uaidote.²⁹ Ie moomo llote: “Ero, diga años o diga maijdicue. O uaina jaca inoticue; iadedi cue nabaiñiai diga, rafuena cue finollena, chivo cuemo jaca fecañedio.”³⁰ O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”.³¹ Ie moo uai ote: “Moo, nagarui cue diga itio. Nana cue radi oienite.”³² Cuemona o ama navui fiodaite isoide; iadedi naimiena dane ciodicue. Naimie navui faifide raiticue; iadedi caje cuemo dane abido rilla. Cue iobillanona rafuena finodicue”. Bie rafuemona omoi fueollena, iena jai lloticue —Jesús llote.

16

Jesúdi patrón ie mullaïma finoca rafuena llua rafue

¹ Ie llofueoicaiganomo Jesús jiaie rafuena llote:

—Ucuberede patrón ie mullaïmana ie rana sedatate. Naie patrón eneno oni illanona, ie mullaïma ie rana raise sedañenana fidide.² Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijiñeitio”.³ Iena cacajano, naie mullaïma comecina facade: “¿Niese nibaiiticue? Cue nama cuena jai dotaacade. Maijiana ocuinidicue. Jiaie cominimona ucube jamaï jicajana meiruiticue.”⁴ Cue finuana jai uinoticue. Naimaci jofomo comini cuena ico feiñollena cue dotaja mei, nana cue patrón debedinona uaidoiticue”.⁵ Ie jira naimacina uaidote. Damiemo jicanote: “¿Cue patrómo niga debedio?”⁶ Uai ote: “Cien bidones raifi aceitunamona oga aceitena debedicue”. Naie mullaïma raite: “O rabemo jarire ja cueno: cincuenta bidones”.⁷ Jiaimemo jicanote: “¿Niga debedio?” Uai ote: “Cien digagai trigo raifi debedicue”. Naie mullaïma dinena raite: “O rabemo ochentana cueno”.⁸ Iena fidiano, naie mullaïmamo ie patrón raite: “Jiairuido marena o illemo o comecina raise facadio. Eo abina uinotimiedio” raite. Ero, Jusiñamuina inoñedinodi naimiena inotino baiñemo ra fecajana baitadimaci.⁹ Naiemona omoi fueollena, omoïmo lloiticue. Omoïmo ite ra diga dueredinona cano. Iemona omoi nabaiñiaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoïna marena ñaitimaci.¹⁰ Janore ra omoïmo illamona, Jusiñamui facaina birui omoi raise maijiia, ailluena ra omoïmo itedena, Jusiñamui facaina jiaï raise maijïtomoi. Janore ra omoïmo illamona, maraiñede rafuena birui omoi finoia, ailluena ra omoïmo itedena, maraiñede rafue nia jiaï finoïtomoi.¹¹ Omoïmo birui ite ra diga Jusiñamui facaina omoi raise maijiñenia, naimiemona jiaie rana feiñoñeitomoi.¹² Omoi anamo ite ra diga Jusiñamui facaina omoi raise maijiñenia, Jusiñamui ie rafue omoïmo itatañeite.¹³ Mena patrones diga daruido buna jaca maijinide. Mena diga bu maijiacania, damiena jiaimie baiñemo gaito. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiái ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi fariseuai comini diga dane ñaia rafue

¹⁴ Jesús llofuiana fariseuai comini cacajano, ucubena eo gaia jira, naimie uaina jamaidimaci.¹⁵ Naimacimo Jesús llote:

—Omoi finoca rafuemona comini omoïna: “Mare” raillana jitaidomoi; iadedi Jusiñamui omoi comeciái maraiñenana uinote. Iese omoi illana

Jusiñamui gaiñede. ¹⁶ Jusiñamui facaina lloraini micoriai cuegafuiaimona Jusiñamui rafuena cacacabidomoi. Moisés micori cuegafuiaimona iena jiai cacacabidomoi. Juan Bautista micorimona naimie anamo omoi illana Jusiñamui jitaillana cacadomoi. Jusiñamui dibeimo omoi comeciai iuaina meiduana cacadomoi. Iena jiai llocabiticue. Iena ailluena ñnuamona, Jusiñamui dibeimo birui duere iacadimaci. ¹⁷ Mona enirue diga nia ia, nana Jusiñamui llogacinuai suicana jaite.

Jesús ñima ie aina dotaja rafuena llofua rafue
(Mt 19.1-12; Mr 10.1-12)

¹⁸ Jesús llote:

—Naga aina dotadimiedi, jiañaiño ollena, jeacinona jai finode. Dotañaiñoa bu oia, jeacinona jai finode.

Jesúdi ucuberedimie iañmaiaí Lázaro ie rafuena llua rafue

¹⁹ Jesús jiaie rafuena llote:

—Cue llogacinona omoi raise uñollena, bie rafue lloiticue. Ucuberedimie ite. Eo mare iniroina jitade. Eo caimare raise guicabite. ²⁰ Naimie nasemo Lázaro raillamie jamai bñide. Naimiedi dueredimie. Efonaitimie. ²¹ Naimiedi ucuberedimie guiga allamona guiacade; ia guiñede. Jiconiaidi naimie efociaina mecabite. ²² Ie mei naimie fiodaite. Jusiñamui cominina naimie illamona, Jusiñamui jaienisai naimie joreño monamo Abraham micori joreño illanomo uitimaci. Ucuberedimie jiai fiodaite. Comini naimiena rañimaci. ²³ Jusiñamui cominina naimie ñenamona, naimie joreño iraimo jaide. Nainomo naimie duere sefuillamona, Abraham joreñoa aarena ciode. Naimie ecimo Lázaro micori ie joreñoa jiai ciode. ²⁴ Abraham joreñoa uaidote: “Cue moo Abraham, cuena duenai. Lázaron a cue dine oreta, ie onocai diga, jinuina cue fumo llocatallesa, cue fuedo manare jaillena. Bie iraimona jai eo llegi cacadicue”. ²⁵ Abraham joreñodi uai ote: “Moo, o illa ñnori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuidio. ²⁶ O dine jainidicai. O enefebetuemo itio. Cai enefebetuemo jiai iticai. Caimona omoi dine bu jaiñellena, omoi mona cai dine bu biñellena, iese ite”. ²⁷ Ucuberedimie micori joreño ñnena uai ote: “Cue moo jofomo Lázaron a oreta. ²⁸ Cuemo cinco amatiaí ite. Naimacimo riire llollena, bie iraimo naimaci riñellena, naimiena oreta”. ²⁹ Abraham joreñodi uai ote: “Naimacimo Moisés micori cuegafuiaí ite. Jusiñamui facaina jaie lloraini micoriai cuegafuiaí jiai ite. Iemo naimaci comeciaina facallesa”. ³⁰ Uai ote: “Iese lloñeno. Iemo comeciaina facañeitimaci; iadedi fiodaillamona jilluanona, naimaci dine bu jaiia, naimiena ñnoñeitimaci. Naimaci comeciai iuai meidoñeitimaci”. ³¹ Abraham joreñodi uai ote: “Moisés micori cuegafuiaí, Jusiñamui facaina jaie lloraini micoriai cuegafuiaí naimaci ñnoñenia, fiodaillamona bu jilloia, naimiena jiai ñnoñeitimaci” —Jesús llote.

17

Jesúdi jeacinona ñnoñenana llofua raufe
(Mt 18.6-7, 21-22; Mr 9.42)

¹ Ie llofueoicaiganomo Jesús llote:

—Diga ramo omoi faicana uitinomo riitomoi. Omoi ramo faitimie duere sefuite. Jusiñamui omoi ramo faitimiena duere finoite. ² Como creyentena jaidimiena ramo bu faia, naimie cimaimo aillue noñici mañanona, joraimo corobaillena naimiena dotacadena, mare. ³ Como creyentena jaidimiena

ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comecina meidoiacania, naimie jearede finoca rafuena feita. ⁴ Nagarui diga icaíño ona jeare naimie finoia, naga icaíño o diga naimie marena dane ñaiacania, naie rafuena feita.

Jesúdi naimiema ñnuana llua rafue

⁵ Ie doce llofueoicaigano Jesúmo llote:

—Ona ñnoticaí; ia caina o uaina eo ñnota.

⁶ Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo síco”, naie amena omoi uaina ñnote.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemona omoi fueollena, iena lloiticue. Illimo ie mullaima maijiamona, ie toíñai sedajamona jofomo abido naimie ria, ie patrón naimiemo lloñeite: “Mai nano guisaíbi”; ⁸ iadedi naimiemo lloite: “Cueiena guillena nano fino. Cuen a eca. Ie mei guitio”. ⁹ Naie mullaima ocuica rana finua muidona, mullaimana naimie illa jira, ie mullaimamo patródi iobillacinona fecañeite. ¹⁰ Ie isoide. Nana cue lluaña omoi finodomoina, dani omoi maijadi, cue cominina omoi illa jira, cuemona iobillacinona feiñoñeitomoi.

Jesúdi diez efonaitinona jillotaja rafue

¹¹ Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite. ¹² Nairai dine naimie riacania, diez efonaitinodi naimiemo dafaífidimaci. Eneo oni naidaidimaci. ¹³ Naimiema ado uaidotimaci:

—Jesús, Maestro, caina duenai. Caina ja jillota.

¹⁴ Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci. ¹⁵ Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade. ¹⁶ Naimiemo iobillacinona jiai fecallena, Jesús uicomo ana bitadate. Naimiedi judíuñedimie. Samaritano imie. ¹⁷ Jesús llote:

—Diez digamiedomoi. Omoína jai jillotaticue. ¿Ninomo jianodi nueve digamie itimaci? ¹⁸ ¿Niese Jusiñamuimo iobillacinona fecaacañedimaci? Dama bimie fecade. Naimiedi judío imieñedimie.

¹⁹ Jesús naimiemo llote:

—A naidada. Mai jai. Cuen a o ñnua jira, jai jillodio.

Jesúdi Jusiñamui ie cominina sedajana llofuia rafue (Mt 24.23-28, 36-41)

²⁰ Naie facaise fariseuai comini Jesúmo jicanotimaci:

—¿Niruido Jusiñamui caina bene sedaite?

Jesús uai ote:

—Síño rafuena omoi ciuamona, Jusiñamui omoína sedallena uíñoñeitomoi.

²¹ Buena ciuamona raíñeitomoi: “Jai, Jusiñamui bene caina jai sedade”. “Jai, batine caina jai sedade”; iadedi omoi motomo itinomona Jusiñamui dibeimo damerie illamona, Jusiñamui omoi motomo jai illana uíñoitomoi.

²² Ie llofueoicaiganomo llote:

—Jaiñiruido duere sefuillamona cue diga janore jisa iacanitomoi; iadedi iese nia íñeitomoi. ²³ Damerie raia: “Ero, batine Cristo jai bairedo” nainomo

canoite. ⁸ Raire fairiuanona, naimacina raire canoite; iadedi abido cue bia, ¿niga cuena inotino itimaci? Nibai ailluena cuena inoñeitimaci.

Jesúdi Jusiñamuimo menamie jia llua rafue

⁹ “Mareuidica” dajerie railla jira, “Jiaie comini baifemo faitica” dajerie railla jira naimacimo Jesús bie rafuena llote:

¹⁰ —Jusiñamui jofomo, nainomo jüllena, menamie jaidiaimaia. Damie fariseo imie. Jiaimie gobierno ucubena oraima. ¹¹ Fariseo imie naidadacaida, dama anado jüde: “Jusiñamui, jiaie comini isoñedicue. Fiidimaci. Marañedimaci. Naimaci añede riño diga itimaci. Cue ecimo ite ucubena oraima isoi iñedicue. ¹² Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jüde. ¹³ Gobierno ucubena oraima eneno naidadacaida, jüde. Monamo eruañede; iadedi jamai bue isollanona, jogobena farode. Raite: “Jusiñamui, jeacinona finoramadicue. Cuena duenai. Macaibaite” jüde. ¹⁴ Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacañedimiena jiaimie afemo itataite. Ie jira gobierno ucubena oraima ie jofomo Jusiñamuimona jai marebicaillanona jaide; ia fariseo imie iese jaiñede.

Jesúdi naimie dine uruia billana jitaila rafue

(Mt 19.13-15; Mr 10.13-16)

¹⁵ Naie facaise Jesús dine comini naimaci eisaiaina atisite. Ie onolli naimacimo naimie joniana jitaidimaci. “Naimacina raise cano” ie Moomo llollena jitaidimaci. Iena ciuanona, ie llofueoicaigano cominina Jesús dine billana rairuidimaci; ¹⁶ iadedi Jesúdi eisaiaina uaiduano raite:

—Uruia cue dine billesa. Naimacina rairuñeno. Cuena bie isoi inotinodi Jusiñamui cominidimaci. ¹⁷ Bie uruia abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

Ucuberedimie Jesús diga ñaia rafue

(Mt 19.16-30; Mr 10.17-31)

¹⁸ Ie facaise illaicominimona damie Jesúmo jicante:

—Maestro, odi mareuidimedio. Jusiñamui diga ico monamo cue jaca illena, ¿nie isoide rana finoiticue?

¹⁹ Jesús uai ote:

—¿Bue ñellena cuena: “Mareuidimedio” raitio? Dama damie mareuidimiena. Naimiedi Jusiñamui. Naimiemo jicano. ²⁰ Moisés micori llogacinuaina inocana jai. Jiaie cuete: “O añede riño diga iñeno. Comena meineño. Rana fiñeno. Jiaimiena o llogidoia, tainona lloñeno. O moo uaina ino. O ei uaina ino”.

²¹ Uai ote:

—Cue uruena illa facaisemona nana bie llogacinuaina inoticue.

²² Iena cacajano, Jesús raite:

—Daje rana nia finoñedio. O raise marebicaicania, omo ite raruiaina feca. Naie ucubena dueredinomo feca. Cuena o inuamona, monamo ico jaca iitio. Cue llofueoicaiganona o illena, mai cue diga bi.

²³ Jesús llua naimie cacajano, sunaicaide. Naimiemo eo ailluena ra illa jira, iena feacañede. ²⁴ Naimiemo eruailano, Jesús raite:

—Ucuberedinodi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jia raise jainide.

²⁶ Jesús llua nacadino jicante:

—¿Iemona buca jillobiti?

²⁷ Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro raite:

—Ero, o llua isoi cai jofuena fañonocaia, o diga jaisoidicai.

²⁹ Uai ote:

—Uanaicinona lloticue: Jusiñamui cominina naimie jaillamona, ie jofona bu fañonocaia, ie aina bu fañonocaia, ie amatiaina bu fañonocaia, ie moonu bu fañonocaia, ie eina bu fañonocaia, ie uruiaina bu fañonocaia, ³⁰ Jusiñamuimona ailluena ibana birui feiñoite. Monamo ico jiai jaca iite.

Jesúdi ie fiodaillena dane llua rafue

(Mt 20.17-19; Mr 10.32-34)

³¹ Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, imana jaidicue. Jusiñamui facaina lloraini cuena jaie cuetimaci. Nana naie rafue ja suite.

³² Judiaañedinomo judiaí illacomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci. ³³ Cuena faitimaci. Cuena meineitimaci; ia darui amani illanona, cue fiodaillamona jilloiticue.

³⁴ Naimie llua na raise cacañedimaci. Naimacina iena Jesús nia raise llofueña jira, iena raise uiañedimaci.

Jesúdi uisnidimiena jillotaja rafue

(Mt 20.29-34; Mr 10.46-52)

³⁵ Jericó railla nairaímo ie llofueoicaigano diga Jesús riacademo, uisnidimie naiso fuemo raillana ciode. Ucubena jamai jica-jicade.

³⁶ Ailluena comini Jesús diga jaillana naimie cacajano, naie cominimo nie isoide rafue illana jicanote. ³⁷ Uai otimaci:

—Nazaret ie Jesús como bene bite.

³⁸ Ie jira naimie cuirioide:

—David micori Jitona o illamona, cuena duenai. Cuena cano.

³⁹ Uicodo jaidino naimiena lletade, naimiena llicaitallena; iadedi naimie eo cuirioide:

—David micori Jitona o illamona, cuena duenai.

⁴⁰ Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

⁴¹ —¿Niese ona cue nibaiana jitaídio?

Uai ote:

—Maestro, cioacadicue.

⁴² Jesús raite:

—Mai eroda. Cuena o inua jira, jai jillodio.

⁴³ Ieconí naimie uisidi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

19

Jesús Zaqueo diga illa rafue

¹ Jericómo Jesús rillanona, nainomo macaritemo, ² naie facaise nainomo Zaqueo raillamie ite. Gobierno ucubena nanoca oraíma. Naimiedi eo ucuberede. ³ Jesús bai macaritemo, Zaqueo naimiena cioacade; iadedi

ailluena comini illamona, Zaqueo ianorina jira, Jesúna cionide. ⁴ Ie jira uicodo aisicana jaide, amenamo a jaillena, naimiena cioillena. ⁵ Naimie dine Jesús rillano, Zaqueo a erodate. Naimiena uaidote:

—Zaqueo, raire ana bi. O diga danomo illena, o jofo dine jaiticue.

⁶ Ie jira raire ana bite. Ie jofomo Jesúna iocire feiñote. ⁷ Iena jiaie comini cuanona, Jesús joreñona jeare ñaianona raitimaci:

—Mariñedinona finoraíma jofomo naimie jaide.

⁸ Jesúna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruaína dueredinomo biruimona fecaiticue. Buma navui cue fñia, cuatro diga ra abido iiticue.

⁹ Jesús uai ote:

—Iese o llua jira, o comini diga Jusiñamuina jai o ñnuana uiñoticaí. —Jamai bitinomo llote:

—Zaqueodi Abraham micori jito; ia Jusiñamuina navui ñnoñede. ¹⁰ Naimie isoidino jillobitallena, biticue. Monamona billanona, imana jaie jaidicue. Jusiñamuina ñnoñedinona jenuaibidicue, naimacina jillobitallena.

Illaima ie mullaiaimo ucubena fecaja rafue

¹¹ Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”. ¹² Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dine jiaie nairaímo jaide. Ie cominina sedallena, nanoca illaimamona ie uaina feiñoiacade. Iemei abido biacade.

¹³ Nia naimie jaiñenia, diez diga ie mullaiaína uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. ¹⁴ Ie comini naimiena enoidimaci. Jiaínona nanoca illaima dine oretajano, raitimaci: “Bimie caina sedajana jitaiñedicaí”; ia nanoca illaima dinena naimaci lluaña jaca cacaiñede. Ie jira naie nanoca illaima naie illaima jitomo ie uaina ite. ¹⁵ Ie uaina feiñua mei, abido ie eniruemo jaide. Rilla mei, ie mullaiaína uaidote. Nie diese ucubena ocana naimaci jaillana uiñoiacade. Ie jira naimacina uaidote. ¹⁶ Nano bitimie raite: “Nama, o cuemo dabe fecadio. Dabedemona jai cuemo ite diez digabe”.

¹⁷ Naie illaima naimiemo llote: “Eo marena maijidio. Mare mullaímadio. Janore ra raise o sedaja jira, ona diez nairaiaína sedataiticue”. ¹⁸ Ie mei jiaie mullaiaína billanona, raite: “Nama, o cuemo fecaca dabedemona jai cuemo ite cinco digabe”. ¹⁹ Illaima llote: “Ona cinco nairaiaína sedataiticue”. ²⁰ Ie mei jiaie mullaíma bite. Raite: “Nama, jadi, o cuemo iga o ucube. Iniroimo tilliano, iena eenoticue. ²¹ Ona cue jaciruillano, odi eo riimiena jira, iena jamai eenoticue. Jiaie cominimona ie rana bairocabidio. O maijiñena ramona ocabitio”. ²² Illaima dinena raite: “Eo marañede mullaímadio. Cueno o llua isoi, ona duere fñoiticue. Cue riimienana uiñotio. Jiaie comini ie rana cue baiuana uiñotio. Cue maijiñena motomo ra cue uana uiñotio; ia buena maijiñedio. ²³ ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube bai femo feiñotocue”. ²⁴ Nainomo itinomo llote: “Naie ucube naimiemono bai ruano, diez digabe itimie mo feca”. ²⁵ Uai otimaci: “Naimiemo ailluena ucube jai ite. ¿Bue ñellena dane jiaie fecaitio?” ²⁶ Illaima dinena uai ote: “Ailluena raredimie jiaie rana feiñoite; iadedi janore raredimie ie rana faifite. ²⁷ Cueno enoidinona bene ati. Naimacina cue sedajana jitaiñedimaci. Naimacina meine”.

Jesús nia llote:

—Ie isoide. Iese omoimo suiñellana, Jusiñamui ie comini sedalliruina omoi uiñoñena jira, cue jitaillacino finocana jai.

*Jesús Jerusalémo jailla rafue
(Mt 21.1-11; Mr 11.1-11; Jn 12.12-19)*

²⁸ Naie rafuena llofuia mei, Jerusalén dine comini uicodo ie llofueoicaigano diga Jesús jaide. ²⁹ Jerusalén iaireicaidemo, mena nairaimo riacade. Betfagémo railla nairaimo ride. Betania nainomo jiaí ite. Olivos railla anedumo naga nairai iaímaiaí ite. Ie llofueoicaiganomona mena orede. ³⁰ Raite:

—Bie nairai illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati. ³¹ Omícomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

³² Naimie llua isoi jaidiiaimaiaí. Naimie llua isoi burritona baitiaimaiaí.

³³ Ie facaise ie naniaí iaímaiaímo jicanote:

—¿Bue ñellena cai burritona suiñodomico?

³⁴ Uai otiiaimaiaí:

—Coco Nama iena jitaide.

³⁵ Ie mei Jesúmo iena atidiiaimaiaí. Burrito emodomo iniroina jobianona, ie emodomo Jesúdi rainadate. ³⁶ Jesús iese jaidemo, naimiena iobitalena, illaíma isoi naimie jaillena, comini imaci iniroi diga, naiso motomo jobedimaci. ³⁷ Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci ubiñuamona, Jusiñamuimo iobillacinona ado eo fecadimaci. ³⁸ Raitimaci:

—¡Cai llaíma billa! ¡Jusiñamui mamecido bitimieo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

³⁹ Naie cominimona dajerie fariseuai raitimaci:

—Maestro, o diga jaidinona ll#caillena, naimacina lleta.

⁴⁰ Uai ote:

—Naimaci ll#caia, biso fuemo ite noficidi cuena marena ñaite.

⁴¹ Jerusalémo Jesús iairei ria, iena ciuano, eede. ⁴² Raite:

—Jerusalén itino, Jusiñamui diga omoi uri illena jai biticue. Omoína naimie cominina itataiacadicue; iadedi iena jitaíñedomoi. Iena jitaídomoidena, ico duere sefuiñeitomoi. ⁴³ Jiaíruido omoi bacauai jobaimena finuanona, omoína cirinoitimaci. Omoi ecido llaítimaci. ⁴⁴ Omoína meineitimaci. Omoi uruiaina meineitimaci. Omoi illanona judaítimaci. Jusiñamui omoi motomo birui illana omoi uiñoñena jira, iese omoimo suite.

*Jesúdi Jusiñamui jofomona damieriena dotaja rafue
(Mt 21.12-17; Mr 11.15-19; Jn 2.13-22)*

⁴⁵ Jerusalémo Jesús rilla mei, Jusiñamui jofomo jaide. Jusiñamuimo ofomaiaína fecallena, naimiemo toica llaudaiaína fecallena, nainomo comini jaisodimaci. Naie cominina ibatajanona, ofomaiaína, toica llaudaiaí diga, damierie fecaudimaci. Iena ciuanona, naimacina jino orede. ⁴⁶ Raite:

—Ie facaina lloraima micori Jusiñamui llogacino jaie cuela: “Cue jofu ite nainomo cuemo comini jillena” cuela. Ero, ailluena omoi ibataja jira, naimie jofona firiruidino jofona omoi finoca.

⁴⁷ Jusiñamui jofomo nagarui Jesús llofujete. Judíuai illaicominídi Jesúsna meineiacadimaci; ⁴⁸ iadedi niese nibañedimaci, nana comíni naimie llofuiana eo jitailla jira.

20

Jesúdi ie siño uaina llua rafue (Mt 21.23-27; Mr 11.27-33)

¹ Jusiñamui jofomo Jesúdi comínina llofujete. Jusiñamui rafuena llofujete. Judíuai illaicominí naimie dine bitimaci. Naimacidi Jusiñamui diga nanoca ñairaini. Naimacidi Moisés micorí llogacino llofueraini. Naimacidi einamaci. Díese billanona, ² jicannotimaci:

—¿Nie isoide uaido o finoca rafuena finocabidío? ¿Bu omo iga uai diga o finoca rafuena finocabidío?

³ Jesús dinena uai ote:

—Omoimo nano jicanoíticue. ⁴ Juan Bautista micorídi comínina navui bautizade. ¿Bu naimie micorína comínina bautizatate? ¿Jusiñamui? ¿Comíni? Cuemo llono.

⁵ Dani coníniri iena siaduanona raitimaci:

—“Jusiñamui” cai fairíoia, caimo jicanoíte: “¿Bue ñellena naimie micorína ñinoñedomo? ¿Bue ñellena naimie micorí llua isoi bautizañedomo?” ⁶ “Comíni” cai fairíoia, bene ítino caina meinetimaci, Juan micorídi Jusiñamui facaina lloraíma naimaci railla jira.

⁷ Ie jira Jesús uai otimaci:

—Uíñoñedicai.

⁸ Jesús dinena raite:

—Ie muadona cuemo nie isoide uai illana omoimo lloñeíticue.

Jesúdi marañede maijiraini rafuena llua rafue (Mt 21.33-44; Mr 12.1-11)

⁹ Nainomo itinomo Jesús llote:

—Jiaie rafue omoimo lloíticue. Iemo cacarei. Daje patrón uvas railla riaraiaina rite. Ie mei ñbatajanona jiaínomo fecade, iena sedallena. Ie mei jiaie eníruemo are illena jaide. ¹⁰ Uvas jai einailla facaise riaraiaina sedaraini dine daje mullaímana orede, naimie facaise iedinona naimie feñollena; iadedi naie sedaraini naie mullaímana fatimaci. Uvas naimiemo fecañeno abido oredimaci. ¹¹ Ie mei patrón jiaie mullaímana orede. Naimiema fatimaci. Jeare finodimaci. Uvas naimiemo fecañeno abido oredimaci. ¹² Naie patrón jiaimiena orede. Naimiema eo bofedaitajanona jino dotadimaci. ¹³ Iemei patrón comecina facade: “¿Niese nibaíticue? Cue isiruiga jitona oretaiticue. Naimiema nibai jaciruitimaci. Naimie uaina ñnoítimaci”. ¹⁴ Riaraiaina sedaraini naimiema ciuanona, coníniri ñaitimaci: “Bimiemo bie illi fiebiíte, naimie moo fiodailla mei. Naimiema cai meinelli, bie illi caimo fiebillesa” ñaitimaci. ¹⁵ Naimiema jino dotajanona, naimiema meinetimaci. Iena fidia mei, ¿niese naie patrón nibaíte? ¹⁶ Naimie biíte, naie sedarainina meinelena. Ie mei jiaínona ie illina sedataíte.

Naie rafuena cacadino raitimaci:

—Bie isoide rafue suillana jitañedicai.

¹⁷ Naimacimo Jesús eruauillano, llote:

—Naie illi sedaraini isoidomoi. Jusiñamui facaina lloraíma micorí omoína jiaie cuete. Ie ciegafuena raise facañedomoi. Naimie micorí cuega: Jofo finoraini jitañena nofici nana naie jofomo ite nofici baífemo jai uaide.

cuega. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena inuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. ¹⁸ Naie noficina nia ñaiticue. Noficimo bu eicaitaia, bofedaite; ia naie nofici bumo ana uaia, naimiena saitaita. Ie isoide. Cue lluana omoi jamaia, duere sefuitomoi. Iena omoi inoñenia, ja muidomo faifitomoi —llote.

Jesúmo gobiernomo ucubena fecajana jicanua rafue

(Mt 21.45-46; 22.14-22; Mr 12.12-17)

¹⁹ Jesús como lloga rafuedo naimacina ñaiana uiñotimaci. Ie jira naie facaiseconi judiuaí illaicomini naimiena gaitaacadimaci; iadedi cominina jaciruitimaci. ²⁰ Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadormo naimiena llogidoiacadimaci. ²¹ Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. ²² Omo rafuena jicanoiacadicaí. Dama Jusiñamuina sedadicaí; iadedi romanos railla nairaí anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

²³ Naimiena naimaci jifuiana uiñuanona, Jesús dinena uai ote:

²⁴ —Ucube cuemo acata. ¿Bu ie joreño nainomo ite? ¿Bumo jainaiade bie cuega radi?

Uai otimaci:

—César.

²⁵ Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

²⁶ Jesúsdi uai raise ua jira naimie lluamona jeare rafuena uiñoñedimaci, naimiena llogidollena. Naimie luari rajicaillamona, lliicaidimaci.

Jesús dine saduceuai railla comini billa rafue

(Mt 22.23-33; Mr 12.18-27)

²⁷ Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci. ²⁸ Jesúmo llotimaci:

—Maestro, cai facaina Moisés micori jaie cuega: “Fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁹ Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiainide fiodailla. ³⁰⁻³¹ Ie emodo imie ie ama feciñona ote. Naimie uruiainide jai fiodailla. Naie siete digamiedemona iese sefude. ³² Ja muidomo naie riño jai fiodaite. ³³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

³⁴ Jesús uai ote:

—Birui aina otomoi. Inina otomoi; ³⁵ iadedi fiodaillamona, Jusiñamui diga jaca itino jillua mei, ainitimaci. Ininitimaci; ³⁶ ia Jusiñamui jaienisai isoi illanona, dane fiodaiñeitimaci. ³⁷ Fiodaitino jilluana omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ³⁸ Jai fiodaitimaci; ia naimaci joreñuai nia itimaci.

Jusiñamuidi daní cagedino imaci Jusiñamuina jira, naimaci joreñuái naimie dine itimaci. Ico naimaci abiaína jiaí jillotaite. Naimiemo naimaci duillamona, naimaci abiaí diga jilluanona, naimie diga jaca itimaci —llote.

³⁹ Iena cacajano, Moisés micorí llogacinuaina llofuerañimona dajerie raite:

—Maestro, raise llotio.

⁴⁰ Ie facaise naimiemo nie isoide rafuena dane jicanuana jaciruitimaci.

Jesús dinena fariseuai cominimo jicanua rafue

(Mt 22.41-46; Mr 12.35-37)

⁴¹ Iemei naimie ecimo itinomo Jesús jicanote:

—¿Niese Moisés micorí llogacinona llofuerañi Cristona raitimaci? ¿Niese naimiedi David micorí jítona raitimaci? ⁴² Salmos railla cuegafuaimo David micorí jaie cuega:

Jusiñamuidi cue Namamo llote: “Illaimana o illamona, cue nabeimo ana rai.

⁴³ Ona inoñedino o anamo itataitcúe”.

⁴⁴ “Cristodí cue Nama” David micorí raite. Iese naimie micorí railla jira, Cristo David micorí afemo faite. Naimiedi dama David micorí jitoñede; ia jiaí ie Nama.

Jesúdi judíuai illaicomínina ñaia rafue

(Mt 23.1-36; Mr 12.38-40; Lc 11.37-54)

⁴⁵ Nana cominí cacajano, ie llofueganomo Jesús llote:

⁴⁶ —Moisés micorí llogacinuaina llofuerañimona abina rairui. Ilaicomínina naimaci itimacídena, naimacina cominí cioillena, eo mare niroina jitaacacabidimaci. Níne naimaci macaria, naimaci jamai bue isoíñedinona itimacídena, cominí naimacina uaiduana gaidimaci. Cominí naimacirí acarillena, ofiracomo uicomo raíacadimaci. Rafue ia, naimaci jamai bue isoíñedinona comecina facajanona, rafue nama ecimo raíacadimaci. ⁴⁷ Feciñuaimona rana ocabillanona, naiñaiñuaina duere finodimaci. Naimiena eo sedadimacídena, Jusiñamuimo are jicabidimaci. Iese naimaci icabilla jira, Jusiñamui naimacina jiaie cominí baífemo duere finoite.

21

Jesúdi Jusiñamui jofomo duerede feciño ucube fecajana ciua rafue

(Mr 12.41-44)

¹ Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. ² Eo duerede feciño menaruñu joniana jiaí ciode. ³ Ie llofueoicaiganomo Jesús llote:

—Bie eo duerede feciño nana ucuberedino jonia baífemo jonete.

⁴ Naimacimo ailluena ite; iadedí naie ucubemona janore jonetimaci. Naiñaiño eo duerede; iadedí nana naiñaiñoimo ite ucubena jai jonete. Janore jonete; ia Jusiñamuimona naiñaiñodí jiaíno baífemo jonete.

Jesúdi Jerusalémo ite Jusiñamui jofu judaiana llua rafue

(Mt 24.1-28; Mr 13.1-23)

⁵ Naie facaise Jesús llofueoicaiganomona dajerie Jusiñamui jofona eruaillanona, raite:

—Mare nofici diga finoca. Eo mare ra nainomo jiaí ite.

⁶ Jesús llote:

—Birui bie rana ciodomoí; iadedí ico jiaíruido nana bie jofomo ite noficiái oni judaísite.

⁷Jicanotimaci:

—Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸Uai ote:

—Omoína bie rafuena bu jifueñellena, omoí abina rairui. Ailluena comini cue mamecido billanona: “Cristodicue” raitimaci. “Cristo jai bairede” raitimaci. Naimaci dibeimo iñeno. ⁹ Jobaimiaí illena fidiitomoí; iadedi jaciruiñeno. Iese suite; iadedi abido nia biñeiticue. ¹⁰ Daje nairai jiaie nairai diga jobairite. Daje gobierno jiaie gobierno diga jobairite. ¹¹ Eo aillena ñuisañuaí suite. Diga illanomo cominidi aime guitimaci. Duicuai eo iite. Monamo comini diga jacirede rana cioitimaci. ¹² Bie isoide rafue nia suiñenia, cuena iñoñedino omoína llogidoitimaci. Omoína gaitatajanona, omoína duere finoitimaci. Naimaci ofiracomo omoína uitimaci. Cárcelmo omoína jonetimaci. Cuemo omoí duilla jira, omoí duere sefuillena, illaicomini dine omoína uitimaci. ¹³ Naie facaiseconi cue rafuena naimacimo lloitoimoí. ¹⁴ Omoí abina omoí riidoia, omoí lluana uicodo jarire iñeno. ¹⁵ Omoí raise lollena, omoína canoíticue. Uiñoracinona omoímo iiticue. Iemona omoí dibeimo iñedino o uaina uaitanitimaci. ¹⁶ Cuena iñotomoí; ia ailluena cuena iñoñeítimaci. Cuemo omoí duilla jira, omoína enoítimaci. Iemona dajerie mootiaí, dajerie etiaí, dajerie amatiaí, dajerie nabaiñaí omoína llogidoitimaci. Omoímona dajeriena meineítimaci. ¹⁷ Cue cominina omoí illamona, nana nairai omoína enoítimaci; iadedi cuena faínonocaiñedimie ja muidomo monamo jaca iite. Naimiena jillotaiticue. ¹⁸ Omoí ille dinori Jusiñamui omoína raise sedaite. ¹⁹ Duere omoí sefuia, cuena faínonocaiñeno jai. Ja muidomo monamo jaca iitomoí. ²⁰ Jerusalén fueo ruicabene icaifona soldaduaí ia, ie judaílle facaiseconi iairei iite. ²¹ Naiemona omoí jillobillena, duere omoí sefuiñellena, Judeamo omoí illamona, aneduaí dine aisi. Jerusalémo omoí ia, naiemona oni jino omoí jai. Jino omoí ia, Jerusalémo omoí jaiñeno. ²² Ie facaina lloraini micoriaí cuegafuaí suillanona, naie facaiseconi naimiena iñoñedinomona Jusiñamui ibana oite. ²³ Naie rafuemonona jillobillena, naie facaise urueside riño duere sefuite. Uruena nia jirode riñodi jiaí duere sefuite. Naie facaise comini duere sefuitimaci. Llegi cacaitimaci. ²⁴ Lloebi diga meinecana uitimaci. Jiaie nairai dine naimacina jaiadoitimaci. Juduaíñedino sedalle facaise dinori, naimaci anamo Jerusalémo itino iitimaci.

Jesús abido ie bille rafue
(Mt 24.29-35, 42-44; Mr 13.24-37)

²⁵ Jesús nia llofue:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoítimaci. Monailiaí eo baguamona, comini comeciaí eo jarire iitimaci. ²⁶ Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fioidaitimaci isoi iitimaci. ²⁷ Naie facaise uillie motodo cue billena nana comini cioitimaci. Ebire biíticue. Naimacina cue sedallena, illaimana biíticue. ²⁸ Bie isoide rafue suia, omoína cue jilloitajabillirui iairei illa jira, cue billirumo raise ocuiri.

²⁹ Iena omoí raise uiñollena, bie rafuena omoímo lloiticue. Higuera railla riarumo omoí comeciaina faca. Nana amenamo comeciaina faca. ³⁰ Bie eniruemo amena firuillamona, fiemona raire illana uiñotomoí. ³¹ Ie isoide. Bie rafue íco suia, Jusiñamui ie cominina raire sedajana uiñoitomoí.

³² Unaicinona omoimo lloiticue. Nana bie rafue suille facaiseconi bie nairai nia iite. ³³ Mona fuite. Enirue jiai fuite; iadedi cue lloga uai jaca suite. ³⁴ Jifaillacinona omo: ebirui raillano, omo: ecimo ite rana ebirui raillano, abina rairuicana jai. Cuena inoñedinona duere finollena, ebena abido biiticue. ³⁵ Cue bia, illaimana cue illamona, nana cominimo juez isoi lloiticue. ³⁶ Ie jira nagarui abi rairuicana jai. Naie duere sefuille facaise omo: jilloillena, Jusiñamuimo jii. Ja muidomo monamo cue diga jaca iitomo:—llote. ³⁷ Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide. ³⁸ Nagarui jitiramo naimiena cacareillena, Jusiñamui jofomo comini bisoidimaci.

22

Judíuai illaicomini Jesúsna gaitallena siadua rafue (Mt 26.1-5, 14-16; Mr 14.1-2, 10-11; Jn 11.45-53)

¹ Naie facaise pascua railla rafue iairei ite. Naie facaise llomenico guille rafue jiai ite. Naie rafue ia, siritate rana jaca guiñedimaci. Egiptomona naimaci jaiagai jillobillana comecillena, naie rafue ite. ² Judíuai illaicomini Jesúsna meineiacadimaci; iadedi cominina jaciruillanona, naimiena nia meineñedimaci.

³ Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie. ⁴ Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúsna gaitatallena, naimaci diga ñaiaide. ⁵ Iobillanona, naimiemo ucubena feaacadimaci. ⁶ Judas dinena:
—Jee —raite. Jesús diga ailluena comini iñena facaiseconi naimiena gaitatallena sedade.

Jesúdi ie fiodaille rafuena llua rafue (Mt 26.17-29; Mr 14.12-25; Jn 13.21-30; 1 Co 11.23-26)

⁷ Llomenico guille rafue illanona, judíuai comini toica llauda fauillarui ride. ⁸ Jesúdi Pedro iaímaiai Juan diga oretajano, raite:
—Cai rafue guille uicodo finollesa omico jai.

⁹ Naimiemo jicanotiaímaiai:

—¿Ninomo naiena coco finuana jitaideo?

¹⁰ Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca. ¹¹ Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono. ¹² Ie mei omicomo afebebamo ite aillue cuartona acataite. Na raruiai diga ite. Nainomo cai guille fino.

¹³ Jaidiaímaiai. Naimie llua isoi baitiaímaiai. Pascua rafue guille finodiaímaiai.

¹⁴ Guille facaiseconi ia, Jesús ie llofueoicaigano diga nainomo guisaide. ¹⁵ Mesamo guitimacimo, ie llofueoicaiganomo llote:

—Nia cue fiodañenia, omo: diga bie rafue guillena eo jitaideo. ¹⁶ Ie cominina cue Moo ico sedalle facaise ia, nana bie rafue fuite.

¹⁷ Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omo: jiro. ¹⁸ Omoína bene dane iese caimare nabaiñeiticue. Cue Moo sedajanomo omo: diga ico cue ia, nainomo omoína dane iese caimare marena nabaiticue. —Iena jirodimaci.

¹⁹ Llomeniconna llinuanona, Jusifñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioidaiticue. Cue abimo omoi comecina facajano, iena guifño.

²⁰ Naimaci guilla fuilla mei, jiroracomo vino diga dane oruitajanona, naimacina jirotrate. Raite:

—Cue fioidaillamona, dama cue diaillamona, jeacino anamona jilloitomoí. Jusifñamuidi omoímo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

²¹ Jesús llote:

—Ero, cuena gaitataitimie cai diga guite. ²² Monamona billanona imana jaidicue. Jusifñamui jitailla isoi jai jaiocaidicue; iadedi Jusifñamuimona cuena gaitataitimie eo duere sefuite.

²³ Iemei: “¿Nimie Jesúsna gaitatalle?” dani coniniri siadoside.

Naimaci moto imiena bu ille rafue

²⁴ Ie facaise coniniri siaduana raitimaci:

—¿Cai moto imiena bu ille?

²⁵ Iena cacajanona, Jesús raite:

—Naimaci jitailla ra finollena, judíuaiñedino illaimaiaidi naimaci anamo itinona ocuicabide. “Cai anamo itinona canocabidicaí” raitimaci; ²⁶ iadedi omoímo iese iñede. Omoi moto itimie omoi moto imieñedimiena jailla. Omoímona bu imiena iacania, omoi mullaímana naimie jaicabillasa. Omoímona bu imiena iacania, omoína naimie canocana jaicabillasa. ²⁷ Ero, jiaie rafuedo iena lloiticue. Naimiena ecallena, naimiena canollena, patrón anamo ie mullaiaí itimaci. Naimaci baifemo patrón illamona, naimacina canollena, ie mullaiaí facaina maijñede. Cue anamo itomoi; ia omoína canollena, omoi mullaíma isoi iticue. ²⁸ Birui duere cue sefuidicue mo, cuena fainonocaiñedomoi. ²⁹ Cue Moo cuena illaimana jai itatate. Omoína fetodicue, ³⁰ jiairuido cue illaima illa facaiseconi cue ecimo omoi caimare marena iocire illena. Nainomo omoi judíuai doce nairaiaina sedaitomoi.

Jesúdi Pedro naimiena januana luua rafue (Mt 26.31-35; Mr 14.27-31; Jn 13.36-38)

³¹ Jesús llote:

—Simón Pedro, ero, Taifedi Jusifñamuimo ona jicanote, o ramo faillena;

³² iadedi ori jai juidicue, cuena nia inocana o jaillena. Ico cuena raise o inoñena mei, cue dibeimo o comeci iuai dane o meidoia, iemona jiaie creyentiaí comeciaina ocuifñotaitio.

³³ Pedro uai ote:

—Nama, cárcelmo o ia, nainomo jiaí iiticue. O fioidaia, jiaí fioidaiticue. Ona fainonocaiñeiticue.

³⁴ Jesús uai ote:

—Pedro, jitiramo itava nia ñañenia, dacaiño amani cuena janoitio.

Jesús fiodailla facaise iaírei illa rafue

³⁵ Ie llofueoicaiganomo Jesús llote:

—Omoímo ite rafuena uiñoiacadicue. Cue rafue lloillena, navui omoína oredicue. “Ucubena uiñoeno, bolsa uiñoeno, meidolle zapatos uiñoeno” omoímo lloiticue. Naie facaiseconi omoi, ¿bue rana jitaídomoi?

Uai otimaci:

—Cai buena jitaíñedicaí.

³⁶ Jesús raite:

—Biruimona omoi duere sefuitomoi. Ie jira abina rairuicana jai. Birui ucube omoimo ia, nine omoi jaia, iena uifno. Bolsa bumoi ia, iena uifno. Abina riidollena, omoimo lloebi ifnenia, janore iniroina feca, lloebi ollena. ³⁷ Cuena jaiie cuegafuiai ja suite. Isaías micorí cuena jaiie cuega: “Maraiñede rafue finoraíma isoi naimie duere sefuite”.

³⁸ Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

Jesúdi Getsemanímo Jusiñamuimo jñia rafue

(Mt 26.36-46; Mr 14.32-42)

³⁹ Guille mei, ie llofueoicaigano diga, Jesús jino jaiide. Olivos railla anedumo naimie jaisoilla isoi jaiide. ⁴⁰ Nainomoi ria, naimacimoi llote:

—Taife omoína ramo fai raillano, iena omoi ifnoñellena, Jusiñamuimo jñi — llote.

⁴¹ Naimie janorede nofici bai faia uaila dinori bai jaiide. Caiñici ifodo ana raita, Jusiñamuimo jñide:

⁴²—Ore Moo, o jitaia, cue duere sefuillamona cuena jillota. Cue jitailla isoi cuena finoñeno; iadedi o jitailla isoi cuena fino.

⁴³ Naimie comecina ocuifnotallena, ie facaiseconi monamona Jusiñamui jaienici bite. ⁴⁴ Jesús comeci jarire illamona, naimie rioci faitemo, difai diruena eniruemo uaide. ⁴⁵ Jñia mei, ie llofueoicaigano dine abido bite. Ocosinaillamona, jai inidimaci. ⁴⁶ Naimacimoi jicanote:

—¿Bue ñellena inidomoi? Mai casi. Taife ramo omoína fai raillano, iena omoi ifnoñellena, Jusiñamuimo jñi.

Jesúna gaitalle rafue

(Mt 26.47-56; Mr 14.43-50; Jn 18.2-11)

⁴⁷ Nia Jesús lloia, diga comini naimie dine bitimaci. Judas Iscariote micorí naimacina ifode. Naimiedi Jesús llofueoicaigamie. Naimiena llibanollena. Jesús dine iairei bite. ⁴⁸ Jesús raite:

—Judas, cuena llibanuanona, cuena gaitataiacadio.

⁴⁹ Ie llofueoicaigano naie rafuena jai ciodimaci. Jicanotimaci:

—Nama, ¿cai atica lloebi diga ona riidoiticaí?

⁵⁰ Ie facaise naimacimona damiedi Jusiñamui diga nanoca ñairaima ie mullaíma ie nabei jefona jaíbonote. ⁵¹ Jesús dinena raite:

—Dama ite. —Ie jefona naimie jetajamona, naimiena jillotate. ⁵² Diga illaicomini Judas diga Jesús dine bitimaci. Naimacimoi Jesús llote:

—Fuiraimadicueta cuena omoi gaitajaíbillá. Omoi lloebina atidomoi. Omoi butaralluna jiaí atidomoi. ⁵³ Nagarui Jusiñamui jofomoi omoi motomoi llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

Pedrodí Jesúna janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Naimiena gaitaja mei, Jusiñamui diga nanoca ñairaima jofomoi uitimaci. Pedro aarena naimaci jinafona racade. ⁵⁵ Nairairibiri motomoi irai bonua mei, ana raidimaci. Pedro naimaci diga jiaí raide. ⁵⁶ Nainomoi ite mullaíñodi irai bouamona, Pedromoi eruailano raite:

—Bimiedi Jesús diga jaisoidimie.

57 Pedro abi janote:

—Naimiena uiñoñedicue.

58 Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

59 Daje hora illanona, jiaimie raite:

—Bimie galileo imiēna jira, bimiedi Jesús diga ua jaisoidimie.

60 Pedro dinena raite:

—O lluana uiñoñedicue. —Ieconī naimie ñaitemo, iitava ñaite. 61 Jesús doбайдacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Iitava nia ñaiñenia, dacaiño amani cuena janoitio”.

62 Pedro jino jaillanona, eo sunaillamona, eo eede.

Jesúna jifanodua rafue
(Mt 26.67-68; Mr 14.65)

63 Ie facaise Jesúna gaitadino naimiēna jifanododimaci. Naimiēna jiai fatimaci. 64 Ie uisina maítimaci. Llotimaci:

—Siño jitodiosa, ¿bu o faja? caimo llono.

65 Iese jifanodocana uitimaci.

Jesúdi judíuai illaicomini dine illa rafue
(Mt 26.59-66; Mr 14.55-64; Jn 18.19-24)

66 Monaidemo judíuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofuerañi ofidimaci. Naimaci dine naimiēna gaitadino Jesúna uitimaci. Naie illaicomini dinena raitimaci:

67 —Ua Cristodiona, iena caimo llono.

Jesús uai ote:

—Omoimo iēna cue lloia, ñinoñeitomoi. 68 Buēna omoimo cue jicānoia, cue uaina oñeitomoi. 69 Monamona jaie billanona, imana jaidicue. Cuēna omoimeinamona, illaīma isoi Jusiñamui ecimo raire iiticue.

70 Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

71 Iēna cacajano, raitimaci:

—Naimie lluana jai cacadicaī. Jiaie comini naimiēna llogiduana jai jitañedicai. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

23

Pilato dine Jesús illa rafue
(Mt 27.1-2, 11-14; Mr 15.1-5; Jn 18.28-38)

1 Judíuai illaicomini naidacaillanona, Pilato dine Jesúna uitimaci.

2 Naimiēna llogidotimaci:

—Cai cominimo marañedifuēna llote. Gobiernomo ucubēna cai fecajana rairuide. Naimie jiai raite: “Cristodicue. Illaīmadicue”.

3 Pilato dinēna naimiēmo jicanote:

—¿Judíuai comini illaīmadio?

Uai ote:

—Jii, judíuai illaīmadicue.

⁴ Jusiñamui diga nanoca ñairainimo Pilato llote. Nainomo bite cominimo jiai llote:

—Nicinodi naimiemo iñede.

⁵ Uai otimaci:

—Gobierno joreño comini comeciai jeare feidocana naimie uite. Nana Judeamo uite. Galileamona tainede. Bene jai caimo ride.

Herodes dine Jesús illa rafue

⁶ Iena cacajano, naimie llogidotinomo Pilato jicanote:

—¿Naimiedi Galilea imie?

⁷ —Jii —raitimaci. Galilea enirue illaïma Herodes. Naie facaiseconi Jerusalémo naimie illa jira, naimie dine Pilatodi Jesúsna orede. ⁸ Jesúsna Herodes ciuanona, iobide. Naimie finoca rafuena naimie fidiã jira, naimiena cioacade. Siño rafuena naimie finua jiai cioacade. ⁹ Jesúsno ie finoca rafuena are jicanote; iadedi Jesús dinena uaina oñede. ¹⁰ Ie facaiseconi judíuai illaicomini Jesúsna riire llogidotimaci. ¹¹ Herodes ie soldaduai diga naimiena eo jeare ñaitimaci. Illaïma jitauga iniroina jitatatimaci. Ie mei Pilato dine naimiena abido orede. ¹² Iemona nairuido Herodes Pilato diga nabairite. Jaië conimana enoidiaïmaïaï.

Pilatodi Jesús fiodaïllana llua rafue

(Mt 27.15-26; Mr 15.6-15; Jn 18.39-19.16)

¹³ Pilatodi judíuai illaicominina, nainomo ite comini diga, uaidote. ¹⁴ Raite: —Bimie cue dine atidomoi. Raitomoi: “Comini comeciai feidocana naimie uite”. Naimiemo jai jicanoticue; ia naimiemo nicinodi iñede. ¹⁵ Herodes cue dine naimiena como abido orede. “Naimiemo nicinodi iñede” jiai raite. Naimiena cue meinetalena, naimie jaca nicinona finoñede. ¹⁶ Ie jira naimiena cue sechedotajanona, naimiena oni oretaiticue.

¹⁷ Naie rafue facaiseconi naga año cárcelmona damiena jino jamai oretauide. ¹⁸ Pilato llua cacajano, nana comini ado cuirriidimaci:

—¿Naimiena oni uño, naimiena meinellena! ¡Barrabás cárcelmona jino oreta!

¹⁹ Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. ²⁰ Jesúsna naimie jamai oretaiacana jira, comini diga Pilato dane ñaite; ²¹ iadedi cuirriidimaci:

—¿Naimiena corai! ¡Naimiena meine!

²² Pilato dane jicanote:

—¿Nie isoide marañede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuirriidimaci:

—¿Naimiena corai! —Ja muidomo Pilato dinena:

—Jee —raite. ²⁴ Naimaci jitailla isoi Pilato fairiote. Jesúsna meinellena llote. ²⁵ Ie mei Barrabásna cárcelmona jino oretate, naimiena comini jicaja jira; iadedi Jesúsna naimacimo fecade, naimiemo naimaci jitailla ra naimaci finollena.

Jesúsna coraïa rafue

(Mt 27.32-44; Mr 15.21-32; Jn 19.17-27)

²⁶ Jesúsna soldaduai oni uitemo, Simón raillamie diga dafaïfidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaoicaïda sonotate. ²⁷ Ailluena comini Jesúsna

racadimaci. Ailluena riñoniai eo eecana jaisite. ²⁸ Iena cacajano, Jesús naiñaiñuái dine doбайдacaída, naiñaiñuáimo llote:

—Jerusalén itíñaiñuái, cue facaina eeñeno; iadedi omoi facaina mai omoi ee. Omoi uruíaí facaina mai omoi ee. ²⁹ Ero, jiairuido duere sefeuillemona comini raitimaci: “Oiniñuái jiaie riñoniai baifemo duere sefuiñena jira, marena itimaci”. ³⁰ Jusiñamui riicaillafuemona jilloiacanamona, comini jiaí raitimaci: “Aneduai caimo jaicorillana jitaídicaí”. ³¹ Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

³² Naie iaímaiaína meinellena, mena maraiñede iimana jiaí uitimaci. Gobierno llogacinona iñoñeíiaímaiaí. ³³ Hfocoraína eruáilla illanomo naimaci ría, Jesúsna coraidimaci. Naie maraiñede iaímaiaína jiaí coraidimaci. Damie Jesús nabeimo. Jiaímie Jesús jarifebeimo. ³⁴ Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduái cuena duere finua rafuena feita —llote. Bu dajerie uille uiñollena, Jesús iniroína jifanoduanano soldaduái facasite.

³⁵ Ailluena comini eruaidimaci. Judíuái illaícominídi naimiena jifanoduanona, coniniri raitimaci:

—Naimiedi jiaie comína duicomona jillotate. ¿Niese dama naimie abína biruí jillotañede? Naimiedi Jusiñamui oretagamedena, Jusiñamui fetocamedena, fiodaillamona dama naimie abína jillotarede.

³⁶ Soldaduái naimiena jiaí jifanododimaci. Ie abí isirena cacaiñellena, naimiemo vino fecajanona, ³⁷ raitimaci:

—Judíuái illaímadiodena, fiodaillamona dama o abína jillota. —Naie vino Jesús jiroñede.

³⁸ Jesús ifogi afeconi rabicimo Pilato cuetatate: “Bimiedi judíuái comini illaíma”.

³⁹ Jesús díga coraíca iaímaiaímona damie naimiena taigode:

—Jusiñamuimona bitíodena, nia fiodaíñenamona dama o abína jillota. Cóna jiaí jillota.

⁴⁰ Jiaímiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadío? Ja fiodaítío. Iemei Jusiñamui uicomo ja íitío. ¿Niese Jusiñamui uicomo o illena jaciruiñedio? ⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesúsno llote:

—Illaímana o illa façaise cuena começi.

⁴³ Jesús uai ote:

—Uanaicino llotícue. Biruí cue díga cue Moo illanomo íitío.

Jesús fiodailla rafue

(Mt 27.45-56; Mr 15.33-41; Jn 19.28-30)

⁴⁴ Jítoma naidai jai ítemo, daje amani horas mona jítibicaide. ⁴⁵ Jítoma raise llígaíñoñede. Jusiñamui jofó ie fetaca iniroife ana anaba jillacímoto motodo menafe cuararide. ⁴⁶ Jesús ado llote:

—Ore Moo, cue joreña feiño. —Ie meí naimie jai fiodaite.

⁴⁷ Soldaduái imaci capitán bie rafuena ciuano, Jusiñamuína jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaillana cioidimaci. Ie mei eo sunaillamona, jogobemo fairuanona, jofomo abido jaidimaci. ⁴⁹ Jesús nabaiñiai bie rafuena aarena cioidimaci. Galileamona bite riñoniai bie rafuena aarena jiai cioidimaci.

Jesús raiafomo jonia rafue
(Mt 27.57-61; Mr 15.42-47; Jn 19.38-42)

⁵⁰⁻⁵² Pilato dine José raillamie jaide, Jesús abina jicallena. Naimiedi illaicomini. Maremie. Inogamie. Jesúsna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride. ⁵³ Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raiañafomo jonete. ⁵⁴ Nairui viernes. Sábadorui rille jai iairei illa jira, Jesús abina raiafomo raire jonete. ⁵⁵ Galileamona navui bite riñoniai racadimaci. Raiafona cioidimaci. ⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

24

Jesús fiodaillamona jillua rafue
(Mt 28.1-10; Mr 16.1-8; Jn 20.1-10)

¹ Domingo jitramo monaidemo, naie riñoniai raiafomo jaidimaci, iñaiñuui finoca soride rana uillena. ² Raiafo ibailla nofici oni joillana cioidimaci. ³ Fo jaidemo, Jesús abina cioñedimaci. ⁴ Uainicaidimaci. Ieconí menamie naiñaiñuui ecimo bairediaimaiaí. Iaimaiaí iniroi eo quenirede. ⁵ Iaimaiaína jacinaillamona, ifogí ana jitadacaidimaci. Naie iaimaiaí dinena jicanote:

—¿Bue ñellena fiodaítimie illanomo cajedimiena jenodomoí? ⁶ Galileamo navui naimie omoimo llogacinona comeciñedomoí. ⁷ Naimie raite: “Monamona billanona, imana jaidicue. Jusiñamui jitailla jira, maraiñede rafue finorainí anamo iitícue. Cuená coraitimaci. Darui amani illanona, fiodaillamona jilloitícue” raite.

⁸ Iemona ie llogacinona jai comecitimaci. ⁹ Raiafomona abido jaidimaci. Ie once llofueoicaiganomo naiñaiñuui ciua rafuena llotimaci. Naie llofueoicaigano diga itinomo jiai llotimaci. ¹⁰ Naie riñoniaimona María Magdalena ite. Juana ite. María ite. Naiñaiñodi Jacobo ei. ¹¹ Naie riñoniaidi iena llotimaci; iadedi ie rafuena cacadinodi iena ñnoñedimaci.

—Jamaifuená ñaitomoí —raitimaci.

¹² Iena cacajano, Pedro aisicana raiafomo jaide. Nainomo ria, ana jitadacaida, fo erodate. Useroi joillana ciode. Iemo ie comecina facajano, jofomo abido jaide.

Mena llofueoicaiganomo Jesús bairia rafue
(Mr 16.12-13)

¹³ Jesús jilluarui mena llofuega iaimaiaí Emaús railla nairaimo jaidiaimaiaí. Jerusalémóna nibai once kilómetros ite. ¹⁴ Nana Jesúsno suide rafuena ñaianó jaidiaimaiaí. ¹⁵ Iaimaiaí ñaianóna, Jesús iaimaiaí diga dafaifillanóna, iaimaiaí diga jaide. ¹⁶ Jusiñamuidi iaimaiaína naimiëna uiñotañena jira, naimiëna uiñoñediaimaiaí. ¹⁷ Iaimaiaímo Jesús jicanote:

—¿Buena ñaitomico? —Ieconí naidadatíaimaiaí. Sunaitíaimaiaí. ¹⁸ Naie íaimaiaímona damiedí Cleofas. Naimie uai ote:

—¿Niese Jerusalémo biruí suide rafuena uíñoñedio? Níbai como ridio. Nana jiaí comíni iena uíñotimaci.

¹⁹ Uai ote:

—¿Nie isoide rafue suide?

Uai otíaimaiaí:

—Nazaret íe Jesús rafue. Naimiedí Jusiñamuí facaina lloráima. Díga síño rafuena finode. Comínina raise llofúete. Jusiñamuimona naimiedí maremie. Comínimona naimie maremie; ²⁰ íadedí caí illaícomíni naimiena gaitatítimaci. Naimiena cruzmo coraitítimaci. ²¹ Jusiñamuí naimie caí díne orecaimemo coméina facadicoco. Naimie caí illaímana illemo ocuridicoco; ía naimie jai fiodaite. Naimie fiodaillamona daruí amani jai íte. ²² Caí comínimona dajerie riñoniaíbiruí caina jacinaitadítimaci. Jítiramo Jesús raíafomo jaidítimaci; ²³ íadedí naimie abina cioíñedítimaci. Abído naimaci bia: “Jusiñamuí jaienisáina ciodicaí” raitítimaci. Naie jaienisáí naimacímó llote: “Naimiedí caje”. ²⁴ Iemeí caimona dajerie raíafomo jaidítimaci. Riñoniaí llua ísoí ciodítimaci. Jesús abina cioíñedítimaci.

²⁵ Jesús dínena uai ote:

—Abí uíñoñedomico. Nana Jusiñamuí facaina lloráini micoriaí cuegafuíaína ñnoíacaiñedomico. ²⁶ Cristo duere sefuillena cuetítimaci. Jusiñamuí íena jítaillena cuetítimaci. “Naimie nía illaímana jaiñenia, duere sefuite” cuetítimaci.

²⁷ Iemeí Jesús íaimaiaína llofúete. Moisés micorí cuegafuíaína llofúete. Jusiñamuí facaina lloráini micoriaí cuegafuíaína jiaí llofúete. Nana Cristona cuegafuíaína llofúete.

²⁸ Emaús díne íaireí naimaci ría, Jesús nía jaiacademo, ²⁹ naimiena caidííaimaiaí. Raitííaimaiaí:

—Coco díga fiebí. Jítoma jai ana íte. Jai abí juaníde, nía o jaillena. — Íe muidona íaimaiaí díga fiebillena fo jaide. ³⁰ Naíllí guitítimacímó, llomenícóna Jesús llínuano, Jusiñamuímo íobíllacínóna fecade. Íena táiruano, íaimaiaímó fecade. ³¹ Jusiñamuí jítaila jira, íeconí Jesúsna uíñotííaimaiaí. Iemeí íaimaiaímona naimiena jai cioícaíñena. ³² Daímaiaí ñaitííaimaiaí:

—Coco díga naimie ñaía, coco comeci caimare íte.

³³ Naie dacaíño Jerusalémo abído jaidííaimaiaí. Jesús llofueoícaígano naimaci nabaiñiaí díga danomó illana baitííaimaiaí. ³⁴ Íaímaiaímó llotítimaci:

—Caí Nama fiodaillamona jai jillode. Simón Pedromo jai bairedé.

³⁵ Íe meí náisona íaimaiaí jaílla rafuena llotííaimaiaí:

—Caí guitícaímó, naimiena uíñotícoco —llotííaimaiaí.

*Jesús íe llofueoícaígano bairía rafue
(Mt 28.16-20; Mr 16.14-18; Jn 20.19-23)*

³⁶ “Jesúna ciodicoco” llotííaimaiaímó, íe llofueoícaígano motomó Jesús bairedé. Llote:

—Jai bitícue. Uri omó í.

³⁷ Naimiena cíuamona, jacinaitítimaci. “Joreño ciodicaí” comeciáina facajanona, jiaí jaciruitimaci. ³⁸ Naimacímó Jesús jícanote:

—¿Bue ñellena jaciruitomóí? ¿Bue ñellena cue bene íllana ñnoñedomóí?

³⁹ Cue onollímó eruai. Cue eíllímó eruai. Jesús dícue. Cuena jeta, raise uíñollena. Cuemo lílící íte. Cuemo íllaící íte. Jamáí joreño ísoíñedícue.

⁴⁰ Iena llua mei, coraiafona naimaci cioillena, ie onolli ie eilli diga acatate.

⁴¹ Iobiacadimaci; iadedi nia raise inoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaina fecadimaci. ⁴³ Iena feñuanona, rite. Iena ciodimaci. ⁴⁴ Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

⁴⁵ Naie facaiseconi naimacina naie ciegafuiaina raise uiñotade.

⁴⁶ Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite. ⁴⁷ Naimie muidona comeciaini iuai meidumona, Jusiñamui naimaci jecinona oni dotaite. Naimie rafue nana nairaimo damierie lloitimaci”. Omoimo buena lloiticue. Cue rafuena llollena, Jerusalémo taineitomoi. ⁴⁸ Bie rafuena ciodomoi. Iena lloitomoi. ⁴⁹ Ero, navui naimie llua isoi, cue Moo Joreño omoi dine ore-taiticue. Jerusalémo fiebi, naimie Joreño omoi feñolle dinori. Cue rafuena omoi llollena, naimie Joreño omoi comeciaina ocuiñotaite.

Jesús monamo jailla rafue

(Mr 16.19-20)

⁵⁰ Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote. ⁵¹ Iena naimacimo lluanona, monamo jaide. ⁵² Jerusalémo eo caimare abido jaidimaci.

⁵³ Jusiñamui iobillacino fecajano, Jusiñamui jofomo nargarui itimaci. Mai. Macaibaite. Lucadicue.

JUAN JESUCRISTO ENIRUEMO ILLA RAFUE CUIAFUE

Jesucristo rafue iese tainede

¹ Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. ² Jusiñamui diga jaca nano ite. ³ Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. ⁴ Naimie muidona iticai. Naimiena cai iñuamona, jaca iiticai. Lligaiñora diga rana cai ciua isoi, caina Jusiñamuina uiñotade. ⁵ Naimiena iñoñedino jiredinomo itimaci isoidimaci. Naimaci comeciai jitrede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶⁻⁷ Naimaci comeciaina lligaiñotimiena llolena, Juan micori llucinodo Jusiñamuina nana comini iñollena, Jusiñamuidi Juan Bautista raillamie micorina oretate. ⁸ Juan naie lligaiñodimie; iadedi Juan naimiena lluaibite. ⁹ Nanoca lligaiñotimiena llole. Nanoca lligaiñotimiedi eniruemo billanona, nana comini comeciaina lligaiñote. ¹⁰ Naimie muidona comini comuidimaci; iadedi naimie bene billa meinoconi, comini dinena naimiena uiñoñedimaci. ¹¹ Ie nairai illanomo naimie ride; iadedi nana cai nairai naimiena feiñoñedimaci. ¹² Damierie naimiena feiñotimaci. Naimiena iñotimaci. Ie uaido naimiedi naimacina Jusiñamui uruiaina itatate. ¹³ Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴ Iemo caina Jusiñamuina uiñotallena, Jusiñamui Jito comena jaide. Naie fa-caise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona cidicai. ¹⁵ Juan micori naimiena cominimo jaie llole:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeicifenia, naimiedi jaca ite —llole.

¹⁶ Jesucristo caina eo duenaillamona, birui caina eo canocabide. ¹⁷ Moisés micori Jusiñamui uaina jaie llole; iadedi iemona Jusiñamui caina duenaillana jaie raise uiñoñedicai. Jesucristo lluamona Jusiñamui caina duenaillana jai raise uiñoticai. Naimiemona uanaicinona jai raise cacadicai. ¹⁸ Jaca buna Jusiñamuina cioiñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi Jesúsna llua rafue (Mt 3.11-12; Mr 1.7-8; Lc 3.15-17)

¹⁹ Jerusalémona Juan micori dine judíuai illaicominidi Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraima biite raillamiemo ocuridicai. Cristo raillamie billemo ocuridicai. ¿Odi naimiedo? —raillanona jicanotimaci. ²⁰ Naimie dinena janoñede; ia:

—Imieñedicue —raite.

²¹ Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina lloraima ico billena jaie llote. ¿Odi naimiedio?

Juan dinena raite:

—Ieñedicue.

²² Dane jicanotimaci:

—¿Budío? Caimo llono, cai oretatinomo cai lllollena. ¿Niese naimacimo ona lloiticaí?

²³ Juan dinena raite:

—Jofue iñenanamo ado llotimiedicue. Isaías micori jaie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoi feiñollena, omoi comeciai raise finollena ñaiticue.

²⁴ Juan dine bitinodi fariseuai comini. ²⁵ Nia jicanoiacadimaci:

—Odi cai Jilloitaraímañenia, o Elíañenia, o Moisés micori llotimieñenia, ¿bue ñellena cominina bautizado? ¿Ñie isoide uai omo ite? ¿Ninomona o uaina otío?

²⁶ Juan dinena uai ote:

—Cominina bautizadicue; iadedi omoi motomo omoi uiñoñegamie jai ite.

²⁷ Naimie cue ifo meidoite. Cue baifemo faite. Jamai bue cue isoilla jira, naimie illafomo cue riñena jira, naimiema canonidicue.

²⁸ Naie rafuedi Betábaramo suide. Jordán railla ille ruicafebeimo ite. Rainomo Juan bautizauide.

Juan micori Jesúsna dane llua rafue

²⁹ Ie areruido Juan micoridi Jesús naimie dine billana ciuano, naimiema raite:

—Ero, Jusiñamui Jito toica llauda mamecido jai bite. Cai jeacino facaina faga llauda ifomo Jusiñamui ie Jitona jai orede. Naimie fallemona comini jeacinona dotaite. ³⁰ Navui naimiema ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamai bue isoifede. Cue nia jeiciñenia, naimiedi jaca ite”. ³¹ Cue dine naimie nia biñenia, naimiedi cai Jilloitaraímana uiñoñedicue; iadedi cominina bautizallena bene iticue, cai cominimo naimiema lllollena.

³² Juan jiaí llote:

—Monamona ucugi isoi Jusiñamui Joreño ana billana ciodicue. Jesúsno baite. ³³ Naimiedi cai Jilloitaraímana nia uiñoñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitio. Cue Joreño baillamiedi cue Joreño omoimo fecaite”. ³⁴ Naie rafuena ciodicue. Iemona naimiedi Jusiñamui Jitonana lloticue.

Jesús ie fetoacaga comini ie rafue

³⁵ Ie areruido Juan micori llofueoicaganomona menamie Juan micori diga ia, ³⁶ Juan micori Jesús macarillana ciuano, raite:

—Ero, Jusiñamui Jito toica llauda mamecido jai bite.

³⁷ Juan micori diga itiaímaiaí naiema cacajano, Jesúsna racadiímaiaí.

³⁸ Jinafo dine erodajanona, Jesús iaímaiaína ciode. Iaímaiaímo jicanote:

—¿Buena jitaídomico?

Iaímaiaí dinena uai otiaímaiaí:

—Rabbí, ¿ni o jofu? ¿Ninomo itio? —uai otiaímaiaí. Rabbí oni dobaíuamona: “Llofueraima raillamie”.

³⁹ Jesús nai iaimaiaia uaina ote:

—Mai. Cue diga bi, omico uiñollena. —Ie jira jaidiaimaiaia. Jesús illanona ciodiaimaiaia. Jitoma nia a illa jira, nairuido naimie diga fiebidiaimaiaia. Jitirecaidemo oni jaidiaimaiaia.

⁴⁰⁻⁴¹ Naie iaimaiaimona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai cominina Jilloitaraimana baiticue. Cristo raillamiena baiticue.

⁴² Ie mei Jesús dine naimiena uite. Jesús naimiena eo eruaillanona, raite: —Birui o mamecidi Simón. Juan ie jitodio. Biruimona Cefana jiaia mamecirenitio —raite. Oni dobañuacidi Pedro.

Jesús menamie uaidua rafue

⁴³ Ie areruido Jesús Galileamo jaiacade. Felipena baillanona raite:

—Cue llofuegamiena o jaillena, cue diga coco jaillena, mai cue diga bi.

⁴⁴ Felipedi Betsaida nairai imie. Andrés iaimaiaia Pedro diga daje nairai iaimaiaia. ⁴⁵ Jesús naimiemo llua mei, Felipedi Natanaelna oni jenuaide. Higuera railla riarana anamo naimiena baillanona, raite:

—Moisés micori jaiie cuegamiena jai baiticue. Jusiñamui lloraini micoriaidi naimiena jaiie jiaia cuetimaci. Naimiedi Jesús. Nazaret imie. Ie moodi José.

⁴⁶ Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

⁴⁷ Jesúmona iaimaiaia iaie ia, Jesús dinena llote:

—Ero, buna jifueñegamie billa. Nanoca Israel imie bite.

⁴⁸ Natanael dinena uai ote:

—¿Bu cuena llogao? ¿Ñiese cuena uiñotio?

Jesús uai ote:

—Felipe ona ailli nia baiñenia, higuera railla riarana anamo o illana jai uiñoticue.

⁴⁹ Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

⁵⁰ Jesús dinena uai ote:

—Amena anamo o illana cue uiñua jira, cuena iñotio. Diga siño rafuena ciojitio. Bie rafue baifemo finuana ciojitio. ⁵¹ Jusiñamuimona billanona, imana jaidicue. Uanaicino omo lloticue. Mona ecorillana o cioia, Jusiñamui jaienisai cue dine billena cioitio. Cuemona abido jaillena jiaia cioitio.

2

Jinuimona Jesús vino finua rafue

¹ Menarui illanona, Galileamo Canámo iima ie ai uarafue ite. Rafue nama uaidua jira, nainomo Jesús ei jaide. ² Jesús jiaia uaidoga. Ie llofueoicaiganodicaia jiaia uaidogacai. ³ Vino cueillamona, Jesús ei Jesúmo llote:

—Vino jai iñede.

⁴ Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

⁵ Iemei ie eidi rafue nama mullaiaimo llote:

—Naimie omoimo llua fina.

⁶ Jinui nainomo eenollena, nainomo seis noficimona finoca llerodana raisoide. Naiemona jinuína ouidimaci. Marena illena, cai einamací llua isoi,

jofomo naimaci ria, naimaci abiaina llereuidimaci. Naga lleroda nibai cinco latas totaca. ⁷ Mullaiaimo Jesús llote:

—Naie llerodaiaina jinui diga oruita. —Pozomona jinui atiano, naie llerodamo toidimaci.

Iena finua mei, ⁸ Jesús naimacimo llote:

—Llerodamona janore jisa uanona, rafue nama dine uiño.

⁹ Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiai uiñotimaci. Jirua mei, ai otimie uaiduano, ¹⁰ raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesúsdi siño rafuena nano finode. Iemona caina ie uai siño uai uiñotade. Ie muidona naimie siño Jitonana #noticai.

¹² Rafue fuilla mei, Capernaumo Jesús ie ei diga, ie amatiai diga, ie llufueoicaiganodicai diga jaide. Nano nigarui nainomo iticai.

*Jusiñamui jofomona Jesúsdi rana fecarainina dotaja rafue
(Mt 21.12-13; Mr 11.15-18; Lc 19.45-46)*

¹³ Pascua railla rafue iaie iacana jira, Jerusalémo Jesús cai diga jaide. Egiptomona cai jaiagai jillobillana começillena, naie rafue ite. ¹⁴ Rillano, Jusiñamui jofomo diga rana fecarainina cide. Ucube ollena, nainomo juraretaiai, toica llaudai, ucugiai fecauidimaci. Ucubena meidorainidi jiai itimaci. ¹⁵ Naimaci ocainaiai diga naimaci jino jnullena, rao Jesús uanona, iena lleride. Naimaci ucubena judaide. Mesaiaina oni caitade. ¹⁶ Ucugiaina fecarainimo llote:

—Omoi ucugiaina jino uiño. Cue Moo jofomo ra feca-fecajana jitaiñedicue —llote.

¹⁷ Iemo Jusiñamuina lloraini micoriai cuezafuiaina jai começitica. Iese jaie cuela: “O jofona cue riiduamona, jiaino cuena meinetaitimaci”. ¹⁸ Nainomo ite judiaiai illaicominini dinena raitimaci:

—¿Nie isoide uaido naimacina jino oredio? Siño rafuena fino, siño uai omo illana cai uiñollena. ¹⁹ Jesús uai ote:

—Bicono judai. Darui amani maijiamona iena dane nillana fuidoiticue.

²⁰ Dane raitimaci:

—Cuarentiséis años bicomo maijidimaci, iena finollena. ¿Niese iena darui amani illanona, iena dane nillana fuidoitio?

²¹ Iese raitimaci; ia Jesúsdi Jusiñamui jofona ñañede. Dama ie abina ñaite. Fiodaillamona ie jilloillena ñaite. ²² Jesús fiodaillamona naimie jillua mei, ie llufueoicaiganodicai bie lluacinona começitica. Ie jira naie cuezafuena #noticai. Jesús lluacinona jiai #noticai.

Jesúsdi comini comeciaimo iticino lluana jitaiñena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina #notimaci. Coniniri raitimaci:

—Naimiedi cai jilloitaraima. ²⁴ —Naganomo comeciaina naimaci facaja jira, naie cominina naimie uiñuamona, Jesús naimaci motomo iacañede.

²⁵ Naimaci comeciaimo iticinuaina naimie eo raise uiñua jira, comini rafuena naimiemo bu lluana jitaiñede.

3

Nicodemo Jesús diga ñaia rafue

¹⁻² Judíuái illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

³ Jesús dinena uai ote:

—Raise llotio; ia daje rafue omo lloticue: Uanai omo lloticue. Dane abido comonori o jeiciñenia, Jusiñamui ie cominina sedajanomo jaca initio.

⁴ Nicodemo abido jicánote:

—¿Niese eimie ie ei jeraimo dane iite? ¿Niese dane comonori jeiciite?

⁵ Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeiciñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite. ⁶ Comemona cai comuitaia, jaca comedica; iadedi Jusiñamui Joreñodo cai comuitaiadedi, Jusiñamui uruedica. ⁷ Omo dane lloticue: Comonori jeicia. Ieri rajicaiñeno. ⁸ Iena o raise cacaillena, jiaie rafuedo iena lloticue. Aifidi ie jitailla dine sairide. Iena cacadio; iadedi ninena billana uiñoñedio. Níne jaillana jiai uiñoñedio. Ie isoide. Niese Jusiñamui Joreño cominina comuitajana jiai uiñoñedio.

⁹ Nicodemo dane jicánote:

—¿Niese biedi dane iite? Raise cacaiñedicue.

¹⁰ Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio. ¹¹ Uanaicinona omo lloticue. Abi uiñuamona omo lloticue. Cue ciua rafuena lloticue; iadedi cue lluaña iñoñedio. ¹² Bene ite rafuena cue lloia, iena iñoñediota, monamo ite rafuena cue lloia, iena jiai raise iñoñeitio. ¹³ Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue. ¹⁴ Monamona biticue; ia amenamo fiódaiticue. Jofue iñenanomo Moisés micori; jaio joreño amenamo jaié cuinade. Jaionia; ainillamona comini fiódaiñellena iena cuinade. Comini ie isoi jilloillena, ie isoi cuena coraítimaci. ¹⁵ Cue fiódaiñellamona bu cue uaina iñoia, monamo jaca iite.

Jusiñamuidi cominina eo isiruilla rafue

¹⁶ Jusiñamuidi cominina eo isiruilla jira, comini dine ie damiede Jitona orede. Ie Jitona naimaci iñollena, naimiena orede. Naimiena iñuamona, monamo jaca iitimaci. Jiai faifiñeitimaci. ¹⁷ Naimacina duere finotallena ie Jitona oreñede; iadedi naimaci jeacinomona jilloillena, naimiena orede.

¹⁸ Jusiñamuidi Jesús uaina iñotinona jaca duere finoñeite; iadedi ie dajede Jitona uaina naimaci iñoñena jira, Jusiñamui duere finollicino anamo jai itimaci. ¹⁹ Comini comeciaina lligaiñollena, Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuabite;

iadedi naimaci comeciaino jitiredinomo iacana jira, jearede rafue naimaci finua muidona, naimiena jitañedimaci. Ie jira Jusiñamui naimacimo duere finollicinona anamo jai itimaci. ²⁰ Naimie finoca rafue bai raillano, naga jeacino finoraíma ie comeci lligaiñuana jitañede; ²¹ ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

Juan micoridi Jesúsna dane ñaia rafue

22 Digaruí illanona, Jesús ie llofueoicaiganodicaí diga, Judea railla eniruemo macaricana jaidicaí. Nainomo diga iruí fiebidicaí. Llofuiamona inotinona bautizacana uiticaí. 23-24 Nia cárcelmo ifenia, ailluena jinui nainomo illa jira, Enón railla nairaimo bautizajanomo Juan micorí jiaí ite. Salim railla nairá iaírei ite. 25 Naie facaise Juan micorí llofueoicaigano judíuaí imie diga bautizajana siadotimaci. 26 Ie muidona Juan micorí dine billanona, raitimaci:

—Maestro, navuí Jordán ruica dine damie billena llotio. Naimiena o bautizallena, o dine navuí bite; iadedí biruí naimiedí comínina bautizade. Ailluena comíní naimie dine jaioidimaci. O dine jai raise biñedimaci.

27 Juan uai ote:

—Jusiñamuí ie uai fecañedena, Jusiñamuí facaina buna jaca buena finonide. 28 Cue lluana navuí cacadomoi. Lloticue: “Cai comíní Jilloitaraímañedicue. Cristoñedicue. Naimie billena cue lollena, Jusiñamuidí naimie uicomo cuena orede”. 29 Jiaíe rafuedo iena lloticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ierí jiaí iobide. Ie isoide. Comíní cue dine navuí biñoidimaci. Biruí Jesúmo jaioidimaci. Naimiemo jai duidimaci. Iena cue cacajamona, ierí iobidicue. 30 Comíní naimie uai siñona uíñuana jitaídicue. Comíní cue jamai bue isoidimiena uíñuana jiaí jitaídicue. 31 Jamai comedicue. Ie jira eniruemo ite rafuena llocabiticue. Jusiñamuimona Jesús billa jira, cai baífemo faite. 32 Ie Moo illanomo ciua rafuena llote. Ie Moo illanomo cacaja rafue jiaí llote; iadedí ie janore comíní naimiena inotimaci. 33 Naimiena inotimiedí Jusiñamuí uanaicinona lluana raise uíñote. 34 Jusiñamuidí ie Joreño ie Jitomo caidíñeno fecaja jira, naimie Jusiñamuí uaina llocabite. 35 Jusiñamuidí ie Jitona isiruite. Ie jira naga rafue naimiemo fecade. 36 Bu Jusiñamuí Jitona inoia, Jusiñamuí illanomo jaca ite; iadedí bu naimiena inoñenia, Jusiñamuí illanomo jaca iñeite. Jusiñamuí riicaillafue anamo jai ite.

4

Galileamo Jesús jailla rafue

1-2 Naie facaise ailluena comíní Jesúmona fueotimaci. Iemei naimie díbeido bautizadimaci. Naimacina naimie bautizallena, janore comíní Juan dine jaide. Jesúdí bautizañede. Dani ie llofueoicaiganodicaí bautizadicaí. Fariseuáí bie rafuena fidiano, iena Jesús uíñua jira, 3 Judeamona Galileamo Jesús cai diga dane abído jaide.

Samaria iñaiño diga Jesús ñaia rafue

4 Galileamo jaillena, Jesúdí Samaria railla enirue díbeido jaiacade. 5 Samariamo cai ria, Sicar railla nairaimo iaírei rillano, daje pozomo ridicaí. Naie pozodí Jacob micorí jaie finoca. Jacob micorí naie pozo illano ie jito José micorímo jaie fecade. 6 Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote. 7-8 Jesús pozomo fiebicaiilla meínona, Sicarmo jaidicaí, guille ollena. Cai jailla mei, Samaria iñaiñodí jinui ollena, pozomo bite. Jesús naiñaiñomo jicade:

—Jinuina cue ine, cue jirollena.

9 Naiñaiñodí uai ote:

—Judío imiedío. Samaria iñaiñodicue. ¿Niese cuemo jinuina jicadío? — Naiñaiño iese raite, judíuaí Samaria comíní diga ñairainina jira.

10 Jesús dinena dane uai ote:

—Jusiñamui omo fecaacalle ra uiñotiodena, o diga ñaitimiena uiñotiona, cuemo jaca itataite jinuina cuemo jicadio. Iemei omo iena fecadicue.

¹¹ Naiñaiño uai ote:

—¿Niese bie pozomona jinuina oitio? Eo ana ite. ¿Ninomona jaca itataite jinuina oitio? ¹² Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruai micoriai jiai naiemona jirodimaci. Ie ocainaiai dajemona jiai jirodimaci. Cai usuma micori baifemo fañedio —raite.

¹³ Jesús uai ote:

—Nagamiaai bie jinui jirua mei, dane jiroacanite; ¹⁴ iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca ite. Dusiñamui dine illena, naimiena jaca itataite.

¹⁵ Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶ Jesús dinena uai ote:

—O jofomo mai jai. O ini diga abido bene bi.

¹⁷ Naiñaiño uai ote:

—Inidicue.

Jesús dinena uai ote:

—Uanaí llotio. Ua inidido. ¹⁸ Cinco diga inina jai faicaidio. Birui o diga itimiedi jiai o iniñede. Uanaicinona ua llotio.

¹⁹ Temona abina uiñocaillamona, naiñaiño dinena uai ote:

—Odi Jusiñamui ie lloraimadio. Iena uiñoticue. ²⁰ Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadica; iadedi omoi judíuai dinena raitomoi: “Jerusalémo Jusiñamuina cai sedauilla”.

²¹ Jesús dinena dane uai ote:

—Cuenta ino. Jaiiruido bai bene ite anedumo cai Moona sedañeitomoi. Jerusalémo naimiena jiai sedañeitomoi. ²² Raise uiñoño Jusiñamuina biruido sedadomoi; iadedi cai nairaimona cai jilloitaraíma illa jira, naimiena raise uiñuana sedadica. ²³ Jaiiruido, ua birui, cominidi: “¿Ninomono Jusiñamuina sedaiticai?” raillamo comeciaina facañeitimaci. Naimaci comeciái jitaillamona, naimaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide. ²⁴ Jusiñamui comeñede. Naimiedi jafaici. Omoi comeciái jitaillamona naimiena omoi sedajana jitaide.

²⁵ Riño uai ote:

—Cai jilloitaraíma billena uiñoticue. Naimiedi Cristo. Naimie bia, nana bie isoide rafuena caína raise uiñotaite.

²⁶ Jesús raite:

—Naimiedicue.

²⁷ Ieconí abido ridicai. Riño diga Jesús ñaia jira, raijicaidicai; iadedi: “¿Buena naiñaiño jitaide?” raillano jicanoñedicai. “¿Buena ñaitomíco?” raillano jiai jicanoñedicai. ²⁸ Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llotte:

²⁹ —Ailli pozo fuemo cue jaca cioiraininamie diga dafañidicue. Nana cue finouiga rafue diese cuemo llotte. Mai, cai jibuisailli. Naimiedi pozo fuemo ite. Nibai naimiedi cai jilloitaraíma. Naimiedi nibai Cristo.

³⁰ Ie jira Jesús dine ailluena comini bitimaci. ³¹ Naie riño ie nairai dine jailla mei, abido cai dine nia riñenia, Jesúsna raiticai:

—Maestro, mai guiño.

³² Naimie uai ote:

—Cuemo guille illana uiñoñedomoi.

³³ Coniniri siadotica:

—Jai nibai bu ecajai biga.

³⁴ Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue llumona, jai guiticue isoidicue. ³⁵ Comecina facadomoi: “Jusiñamui uaina nia lloñeitica. Ico iena lloítica”. Ie isoide. Ilimo riana nia llisiñenia, comeciaina facadomoi: “Riana einallena, naga amaga fivui fiebite. Naie facaise maijítica”. Omoimo lloticue: Omoi ecimo eruai. Riana jai einate isoide. Naimacimo Jusiñamui rafue lollena, iena naimaci ñollena, ailluena comini jai itimaci. ³⁶ Naie llisillana maijítimiedi ie ucubena feiñoite. Ie isoide. Jusiñamui rafuena damerie llocabillamona, comini iena cacadimaci. Jaiño billamona, iena dane cacajamona, iena ñnotimaci. Naie mare rafue lloraini ibana feiñoitimaci. Jusiñamui ðibeimo naimaci dajena maijia jira, dajena iobitimaci. ³⁷ Cai comini iena raicabitimaci: “Damie iduaina rite; ia jiaimie llisillana ote”. ³⁸ Ie isoide. Omoina oredicue, comini cue ðibeimo itatallena. Naimacimo cue uaina nano lloñedomoi; iadedi nano jaiño naimacimo cue uaina llotimaci. Ie jira nana omoi llofuiamona cue uaina ñnotimaci.

³⁹ Samaria iñaiño llumona, naiñaiño nairaïmona ailluena comini Jesúsna ñnotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitaraïma” raillanona Jesúsna ñnotimaci. ⁴⁰ Jesús ðine naimaci rillanona, naimaci ðiga naimie fiebillena, Jesúsno jicanotimaci. Ie jira Jesús menarui naimaci ðinomo fiebide. ⁴¹ Naimie llofuiamona, jiaie ailluena comini naimiena ñnotimaci. ⁴² Riñoimo llotimaci:

—Daño o llumona, navui ñnotica; iadedi naimie uaina cai cacajamona, birui raise ñnotica. Naimiedi comini ua Jilloitaraïma.

⁴³ Menarui illanona, nainomona Galileamo Jesús cai ðiga jaide. ⁴⁴ Caïmo llote:

—Jusiñamuina lloraïmadi ie nairaï illanomo ia, naie comini naimie llumona cacarefiacaiñedimaci; ⁴⁵ iadedi Galileamo cai rillanona, nainomo itino naimiena caïmare feiñoitimaci. Pascua railla rafue facaise Jerusalémo nana naimie finoca rafue navui naimaci ciua jira, naimiena caïmare feiñoitimaci.

Jesúdi illaïcomini jitona jillotaja rafue

⁴⁶ Galileamo Jesús cai ðiga macaria, dane Canámo ridica. Nainomo jinuiamona vino navui finode. Nainomo cai ia, Capernaum railla nairaïmo itimie jito ðuide. Duidimie moodi gobierno ðiga maijuide. ⁴⁷ Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiodaicana jira, ie jitona jillotallena Jesúsno ðuere jicanote. ⁴⁸ Jesús naimieo llote:

—Siño rafuena omoi cioiñenia, cuena ñnoñedomoi.

⁴⁹ Uai ote:

—Maestro, cue ðiga bi, cue jito fiodaïñellesa.

⁵⁰ Jesús uai ote:

—Mai jai. O jito jai fiodaïñeite —llote. Naie ñima Jesús uaina ñnuano, ie jofomo abido jaide. ⁵¹ Naisona naimie jaidemo, ie mullaïai ðiga afeedo beici ðafaïfide. Llotimaci:

—O jito jai jillode.

⁵² Ie jira naimie jicanote:

—¿Nino jitoma itemo, jillode?

Uai otimaci:

—Navui are jitoma oni lluai caidemo, abi cuarilladi fainonocaide.

⁵³ Ie comecina facade: “Navui are naie facaise Jesús cuemo llote: ‘O jito jai jillode’”. Ie mullaiaia lluana cacajamana, naimiedi Jesúsdi cai Jilloitaraimana #note. Nana naimie jofomo itino jiaia #notimaci. ⁵⁴ Judeamona Galileamo Jesús abido billano, siño rafuena iese jai finode.

5

Joraibimo tisitaitimie jillua rafue

¹ Digarui illa mei, cai judúuai rafue iacana jira, Jerusalémo Jesús abido jaide. ² Jerusalémo toica llaudaiaia jaisoilla nase facaimo joraibi ite. Cai judúuai uaimona nai joraibi mamecidi Betesda. Naie jorai fuedo ite cinco jifocotiaia. ³ Nainomo diga duidino biidimaci: uisinidimaci, ñuja-ñujacaidino, tisitaitino. Jinuina begollena sedadimaci. ⁴ Feide isoidemona dacaiño Jusiñamui jaieniciidi jinuina begotallena bite. Iemei nai jinuimo nano jaidimie ie duicomona jillode. ⁵ Duidino motomo tisitaitimie ite. Treintiocho años duide. ⁶ Naimiena cuano, naimie are duillana uiñuamona, Jesús naimiemo jicanote:

—¿Jilloiacadio?

⁷ Duidimie uai ote:

—Jii; iadedi jinuina begoia, jaca buna iñede cue canoitena. Ie jira jiaimiedi cue uicodo jinuimo jaide. Ie jirari nia jilloñedicue.

⁸ Jesús uai ote:

—Mai naidacai. O biira ferinocaida macari.

⁹ Ieconí naimie jillode. Ie biira ferianona oni jai macarite.

Sábadoruimo duidimie jilloitajana siadua rafue

Sábadoruimo, judúuai jafaici ouillaruimo, naimie jillode. ¹⁰ Ie jira judúuai illaicominiidi jillodimie mo llote:

—Birui sábado. O biira abinocaida o uilla jira, Moisés micori rairuica rana jai finodio. Sábado mo maijinidicai. Birui jafaici uaruimo jaca buena jetanidicai.

¹¹ Naimie uai ote:

—Cuen jilloitaimie cuemo llote: “O biira mai ferinocaida macari”.

¹² Judúuai dinena jicanote:

—¿Bu iena omo llote? —Naimie uiñoñena jira, uai oñede.

¹³ Jesúsdi comini motomo itabilla jira, ailluena comini illa jira, jai jillodimie ie jilloitaimiena uiñoñede. ¹⁴ Ie meinoconi dallu illanona, Jusiñamui jofomo Jesús dinena naimiena baite. Llote:

—Jai jillodio. Abido dane eo duere o sefuisa, dane jeacinona finoño.

¹⁵ Ie mei judúuai illaicomini mo jillodimie lluaide. Llote:

—Jesús raillamie cuena jillotate.

¹⁶ Sábadoruimo Jesús bie rafuena finua jira, judúuai illaicominiidi naimiena duere finoacasite. ¹⁷ Jesúsdi abina riiduano llote:

—Cue Moodi ie jitaille rafue jaca finode. Ie isoi cue jitaille rafue finocana jaca jaidicue —llote. ¹⁸ Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judúuai illaicomini naimie meinellena eo jitaidimaci.

Jesús ie Moo isoi finua rafue

¹⁹ Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. ²⁰ Cue Moo cuena isiruillanona, nana ie finoca rafuena cuena jai uñotade. Naimie Jitona cue illa jira, bie imana cue jilloitaja baifemo jiaie siño rafuena fnoiticue, omoi rajicaillena. ²¹ Fiodaitinona jilloitallena, cue Moomo ie uai ite. Naie uai cuemo jiaie ite. ²² Cue Moo juez isoi naimie #noñedinomo lloñeite; iadedi naimacimo juez isoi cue lollena, naimaci duere sefuillena, ie uai cuemo iga. ²³ Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuena omoi iobitañena, cue Moona jiaie iobitañedomoi. ²⁴ Uanaicinona lloticue. Cue uaina bu cacaja, cuena oretatimiena bu #noia, monamo jaca iite. Jearede rafue naimie finua facaina duere sefuñeite. Faiñeite; ia monamo Jusiñamui diga jaca iite. ²⁵ Uanaicino lloticue. Jusiñamui Jitodicue. Ua birui cuena #noñedino cue uaina cacareitimaci. Cuena cacajamona, cuena #nuamona, jaca iitimaci. ²⁶ Cominina jaca itatallena, cue Moomo uai ite. Comini jaca itatallena, cuemo ie uai jiaie iga. ²⁷ Cuena #noñedinomo juez isoi cue lollena, naimiemo cue duillamona, ie uai cuemo jiaie iga. ²⁸ Ieri rajicaiñeno. Jiairuido nana jai fiodaitino diese cue lluaa cacaitimaci. ²⁹ Fiodaillamona naimaci abiaie jilloitimaci. Ie mei cue jitaillacinona finodino jaca illena lloticue. Cue jitaillacinona fnoñedino diese duere sefuillena lloticue. ³⁰ Naimacimo cuena oretatimie jitailla isoi lloticue. Dama cue comecimo ite rafuena cue lloñena jira, bie lluacinodi uanaicino.

Jusiñamui ie Jito uaina comini #noñena rafue

³¹⁻³² Jesús nia llote:

—Dama cue abina cue lloidedi, bu cuena jaca #noñede; iadedi Jusiñamui cue facaina jiaie llote. Naimie lluacino uanaicino. Iena uñotocue. ³³ Naimiena cacareillena, Juan Bautista micori dine cominina navui oretatomoie. Abido naimaci bia, naimaci cacaja rafuena omoi mo lollena, naimacina oretatomoie. Juan lluacinodi uanaicino. ³⁴ Naimie micori cue rafuena llouide; iadedi naimie micori llogacinomo omoi comeci eo facajana birui jitañedicue. Cuena omoi #nollena, naimie mamecina jai llinoticue. ³⁵ Lamparín raise lligaiñua isoi, ie rafuedo Juan micori omoi comeciaino iticinona raise uñotade. Dallu ieri iobidomoie. ³⁶ Cue finoca rafue Juan micori finoca rafue baifemo faite. Cue siño finoca rafuena ñaiticue. Cuena naimie oretajamona, cue Moo uaido iena finodicue. Ie jira naimemona naimie dinena cue billana jai uñotomoie. ³⁷ Cue finoca rafue muidona cuena uñotomoie; iadedi naimie lluaana jaca cacaiñedomoi. Naimiena jiaie jaca cioñedomoi. ³⁸ Cuena omoi #noñena jira, naimie uaina feiñoñedomoi. ³⁹ Jusiñamui dine omoi rillena, Jusiñamui facaina lloraini micoriaie cuegafuiaina facacabidomoie. Naifuiaide cuena ñaite; ⁴⁰ iadedi Jusiñamui dine omoi rillena, cue uaina #noiacañedomoi. ⁴¹ Cuemo iobillacinona omoi fecallena sedañedicue. ⁴² Jusiñamuina isiruiñedomoi. Iena uñoticue. ⁴³ Cue Moo mamecido cue billanona, cuena feiñoñedomoi; iadedi dama ie mamecido jiaime bia, naimiena feiñoitomoie. ⁴⁴ Jaca #noiacañedomoi. Iobillacino cominimo fecadomoie; iadedi ua Jusiñamuidi omoi na “Mare” raillana jitañedomoi. ⁴⁵ “Cue Moomo omoi marañede finoca rafuena lloticue” raillanomo comeciaina facañeno. Moisés micori cuegafuiaimo omoi llogiduafue jai ite. Moisés micori cuegafuiaie muidona Jusiñamui dine

omoi jaca illemo ocuridomoi. ⁴⁶ Moisés micori cuegafuiaina inotomoina, cuena naimie micori cuia jira, cuena jiai inoitomoi. ⁴⁷ Naimie cuegafuiaina inoñedomoi. Ie jira cuena jiai inoñeitomoi —llote.

6

Jesús cinco llomenicomona ailluena cominina ecaja rafue

(Mt 14.13-21; Mr 6.30-44; Lc 9.10-17)

¹ Jiairuido Galilea railla jorai ie ruica díbeimo Jesús ie llofueoicaiganodícaí díga jaide. Naie joraidi jiai Tiberiana mamecírede. ² Duidinona naimie jillotaullana naimaci cuia jira, ailluena cominí naimiena racadímaci. ³⁻⁴ Naie facaiseconí pascua railla rafuedi jai iaire ite. Jesús caí díga anedumo a jaillanona, dinomo ana raide. ⁵ Oni erodatemo, ailluena cominí naimie díne billana cíode. Felipemo jicanote:

—Naimaci guillena, ¿ninomona llomeniconona oíticai?

⁶ Naimiena facacillena, iena jicanote; iadedi Jesús ie finolle rana jai uíñote.

⁷ Felipe uai ote:

—Janore naimaci guillena, doscientos dígarui ie maíjia ucube díese llomenico oticaina, baíñede.

⁸ Naie facaise caimona damie iena cacade. Naimiedi Simón Pedro ama. Andréna mamecírede. Naimie raite:

⁹ —Cinco cebadamona finoca jenide llomenico daje uruemo bene ite. Mena lílicai jiai naimiemo ite; ia ¿níese níbaíticai? Baíñeite.

¹⁰ Jesús caimo llote:

—Cominimo llono, ana imaci raíllesa.

Ie jira raitire illanomo ana raidímaci. Cinco mil íñiaí ítimaci.

¹¹ Llomeniconona Jesús ua meinoconí, Jusiñamuimo iobillacinona fecajano, Jusiñamuimo jíide. Iemeí cominimo caina naie llomeniconona fecatate. Cominí jitailla díerise lílicai daje ísoi fecatate. ¹² Naimaci monillamona, caimo Jesús llote:

—Buena jaca faíñíellena, fiebide guille danomo íraí.

¹³ Ie jira iena íraidícaí. Naie cinco llomenicomona, cominí guigamona fiebidemona, doce círigaíaimo oruitatícaí. ¹⁴ Jesús finoca rafuena naie cominí dí cuanona, llotímaci:

—Jusiñamui facaina llorainí micoriaídí caí Jilloitaraima íco billena jaie llotímaci. Bimiedi naimie.

¹⁵ Naimaci illaímana naimie illena, naimiena gaítaacadímaci. Iena naimie uíñua jira, iena naimie jitaíñena jira, aneduaimo naimie oní jaide.

Capernaumo Jesús abido jailla rafue

(Mt 14.22-27; Mr 6.45-52)

¹⁶ Jitoma ana ítemo, jai navuidemo, ie llofueoicaiganodícaí joraimo jaídícaí. ¹⁷ Caí botemo caí jaillano, ruica Capernaumo jaíacadícaí; iadedi Jesús nía bíñede. Jesúsna sedadícaimo, naimie bíñena jíraí, jai jíitrena facaiseconí jai jaídícaí. ¹⁸ Ríire aífí illa jira, jorai eo bagode. ¹⁹ Níbaí cinco, níbaí seis kílómetros jaídícaimo, damie caí díne jínuí emododo billana cíodícaí. Bote díne naimie billana cíuanona, jacínaitícaí. ²⁰ Jesús caimo llote:

—Jesúdicuesa. Jacínaiñeno.

²¹ Iena cacajanona, botemo naimiena a billana jítaídícaí. Ieconí ruica díne caí jaíacananomo ridícaí.

Cominí Jesúsna jenua rafue

22-24 Cai jailla mei, daje bote nairuido illa jira, jinafomo fiebidino Jesús cai diga jaiñenana uiñotimaci. Cai Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúsna naimaci cioñena jira, cai jiaí iñena jira, naie botiaido Capernaumo Jesúsna jenollena, jaidimaci.

Jesús: “Llomenicodicue” railla rafue

25 Ruica dine Jesúsna comini baillanona, jicanotimaci:

—¿Niruido bene ridio? 26 Jesús uai ote:

—Navui are omoína cue ecajamona, iemona omoi monillamona, cuena jenodomoí. Siño rafuena cue finuana ciodomoi; iadedi cuena nia ñnoñedomoi. 27 Guille raire cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, imana cue jaillena, cuena oretate. Ie uai cuemo illanona, cue uaina omoi ñnuamona, Jusiñamui diga jaca iitomoí.

28 Jicanotimaci:

—Nia Jusiñamui dibeimo iticaina, ¿nie isoidifue finodicaina mare?

29 Jesús uai ote:

—Naimie oretagamie uaina omoi ñnuana jitaide.

30 Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai ñnollesa. 31 Cai jaiagai jofue iñenanomo Jusiñamui mona bite guilla ra guisoidimaci. Moisés micori iena jaie cuela: “Jusiñamui mona bite guiga ra naimacimo nagarui fecauide”. Iemo jiaí birui ocuridicai. Naie isoide siño rafuena o finuana jiaí cioacadicai —lloimaci.

32 Jesús uai ote:

—Uanai lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoi mo jai feacaacade. 33 Jusiñamui feacaacalle llomenico monamona jai bite. Comini iena guillamona, jaca iitimaci.

34 Llotimaci:

—Nagarui caimo bie isoide llomeniconona feca.

35 Jesús uai ote:

—Llomenico guillamona iticai. Omoi llomenico isoidicue. Cuena ñnuamona, monamo jaca iitomoí. Cuena ñnotimie dane aimetañeite. Cuena isiruitimie jaca dane jiroacaiñenite. —Iese llotie; ia naimaci comeciaina ñaite. Naimaci comeciái jitaillacino naimacimo jaca illena ñaite—. 36 Cuena ciodomoi; iadedi cuena ñnoñedomoi. 37 Nana cue dibeimo cue Moo itatallinodi cuena ñnoitimaci. Cuemona naimacina jaca oni dotañeiticue. 38 Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. 39 Cuena oretatimiedi cue dibeimo itatallinomona buna faifillana jitañede. Jusiñamui lluaruimo fiodaillamona nana naimaci abiaína cue jilloitajana jiaí jitaide. 40 Jusiñamui Jitona cue illana bu ñnoia, cuena bu ñnoia, monamo jaca iite. Jusiñamui lolliruimo fiodaillamona naimie abina jillotaiticue. Iese cue Moo jitaide.

41 Jesúsdi: “Monamona bite llomenicodicue” railla jira, judíuai illaicominidi naimie uaina jamaillano ñnosñede. 42 Raitimaci:

—Bimiedi Jesús. José jito. Ie moona uiñoticaí. Ie eina jiaí uiñoticaí. ¿Niese naimiedi: “Monamona biticue” raite?

43 Jesúsdi uai ote:

—Iese omoi naiñeno. ⁴⁴ Naimiena cue Moo ñnotañenia, bu cuena ñnonide. Cuena bu ñnoñenia, Jusiñamui lolliruimo fiodaillamona naimie abina jillotaiticue. ⁴⁵ Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jai ñnoite. ⁴⁶ Buna cue Moona jaca cioñede. Naimiemona cue billamona, dama cue cúa. ⁴⁷ Uanaicinona lloticue. Cue uaina ñnotimie monamo jaca iite.

⁴⁸ Jesús dane llote:

—Llomenico guillamona iticai. Omoi llomenico isoidicue. Cuena ñnuamona, monamo jaca iitomoi. ⁴⁹ Jofue iñenanomo omoi jaiagai Jusiñamuimona bite rana guisoidimaci; iadedi fiodaitimaci. ⁵⁰ Birui jaiie guille ra ite. Monamona ite. Iena bu guia, monamo jaca iite. ⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomenicono guia, jaca iite. Bie llomenicodi cue abi. Comini facaina fiodaiticue.

⁵² Iena cacajano, judíuai illaicomini coniniri naiena siadotimaci. Raitimaci: —¿Niese bimie abina raiticai?

⁵³ Ie jira Jesús dinena raite:

—Uanaí lloticue. Cue abina omoi riñenia, cue diruena omoi riñenia, cue Moo diga jaca iñeitomoi. ⁵⁴ Bu cue abina riia, bu cue diruena riia, cue Moo diga jaca iite. Fiodaillamona naimie abi iirairuimo jillotaiticue. ⁵⁵ Cue abidi ua rille. Cue diruedi ua rille. ⁵⁶ Bu cue abina riia, bu cue diruena riia, cuena nabaide. Naimiena jai nabaidicue. ⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jai iite. ⁵⁸ Bie isoide guille ra monamona jai bite. Omoi jaiagai jaie guiga ra isoñede. Jaie fiodaitimaci; iadedi bie guille ra birui bu guia monamo jaca iite. —Iese llote; iadedi naimie fiodaillamona, naimiena comini ñnuamona, Jusiñamui diga naimaci jaca illena ñaite.

⁵⁹ Capernaumo judíuai ofiracomo Jesús buena llote.

Jesús diga jaisoidino naimie llwana siadua rafue

⁶⁰ Jesús diga jaisoidino naimie llwana cacajano, coniniri siadotimaci:

—Bie llua eo irirede. Bu iena cacañede.

⁶¹ Jesúsdi naimaci iese siaduana uññote. Ie jira llote:

—Cue llwana raise ñnoñedomoi. ⁶² Jusiñamuimona ñmana jaillena jai biticue. Monamo abido ico cue jaillena cioitomoina, iena jai ñibaí raise ñnoñeitomoi. ⁶³ Cai joreño caimo illamona, iticai. Dani cai abi diga iñedicaí. Ie isoide. Cue llogacino Jusiñamuimo duide. Iena omoi ñnuamona, jaca iitomoi; ⁶⁴ ia omoimona nana ñnoñedomoi —llote. Nano dofoconimona Jesúsdi naimiena ñnoñedinona uññote. Naimiena gaitaitimiena jai uññote.

⁶⁵ Jesús dane llote:

—Ie jira omoimo lloticue: Cue Moo jitaiñenia, cuena jaca bu ñnonide.

⁶⁶ Iena cacajano, Jesús diga jaisoidinomona, diga comini naimiena fañonocaidimaci. ⁶⁷ Ie jira ie doce llofueoicaiganodicaímo Jesús jicanote:

—¿Jai cuena fañonocaida, abido jaitomoi?

⁶⁸ Simón Pedro uai ote:

—Nama, o diga cai jañenia, ¿bu diga jaiticai? Jusiñamuimo cai rillena, o isoi jillotaraíma iñede. Jaiñiemmo jaca itatajaracinodi iñede. ⁶⁹ O llwana jai ñnoticai. Jusiñamui mare Jitodio. Iena uññoticaí.

⁷⁰ Jesús dane uai ote:

—Doce digamie fetocaomoi; iadedi omoimona damie Taifemo jainaiade —llote. ⁷¹ Caimona Judas Iscariote micorina ñaite. Judas micori Jesúsna gaitataiacadimie.

7

Jesús amatiaí naimiena ñnoñena rafue

¹ Jaiiruido Galileamo ite nairaiamoi Jesús macarite. Judúuai illaicomini naimiena meineiacana jira, Judeamo jaiñede. ² Jifocotiaiaí railla rafue iaire ite. Judúuai ie rafue. ³ Ie jira Jesús amatiaí naimiemo llote:

—O diga jaicabidino o finua rafuena raise cioillena, beno fañonocaida, Judeamo jai. ⁴ Bu ie mameci are soriacania, bainino maijiraínina. Ie isoide. Siño rafuena o finoia, ailluena comini illa motomo iena fino.

⁵ Jesús amatiaí naimiena ñnoñena jira, iese raite. ⁶ Jesús dinena uai ote: —Jerusalémo nia jaiñeiticue; iadedi nainomo omoi jaiacalliruido omoi jai. ⁷ Comini omoína enoiñedimaci. Naimaci finoca jearede rafuena cue llua jira, cuena jaca enoidimaci. ⁸ Jerusalémo rafuemo jai. Cue jaillirui nia riñena jira, nia jaiñeiticue. ⁹ —Iese lluanu, Galileamo naimie fiebide.

¹⁰ Naimie amatiaí rafuemo jailla mei, Jesúsdi naimaci jinafona dama bainino jaide. ¹¹ Nai rafuemo judúuai illaicomini Jesúsna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

¹² Nainomo ailluena comini itimaci. Comini illa motomo naimiena anado siadoside. Jiaíno dinena: “Naimiedi mare” raitimaci. Jiaíno dinena: “Naimiedi cominina jifue” raitimaci. ¹³ Judúuai illaicomínina iciana comini jaciruillanona, anado siadoside. Jesúsna marefodo buna ñaifede.

Sábadoruimo Jesús maijia raufe

¹⁴ Jifocotiaiaí railla rafue atuedo fuitemo, Jesús Jusiñamui jofomo jaillano, llofuede. ¹⁵ Illaicomini naimie llofuiamona rajicaidimaci:

—¿Niese naimie abi uiñote? Eo rafuena uiñotimiemona jaca fueoñede —raitimaci.

¹⁶ Jesús uai ote:

—Dama cuemona oñega cue llofuiacínodi. Cuen a oretatimie ie. ¹⁷ Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuimona cue uana uiñoite. Dama cue comecimona cue oñenana jiaí uiñoite. ¹⁸ Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanaí llote. Maraiñedicinona finoñede. ¹⁹ Moisés micori Jusiñamui uaina jaie llote; iadedi birui naie llogacinuaina nia raise ñnoñedomoi. Iena raise ñnotomoidena, cuena niade meineiacañedomoi.

²⁰ Comini dinena uai ote:

—Nibaí uairitaidio. ¿Bu ona meineiacade?

²¹ Jesús uai ote:

—Dacañño sábadoruimo damiena jillotaticue. Ie jira cue uaina uaitatomoí. ²² Sábadoruimo jiaí maijicabidomoi. Moisés micori iisaiái abiaí diana omoímo jaie llote; iadedi naimie micori naiena nano lloñede. Naimie micori usumatiaí naiena nano llotimaci. Sábadoruimo iisana abi dellirui ia, detomoi. ²³ Moisés micori llogacinona ñnollena, sábadoruimo iisaiaina detomoi. Sábadoruimo ñmana raise jillotaticuemo, ¿bue ñellena cue diga iciritomoi? ²⁴ Cominimo jamai eruailanona, naimacina jeare ñaíñeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

²⁵ Te jira Jerusalémo itino coniniri siadotimaci:

—Illaicomini bimiena meineiacadimaci; ²⁶ iadedi beno marefodo naimie llofuate. Jaca buena lloñedimaci. Illaicominidi: “Bimiedi cai Jilloitaraima” raillano nibai comeciaina facadimaci. ²⁷ Bimie ie billanona cai uiñua jira, naimiedi cai Jilloitaraimañedimie. Cai Jilloitaraima baireia, jaca budi naimie billanona uiñoñeite —siadotimaci.

²⁸ Te jira Jesús Jusiñamui jofomo naimie llofuiano llote:

—Cuenta uiñotomoi. Ninena cue billana jiai uiñotomoi. Cue jitailla jira biñedicue; iadedi jiaimie cuenta oretate. Naimiedi uanai llote. Naimiena uiñoñedomoi. ²⁹ Naimiemona cue billa jira, naimiena uiñotocue. Cuenta oretate —llote.

³⁰ Te jira illaicomini Jesúna gaitaacadimaci; iadedi naimie fiодaille facaise nia riñena jira, buna naimiena gaitañede. ³¹ Nairui ailluena comini naimie uaina inotimaci. Raitimaci:

—Cai Jilloitaraima bia, ¿niese naimiedi bimie baifemo jiaie rafuena finoite?

Jesúna gaitaiacana rafue

³² Fariseuaidi comini lese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede. ³³ Te jira naimacina Jesús dinena raite:

—Dallu omoi diga nia iiticue. Ie mei cuenta oretatimie dine abido jaiticue.

³⁴ Cuenta jenoitomoi; iadedi cuenta baiñeitomoi. Cue dine binitomoi.

³⁵ Te jira nainomo ite illaicomini dani siadotimaci:

—¿Nine jaite? ¿Niese naimiena baiñeitica? Judíuaiñedinona llofuellena, jiaie eniruemo cai comini dine nibai jaite. ³⁶ ¿Niese naimie raite: “Cuenta jenoitomoi; iadedi cuenta baiñeitomoi”? ¿Niese raite: “Cue dine binitomoi”? —iese siadotimaci.

Jesúdi Jusiñamui Joreñona ñaia rafue

³⁷ Jifocotiaiai railla rafue fuillaruiamo, ua rafue ie nairuimo, Jusiñamui jofomo itinomo Jesús ade llote:

—Bu jiroacania, cue dine bi. ³⁸ Jusiñamui facaina lloraini micoriai jaie cuela: “Naimiena inotimie comecimo jaca itatate jinui isoi iite, torafomona jinui tonooilla isoi”.

³⁹ Jesúsdi iese llote; ia Jusiñamui Joreñona ñaite. Jesúsna inotinomo Jusiñamuidi ie Joreñona ico illena ñaite. Jesús nia fiодaiñena jira, iena nia iñega.

Comini Jesúna dane siadua rafue

⁴⁰ Jesús lluana comini cacajano, raitimaci:

—Jusiñamui facaina lloraini micoriai Jusiñamui facaina lloraima ico billena jaie llotimaci. “Cristo nia baireñenia, naimie biite” llotimaci. Bimiedi naimie.

⁴¹ Jiaino raitimaci:

—Naimiedi cai Jilloitaraima. Naimiedi Cristo.

Jiaino raitimaci:

—Cai Jilloitaraima Galileamona biñeite. ⁴² Jusiñamui facaina lloraima micori cuela: “Cai Jilloitaraimadi David micori jito. Belémo David micori illanomo jecille”.

⁴³ Te jira daje isoi naimiemo comeciaina facañedimaci. ⁴⁴ Jiaino naimiena gaitaacadimaci; iadedi buna naimiena jetañede.

Judíuai illaicomini Jesúna inoñena rafue

⁴⁵ Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúna atiñedomoi?

⁴⁶ Policías dinena uai ote:

—Naimie llofuia isoi jaca buna llofueñede. Iena jacinailanona, naimiena atiñedicai.

⁴⁷ Fariseuai dane llotimaci:

—Cominina jifua isoi, omoína jiai jifuate. ⁴⁸ Cai illaicomini dinena naimiena jaca ñnoñedicai. Moisés micori llogacinodo raise jaidicai; ⁴⁹ ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

⁵⁰ Naie illaicominimona Nicodemo raillamie ite. Naimie naiona Jesús dine navui jaide. Fariseo imie. ⁵¹ Jesúna riiduanona, naimie llote:

—Cai einamaci llocabitimaci: “Bu duere cai finoacania, nano naimie lluomo cacarefiticai. Jearede rafue naimie finuana cacareillano, naimiena duere finoiticai”. Iena cai cacaiñenia, naimiena duere finoñeiticai.

⁵² Nicodemomo llotimaci:

—Galileamona bitino isoi ñaitio. Naimie llofuegamiena nibai jai jaiacadio. Jaie cuezafuaina raise faca. Jusiñamui facaina llorani micoriacidi cai nairaina jilloitaraima Galileamona billena jaie cueñedimaci. Bie Jesús raillamiedi cai nairaina jilloitaraimañedimie.

⁵³ Ie meinoconi damierie imaci jofomo jaidimaci.

8

Ie iniñede iima diga riñodi rafuetaila ie rafue

¹ Naie facaise Jesúdi Olivos railla anedumo jaide. ² Ie areruido jitiramo Jusiñamui jofomo abido dane jaide. Ailluena comini naimie dine billa jira, naimie ana raíta, naimacina llofuate. ³ Naie facaise Moisés micori llogacinona llofueraimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñona jai eidatimaci. Comini illa uicomo atiano, ⁴ Jesúmo llotimaci:

—Llofueraima, biñaiño ie iniñede iima diga eidaticai. ⁵ Moisés micori jaie cuela: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?

⁶ Naimiena facacillena, naimie raise uai oñenia, naimiena llogidollena, iese jicanotimaci. Iena cacajano, Jesús ana jitadacaida, eniruemo ie onocai diga cuete. ⁷ Naimiemo diga icaiño jica-jicanuano, naimie naidacaida, naimacimo llote:

—Omoimona jeacino iñedimie naiñaiñomo nano noficina fairino.

⁸ Dane ana jitadacaida, eniruemo dane cuete. ⁹ Naimie lluna cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena. ¹⁰ Eruaillano naiñaiñomo jicanote:

—¿Ni nai o llogidotino?

¹¹ Naiñaiño uai ote:

—Jaca iñedimaci. Cuena jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoñoeno.

Jesúdi comini comeciai lligaiñua rafue

¹² Jesúdi cominina dane llofuianona, raite:

—Jeaçino oni jaillena, comini comeciaina lligaiñoticue. Cuena ñnotimie jiti redinomo jaca iñeite. Jeaçino anamo jai iñedimie Jusiañamui diga ico jaca iite.

¹³ Fariseuai dinena uai otimaci:

—Dama o abina ñaitio. Ie jirari uanaicinona lloñedio.

¹⁴ Jesús uai ote:

—Dama cue abina lloticue; iadedi uanaicinona lloticue. Ninena cue billanona uñoticue. Níne cue jaillinona jiai uñoticue. Ninena cue billanona uññoñedomoi. Níne cue jaillinona jiai uññoñedomoi. ¹⁵ Abi raise uññoñeno cuena jeare ñaitomoi. Iese omoína ñaiñedicue; ¹⁶ iadedi omoína cue ñaia, uanaicinona lloticue. Dama cue uaina omoína lloñedicue. Cuena oretatimie omoína jiai llote. ¹⁷ Moisés micori iena jiai jaie cuela: “Menamie daje isoi lloia, naie iaimaia; llucacnodi omoi ñnuu” cuela. ¹⁸ Cue facaina llollena, menamie jai ite. Cue facaina lloticue. Cue Moo cue facaina jiai llote.

¹⁹ Fariseuai dinena jicanote:

—¿Ni o moo?

Jesúdi uai ote:

—Cuena uññoñedomoi. Cue Moona jiai uññoñedomoi. Cuena uñnotomoi, cue Moona jiai uñnotomoi.

²⁰ Jusiañamui jofomo ucube eenoracomo bicinona siadotimaci. Jesús fiadille facaine nia riñena jira, jaca buna naimiema gaitañede.

Jesúna comini ñnoñena, naie jeaçino diga fiadailla rafue

²¹ Naimacimo Jesús dane llote:

—Ico oni jaiticue. Cuena jenoitomoi; iadedi cuena baiñeitomoi. Na omoimo jeaçino nia itemo, fiadaitomoi. Cue jaillinomo jainitomoi.

²² Ie jira judíuai illaicomini dinena iena siadotimaci:

—Dama ie abina meineite.

“Cue jaillinomo jainitomoi?” Jesús railla jira, iese siadotimaci.

²³ Jesúdi uai ote:

—Jusiañamuimo ite rafuemo duiñedomoi. Naimiemo ite rafuemo duidicue. Naimie dibeimo iñedomoi; ia naimie dibeimo iticue. ²⁴ Cue Jusiañamui Jitonana omoi ñnoñena jira, na omoi jeaçino diga fiadaitomoi.

²⁵ Jicanoside:

—¿Budío?

Jesús uai ote:

—Nano omoi motomo cue illamona bumiedicuena omoína raicabiticue. ²⁶ Diga rafue omoimo lloiacadicue. Marañede rafuena omoi finuana omoimo nia lloiacadicue; iadedi omoimo cuena oretatimie uaina dama lloticue. Nai uaidi uanaicino —llote.

²⁷ Naimiedi ie Moo Jusiañamuina llote; iadedi cacañedimaci. ²⁸ Ie jira Jesús llote:

—Cuena omoi meinia mei, bumiedicuena uñnoitomoi. Cue uaido dama lloñedicue; iadedi cue Moo cue llofuia uaido llocabiticue. ²⁹ Cuena oretatimie cue diga ite. Naimie jitailla rafuena cue finua jira, cuena faionocañede.

³⁰ Iese Jesús llotemo, diga illaicomini naimie uaina como ñnoiacadimaci.

Comini Taife anamo illa rafue

³¹ Jesúdi naimie uaina como ñnoiacadinomo llote:

—Cue lluaña ñnocana omoi jaia, cue ua cominidomoi. ³² Uanaicinona uñnoitomoi. Ie mei jaimie anamo dane iñeitomoi.

³³ Uai otimaci:

—Abraham micorì ie uruiaidicai. Jiaimie anamo jaca iñedicai. ¿Bue ñellena llotio: “Jiaimie anamo iñeitomoi”?

³⁴ Jesúdi uai ote:

—Uanai lloticue. Jeacino finocabidomoi. Naga jeacino finoraima ie jeacino anamo jai ite. Omoi jeacino anamo omoi illana ñaiticue. ³⁵ Jiaie rafuedo iena lloiticue. Ie patrón anamo itimiemo ie patrón rafuedi duiñede; iadedi naie patrón jitome ie rafuedi duide. ³⁶ Ie isoide. Jusiñamui Jitona cue illamona, naimie rafuemo duidicue. Ie jira omoi mo cue lloia, omoi jeacino anamo ua iñeitomoi. ³⁷ Abraham micorì ie uruiaidomoi. Iena uiñoticue; iadedi cue llwana omoi raise iñoñena jira, cuena meineiacadomoi. ³⁸ Cue Moo diga jaiie cue illamona, cue cúa rafuena llocabiticue. Omoi moomona cacaja rafuena finocabidomoi.

³⁹ Uai otimaci:

—Cai moodi Abraham micorì.

Jesús dane uai ote:

—Abraham micorì uruiaidomoidena, Abraham micorì finoca rafue isoi finodomoi. Abraham micorì uruiaifnedomoi. Ie jira Abraham micorì finoca rafue isoi finoñedomoi. ⁴⁰ Uanai cue llua jira, cuena meineiacadomoi; iadedi Abraham micorì iese finoacaiñede. Cue llucino Jusiñamuimona oticue. ⁴¹ Jusiñamui uruiaí finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiaifñedicai. Cai Moodi Jusiñamui.

⁴² Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biñedicue; iadedi cuena oretate. ⁴³ ¿Bue ñellena cue llwana cacaiñedomoi? Cacareirainidomoi. ⁴⁴ Omoi moodi Taifena jira, cue llwana iñoñedomoi. Naimie jitailla rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucinodi comucabide. Naimie isoidomoi. ⁴⁵ Uanai cue llua jira, cuena iñoñedomoi. ⁴⁶ ¿Nie isoide jeacino finodicue? Cuemo llono. Uanai cue llia, ¿bue ñellena cuena iñoñedomoi? ⁴⁷ Jusiñamuina mooredimiedi Jusiñamui uaina cacade. Jusiñamui uruiaifñedomoi. Ie jira cue llwana cacaiñedomoi.

⁴⁸ Naimiëna jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

⁴⁹ Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ñaiamona cuena iobitañedomoi. ⁵⁰ Omoi mona iobilacinona feiñollena, cue rafuena finoñedicue; ia cue Moo iena oiacade. Cuena omoi iñoñenia, cuemo iobillacinona omoi fecañenia, cue Moo omoi na duere foinoite; ⁵¹ ia bu cue llwana ua iñoia, jaca ua fodiaiñeite.

⁵² Naie illaicomini dinena uai otimaci:

—Janaba illamiediona jai uiñoticai. Abraham micorì jaiie fiodaite. Jusiñamuina lloraini micorìai jiaí jaiie fiodaitimaci; iadedi: “Bu cue llwana iñoiadedi, fodiaiñeite” raitio. ⁵³ Cai usuma Abraham micorì baifemo faiñedio. Jusiñamuina lloraini micorìai baifemo faiñedio. ¿Bumiediota?

⁵⁴ Jesúdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi; ⁵⁵ iadedi naimiëna

uiñoñedomoi. Naimiēna uiñoñoticue. “Naimiēna uiñoñedicue” cue raia, omoi isoi taino lloticue. Naimiēna uiñoñoticue. Naimiēna jiai iñoticue. ⁵⁶ Omoi usuma Abraham micorī eniruemō cue ico billena jaiē uiñoñote. Iena uiñoñamona, naimiē iobide.

⁵⁷ Illaicomīni dinēna uai otimaci:

—Odi cincuenta años nia iñedio. ¿Niese Abraham micorīna ciodio?

⁵⁸ Jesús uai ote:

—Abraham micorī nia iñēna facaiseconi jaca iticue.

⁵⁹ Iena cacajanona, naimiē fairinollēna, naie illaicomīni noficīna llinotimaci; iadedi Jesús reirillanona, Jusiñamui jofomona oni jaiē.

9

Jesús uisīnidimīēna jillotaja rafue

¹ Jiairuido iē llofueoicaiganodicai diga Jesús macaria, uisīnidimīēna ciodē. Iesē nanomona jaca naimiēdi jeicīga. ² Jesúmo jicanotīcai:

—Llofueraīma, ¿bue ñellēna naimiēdi iesē jeicīga? ¿Nīē isoide ra iē mōo jetajamona, naimiē iesē jeicīga? ¿Nīē isoide ra iē ei jetajamona, naimiē iesē jeicīga? Caimo llono.

³ Jesús uai ote:

—Naimiē jeacīno finua muidonañēde. Iē mōo muidonañēde. Iē ei muidonañēde. Jaca bue jetajamona, iesē comuiñēde. Jusiñamui uai siñonana comīni uiñoñellēna, iesē jeicīga. ⁴ Nia userēna jira, cuēna orētatimīē iē jitailla rafuēna finoacadīcai. Raire jītīrenite. Iē mei bu jaca maījīnite. ⁵ Eniruemō cue nia ia, comīni comēciaina lligaiñoticue. —Iesē Jesús llote; iadedi jiaīē rafuēna ñaīte. Naimiē nia fiōdaiñēna, Jusiñamui rafuēna llocana naimiē jaillana ñaīte. Iē fiōdaillirui jai iaīre iacanana ñaīte. Comēciaina lligaiñuana llote, jeacīno oni jaillēna.

⁶ Iena lluanona enirueña tuajano, enirue idīai finuanona, uisīnidimīē uisīna naie enirue diga rīginote. ⁷ Raite:

—Siloé railla joraibīmo mai noisai —raite. Siloé oni dobaiñuamona: “Oretarabī”.

Iē jira naimiē noisaide. Uisī jai ciodēmō, abīdo bite. ⁸ Billa mei, naimiē ecīmō itino, jiai naimiēna ciocabidīno diga, naimiē jilluana conīnīri siadotīmaci:

—¿Buuta naimiēdi? Bene ucube jīcallēna raīcabidimīē isoide.

⁹ Jiaīno raitīmaci:

—Jīi, naimiē.

Jiaīno raitīmaci:

—Iēñēde. Naimiēna eruaīde isoide.

Naimiē dinēna raite:

—Uisīnidimīēdicue; iadedi jai ciodicue.

¹⁰ Naimiēmō jicanotīmaci:

—¿Nīesē jai bīrui ciodio?

¹¹ Uai ote:

—Jesús raillamīē enirue idīai finuano, cue uisīna rīginote. Cuemo llote: “Siloé railla joraibīmo noisai”. Iē jira noisaidicue. Jai ciodicue.

¹² Jicanotīmaci:

—¿Nīnomo itē nai Jesús?

Naimiē uai ote:

—Uiñoñedicue.

Comīni uisīnidimīē jai jilluana siadua rafue

13 Navui uisínidimie jai jillua mei, fariseuai dine comini naimiena uitimaci. 14 Sábadoruimo Jesúdi naimiena jillotaja jira, 15 fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

16 Fariseuaimona jaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jaino raitimaci:

—¿Niese jearede ra finouidimiedi uisínidimiena jillotate? —Ie jira daje isoi comeciaina facañedimaci.

17 Ie jira navui uisínidimiemo dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloaíma.

18 Naimie moo, naimie ei iaimaímo nia jicanoñenia, judúuai illaicomini nai iima jaca cioñenano inosiñede. Ie jira iaimaíana uaiduanona,

19 jicanotimaci:

—¿Bimiedi omico jito? ¿Naimie jaca uisínino jeiciga?

20 Uai otiaímaíai:

—Jii, bimie coco jito. Jaca uisínino jeiciga. Iena uiñoticoco. 21 Niese jai naimie uisina ciuana uiñoñedicoco. Bu naimiena jilloitajana jai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaímaíai.

22 Bie rafue nia suñenia, judúuai illaicomini navui llotimaci: “Jesúdi cai Jilloitaraíma bu lloia, cai ofiracomo naimiena fo billana rairuiticai”. Iena jaciruillanona, 23 llotiaímaíai: “Naimie jai eimiesa. Naimiemo jicano”. 24 Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecañeno. Naimie jearede rafuena finouidimiena uiñoticai.

25 Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

26 Jicanotimaci:

—¿Niesede ra diga finuamona odi uisina ciodio? ¿Niese ona jillotate?

27 Uai ote:

—Omoímo jai lloticue; iadedi cacaiacañedomoi. ¿Bue ñellena omoímo dane lloticue? ¿Ie llofueganona jaiacadomoi?

28 Riire uai otimaci:

—Naimie ie llofuegamiedio. Caídi Moisés micorí ie llofueganodicai.

29 Jusiñamui Moisés micorímo jaie lluaana uiñoticai; iadedi bimiena uiñoñedicai. Naimie ninena billana jai uiñoñedicai.

30 Nai iima uai ote:

—Jadi, naimie ninena billana uiñoñedomoi; iadedi cuena jillotate.

31 Jusiñamuidi jearede rafuena finodino ñaia uaina cacareñede. Naie isoidino siño rafuena finoñenana uiñoticai; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñoticai. 32 Enirue finua facaisemona

jaca buna uisínino jeicigamiéna jilloitañede. ³³ Jesúsdi Jusiñamuimona biñedimiedena, jaca buena finonide.

³⁴ Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiéna jino dotadimaci.

Jesús uisínidimie diga ñaia rafue

³⁵ Uisínidiména jino dotajana fidianona, Jesús naimiéna jenode. Baillano, jicanote:

—¿Omoi cominina Jilloitaramana innotio?

³⁶ Uai ote:

—¿Bumai naimie? Cuemo llono, naimiéna cue inollasa.

³⁷ Jesús uai ote:

—Naimiéna ciodio. O diga ñaite. Cue.

³⁸ Caiñici ifodo rainadajanona, iobillacinona fecallena, uai ote:

—Nama, jai o uaina inoticie.

³⁹ Jesús uai ote:

—Uisínidino ciotallena, eniruemo biticue. Jai uisina ciodio uisina ciotañellena biticue. —Iese Jesús raite; ia naimaci comeciaina ñaite. Jesús “Jai marañedicaí” raitinona jillotajabite. Jesús “Jai maredicaí” raitinomo ite jeacino naimaci uiñollena bite.

⁴⁰ Naimie ecimo ite fariseuai iéna cacajano, jicanotimaci:

—¿Uisínidomoi caina raitio?

⁴¹ Jesús uai ote:

—Uisínidino isoi itomoina, omoimo ite jeacino omoi muidonañede; ia “Jai ciodicai” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiacaiñena jira, iese ñaite. Naimaci jeacino oni dotajana jitaiñedimaci.

10

Toica llaudaiaí sedaraima rafue

¹⁻² Jesús dane llofuate:

—Cue rafuena omoi raise uiñollena, toica llaudaiaína ñaiticue. Llaudaiaí jino uicabilla isoi, llaigafomo nasedo fo jaidimiedi naie llaudaiaí sedaraima; ia jinofebeí dinena bitimiedi firiraima. ³ Llaigafu llaudaiaí sedaraima fo jaillena, nase sedaraimadi nase econote. Llaudaiaí naimie uaina uiñotimaci. Imaci mameciaido uaiduamona, llaigafomona jino bitimaci. ⁴ Nana ie llaudaiaí jino bia, naimacina ifode. Naimie uaina uiñuanona, naimiéna racadimaci. ⁵ Naimaci uiñoñegamiéna racañedimaci; iadedi naimie uaina naimaci uiñoñena jira, naimiemona oni aisidimaci.

⁶ Bie isoidicinona Jesús llofuate; iadedi naie comini iéna cacaiñedimaci. ⁷ Ie jira Jesús dane llofuate:

—Llaigafu ie nase isoidicue. ⁸ Damierie firirainina bitimaci. Ie jira llaudaiaí naimaci uaina cacaiñedimaci. —Iese Jesús llofuate; ia naimiéna inotinona ñaite. Naimiéna abi caitadinona ñaite. Naimie inotino naimiéna abi caitadino llogacinomo cacarefiñena ñaite. ⁹ Nia llofuate:

—Llaigafu isoidicue. Bu cue nasedo fo bia, jilloite. Llaudaiaí isoi fo biite. Jino jaite. Mare guille baite isoite. —Iese llofuate; ia naimiéna inotino marena illana ñaite. Naimiemona naimaci jitaila rafuena uana ñaite. ¹⁰ Nia llofuate:

—Llaudaiaina fillena, meinellena, faifillena, firiraima bite; iadedi cominina jaca raise itatallena, biticue. ¹¹ Llaudaiai marena sedaraimadicue. Mare sedaraimadi ie toiniaí facaina riiduanona ie abina faifite. ¹² Janallari bia, laudaiai naimie ieñena jira, jamai maijidimiedi, laudaiaina faionocaillano, ecimona aiside. Llaudaiaina janallari gaitaacanamona, laudaiai tuudimaci. ¹³ Jamai ucube oiacanano, isiruiñenano, jamai maijidimie aiside. ¹⁴ Iese iñedicue. Mare sedaraimadicue. Cue llaudaiaina uiñoticue. ¹⁵ Cue Moo diga conimana coco uiñua isoi, naimaci cuena jiai uiñotimaci. Cue llaudaiai facaina fiodaiticue. —Iese Jesús llofue; ia naimiena ñnotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiai fiodaiacade. ¹⁶ Nia llofue; —

Jiaie llaigafomo jiaie llaudaiai cuemo ite. Naimacina jiai atiacadicue. Cue uaina cacaitimaci. Ie mei danomo nana cue llaudaiai iitimaci. Naimacina dama sedaiticue. —Iese Jesús llofue; ia jiaie nairaiaimo naimiena ñnotinona ñaite. Dajena naimacina sedajana ñaite.

Jesús fiodaille rafue

¹⁷ Jesús nia llofue; —

—Cue jai fiodaiacanamona, cue Moo cuena isiruite. Fiodaillamona dane jilloiticue. ¹⁸ Cue jitañenia, jaca buna cuena meineñeite. Cue jitailla jira, fiodaiticue. Siño uai cuemo illa jira, cue jitailliruimo fiodaiticue. Cuemo cue Moo siño uaidi jai illa jira, dane jilloiticue.

¹⁹ Jesús iese llofuia jira, judíuai illaicominidi daje isoi comeciaina facañedimaci. ²⁰ Jiaínodi: —

Naimiemo Janaba illamie —raitimaci—. Uairico. Naimiena cacareia-cañedicai —raitimaci.

²¹ Jiaíno raitimaci: —

Bie isoidicinona Janaba illamie llofueñede. Janaba illamie uisindimiena jillotanide.

Jesús ie Moo diga daje isoi comeci lloilla rafue

²² Rollime facaise Jerusalémo Jesús ite. Naie facaiseconi Jusiñamui jofe ie finua comecia rafue ite. ²³ Salomón micori finotaga jofe abi ibirimo Jesús macarite. ²⁴ Naie facaise judíuai illaicomini naimie dine bitimaci. Jicanotimaci: —

¿Niruido caímo ona lloitio? Odi caí Jilloitaraimania, caímo marefodo llono.

²⁵ Jesús uai ote: —

Omoimo jai lloticue; iadedi ñnoñedomoi. Cue Moo mamecido cue finoca rafuemona cuena uiñotomoi. ²⁶ Cue toica llaudaiaimo omoi jainaiñena jira, cuena ñnoñedomoi. ²⁷ Cue toica llaudaiai cue uaina cacadimaci. Naimacina uiñoticue. Cuena racadimaci. ²⁸ Naimaci jaca itataticue. Jaca abina faifñeitimaci. Cue anamona jaca budi naimacina bairoñeite. ²⁹ Cue Moo naimacina cuemo fecade. Naimacidi jiaíno baifemo faitimaci. Naimiemo jaca budi naimacina baiронide. ³⁰ Cue Moo diga daje isoi comecina lloidicoco. —Iese llo; ia naimiena ñnotinona ñaite. Naie illaicomini naimiemo jainaiñena jira, naimiena ñnoñedimaci. Iena Jesús ñaite.

³¹ Jesús llofuiana cacajano, naie illaicomini nificina llinotimaci, naimiena meinellena. ³² Iena ciuanona, Jesús llo; —

Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi? —

³³ Uai otimaci: —

—Mare rafuena o finua muidona, ona meineñeiticai. Jamai imadio. “Jusiñamuidicue” o railla jira, ona meineiticai. Jusiñamui Joreñona jiai jeare ñaitio.

³⁴⁻³⁶ Jesús dinena uai ote:

—Jaie ciegafuiaina jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamuillaidomoi”. Jusiñamui ie uaina cacadinomo jaie iese lloide, ¿ñiese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ñaitio” raitomoi. ³⁷ Cue Moo isoi cue finoñenia, cuena ñinoño; ³⁸ iadedi cuena omoi ñinoiacañenia, cue Moo isoi cue finoia, naie rafuena ñno. Iemei cue Moomo cue jainaiailana uiñoitomoi. Cuemo cue Moo jainaiailana jiai uiñoitomoi.

³⁹ Tena cacajano, naimiena dane gaitaacadimaci; iadedi naimacimona jillode.

⁴⁰ Ie mei Jesús Jordán railla ille ruica dibeimo jaide. Nainomo Juan micori cominina nano bautizade. Nainomo rillanona, nainomo Jesús fiebide.

⁴¹ Ailluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúsna llucacimodi uanaicino.

⁴² Nainomo ailluena cominidi Jesús naimaci Jilloitaraimana ñnotimaci.

11

Betaniamo Jesús abido jailla rafue

¹ Naie facaise Betaniamo Lázaro raillamiedi duide. Naimie miriñodi Marta, María iaiñuai. ² Naie Mariadi jiairuido Jesús eillimo caimare soride rana totade. Ie mei naiñaiño ie ifotie diga naimie eillina safenaillena dote. ³ Naie iaiñuai Jesús dine uaina orediañuai, naimie billena. Naimie jibuisaibillena llotatatañuai:

—Nama, o isiruiamie duide —lлотatatañuai.

⁴ Jesús naie rafuena fidiano, llote:

—Jamai fiodaillena naimie duiñede. Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodio” cuena raitimaci.

⁵ Jesúsdi Lázaron isiruite. Ie miriño iaiñuaina jiai isiruite; ⁶ iadedi Lázaro duillana Jesús fidiano, naimie dine jaiñede. Naimie illanomo menarui nia fiebide. ⁷ Ie mei ie llofueoicaiganodicaimo llote:

—Judeamo abido dane mai cai jailli.

⁸ Uai oticai:

—Llofueraima, judíuai illaicomini birui noficina ona fairinoiacadimaci. ¿Ñiese naimaci dine dane jaitio?

⁹ Uai ote:

—Nagarui userede. Userenia bu macaria, raise ciua jira, eicaitañede; ¹⁰ iadedi bu naiona macaria, raise cioiñena jira, eicaitaide. —Iese llofujete; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

¹¹ Dane llote:

—Lázaro jai inide; iadedi naimiena casitallena, jaiticue.

¹² Uai oticai:

—Nama, naimie jamai inia, nia dama casite.

¹³ Naimie jafaici uanona iniamo comeciaina facadica; iadedi Jesús naiena lloñede. Lázaro fiodaillana ñaite. ¹⁴ Ie jira Jesús caimo marefodo llote:

—Naimie jai fiodaite. ¹⁵ Nainomo cue iñena jira, cue siño uai omoi ñnollena, omoi facaina iobidicue. Naimie dine mai cai jailli.

¹⁶ Caimona Tomás caimo llote:

—Maiña. Naimie diga fiodaisaitica; —llote. Tomás mameci jiaicidi Dídimó. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raiafomo jai nagaamagarui illana fididica; ¹⁸ Jerusalémona Betaniamo tres kilómetros dinori illa jira, ¹⁹ diga judíuai illaicomini eedollena, Marta iaíñuai María dine bitimaci. ²⁰ Jesús billana Marta fidiano, cai dine naisomo bite; iadedi jofomo María fiebide. ²¹ Jesúsno Marta llote:

—Nama, o bene itiona, cue iio fiodañede; ²² iadedi Jusiñamuimo buena o jicaia, naimie iena finoite. Iena uiñoticue.

²³ Jesús dinena uai ote:

—O iio abido jilloite.

²⁴ Naiñaiño uai ote:

—Nana comini jilloillirruimo naimie jiai jilloite. Iena uiñoticue.

²⁵ Jesús uai ote:

—Fiodaillamona comini abiaina Jilloitaraímadicue. Jusiñamui diga jaca illena, cominina itataraimadicue. Bu cuena ñnuanona, fiodaiadedi, iemona ico jilloite. ²⁶ Cuena ñnotimiena Jusiñamui illanono jaca illena itataticue. ¿Iena ñnotio?

²⁷ Naiñaiño uai ote:

—Jii, Nama; odi cai Jilloitaraímadio. Odi Jusiñamui Jitodio. Jusiñamui dinena o billamo jaie ocuridica;.

²⁸ Iese raillanona, jofomo Marta abido jaide. Ie euiñona uaiduano, anado llote:

—Llofueraíma jai ride. Ona uaidote.

²⁹ Iena cacajano, raire cai dine María bite. ³⁰ Marta diga ie ñaianomo Betania ecimo Jesús nia ite. ³¹ Jesús dine María nia jaiñenia, judíuai illaicominidi Maríana nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci. ³² María Jesús dine rillano, naimiena duenaillano, cañici ifodo rainadacaida, llote:

—Nama, bene itiona, niadedi cue iiodi fiodañede.

Jesús Lázaronajillotaja rafue

³³ María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite. ³⁴ Jicanote:

—¿Ninomo Lázaronaraitomoi?

Uai otimaci:

—Nama, mai jibuisaibi.

³⁵ Lázaronaduenailanona, Jesús eede. ³⁶ Iena ciuanona, judíuai illaicomini dinena llotimaci:

—Ero. Naimiena eo isiruite.

³⁷ Jiaíno raitimaci:

—Navui uisinidimiena jillotate. ¿Bue ñellena bimiena jilloitañede, naimie nia fiodañenia?

³⁸ Iena cacajanona, ie siño uai finuana naimaci nia raise inosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica. ³⁹ Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

⁴⁰ Jesús uai ote:

—Cuenta o inoia, Jusiñamui uai siñonana uiñoitio.

⁴¹ Temona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue. ⁴² Jaca cuenta cacadio. Iena uiñotiecue; iadedi cue diga bene itino illa muidona, iese ado llotiecue. Cuenta o oretajana naimaci inollena, o diga ado ñaitiecue.

⁴³ Ie mei eo ado llote:

—Lázaro, jino bi.

⁴⁴ Nai fiodaitimie nia naimie abi nana ferinua ra diga jino bite. Jesúsdi cominimo llote:

—Naimie abi ferinua oni suiño. —Ie jira suiñodimaci.

⁴⁵ Ie muidona María diga bitinomona ailluena comini Jesúsna inotimaci. Naimie finoca rafuena ciuanona, inotimaci.

Jesúna meinellena, illaicomini comeciaina facaja rafue

(Mt 26.1-5; Mr 14.1-2; Lc 22.1-2)

⁴⁶ Jesúsna inoñedinomona damierie Jesús finoca rafuena fariseuai dine lluidimaci. ⁴⁷ Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiticai? Diga siño rafuena ua finocabide.

⁴⁸ Naimiena niese cai nibaiñenia, nana comini naimiena inoitimaci. Nana comini naimie dibeimo jai, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaiñedicaí.

⁴⁹ Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi. ⁵⁰ Iese cai nairaimo suiñellena, damie cai nairai facaina fiodaitena, mare. Iena nibai nia raise uiñoñedomoi.

⁵¹ Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

⁵² Cai comini facaina dama fiodañede; iadedi nana Jusiñamuina inoitinona facaina fiodaite. Diga nairaiaimo itimaci; iadedi naimiemo dajena nana naimaci duillena, naimie fiodaite. ⁵³ Caifás lluaana naimaci cacajamona, judiaui illaicomini comeciaina nia facadimaci, naimiena meinellena.

⁵⁴ Ie jira Jesús judiaui illaicomini illa motodo marefodo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai. ⁵⁵ Pascua railla rafue aire iacana jira, ailluena comini Jerusalémo naimaci nairaiaimona jaidimaci. Rafue nia taineñenia, naimacimo ite rafue oni jaillena, cai einamací llua isoi finodimaci. ⁵⁶⁻⁵⁷ Jusiñamui diga nanoca ñairainidi fariseuai diga navui ñaitimaci:

—Bu Jesúsna cioia, naimiena cai gaitallena, caimo llono.

Rafuemo bitino illamona, Jesúsna jenodimaci. Jusiñamui jofomo naimaci ia, coninimo jicanododimaci:

—¿Niese comeciaina facadomoi? ¿Jesús bene biite? Cai illaicomini llua jira, nĩbai jai biñeite. Illaicomini lluana fidiano, naimie biñeite.

12

Betaniamo Lázaro jofomo Jesús guilla rafue

(Mt 26.6-13; Mr 14.3-9)

¹ Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaron fiodaillamona navui jillotate. ² Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticai. ³ Iemei Mariadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride. ⁴ Caimona Judas Iscariote micorina mameciredimie ite. Jesúna gaitataitimie. Llote:

⁵ —¿Bue ñellena bie soride radi fecañede, ucubena ollena? Fecacadena, trescintos digarui maijia ucube diese raifide. Ie mei nai ucube dueredinomo fecadena, mare —llote. ⁶ Dueredinona naimie duenaiñede; iadedi naimie cai ucubena sedade. Naimiedi fiiriraima. Naie ucubemona fiuilla jira, iese naimie llote.

⁷ Jesús uai ote:

—Dama ite. Bie soride ra naiñaiño jai eenoga cue fodaillirui iena.

⁸ Dueredino omoi diga jaca iitimaci; iadedi omoi diga jaca iñeiticue.

Ailluena comini Lázaron ciua rafue

⁹ Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázaron Jesús jillotaja jira, Jesúna dama cioiacañedimaci; iadedi Lázaron jiai cioiacadimaci. ¹⁰ Ie jira Jusiñamui diga nanoca ñairainidi Lázaron jiai meinellemo comeciaina facadimaci. ¹¹ Lázaro muidona ailluena judíuai illaicomini naimaci illa dibeí fainonocaida, Jesúna ñnotimaci.

Jerusalémo illaima isoi, Jesús marena jailla rafue

(Mt 21.1-11; Mr 11.1-11; Lc 19.28-40)

¹² Pascua railla rafue illa jira, ailluena comini Jerusalémo itimaci. Egip-tomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaron Jesús navui jilloitajana diga comini ciodimaci. Iena llocana uitimaci. Ie jira ailluena comini Jesús dine jaidimaci. ¹³ Raforona uanona, naimiena feiñollena, naimie uicomio jaidimaci. Ado cuiriisite:

—¡Cai Jilloitaraima billa! ¡Jusiñamui mamecido bitimie eo mare! ¡Cai Illaima eo mare! —cuiiriisite.

¹⁴ Jesúdi ailli baiga burrito emododo jaide. Jusiñamui facaina lloraima micori jaie llua isoi jaide. Jaie llote: ¹⁵ “Jerusalén imaci, jacinañeno. O Illaima burrito emododo biite”. ¹⁶ Naie facaise bie rafuemo comeciaina facañedicai; iadedi Jesús jillua mei, bie rafuena comeciticai. ¹⁷⁻¹⁸ Lázaron Jesús jillotaja jira, ailluena comini Jesús dine jaidimaci. ¹⁹ Tena ciuano, fariseuai coniniri ñaitimaci:

—Jaca buena birui finoñedicai. Ailluena comini Jesús dibeimo jai jaidimaci.

Judíuaiñedino Jesúna cioiacana rafue

²⁰ Judíu aiñedino Jusiñamuina sedallena, pascua railla rafuemo jiai bitimaci.

²¹ Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadicai.

²² Felipe iena Andrémo lloste. Ie mei Jesúmo lluidiaimaia. ²³ Jesús uai ote:

—Monamona biticue; ia jai cue fiodaille facaise ride. Comini cue uaidi siñonana uifua facaise jai ride. ²⁴ Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodaiñenia, jaca bu jillobiñeite. Cue fiodaillemona ailluena comini jillobitimaci. ²⁵ Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite. ²⁶ Cuen bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena camare itataite. ²⁷ Cue comeci jai rucaicuerite; iadedi, ¿niese raiticue? Raiñeiticue: “Moo, cue fiodaillemona cuena jillote”. Fiodaillena biticue. Ie jira raiticue: ²⁸ “Moo, cominina o uai siñonana uifota”.

Ieconí monamona Jusiñamui lloste:

—Jai iena finodicue. Dane iena finoiticue.

²⁹ Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaienici lloste.

³⁰ Jesús uai ote:

—Cue facaina naie lluana cacaiñedomoi; iadedi omoi facaina iena cadomoi. ³¹ Cuena uifoañedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafefitaite. ³² Cruzmo cue fiodaia, naimacina jilloitallena, ailluena cominina cue díbeimo itataiticue. ³³ — Naimie fiodaillana naimaci uifollena, iese lloste.

³⁴ Naie comini uai otimaci:

—Jusiñamui facaina lloraini micoriai jaie cuela: “Cai Jilloitaraíma jaca fiodaiñeite”. ¿Niese raitio: “Jusiñamuimona biticue; ia fiodaiticue”?

³⁵ Jesús dane uai ote:

—Cue llofuia dinori omoi comeciaina nia lligaiñoticue. Cue lluomo cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uifoañede. Ie isoide. Jeacino anamo itinodi jitiredinomo itimaci isoidimaci. Uanaicnona uifoañedimaci. ³⁶ Jeacino anamona omoi jilloillena, cue llofuia uaido omoi comeciaina birui lligaiñoticue. Cue uaina ñno, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina ñnoñena rafue

³⁷ Jesús diga siño rafuena finode; iadedi ailluena comini: “Naimiedi cai Jilloitaraíma” raillana nia ñnosíñede. ³⁸ Iemona Isaías micori jaie cuela: Naimie jaie cuela:

Jusiñamui, cai llucacimona cacadimaci.

O siño uaido o finoca rafuena jiai ciodimaci; iadedi ñnoñedimaci.

³⁹⁻⁴⁰ Isaías micori dane cuela:

Naimaci cioi raillano, Jusiñamui naimacina uisindino isoi itatate.

Naimaci comeciimona abina uifoi raillano, naimaci comeciaina feitate.

Naimiena ñnoi raillano, iese naimacina jai itatate.

Je jira jai ñnonidimaci. ⁴¹ Jusifñamui ie ebirede rafuena naimie ciuamona, Isaías micori iena llotte. Isaías micori Jesús uaina ñnotimaci. Fariseuaina jaciruillanona, iena janotimaci. Naimaci ofiracomona naimacina jino dotajana jaciruitimaci. ⁴³ Comini naimacina iobitajana naimaci eo jitaila jira, dotajana jitaiñedimaci. Jusifñamuimo ite iobillacinona raise oiacañedimaci.

Jesús ie Moona ñaia rafue

⁴⁴ Naie facaise Jesús eo ado llotte:

—Cuenta ñnotimie cuenta oretatimiena jiai jai ñnote. ⁴⁵ Cuenta cioidimie cuenta oretatimiena jiai ciede isoide. ⁴⁶ Comini comeciaina lligaiñollena biticue. Ie muidona naga cuenta ñnotimie jitiñedinomo jai iñede. Jeacino anamo jai iñede. ⁴⁷ Cue uaina cacajano ñnoñedimie mo juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; ⁴⁸ ia cuenta bu ñnoñenia, cue uaina naimie ñnoñenia, ja muidona faifite. Cue uaina naimie ñnoñellemona, nana naimiena ñnoñedino janafefilliruimo Jusifñamui naimiena ño duere finoite. Cuenta jitaiñedimie, cue uaina jitaiñedimie comini janafefilliruimo janafefite. ⁴⁹ Dama cue comeci facaja uaido lloñedicue. Cue Moo cuenta oretaja muidona, cue Moo cuemo lloga uaido lloticue. ⁵⁰ Cue Moo lloga uaidi naimie ñibeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

13

Jesúdi ie llofueoicaigano eilliaina jocua rafue

¹ Pascua railla rafue riacana areruido ia, Jesús ie Moo ñine abido jaiacanana uiñote. Naimaci diga naimie ñia ia, ie cominina jaca eo isiruite. ² Jesús gaitatallena, naie facaise Taifedi Judas Iscariote micori comeciña feidote. Judas micori Simón jito. ³ Jesús ie uai ie Moomona feiñuana uiñote. Ie Moo ñinena billana uiñote. Ie Moo ñine abido jaillena jiai uiñote. ⁴ Nairuido Jesús cai diga guite. Guilla meinocni, Jesús a ñaidacaida ie abimo ite ñiroina ñiñote. Abi dora diga ie moillina ferinote. ⁵ Janorede nogomo jinuina totaja mei, cai eilliaina jocode. Safenaillena, ie dora diga dote. ⁶ Simón Pedro ñine naimie ñia, Pedro jicanote:

—Nama, ¿cuenta eillina jiai jocoitio?

⁷ Jesús uai ote:

—Cuenta finoca rafuena birui uiñoñedio; iadedi jairuido uiñoitio.

⁸ Pedro uai ote:

—Cuenta eillina jaca jocoñeitio.

Jesús uai ote:

—O eillina cuenta jocoñenia, cuenta facaina iñeitio.

⁹ Pedro uai ote:

—Nama, dama cuenta eillina jocoñeno. O facaina raise cuenta illena, cuenta onolli, cuenta ifogi diga, jiai joco.

¹⁰ Jesús uai ote:

—Nana o abina jocoñeiticue. Da o eillina jocoiticue. Jai ñoidimie ñena iacaño ñoñede. Ie abi jai ñeande. Dama ie eillina ñiba ñane jocoacade. Omoi comeci jiai jai ñeande; iadedi omoimona ñame comeci ñia jearede.

¹¹ Naimiena gaitataiacadimiena naimie uiñua jira, ñese llotte.

¹² Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. ¹³ Cuenca “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue. ¹⁴ Omoi Namadicue. Omoi llofueraimadicue; iadedi omoi mullaima isoi iticuedena, omoi eilliaina jai jocodicue. Omoi jamai bue isoidinomona, omoi eilliaina danirie jocua. ¹⁵ Cuemona fueo. Abi iedoñeno cue isoi omoi jai. Cue afemo iñedomoi. ¹⁶ Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoi. Cue afemo iñedomoi; ia omoi eilliaina jocodicue. “Jaiimie afemo iticaí” raillanomo comecina omoi facañeno. ¹⁷ Bicino omoi uifnuamona, iese omoi finoia, caimare iitomoi. ¹⁸ Nana omoina iese ñaiñedicue. Nana cue fetocanona uifnoticue. David micori jaiie llote: “Cue diga guitinomona damie cuena enoidimie ite”. ¹⁹ Bie nia suiñenia, iena jai lloticue. Iena cuemo suilla mei, David micori llogacino raise ñnoitomoi. ²⁰ Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

Jesús ie gaitaitimiena llua rafue
(Mt 26.20-25; Mr 14.17-21; Lc 22.21-23)

²¹ Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

²² Caimona ¿nimie naimiena gaitataite? raillanona, comecina facajano, coninimo eroridicai. ²³ Cuenca Jesús eo gaia jira, Jesús abimo iticue. ²⁴ Cuenca uaiduanona, Pedro cuemo llote:

—“¿Bu ona gaitataite?” Jesús mo jicano.

²⁵ Ie jira Jesús mo jicanoticue:

—Nama, ¿bu ona gaitataite?

²⁶ Jesús uai ote:

—Bie llomeniconna mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito. ²⁷ Llomeniconna guilla meinoconi, Taife anamo Judas micori illamona, Taife naimie comecina feidote. Jesús naimiemo llote:

—O finoacaga rana raire fino.

²⁸ Jesús Judas micorimo llua rai uifnoñedicai. ²⁹ Judas micori ucubena sedaja jira, jiaino comecina facade: “ ‘Cai jitaille guille ibarisai’ Jesús naimiemo llote”. Iese lloñenia, “ ‘Janore ucube dueredinomo feca’ nibai naimiemo llote”. ³⁰ Guilla mei, Judas micori jino jaide. Naie facaise jai jitireficaide.

Jesús ie fiodablena ñaia rafue

³¹ Judas micori jailla mei, Jesús llote:

—Jusiñamui mona billanona, iimana jaidicue; ia cue fiodablena facaise jai ride. Cue fiodablemona cominidi Jusiñamui uai siñonana uifnoitimaci. ³² Iemona Jusiñamui uai siñonana comini uifnoia, Jusiñamuidi cominina cue siño Jitona jiai uifnotaite. Iese ja finoite. ³³ Cue comini, dallu omoi diga bene iticue. Jaiticue. Cue diga iacanitomoi. Judíuai illaicominimo navui cue llua isoi, omoimo ja lloticue. Cue jaillinomo nia jaiñeitomoi. ³⁴ Ie jira jaiie rafuena omoimo ja lloticue. Omoina cue isiruilla isoi, coninina omoi isirui. ³⁵ Coninina omoi isiruillamona, jiaie cominidi cue cominidomoina uifnoitimaci.

Pedro Jesús diga ñaia rafue

(Mt 26.31-35; Mr 14.27-31; Lc 22.31-34)

³⁶ Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio. Jiairuido jaitio.

³⁷ Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaiticue.

³⁸ Jesús dinena uai ote:

—Cue facaina fiodaiacadío. Unai omo lloticue. Nia monaiñenia, iitava nia ñaiñenia, dacaño amani cuena janoitiosa.

14

Jesús ie Moo dinomo rille rafue

¹ Jesús ie llofueoicaiganodicaina nia llofuate:

—Rucaicueriñeno uri i. Jusifiñamuina iñocana jai. Cuena jiai iñocana jai.

² Cue Moo illanomo diga comini illanuai ite. Iese iñedena, omoimo jai lloticue. Omo illinuaina raise finollena, nainomo jaiticue. ³ Fuiduanona, dane abido biiticue. Omoina cue dine uillena, cue dine omo illena, biiticue. ⁴ Cue jaillinona birui uiñotomoi. Nainomo omo rillena jiai uiñotomoi.

⁵ Tomás uai ote:

—Nama, o jaillinona uiñoñedicaí. ¿Niese nainomo riiticaí?

⁶ Jesús uai ote:

—Omo naiso isoidicue. Uanaicinona lloticue. Cue Moo dibeimo cominina jaca itataticue. Cue Moo dine joide naiso isoidicue. Jaca dasode cue Momo duide naídi. Cue Moo dine o ria, cuena iño. ⁷ Cuena uiñotomoina, cue Moona jiai uiñotomoi. Biruidemona naimiena uiñotomoi. Naimiena jai ciodomoi.

⁸ Felipe uai ote:

—Nama, o Moona caimo acata. Iemo jai macaibaite.

⁹ Jesús uai ote:

—Felipe, are omo diga iticue; iadedi cuena nia uiñoñedomoi. Cuena ciodimie cue Moona jiai jai ciode isoide. ¿Niese llotio: “O Moona caimo acata”? Cue Moona jai ciodio isoidio. ¹⁰ Cue Moo diga daajedicoco. Iena nia iñoñedio. Cue lluadi cue Moo uai. Cue lluadi cue comeci luaiñede. Cue motodo naimie maijide. ¹¹ Cue Moo diga daajedicocona iño. Cue uaina omo iñoñenia, siño rafuena cue finua jira, cuena iño.

Jesús ie Moo Joreña llua rafue

¹² Jesús nia llofuate:

—Unai lloticue. Cuena omo iñoia, cue finoca rafuena jiai finoitomoi. Cue Moo dine cue jailla jira, cue Moo Joreña omo dine cue oretaja mei, cue finua baifemo finoitomoi. ¹³ Cue Moo uai siñonana omo uiñollena, buena cue dibeido cue Momo omo jicaia, nana iena finoiticue. ¹⁴ Cue dibeido omo jicaia, iena finoiticue. ¹⁵ Cuena omo isirua, cue llogacinuaina iñoitomoi. ¹⁶ Ie Joreño omoimo fecallena cue Momo juiticue. Naie Joreñodi omoína canoite. Omo diga jaca iite. ¹⁷ Uanaicinona llocabite. Naimiena naimaci uiñoñena jira, cuena iñoñedino naimiena feiñonidimaci; iadedi naimie omo diga illa jira, naimiena uiñotomoi. Omo diga jaca iite. ¹⁸ Omoína fainonocaiñeticue; ia dane biiticue. ¹⁹ Nano nigarui illanona, cuena iñoñedino cuena nia cioitimaci. Ie mei cuena cioiñeitimaci; iadedi fiodaillamona cue jillua mei, cuena nia cioitomoi. Cue jaca illa jira, jiai

jaca iitomoí. ²⁰ Fiodaillamona cue jillua mei, cue Moomo cue duillana raise uiñoitomoí. Cuemo omoí duillana jiaí raise uiñoitomoí. Omoímo cue duillana jiaí raise uiñoitomoí. ²¹ Cue llogacinuaina omoí isiruia, cuena isiruitomoí. Ie jira cue Moodi omoína jiaí isiruite. Omoína jiaí isiruiticue. Omoína cuena uiñotaiticue.

²² Iscariotena mamecireñede Judas naimiemo jicanote:

—Nama, ¿bue ñellena dani caina ona uiñotaitio; iadedi jiaie cominina ona uiñotañeitió?

²³ Jesús uai ote:

—Cuena isiruitinona cue rafuena uiñotadicue. Bu cuena isiruia, cue llogacinuaina iñoite. Cue Moo naimiema isiruite. Iemona naimiema nabaiticoco. ²⁴ Bu cuena isiruiñenia, cue llogacinuaina iñoñede. Cue llogacinodi cuejeñede. Cue Moo ie. Naimie cuena oretate. ²⁵ Omoí diga nia cue illamona, bie llogacinuai omoímo jai lloticue. ²⁶ Cue Moodi omoína canollena, naga rafuena omoína llofuellena, cue facaina ie Joreña omoímo oretate. Omoína nana omoímo llogacinuaina comecitaite. ²⁷ Cue Moo dine jaiticue; iadedi omoí comeciaina uri itataiticue. Cuena iñoñedino omoí comeciaina iese itatanidimaci. Jarire iñeno. Jaciruiñeno. ²⁸ Ailli cue llua cacadomoí: “Cue Moo dine jaiticue; iadedi dane biiticue”. Cue Moo dine cue jailla jira, cuena omoí isiruia, cueri iobitomoí. Cue Moo cue afemo ite. ²⁹ Bie rafue cuemo nia suiñenia, uicodo omoímo iena jai lloticue. Naie suia, cuena fañonocaiñeno omoí jaillena jitaídicue. ³⁰ Omoí diga are nia ñañeiticue. Cuena iñoñedino anamo itimie cuena jai duere finoacade. Taifena ñaiticue. Naimie anamo iñedicue; ³¹ iadedi cue Moona cue isiruillana cuena iñoñedino uiñollena, cue Moo cuemo llua isoi, finoiticue. Mai cai jailli.

15

Uvas railla riará ie rafue

¹ Jesús nia llofuate:

—Cue díbeimo marena omoí illena omoí raise uiñollena, jiaie rafuedo iena llofueiticue. Uvas railla ua riaradicue. Cue Moodi uvas railla riará sedaraíma. ² Cue amena igailaidomoí. Llisiñede igai cue Moo cugaíca. Eo llisillena, naga lliside igaina janore muido jaigaíca. Ie isoide. ³ Cue llogacinuaido jaillamona, jai jaigaíca isoidomoí. Iemona omoí comeciái jai jeanide. ⁴ Cuena nabai. Ona jiaí nabaiticue. Naie amenamo jai duiñena jira, daje díbegaise jaitaca igaidi jai llisiñede. Ie isoide. Cuena omoí nabaicabiñenia, llisiñede igai isoidomoí. Ie jira cuena nabai. ⁵ Uvas railla riaradicue. Cue amena igailaidomoí. Cuemo omoí duiadedi, omoímo cue duiadedi, eo lliside isoidomoí; iadedi cuemo omoí duiñenia, jaca llisiñede isoidomoí. Cuemo omoí duiñenia, cue jitailla isoi mare rafuena jaca finoñeítomoí. ⁶ Jai duide igailaí safenailla mei, marañena jira, jobaillena, danomo ofitacícaí. Cuemo duiñedimie jai duide igai isoide. Jusíñamuimona duere sefuite. ⁷ Cuena omoí nabaía, cue uaina omoí feitañenia, omoí jitaillena jica. Ie mei feiñoitomoí. ⁸ Eo lliside omoí isoía, cue Moo iobide. Iese omoí ía, ua cue comínidomoí. —Iese Jesús llofuate; ía naimie díbeimo naimací raise illena ñaite. Mare rafuena naimací finocana jaillena ñaite.

⁹ Nia llofuate:

—Cuena cue Moo isiruilla isoi, omoína isiruiticue. Cuena nabaicabi. ¹⁰ Cue Moo llogacinuaina cue iñuamona, naimie isiruillacino anamo iticue. Cue

Moo llogacinuaina omoi ñnuamona, cue isiruillacino anamo itomoi. ¹¹ Cue isoi omoi comeciai eo caimarellena, bicinuai omoimo lloticue.

¹² Dane bie rafuena lloiticue. Omoina cue isiruilla isoi, coninina omoi isirui. ¹³ Naimaci o isiruillamona, o nabaiñiai facaina o fiodaia, naimacina eo ua isiruitio. ¹⁴ Cue llogacinuaina omoi ñnoia, cuena nabaidomoi. ¹⁵ Omoina “Cue mullaiaidomoi” jaca raiñedicue; iadedi omoina “Cue nabaiñiaidomoi” birui raiticue. Mullaiaia imaci patrón finoca rafuena uiñofedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uiñotomoi. ¹⁶ Cuena fetofedomoi; iadedi omoina fetodicue. Omoi lliside isoicabillana omoimo jai lloticue. Ie mei buena cue mamecido cue Moomo omoi jicaia, omoimo fecaite. ¹⁷ Coninina omoi isiruillena jai lloticue.

Comini Jesúna enoilla rafue

¹⁸ Jesús nia llofuede:

—Cuena ñnoñedino omoina enoia, nano cuena jai enoidimaci. Iena uiñotomoi. Omoina nia enoñenia, cuena jai enoidimaci. ¹⁹ Naimacimo jainaiaidomoina, omoina isiruitimaci; iadedi naimacimo omoi jainaiañena jira, omoina cue fetua jira, omoina enoidimaci. ²⁰ Omoimo jai lloticue. Illaia duere sefua, naimie anamo itino jiai duere sefuidimaci. Ie isoide. Cuena comini duere finua isoi, omoina jiai duere finoitimaci. Cue llofuiacinona naimaci ñnua isoi, omoi llofuiacino jiai ñnoitimaci. ²¹ Cuena oretatimiena naimaci uiñofena jira, cue muidona iese finoitimaci. ²² Naimacimo ite jeacinona naimacimo lloñedicuena, naimacimo ite jeacinona uiñofedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. ²³ Cuena enoidimiedi cue Moona jiai enoide. ²⁴ Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacinona uiñofedimaci. Cue siño finoca rafuena jai ciodimaci. Ie jira cuena enoidimaci. Cue Moona jiai enoidimaci. ²⁵ Naimacina David micori jai llo: “Naimacimo buena finoñedicue; ia cuena enoidimaci?”. Naie cuegafuai jai suide.

²⁶ Cue Moo ie Joreño omoimo oretaite. Ie Joreño omoina canoite. Omoina uanaicinona uiñotaite. ²⁷ Cue nano lluaruimona cue diga omoi illa jira, cue facaisena jiai raise lloitomoi.

16

Judíuai illaicomini Jesús llofueoicaiganona duere finua rafue

¹ Jesús nia llofuede:

—Danamo abido omoi jaiñellena, cue uaina omoi fañonocaiñellena, bicinuai omoimo ja lloticue. ² Omoi ofiracomona illaicomini omoina dotaitimaci. Jaiñuido omoina meiniamona: “Jai Jusiñamuina marena sedadica”, comeciaina facaitimaci. ³ Cuena naimaci ñnoñena jira, cue Moona jiai naimaci ñnoñena jira, iena finoitimaci. ⁴ Bie rafue omoimo sua, naie facaise cue lluaana omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

Jesús Jusiñamui Joreña llua rafue

⁵ Jesús nia llofuede:

—Cuena oretatimie dine ja jaiticue; iadedi omoimona buna: “¿Ñine jaitio?” cuemo jaca nia jicanoñede. ⁶ Omoimo bie rafue cue llua jira, omoi comeciai eo sure ite. Ie jira cue jaillinona jicanoñedomoi. ⁷ Uanai

lloticue. Cue jaia, mare. Cue jaiñenia, omoína canoraima omoí dine biñeite. Cue jaia, omoí dine naimiena oretaiticue. Jusiñamui Joreñodí omoí canoraima. ⁸ Naimie bia, cuena ñinoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jai uiñotaite. ⁹ Cuena naimaci ñinoñenia, naimacina naimacimo jeacino nia illana uiñotaite. ¹⁰ Cue Moo dine abido cue jaillonona, cuena cioiñeitimaci; ia iemona Jusiñamui Joreño cue uaina siñonana uiñotaite. ¹¹ Fiodaillemona jilloiticue. Iemona cuena ñinoñedino anamo itimiedi cue Moo janafefillacino anamo iite. Taiñena ñaiticue. Cue finoca rafue muidona, cue Moo Joreñodí cominina, cue Moo Joreñodí cominina naie janafefillemona jilluana uiñotaite. ¹² Diga rafue omoimo nia lloiacadicue; iadedi jai rairaiñaidomoi. ¹³ Jusiñamui Joreño bia, omoimo nana uanaicinuaína llofueite. Dama ie facaina llofueñeite; iadedi ie cacajacinodo llofueite. Jaiñuido sulle rafuena llofueite. ¹⁴ Omoína cue rafuena uiñotaite. Ie jira cuena iobitaite. Nana cue Moomo ite uaidi cueje. ¹⁵ Ie jira bie rafuena lloticue. Jusiñamui Joreño omoína cue rafuena raise uiñotaite.

Sunaillamona caimare illa rafue

¹⁶ Jesús nia llofueite:

—Dallu illanona cuena cioiñeitomoi. Ie mei dallu illanona, cuena dane cioitomoi.

¹⁷ Ie llofueoicaiganodicaimona damierie daní coninimo jicanodosite:

—¿Ñiese caimo lote: “Dallu illanona, cuena cioiñeitomoi. Ie mei dallu illanona, cuena dane cioitomoi. Cue Moo dine jaiticue”? ¹⁸ ¿Buena caimo lote? Raise cacaiñedicai.

¹⁹ Cai jicanuana Jesús uiñuanona, naimie jicanote:

—¿Cue lluana raise uiñoiacadomoi? ²⁰ Cuemo sulle rafue suia, eo eitomoi; iadedi cuena ñinoñedino eo iobitimaci. Sunaitomoi; iadedi jaiñuido caimare iitomoi. ²¹ Jiaie uaido iena lloticue. Riño jocoacania, naiñaiño jigico isirede. Joca mei, naiñaiño urue jeiciamona, isirenadi feibicaide. Iemona jai iobide. ²² Ie isoide. Ja sunaitomoi; iadedi dane omoína cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoína buna sure itatañeite. ²³ Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaite. ²⁴ Cue mamecido cue Moomo buena jaca nia jicañedomoi. Jica. Ie mei feiñoitomoi, omoí comeci eo caimare illena.

Jaiñuido Jesús marefodo llua rafue

²⁵ Jesús nia llofueite:

—Jiaie uaido bicinona omoimo jai lloticue. Jaiñuido iese lloñeiticue. Omoína cue Moona marefodo lloticue. ²⁶ Nairuimo cue Moomo omoí facaina jicañeiticue. Cue mamecido cue Moomo omoí jitaillacinona daní jicaitomoi. ²⁷ Omoína naimie isiruillamona, omoimo fecajite. Cuena omoí isiruilla jira, cue Moomona cue billana omoí ñnua jira, cue Moo omoína isiruite. ²⁸ Cue Moomona eniruemo biticue. Naimie dine abido jaiticue.

²⁹ Lloticai:

—Jai marefodo caimo llotio. O uaina meidocana jai uiñedio. ³⁰ Nana rafuena o uiñuana uiñoticaí. Cai comeciaino iticinona o uiñuamona, caina raise uiñotio. Iemona Jusiñamuimona o billana jai ñnoticaí.

³¹ Jesús uai ote:

—Cuenta jai ñnotomoi. ³² Jaiaruido, ua birui, oni tuuitomoi. Nagamiiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga ite. ³³ Cuenta omoi ñnuano, omoi uri illena, omoimo bie lloticue. Eniruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faiticue.

17

Jesús ie Moo diga ñaia rafue

¹ Jesús bicinona llua mei, monamo eruaillano, jüde:

—Moo, cue fiodaicanarui jai ride. Cue uai siñonana uiñota. Iemei o uai siñonana jiai uiñotaiticue. ² Nana comini afemo cuenta jai itatatio. Imana cue jaillamona, nana comini afemo cuenta jai itatatio. Comini comeciai iuaina o meidotajamona, cue fiodaillamona, ailluena comini o diga jaca iitimaci. ³ Ona nanoca Jusiñamuina uiñoitimaci. Jai cuenta o oretajana jiai uiñoitimaci. ⁴ Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. ⁵ Ore Moo, enirue nia iñena facaiseconi o diga iticue. Illaima isoi o ecimo dane ebire iacadicue. Dane cuemo ine, daje isoi coco illesa. ⁶ Comini comeciai iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena ñnocana jaidimaci. ⁷ Nana cuemo ite rafue omona feiñoticue. Iena jai uiñotimaci. ⁸ Nana cuemo o llogacinuaina naimacimo jai lloticue. Jai ñnotimaci. Omona cue billana jiai jai ñnotimaci. Cuenta o oretajana jiai ñnotimaci. ⁹ Naimaci facaina birui jüdicue. Naimacina cuenta ñnotadio. Ie jira omo jai duidimaci. Ona ñnoñedino facaina birui jüñedicue. ¹⁰ Nana o dibeimo itinodi cueje. Nana cue dibeimo itinodi oie. Nana naimaciri iobidicue. ¹¹ Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci finoi raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. ¹² Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraita. Jusiñamui lloraima micori cuegafuiai suillena, naimie ua faifite. ¹³ O dine ja jaiticue. Cue isoi naimaci comeciai eo caimare illena, naimacimo ailluena rafuena jai lloticue. ¹⁴ O llogacinuaina jai lloticue. Ona ñnoñedinomo naimaci jainaiñeina jira, ona ñnoñedino naimacina enoidimaci. Ona ñnoñedinomo jiai jainaiñedicue. ¹⁵ Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue. ¹⁶ Ona ñnoñedinomo jainaiñedimaci. Ona ñnoñedinomo jiai jainaiñedicue. ¹⁷ O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciaino raise itata. ¹⁸ Bene cuenta o oretaja isoi, ona ñnoñedino dine naimacina oretaticue. ¹⁹ Uanaicinona naimaci uiñuamona, naimaci comeciai marebicallena, cuenta ñnotino facaina fiodaicadicue. ²⁰ Bimacina birui dane jüñedicue; iadedi bimaci cue rafuena ico lloia, jiaie comini cuenta ñnoitimaci. Cuenta ico ñnoitino facaina birui jiai jüdicue. ²¹ Daajedicoco. Coco illa isoi, naimaci comeciaina daje isoi lloillena, nana naimaci facaina jüdicue. Daje isoi comeciai lloillamona, cuenta nia ñnoñedinodi ñnoitimaci. Iemona cuenta o oretajana ñnoitimaci. ²² Cuemo o iga uaidi ebirede. Naimaci comeciai lloillena, naimacimo o uai jai cue iga. ²³ Naimaciri dajedicaí. O

diga daajedicoco. Naimaci comeciai daje isoi lloillana jitaidicue. Iemona cuena ñnoñedino bene cuena o oretajana uiñoitimaci. Cuena o isiruilla isoi, naimacina o isiruillana jiai uiñoitimaci. ²⁴ Ore Moo, naimaci cue dine illena jitaidicue. Enirue nia ññenia, illaïma isoi o ecimo ebire jaie iticue. Dane ie isoi ebire birui cue ia, naimaci cuena cïana jitaidicue. ²⁵ Ore Moo, mareuidimedio. Jiaie comini ona uiñoedimaci; iadedi ona uiñoticue. Cue llofueoicaiganodi o cuena oretajana jai uiñoticue. ²⁶ Naimacimo ona jai lloticue. O cuena isiruilla isoi conina naimaci isiruillena, naimacimo nia lloticue —jide.

18

Jusúna gaitalle rafue

(Mt 26.47-58; Mr 14.43-54; Lc 22.47-54)

¹ Jia mei, Jesús ie llofueoicaiganodicai diga, Cedrón railla iconi enefebeimo ruica aceituna railla riaraiï illanomo naïona jaide. ² Jesús cai diga nainomo jaisoilla jira, Judas micori naie illanona jiai uiñote. Jesúsna gaitatallena nainomo Judas jaide. ³ Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiai oredimaci. Soldaduai di lamparinaiïri bitimaci. Reinaïari jiai bitimaci. Sidanaïari jiai bitimaci. Judas naimacina ifode. ⁴ Jesúsdi nana naimiemo suille rafue uiñuanona, naimaci dine billano, jïcanote:

—¿Buna jenodomoï?

⁵⁻⁶ Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinaïllamona, abido ñajillamona, eniruemo uaidimaci. Jesúsna gaitatallena, Judas micori naimaci diga ite.

⁷ Jesús dane jïcanote:

—¿Buna jenodomoï?

Uai otimaci:

—Nazaret ie Jesús.

⁸ Jesús uai ote:

—Omoïmo jai lloticue: “Imiedicue”. Cuena omoï jenoïa, cue diga itino oni jaïllena rairuñeno.

⁹ Naimie ie Moomo como lloga uai suïllena, iese llote. Iese ie Moomo como llote: “Cuena o ñnotaganomona jaca buna faïñnedicue”. ¹⁰ Ie daacaiño Simón Pedrodi ie lloebi llinocaida, Jusiñamui diga nanoca ñairaima mullaïma jefona jaïbonote. Naie mullaïma mamecidi Malco. ¹¹ Iena cïuanona, Jesús Pedromo llote:

—O lloebina eeno. Cue Moo jitaïlla isoi, fiodaiticue.

¹² Ie mei soldaduai, imaci capitán diga, judúuai imaci policías diga, Jesúsna gaitajano, naimiena maïtimaci. ¹³ Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. ¹⁴ Navui Caifás judúuai illaicominimo llote: “Damie nana cai comini facaina fiodaitena, mare”.

Pedro Jesúsna nano janua rafue

(Mt 26.69, 70; Mr 14.66-68; Lc 22.55-57)

¹⁵ Simón Pedro Jesús jinafo racade. Jiai racadicue. Cuena Jusiñamui diga nanoca ñairaima uiñua jira, ie nairaiïbirimo Jesús diga jaidicue; ¹⁶ iadedi

Pedro nasemo fiebicaide. Ie jira jino abido jaillano, Pedro fo atillena, nasena sedaraiñomo jicanoticue. ¹⁷ Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

¹⁸ Rosirena jira, naie jofo mullaiaí, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiaí ite.

Jesús Anás dine illa rafue

(Mt 26.59-66; Mr 14.55-64; Lc 22.66-71)

¹⁹ Ie facaise Anás Jesúmo ie llofueoicaiganodicaina jicanote. Ie llofuacinuaina jiaí jicanote. ²⁰ Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiaí jaca llofuecabiticue. Nainomo nana o comini oficabidomoi. Bainino buena jaca lloñedicue. ²¹ ¿Bue ñellena birui cuemo jicanotio? Cuenacacadinomo iena jicano. Cue llofuiana uiñotimaci.

²² Iese Jesús llua jira, daje policia naimie uiecona butade. Jesúmo jicanote:

—¿Bue ñellena iese uai otio?

²³ Jesús dinena naie uai ote:

—Naimie uai jeare oticuena, cuemo llono. Jeare oñedicuemo, ¿bue ñellena cuena butadio?

²⁴ Jesús uai oñede. Iemei Anásdi Caifás jofomo Jesús maianona orede.

Pedro Jesúna dane janua rafue

(Mt 26.71-75; Mr 14.69-72; Lc 22.58-62)

²⁵ Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶ Naie facaise daje mullaíma Pedromo llote:

—Aceitunas railla riaraiái illanomo ona ciodicue —llote. Jusúna soldaduai gaitaja facaiseconi Pedro naie mullaíma ie come jefona ailli jaíbonote, soldaduai Jesúna gaitaja ie daacaiño. ²⁷ Pedro dane janote. Ieconí itava ñaite.

Jesús Pilato dine illa rafue

(Mt 27.1-2, 11-14; Mr 15.1-5; Lc 23.1-5)

²⁸ Ie mei Caifás jofomona gobernador jofomo Jesúna jitramo uitimaci. Naie facaise gobernador di Pilato. Naimiedi judíuaiñedimie. Naimaci einamaci rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guilledí guiñega. ²⁹ Ie jira Pilato jino bite. Naimacimo jicanote:

—¿Nie isoide rafue muidona llogidotomoi?

³⁰ Uai otimaci:

—Bimie marañede rafue finoñedena, o dine naimiena atañedicai.

³¹ Pilato llote:

—Naimiena uiño. Omoi einamaci llogacinuaido naimiena duere fino.

Uai otimaci:

—Come meinellena caimona rairuidomoi. Naimie coraiana jitaídicaí —llotimaci. ³² Navui Jesúdi: “Cuenacruzmo coraítimaci” llote. Naie llucino jai suisaide.

³³ Pilato fo abido jaillano, Jesúna uaiduano, naimiemo llote:

—Judíuai illaíma raillamiedio.

³⁴ Jesús dinena jicanote:

—¿O comecina dama iese facajano llotio? Iese comecina o facañenia, jiaimie omo lloga.

³⁵ Pilato uai ote:

—Judío imieñedicue. O rafue raise uifioñedicue. Omoi comini cuemo ona fecadimaci. Jusiñamui diga nanoca ñairaini cuemo jiai fecadimaci. ¿Nie isoide marañede rafuena finodio?

³⁶ Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicedena, cue comini cue facaina fuiridimaci.

³⁷ Pilato uai ote:

—Ie jira odi illaimadio.

Jesús uai ote:

—Jaca railla. Uanaicino llorena, jeicigacue. Nana uanaicinona jitaidino cue lluaana cacadimaci.

³⁸ Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo iñede.

Jesúna coraiacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuabisoidomoi. Bie año omoi jitaia, omoi illaíma raillamiena marena oretaiticue.

⁴⁰ Comini dinena cuiriidimaci:

—Dama ite. Bimiena jitaiñedicaí. Barrabásna cárcelmona marena jino oreta. —Iese cuiriidimaci. Barrabásdi firiraima.

19

¹ Ie mei Pilato Jesúna oni uillanona, naimiena sechedotade.

² Jifanodosillena, soldadauí eecuaimona finoca nuiciraina naimie ifogimo jitadimaci. Jiduirede iniroina jitatajano raitimaci:

³ —Judíuai illaimadio. —Iemei ie uiecona bucoidimaci.

⁴ Pilato dane jino billano, raite:

—Naimie omoi dine jino ja biite. Naimiemo nicinodi iñede —raite.

⁵ Ie facaise Jesús jino bite. Eecuaimona finoca nuiciraina jitaca. Jiduirede iniroina jitaca. Pilato naimacimo llote:

—Jadi, naimie.

⁶ Jusiñamui diga nanoca ñairainidi, jiaie illaicomini diga, naimiena ciuano, cuiriidimaci:

—Naimiena corai.

Pilato llote:

—Naimiemo nicinodi iñede; ia oni uillanona, naimiena omoi corai.

⁷ Uai otimaci:

—Moisés micori jaie cuela: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caimona naimiedi marañede rafue jai finode.

⁸ “Naimiedi Jusiñamui Jito” comini raillana Pilato cacajano, eo jacinaita.

⁹ Jesúna dane fo uite. Jesúsdi Jusiñamui Jitona naimie raise uifioñellena, Jesúmo jicanote:

—¿Ninena bitio?

Jesús uai oñede. ¹⁰ Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraitallena.

¹¹ Jesús uai ote:

—O anamo Jusiñamui cuena itataja jira, o uai ite, cuemo llollena. Ie jira omo cuena fecadino o baifemo jeacino finodimaci.

¹² Ie facaimona Pilato Jesús marena jino oretaiacade; iadedi judíuai illaicomini dinena cuiriisite:

—Bimie o jino marena oretaia, cai nanoca illaíma ie nabaiñedio. “Illaímadicue” Jesús lluamona, cai nanoca illaíma díbeimo naimiedi ñede. Cai nanoca illaímadí César.

¹³ Comini lluana cacajano, Pilato Jesúsna jino atide. Ie cominimo lloronomo raide. Naie illano nofinina mameciredede. Judíuai uaido Gabatana mameciredede. ¹⁴ Pascua rafue guilla finoraruijoma jitoma naidai illanona, Pilato dinena llote:

—Jadí, omoi illaíma.

¹⁵ Iemona cominidi cuiriisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaímana coraiticue?

Jusiñamui diga nanoca ñairaini uai otimaci:

—Cai illaímadí César. Jiaie illaímadí caimo ñede. Jaca dallaímade cai illaímadí.

¹⁶ Ie mei Pilato naimacimo naimiena fecade, coraíllena.

Jesúna coraiacana rafue

(Mt 27.32-56; Mr 15.21-41; Lc 23.26-49)

Pilato llua jira, Jesúsna uitimaci coraíllena. ¹⁷ Jesúsdi ie cruzna rocaoicaida sonode. Hfocoraína eruaiilla mameciredede illanomo jaidimaci. Judíuai uaido naie illano Gólgotana mameciredede. ¹⁸ Nainomo naimiena coraidimaci. Naimie abimo menamie coraica. Damie Jesús nabeimo. Jiaimie jarifebeimo.

¹⁹ Cruzmo jonellena, Pilato rabicimo cuetatate: “Nazaret ie Jesús. Judíuai Illaíma”. ²⁰ Judíuai uaido cuega. Romanos comini uaido jiai cuega. Griego uaido jiai cuega. Jesús coraiano Jerusalén ianori illa jira, ailluena comini iena cioidimaci.

²¹ Iena ciuamona, naie rabicina meidollena, Jusiñamui diga nanoca ñairaini Pilatomo llotimaci:

—“Judíuai Illaíma” raillano jai cuetatatio. Iena meiduana jitaídicaí. Bimie dinena raisoide: “Judíuai Illaímadicue” raillanona, o cuetatajana jitaídicaí

²² Pilato uai ote:

—Jai cuetataticue. Jiaie rabicimo dane cuetatañeiticue.

²³ Jesúsna coraía meí, soldaduai naimie iniroi uanona, naga soldado digamie jonega iniroi. Nagaamaga soldaduai ite. Ie camisa fiebide. Naie daje jamai nigaroi. ²⁴ Ie jira daní coniniri ñaitimaci:

—Bie camisa cuaranofeíticaí, daní cai fecallena. Mai. Conima jabomaiticaí, iena ollena. —Iese finuano Jusiñamuina lloraíma micorí cuegafuíaí suide. Jiaie cuega: “Cue iniroi daní naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵ Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite. ²⁶ Jesús ie eina ciode. Cuena naiñaiño ecimo jiai ciode. Cuena eo gaide. Ie jira ie eimo llote:

—Jadí, o jito isoi itimie anamo iitio.

²⁷ Cuemo llote:

—Jadi, o ei isoidiñaiño anamo iitio.

Naie dacaiño naiñaiñoña cue jofomo uillanona, naiñaiñoña sedadicue.

²⁸ Te mei Jesús nana rafue jai fuillana uiñuano, llote:

—Jiroacaducue. —Iese lluanona, Jusiñamuina lloraíma micorí jaie cuegafuíaí jai suide. ²⁹ Nainomo llerojímo vino ite. Radosimo fibecode rana joniano, vinomo faite. Iemei Jesús mo fecade jaronollena. ³⁰ Iena jaronuano, Jesús llote:

—Cue maijía jai fuite. Jai macaibaite. —Ie ifogí ana jítadacaida, fiodaite.

Jesús sida diga ducia rafue

³¹ Pascua railla rafue guille finuarui illa jira, judíuai illaicomíni Pilato dine jaidimaci. Raire fiodaillena, coraicano idaiaina uellullena naimiemo jicanuaidimaci. Sábado rafue ie nairui nia illanona, sábadorui jai raire taineacana jira, coraicano cruzmo sábadorui mo illana jitañedimaci. ³² Soldaduai jaillano, Jesús ecimo coraica iaímaiaí idaiaina uellude. ³³ Jesús dine billano, naimie jai fiodaillana ciódimaci. Ie jira naimie idaiaina uelluñedimaci; ³⁴ iadedi daje soldado Jesús ciraigiconi sida diga ducide. Naifo diaide. Naifomona jinui jiaí bite. ³⁵ Nana iena ciódicue. Uanai llotícue. Omoí ñinollena, iena llotícue. ³⁶ Soldaduai iese finuamona, jaie cuegafuíaí jai suide. Jaie Jesúsna cuega: “Naimie illaicina tainoñeitimaci”. ³⁷ Jiaí jaie cuega: “Judíuai dína naimaci ducitagamiemo ico eruaitimaci”.

Nofici ifomo Jesús raia rafue

(Mt 27.57-61; Mr 15.42-47; Lc 23.50-56)

³⁸ Naie facaise Pilato dine José raillamie jaide. Cruzmona Jesús abí oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abí ana uanona, iena oni uite. Judíuai illaicomínina naimie jaciruillanona, Jesúsna bainino ñnote. ³⁹ Nicodemo jiaí bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. ⁴⁰ José, Nicodemo diga, Jesús abina useroina ferinotiaímaiaí. Naimaci comíni finouilla isoi, naie siorede radi ñiroimo jonega. ⁴¹ Amenaiaí iaire illanomo Jesúsdi coraica. Nainomo nofici ie raiafodi ite. Nia buna naifomo raíñenafo. ⁴² Naifo iaire illa jira, sábadorui jai riacana jira, jiaie raiafo jenollena abí juanina jira, nainomo naimiena jonetiáímaiaí. Nofici diga raiafo raise ibailla mei, jofomo jaidiaímaiaí.

20

Fiodaillamona, Jesús jillua rafue

(Mt 28.1-10; Mr 16.1-8; Lc 24.1-12)

¹ Domingo jítiramo nia monaiñenia, raiafomo María Magdalena jaide. Raiafo ibailla nofici oni joillana cióde. Jesús abina cioñede. ² Ie jira aisicana Pedrona jenuaide. Cuen a jiaí jenuaide. Baillano, llote:

—Cai illaicomíni cai Nama abina raiafomona otimaci. Naimiena jonianona uiñoñedicue.

³ Ie mei raiafomo jaidicoco. ⁴ Aisicana jaidicoco; iadedi riere cue aisicana jailla jira, nano ridicue. ⁵ Ana bitadacaida, fo erodaticuemo, useroi joillana ciódicue; iadedi fo jaiñedicue. ⁶ Ie mei Simón Pedro rillano, fo jaide. Useroi joillana jiaí cióde. ⁷ Ie ifogímo ferinoga ñiroi eneno illana cióde. Raise nacuana cióde. ⁸ Iemei jiaí fo jaidicue. ñiroina ciuamona, Jesús jai jilluana ñnoticue. ⁹ Jaie cuegafuíaí llote: “Fiodaillamona jilloite”. Naie cuegafuíaína como raise ñnoticoco. ¹⁰ Ie mei jofomo jaidicoco.

*María Magdalenamo Jesús bairia rafue
(Mr 16.9-11)*

¹¹ Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo, ¹² Jusiñamuimona mena jaienici jai billana ciode. Userede iniroi jitadiaimaia. Jesúsna navui jonianomo ana raidiaimaia. Damie ifogi dibeimo raide. Jiaimie eilli dibeimo raide. ¹³ Naiñaiñomo jicanotiaimaia:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴ Naie facaise jinafo dine erocailanona, Jesúsna ciode; iadedi naimiena uiñoñede. ¹⁵ Naiñaiño comecina facade; “Naimiedi bie illano sedaraima”. Jesús naiñaiñomo jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶ Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboní! —Naie uai oni dobaíuamona: “Llofueraima”.

¹⁷ Jesús uai ote:

—Cuenta llinoñoeno cuenta faicai. Cue Moo dine nia a jaiñedicue. Cue amatai dine mai jaillanona, cue rafuena luai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

¹⁸ Ie jira María Magdalena Jesús llofueoicaiganodicaí lluaibite:

—Cai Namana jai ciodicue. —Iemei caimo naimie naiñaiñomo lluaana llote.

*Jesús ie llofueoicaiganomo bairia rafue
(Mt 28.16-20; Mr 16.14-18; Lc 24.36-49)*

¹⁹ Domingo naio Jesús llofueoicaiganodicaí jofomo ofidicaí. Judíuai illaicominina cai jaciruillamona, nasiaí nana cai ibaica. Nase econoñoeno ieconi Jesús cai motomo billanona, caina uaiduano, llote:

—Uri omoi i.

²⁰ Ie onollina acatate. Ie ciraigina jiai acatate. Cai Namana jai cai ciuari eo iobidicaí. ²¹ Jesús dane llote:

—Uri omoi i. Cue Moo cuenta oretaja isoi cue rafuena llolena, omoina oretaiticue.

²² Ie facaise caina fraiñuanona, raite:

—Jusiñamui Joreñoona omoi feiñuana jitaidicue. ²³ “O jeacinona jai dotade” bumoo omoi lloia, Jusiñamui jai dotaca. “O jeacinona nia dotañede” bumoo omoi lloia, Jusiñamui nia dotañega.

²⁴ Naie naio Tomásna mameciredede llofueoicaigamie cai diga iñede. Dídimona jiai mameciredede. Naimiedi gorasa. ²⁵ Naimiemo lloticaí:

—Cai Namana ailli ciodicai.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ññoñeiticue.

Jesús ie llofueoicaiganomo dane bairia rafue

²⁶ Ocho digarui illanona, Jesús llofueoicaiganodicaí dane ofillano, Tomás cai diga ite. Nana nasiaí ibaica; iadedi nase econoñoeno ieconi Jesús cai motomo dane fo billano, uaiduano, llote:

—Uri omoi i.

²⁷ Iemei Tomásmo llote:

—Eroda cue onollimo. Naifo jeta. Ciraigi ifona jiai jeta. Iinoñeno jaiñeno. Mai ñno.

²⁸ Tomás uai ote:

—Cue Namadio. Cue Jusiñamuidio.

²⁹ Jesús dane uai ote:

—Cuena o cúa jira, cuena ñnotio; iadedi cuena cioñedino cuena ñnoia, jiai caimare iitimaci.

³⁰ Jesús diga ñno rafuena finode. Iena ciodicai. Nana naie rafuena bie rabenicomo cueñedicue; ³¹ iadedi dajerie cueticue. Jesúsdi cai Jilloitaraimana omoi ñnollena, iena cueticue. Naimiedi Jusiñamui Jitona omoi ñnollena, iena jiai cueticue. Naimiena omoi ñnuano, naimie diga jaca iitomoí.

21

Jesús ie llofueoicaiganomo ane bairia rafue

¹ Diga irui illanona, Tiberiana mameciredede jorai fuemo Jesús ie llofueoicaiganodicaimo dane bairede. ² Nainomo diese iticai: Simón Pedro, Tomás, Natanael, cue ama Jacobo, cue, jiaie iaímaiaí. Tomás mameci jiaicidi Didimo. Natanael Galilea ie Caná naíraí imie. ³ Simón Pedro caimo llote:

—Lloiji faiaiticue.

Naimie uai oticai:

—O diga jaiticai. —Iese raillano, botemo jaidicai. Namona naio lloijina faiticai; ia jaca buena oñedicai. ⁴ Monaiacademo, Jesús jorai fuemo bite; iadedi naimiena uiñoñedicai. ⁵ Jesús caimo jicanote:

—Caimaci, ¿nie diese lliciaína jai otomoí?

Uai oticai:

—Jaca oñedicai.

⁶ Naimie dane uai ote:

—Omoi bote nabei dine omoi lloijina faíno.

Ie jira faiticai. Ailluena lliciaí naiemo jilla jira, a aiñonidicai. ⁷ Iena ciuamona, Pedromo lloticue:

—Cai motomo cai Namadi íte.

Pedro iena cacajano, naimie taímiena jira, ie iniroi jítade. Jesús dine naimie raíre rillena, joraimo daiade; ⁸ iadedi botedo biticai. Enirue iaíre illa jira, na lliciaímo sonocana, lloijina atidicai. Nibai cien metros oni íte. ⁹ Jorai fuemo cai ría, cocimona bonoca iraina ciodicai. Lliciaí iraimo ruica jai íte. Llomenico jiai íte. ¹⁰ Jesús caimo llote:

—Omoi oga lliciaímona janore ati.

¹¹ Ie jira Simón Pedro botemo jaillano, lloijina llinuanona, eniruemmo ari sonode. Ciento cincuenta y tres jemierie jítaticai. Ailluena íte; iadedi lloiji cuaríñede. ¹² Jesús llote:

—Mai guisaíbi. —Jesúna cai uiñua jira: “¿Budío?” jaca buna raíñena.

¹³ Jesúsdi llomenico diga lliciaína caina ecade. ¹⁴ Fiodaillamona jillua facaise-mona dacaiño amani caimo Jesús jai abina baíretate.

Jesús Pedro diga ñaia rafue

¹⁵ Guilla mei, Jesús Simón Pedromo llote:

—Simón, odi Juan jítodio. —Jiai jicanote— ¿Nana o nabaiñiaí baífemo cuena isiruitio?

Simón uai ote:

—Jíi, Nama, ona cue isiruillana uiñotio.

Jesús uai ote:

—Toica llaudaiaia uruiaina omoi raise sedaja isoi, cuena #notinona raise seda. Naimacina cue rafuena raise llofue.

¹⁶ Dane llote:

—Simón, odi Juan jitodio. —Dane jicanote— ¿Cuena isiruitio?

Simón uai ote:

—Jii, Nama, ona cue isiruillana uifiotio.

Jesús dinena uai ote:

—Toica llaudaiaia uruiaina omoi raise sedaja isoi, cuena #notinona seda.

¹⁷ Dane jicanote:

—Simón, ¿cuena isiruitio? —Jesús naimiemo dane jicanua jira, “Jesús cue uaina #noñede” raillanona, Pedro comeci sunaite.

Uai ote:

—Nama, naga rafuena uifiotio. Ona cue isiruillana uifiotio.

Jesús uai ote:

—Toica llaudaiaia uruiaina omoi raise sedaja isoi, cuena #notinona seda.

¹⁸ Daje rafue omo nia lloiticue. O nia conirue facai o iniroi dama jitadio. Ie mei o jitaillanomo jaidio. O uaiciroma facaiseconi o onolli oni ñuitaitio. Ie mei jiamie o iniroi ona jitajano, o jitañenanomo ona uite. Cue llua #nocana o jai.

¹⁹ Fiodaillena Pedro uifollena, uicodo Jesús iese llote. Cristo llua isoi, Cristo rafue muidona, illaicomini Pedrona jairuido meinetimaci. Naimie fiodaillanona, Jusiñamuina iobitade.

Jesús ie gaia llofueoicagamiemo llua rafue

²⁰ Pedro diga Jesús nia ñaia facaise, Pedro dobaicaillanona, cuena ciode. Iaimaiaia jinafona racadicue. Jesús gaimiedicue. Navui cai guia, Jesús nia fiodañena, Jesús abimo cue ia, Jesúmo jicanoticue: “¿Bu gaitatallio?”

²¹ “Cuena #notinona seda” Pedromo Jesús llua mei, Pedro dobaicaillanona, cuena ciuano, Jesúmo jicanote:

—Nama, ¿niese naimie fiodaite?

²² Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue llua #nocana o jai.

²³ Ie jira creyentiaia naie llua fidiano cuena raitimaci:

—Naimie fiodañeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

²⁴ Nana rafuena ciuano lloticue. Iena cueticue. Uanaicinuaina cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

JESUCRISTO ORETAGANODI NAIMIË RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o ñine, ¿nigacino? ¿Ñie isoidio? Omo jiaie rabe birui dane oretaiacadicue. Lucadicue. Navui jiaie cartana oretaticue. Ailluena Jesús ñinoca rafuena nainomo cueticue. Ailluena Jesús llofueiacinona jiaie cueticue.

² Monamo naimiëna Jusiñamui ñia uifñenia, Jesús ie llofueoicaiganona llofueuide. Ie llofueoicaiganona jiaie naimië fetuamona, Jusiñamui Joreño uaido naimacina llofueuide. Naie llofueiacinona navui cueticue. Jesús monamo jailla mei, ie llofueoicaigano naimië oretaganona mameciredimaci. ³ Naimië fiodaillamona ie jillua mei, naimacimo bairedue. Naimië ua jilluana naimaci raise uifñollena, diga icaifño cuarenta digarui naimacimo baireuide. Naimacina Jusiñamui ñibeimo ie comini jai illa rafuena llofueuide. Naimiëmo jai suide rafuena llofueuide. Naimiëmo ñia suifñede rafuena llofueuide.

⁴ Naimaci diga Jesús guilla facaise, naimië Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo ñia fiebi. ⁵ Naimië rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreñona feiñoitomoi —raite.

Monamo Jesús jailla rafue

⁶ Ie llofueoicaigano diga Jesús dane ofillanona, naimiëmo jicanotimaci:

—Nama, ¿birui cai judíuai cominina jai sedaitio, David micori cai usumatiai micoriai jiaie sedaja isoi?

⁷ Naimië uai ote:

—Naie rafue suille facaiseconi jaca uifñoñeitomoi. Naimië siñona illamona, dama cue Moo naie rafue suilliruina uifñote; ⁸ iadedi cue Moo ie Joreñona omoi feiñua mei, siño uai omoimo iite. Ie jira Jerusalémo cuena lloitomoi. Judeamo, Samariamo, ua nana eniruemo ite nairaimo lloitomoi —raite.

⁹ Naimië iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiëna cioisifñede. ¹⁰ Monamo ñia eruaidemo, ieconi naimaci ñine Jusiñamui jaienici, mena iima bairia isoi, bairediaimaia. Naie iaimaia iniroi userede. ¹¹ Raitiaimaia:

—Galileo imaci, ¿bue ñellena monamo eruaidomoi? Omoi motomona Jesús monamo jaillana jai ciodomoi. Naimië jai jailla isoi, dane abido ico biite —raitiaimaia.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros ñinori illanona, sábadoruimo Moisés micori lloga ñinori macaritimaci. ¹³ Rillano imaci cuartomo jaidimaci. A ñibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimië jiaie Jacobo jito. Diese nainomo itimaci.

14 Naimaci jitaillamona, Jusiñamuimo jillena, nagarui danomo ofidimaci. Jillena, jaino naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

15 Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

16 —Amatai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacinodi cuega. Iena uifoticaí. Judas micorina uifoticaí. Naimie Jesúsna gaitadinona ifode. 17 Naimiedi da cai llofueoicaigano imie. Cai diga maijuiude.

18 Ie marañeno finoca rafuemonona ucubena feiñua mei, ie comeci iuaina meiduanona, naie ucubena oni judaíde. Judíuái illaicomini naie ucube diga eníruena ibadimaci. Nainomo Judas micori ie cimái cuinajanona, ie abina dama meinete. Rifailamona, ana uailamona, ie jebegi boficaillamona, nana ie jebegi jino uaide. 19 Nana Jerusalémo itino iena fididimaci. Ie jira cai uaido naie eníruue mamecired Acéldama. Oni dobaiñuamona dirue toillanie. 20 Ero, Salmos rabenicomo Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie maijille jaiimiemo iite.

Iese cuega. 21-22 Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaisezona, Jesús monamo caimona jaillarui facaiseconi, naimaci cai diga jiai itimaci. Naimacimona damiena fetoiticaí, Jesús jilluana cai diga llollena. —Iese Pedro raite.

23 Ie mei mena iimana fetodimaci. Damiedi José Barsabas. Jiaici mameci Justo. Jaiimiedi Matías. 24 Ie mei Jusiñamuimo jiidimaci:

—Nama, nana comini imaci comeciaina uifotio. ¿Nie iimana jitaidio? Caina uifota. 25 Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micori ie maijiana jai faínonoicaide —jiidimaci. 26 Ie jira conima jabomasíde, uifollena bu ille. Matíamo baite. Iemei jiaie once diga oretagano isoi naimie ite.

2

Cristo oretagano Jusiñamui Joreñona feiñua rafue

1 Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. 2 Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jiai cacadimaci. 3 Iena naimacimo bairede. Iena ciodimaci. Irai boua isoi eruaidé. Nana naimacimo baite. 4 Iese Jusiñamui Joreñona feiñotimaci. Nana naimaci comeciaina namatade. Iemei diga nairai uailaído ñaitimaci, Jusiñamui Joreño naimacina ñaitatajamona. Naimaci ñaia uailaina uifonedimaci.

5 Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiamona bitimaci. 6 Creyentiaí ñaiana naimaci fidiano, ailluena comini jino tainomo ofidimaci. Nagamiiaídi ie nairai uaina cacade. Ie jira jacinaítimaci. 7 Eo rajicaídímaci. Coninimo jicanotimaci:

—¿Buta ñaite? Nana Galileo imaci. 8 ¿Niese naimacina cacadicaí? Cai uaido dajerie ñaiana cacadicaí —raitimaci. 9 Diga comini imiaí itimaci: Partos, Medos, Elamitas, Mesapotamia imaci, Judea imaci, Capadocia imaci, Ponto imaci, Asia imaci, 10 Frigia imaci, Panfilia imaci, Egipto imaci, Libia imaci.

Libia imaci enirue Cirenemo ruica eruaide. Romamona jamai macaritano jiai itimaci. ¹¹ Judíuai itimaci. Judíuaiñedino jiai itimaci. Judíuai isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci.

¹² Nana eo rajicaidimaci. Danirie jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñiai naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluomo cacarei. Naie rafuena lloiticue. ¹⁵ Omoi comeciaina omoi facaja isoi, jifaiñedicaí. Jitoma nia fuiri daidemo, bu jaca jifairainina. ¹⁶ Joel micori bie rafuena jaie llote. Joel micori Jusiñamui rafuena lloraíma. Naimie jaie lloga rafue birui caimo jai suide.

¹⁷ Llote:

Jusiñamui caimo llote: “Jairuido bie rafue suite.

Cue Joreña diga cominimo fecajiticue.

Iedo omoi uruaí cue lluaña lloitimaci.

Iemona omoi coniruiaina nicairitaiticue.

Iemona omoi einamacina jiai nicairitaiticue.

¹⁸ Ua nana cuena sedadinomo cue Joreña fecajiticue.

Naimaci cue lluaña lloitimaci.

¹⁹ Monamo eo jacirede rafuena ico suiñotaiticue.

Eniruemo eo jacirede rafuena ico jiai suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ iadedi birui cuemo bu jicaia, ie jeacinomona naimiena jillotaiticue”
Jusiñamui llote.

Ie Joreño caimo birui illamona, Joel micori llogacino jai suide.

²² Caimaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi.

²³ Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúsna coraitatomoí. Jusiñamuina iñoñedinona naimiena meinetaomoi; ²⁴ iadedi fiodaillamona naimiena Jusiñamui jillotajano, lligi ie cacajamona naimie jillobide. Naimie fiodaite; iadedi fiodaillamona nainomo iñoñede. ²⁵ David micori naimiena jaie llote:

Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

²⁶ Ie jira cue comeci caimare ite. Eo iobidicue.

Cue marena illemo jai jiai ocuiridicue,

²⁷ raiafomo cue joreña naimie fainonocaiñena jira,

ie mare Jito abi rifaillana naimie jitaiñena jira.

²⁸ Naimie cuena jilloitallena uiñoticue.

Cue diga naimie illa jira, cue comeci caimare iite.

²⁹ Caimaci, cai usuma David micorina marefodo ñaiticue. David micori ñaia, dama naimie facaina ñaiñede. Jesúsna ñaite. David micori jaie fiodaite. Raiafomo jonega. Naifo bene nia illamona, naimiedi Jesúsna ñaiana uiñoticaí.

³⁰ Ie ia David micori Jusiñamui rafuena llote. Naimie micoridi Jusiñamui

naimiemo uanaicinona llua na uifote. Jaie Jusiñamui naimiemo llote: “O uruiaimona damie illaimana illanona, ie cominina sedajite” llote. ³¹ Cristona ñaite. David micori nia suifede rafuena llote. Naimie micori Cristo jilloillena llote: “Raiäo Jusiñamui fiodaillanomo Cristo Joreño fainonocaiñeite. Cristo abi rifañeite” llote. ³² Jesúna ñaite. Jusiñamui Jesúna jai jillotate. Nana cai iena cidicai. Ie jira iena lloticai. ³³ Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui cüa isoi, omoi birui cacaja isoi. ³⁴ Naimie abi monamo jaiñena jira, David micori dama naimie facaina ñañede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana rai.

³⁵ Ona ñnoñedinona o anamo itataitcüe” raite. David micori llua isoi, birui jai suide.

³⁶ Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judüai comini naiena uifüana jitaicüe.

³⁷ Pedro llua na cacajano, naimaci comeciäimo riire baite. Pedromo iena jicanotimaci. Ie nabaiñäimo jiai jicanotimaci:

—Caimaci, o llua na jai cacadica. ¿Bue finoitica?

³⁸ Pedro uai ote:

—Omoi comeciäi iuaina meido. Iemei Jusiñamui omoiimo ite jeacinuaina dotajite. Jesucristo facaina omoi bautizallomoi. Jusiñamui Joreño na jiai feifioitomoi. ³⁹ Omoiimo ie Joreño fecallena navui llote. Omoi uruiaimo jiai fecaite. Jiaie nairaia itinomo jiai fecaite. Ua nana Jusiñamui fetocanomo jiai fecaite.

⁴⁰ Diga uai naimacimo Pedro llote. Raite:

—Ailluena comini marañede rafuena birui finocana jaidimaci. Fafitimaci. Naimaci isoi jaiñeno; iadedi cue llua na omoi cacajamona, iena ñno.

⁴¹ Diga comini ie lloga uaina feifüano, bautizadimaci. Nairuido niba tres mil comini creyentiaina jaidimaci. ⁴² Cristo oretagano llofuiana fueoidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiuuidimaci.

Cristona ñnotino illa rafue

⁴³ Cristo oretaganodi diga siño rafuena finuamona, nana comini jacinaitimaci. ⁴⁴ Nana creyentia damacina itimaci. Naimaci raruia coninimo fecauuidimaci. ⁴⁵ Dueredino ia, naimacina canollena, raruiairedino naimaci raruiaina vendidimaci. Iemei naie ucube dueredinomo fecadimaci. ⁴⁶ Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiai sedauuidimaci. Nainomo danomo guillanona, Jesús fiodaillana comeciuidimaci. Caimare imaci comeciäi illamona, caidifeno guisoidimaci. ⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

3

Jusiñamui jofomo Pedro llucino

¹ Jusiñamui jofomo jiaa facaise Pedro iaimaia Juan diga jaide. Jitoma ana ia, comini jiuuidimaci. ² Iaimaia jaillanomo jiaie comini tisitaitimiena atiana

ciodiamaia. Tisitaitimiena naimie jaca jeiciga. Naimiena nagarui atiano, Jusiñamui jofo ie ebiredena railla nase fuemo rainaudimaci. Nainomo naimiena rainaudimaci, fo jaidinomona ucube jica-jicallena. ³ Iaimaia fo jaiacania, ucube jicallena, ie onolli ñitude. ⁴ Iaimaia naimiemo eruaillano, Pedro raite:

—Cocomo eruai.

⁵ Ie jira iaimaiaimo eruaide. Ra feiñoitena, ocianona sedade. ⁶ Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

⁷ Pedro naimie onollido llinuano, a naidanete. Ieconí naimie eillidi jillode. Ie taisicoñuai jiai jillode. ⁸ Daiacaillanona naidacaide. Macarillanona, iaimaia diga fo jaide. Jusiñamuimo iobillacinona fecajano, daiacaillanona macarite. ⁹ Nana comini naimie macarillana ciodimaci. Naimie iobillacinona fecajana jiai cacadimaci. ¹⁰ Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajjicaidimaci. ¹¹ Naimiedi Pedro iaimaia Juan diga nia llinuano, naimaci ñine Salomón micori finotaga jofo abi ibirimo comini aisidimaci. Rajjicaidimaci. ¹² Iena ciuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daimaia iaimaia uaido naimiena jilloitate” raillanona cocomo eruaidomoi. ¹³ Iena finoñedecoco; iadedi Jusiñamui iena finuano, ie Jito Jesúsna iobitade. Cai usumatia micoriai, Abraham, Isaac, Jacob, ua nana cai usumatia micoriai bie Jusiñamuina sedadimaci; iadedi Jesúsna birui fecadomoi, coraillena. Pilato naimiena jino marena oretaicana jira, Pilato ecimo naimiena llogidotomoi. ¹⁴ Mareuidimiena jitaiñedomoi; iadedi come fatimiena cárcelmona jino billana jitaidomoi. Barrabás raillamiena jitaidomoi. ¹⁵ Jusiñamui dibeimo caina itatatimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco. ¹⁶ Tisitaitimie jilluana jai ciodomoi. Naimiena uiñotomoi. Jesúsna naimie ñnua jira, Jesús naimiena mairitate. Naimiena raise jillotate. Iena jai ciodomoi.

¹⁷ Caimaci, ero, omoi finoca rafuena abina uiñoñoeno finodomoi. Omoi illaicomini jiai daje isoi finodimaci. ¹⁸ Jaie Jusiñamuidi ie facaina llorainina jiairuido suille rafuena llotatate. Naimacina Cristo legi cacajana llotatate. Birui naie llogacino suide. ¹⁹ Omoi comeciai uaiillai meido. Jusiñamui dibeimo omoi comeciaina meido. Iemei Jusiñamui omoi jeacinona dotaite. Iena jaca feitaite. ²⁰ Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi ñine dane oretallena, iena fino. Naimiedi omoi jilloitaraima. ²¹ Jusiñamui facaina lloraini micoriai jaie lloga rafue suille ñinori monamo naimie fiebiite. Jaie Jusiñamuidi ie mare lloraini micoriai uaido buena llote. ²² Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi ñamiena fetoite. Nana naimie omoi lluna cacare. ²³ Bie lloraimana bu cacareñenia, Jusiñamui naimiena duere finoite. Iemona faifite”. ²⁴ Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci buena llotimaci. ²⁵ Jusiñamuidi cai usumatia micoriaimo rafuena llote; ia bie rafue birui omoimo jiai duide. Jusiñamui Abraham micorimo jaie llote: “Nana cominidi o uruai mudona caimare iitimaci”. ²⁶ Ie rafue suiñollena, Jusiñamui ie Jitona omoi ñine navui orede. Omoi caimare illena, nano omoi marañedicinona fañonocaitallena, omoi ñine naimiena nano jai oretate.

4

Cristo oretagamaiaia i laicomini motomo illa rafue

1 Comini diga Pedro iaimaiaia Juan diga ñaia facaise, Jusiñamui diga ñairainidi naie iaimaiaia dine bitimaci. Jusiñamui jofona sedaraini illaima diga, saduceuai railla comini diga jiaia bitimaci. 2 Fiodaillamona Jesús jai jilluana llofuetiaiaiaia. Cominina iaimaiaia llofuia jira, naie iaimaiaia diga iciritimaci.

3 Iaimaiaia gaitajanona, jai navuilla jira, cárcelmo jonetimaci, ie jitiramo naie rafuena siadollena. 4 Iese suide; ia Pedro llogacinona cacadinomona ailluena comini naiena inotimaci. Cinco mil digamie creyentiaia jaitimaci.

5 Icoiti Jerusalémo nana juduaia i laicomini siadollena ofidimaci. 6 Anás jiaia bite. Naimiedi Jusiñamui diga nanoca ñairaima. Caifás bite. Alejandro jiaia bite. Nana Jusiñamui diga nanoca ñairaima cominidi ofidimaci. 7 Naimaci motomo Pedro iaimaiaia Juan diga atianona, iaimaiaimo jicanotimaci:

—¿Bu uai diga buena finodomico?

8 Jusiñamui Joreño nana Pedro comecimo namatajano, Pedro naimacimo llote:

—Ilaicomini, bie rafuena omoimo lloticue. 9 Tisitaitimie jilluana birui cocomo jicanotomoi. “¿Bueмона naimie jillode?” raillanona cocomo jicanotomoi. 10 Jesucristo uai diga jillode. Omoi buena uiñuana, ua nana juduaia comini buena uiñuana jitaidicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tisitaitimie jai benoconi naidaillana ciodomoi. 11 Omoi jofo finoraini isidomoi. Omoi jitaiñede noficidi jiaie nofici baifemo jai jaide. Jesúdi naie nofici isoide. Naimie rafuena omoi jitaiñena jira, naimiena meinetomoi. 12 Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

13 Jaciruiñeno marefodo llofuetiaiaiaia. Nainomo itino iena cacajano, comecina facadimaci: “Abina uiñoñediiaiaiaia. Jamai bue isidiaiaiaia”. Ie jira rajicaidimaci; iadedi Jesús llofueoicaigaiaiaiaiaina illana uiñotimaci.

14 Jilloitagamie iaimaiaia diga naidaillana cioidimaci. Ie jira naimaci uai iñede. 15 Naie rafuena siadollena, naie illaicomini iaimaiaiaina bai oredimaci. 16 Coninimo jicanotimaci:

—¿Niese naie iaimaiaiaina nibaiticaia? Nana Jerusalémo itino iaimaiaiaia siño rafuena finuana jai fididimaci. Iena janonidicaia. 17 Jiaie comini iena fidii raillano, Jesús rafuena iaimaiaiaia llofuiana rairuiticaia.

18 Ie mei iaimaiaiaina naimaci dine dane uaidotimaci. Iaimaiaiaimo Jesús rafuena llofueñellena riire llotimaci. 19 Pedro iaimaiaiaia Juan diga naimaci uai ote:

—Ie rafuena coco llollena Jusiñamui jitaide. Omoi uaina coco inoia, Jusiñamui jitailla rafuena finoñeiticoco. Cocomo llono. ¿Bu uaina inoiticoco? ¿Jusiñamui? ¿Omoi? Cocomo iese llono. 20 Daiaiaiaia coco ciua rafuena lloticoco. Daiaiaiaiaia coco cacaja rafuena lloticoco —raite.

21 Iaimaiaiaina jacinaitajamona, iaimaiaiaina jino oretatimaci. Iaimaiaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira. 22 Jai jillodimiemo cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo jiiacino

²³ Iaimaia jino jailla mei, iaimaia nabaiñia dine jaidiaimaia. Ilaicomini iaimaiaimo luana llotiaimaia. ²⁴ Naimaci iena cacajano, Jusiñamuimo damie luua isoi jiidimaci:

—Ore Moo, mona finodio. Eniruena finodio. Monailaina finodio. Nana naiemo ite rana jia finodio. ²⁵ Cai usuma David micorina raise uifotica. Naimiedi ona sedadimie. Naimiena bie rafuena o Joreño jaie llotatajama, naimie llotie:

¿Bue ñellena Jusiñamui diga judiuaiñedino iciritimaci?

¿Bue ñellena Jusiñamuimo comini tainomo comeciaina facadimaci?

²⁶ Ilaicomini ofidimaci, Jusiñamui diga fuirillena.

Jusiñamui facaisena ifnedimaci.

Cristo facaisena jia ifnedimaci

llote. ²⁷ Naie rafue birui bene suide. Bie nairaimo Herodedi, Poncio Pilato diga, judiuaiñedino diga, judiuai comini diga, ofide. O mare Jito Jesús facaisena ifnedimaci. Naimacimo o oretagamie facaisena ifnedimaci. ²⁸ Naimaci ofillama, nana o jitaille rafuedi, o jaie lloga rafue diga, jai suide. ²⁹ Nama naimaci jaciruitajacinona jai uifotio. Cai comeciaina ocuifnota, o rafuena jacitaiñeno cai lollesa. ³⁰ Duidinona jilloita. O mare Jito Jesús uaido caina siño rafuena finota —jiidimaci.

³¹ Jusiñamuimo jiiacino fuilla meinoconi, naimaci ofiracodi jaidisite. Jusiñamui Joreño nagamiai comecimo namatade. Iemona Jusiñamui uai jacitaiñeno llocana jaidimaci.

Creventia damacina illa rafue

³² Nana creventia damacina itimaci. Naimacimo raruaia ia, dajena naimacimo duide. ³³ Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode. ³⁴ Naimaci dine buna buena jaca jitaifnedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, ³⁵ Cristo oretaganomo fecadimaci. Ie mei dueredinomo imaci jitailla isoi fecauidimaci. ³⁶ Naimaci motomo José mamecedimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie. ³⁷ Jerusalémo naimie fecalle eniruedi ite. Iena fecajama, ucube atiano, Cristo oretaganomo fecade.

5

Ananías micori ie ai micori diga Jusiñamuina jifuia rafue

¹ Naie facaise Ananías ie ai diga iaimaia eniruena jia fecade. Ie ai mamecidi Safira. ² Naie iba naimiemo dabeie fiebide. Ie ai iena uifnote. Atuedo atianona, Cristo oretaganomo fecade, “Nana ucube atidicue” raillanona. ³ Jusiñamui Joreño Pedrona naie rafuena uifnotajama, Ananiamo Pedro jicane:

—¿Niese Taife o comecimo namatade? Jusiñamui Joreñomo taino llotio, dabeie ucube omo fiebilla jira. ⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina maraiñeno facadio? Cominimo taino llotio. Jusiñamuimo tainona jia llotio.

⁵ Ananías bie uaina cacajano ieconí fiodaillamona oni caide. Nana iena ciódino eo jacinaitimaci. ⁶ Iemei nainomo ite conirueniaí naimiēna feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uiñoñeno bite. ⁸ Pedro naiñaiñomo jicanote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

⁹ Pedro jicanote:

—¿Bue ñellena Jusiñamui Joreñona jifuetomico? Ero, o ini raiafomo jonetino saisa jai nasemo cacade. Naimaci ona jiai jino ja uitimaci.

¹⁰ Naimie ecimo ieconí naiñaiño fiodaillamona, oni caide. Conirueniaí fo billano, naiñaiño fiodaillana ciódimaci. Jino uillano, ie ini abimo dafomo jonetimaci. ¹¹ Iena fidiamona, nana creyetiaí eo jacinaitimaci. Nana bie rafuena fididinodi jiai eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jofo abi ibirimo ofisoidimaci. ¹³ Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴ Jaciruitimaci; iadedi creyentiaina ailluena comini jaidimaci. Ailluena iñiaí, ailluena riñoniaí, diese creyentiaina jaidimaci. ¹⁵ Imaci bairamo duidinona jonecaida, naisomo atidimaci. Pedro nainomo macarillano, o llota naimie joreño naimacimo ibaillamona, “Jillobiticaí” raillano, atidimaci.

¹⁶ Jerusalémo ie fuemo ite nairaiamona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finoudimaci.

Cristo oretagano duere sefuilla rafue

¹⁷ Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiai eo uradoidimaci. Saduceuai railla cominimo duidimaci. ¹⁸ Eo uradoillamona, Cristo oretaganona gaitajano, cárcelmo jonetimaci. ¹⁹ Naiona Jusiñamui jaienicidi cárcel nasena econote. Cristo oretagano jino atiano, naimacina raite:

²⁰ —Jusiñamui jofomo mai abido jai. Cominimo Jusiñamui dine naimaci ille rafuena llono.

²¹ Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaina oretate, Cristo oretaganona atillena. ²² Cárcelmo jaidemo, naimacina cioñedimaci. Abido billanona, llotimaci:

²³ —Cárcel ie nase jaca ibaicana ciódicai. Raise llaveca. Nase fuemo jaca soldaduai itimaci; iadedi econoticaimo, jaca buna cioñedicai.

²⁴ Jusiñamui jofo nanoca sedaraima, Jusiñamui diga ñairaini diga, bie lluaana cacajano, uainicaidimaci. Comecina facadimaci: “¿Nie isoide rafue naimacimo jai suide?”

²⁵ Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶ Iena cacajano, Jusiñamui jofo nanoca sedaraima ie policías diga jibuisaide. Cristo oretaganona atide. Fecuisse atide, comini dinena policiaiana notificaido fairinoi raillano. ²⁷ Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llotote:

²⁸ —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecacia, “Cai illaicomini Jesúsna meinetimaci” llotomoi.

²⁹ Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina ñinoiacadicai. ³⁰ Cai usumatiai micoriai Jusiñamuina sedauidimaci. Naie Jusiñamuidi Jesúsna jai jillotate. Jesúsna meinellena, cruzmo coraidomoi; ia Jesúsna omoi meinia mei, ³¹ Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judíuai comini comeciai iuai meidollena, naimaci jeacinuai dotallena, iese naimiena itatate. ³² Bie rafuena llofuecabiticai. Jusiñamui Joreño uaido iena jiai llofueticai. Jusiñamuina ñnotinomoi Jusiñamuidi ie Joreñoña jai fecade —raite.

³³ Iena cacajano, illaicomini eo iciritimaci. Cristo oretaganona meineiacadimaci; ³⁴ ia ieconi illaicomini motomo damie naidaide. Naimie mameci Gamaliel. Moisés micori llogacinona uuicaide. Nana cominidi naimie uaina ñnotinimaci. Cristo oretaganona dallu bai oni oretaganona, naimie llotote:

³⁵ —Caimaci, omoi bie cominimo omoi finolle rafuemo comeciaina raise faca. ³⁶ Jiaie Teudas micori illaimana jaiacade. “Jai uaina baitimiedicue” raillano, naimie dibeimo cuatrocientos ñiñiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. ³⁷ Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite. ³⁸ Ie jira ja omoimo lloiticue: Bie cominina fainonocai. Jamai cominimona naimaci llogacino iade, jamai cominimona naimaci finuacino iade, ieconi duite. ³⁹ Jusiñamuimona bie rafue ia, jaca niese ñibaiñeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie lluaña feiñuano, ⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; ⁴¹ iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci. ⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

6

Creyentiaina canollena, siete digamie diáconuaina illena, fetua rafue

¹ Naie facaise ailluena comini creyentiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuui judíuai feciñuui isoi nagarui rana feiñoñena jira, jeare ñaitimaci. ² Ie jira naie doce oretaganodi creyentiaí danomo ofillena, nana naimacina uaidotimaci. Naimacimo llotimaci:

—Jusiñamui uaina llollena, ra fecalle diga, abi juanide. Jusiñamui uaina llofuiana cai fainonocaiadedi, marañede. Ra jamai cai fecaiadedi, jiai

maraiñede. ³ Ie jira, amatai, omoi mona siete digamiena feto. Inoganona feto. Jusiñamui Joreño nana comecimo namatadinona feto. Eo abi uiñotinona feto. Ie isoidi iñiaina feto. Bie ra fecarainina maijitimaci. ⁴ Te mei cai abi juarenite, Jusiñamuimo cai jüllena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo inote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judíuai comini isoi naimiedi Jusiñamuina inote. ⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷ Naie facaise Jusiñamui uaidi cominido uiñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiena namatajamonana, naimie uai eo siño. Comini motomo ailluena siño rafuena finouide. ⁹ Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; ¹⁰ iadedi naimaci uaitalle uaidi iñede. Naimacimo Esteban uai isoidiuidi iñede. Jusiñamuimona ie uaina ua jira, Esteban abina uiñuano ñaite. ¹¹ Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicai. Naimiedi Jusiñamui jinafomo jeare ñaiana jiai cacadicai.

¹² Iese lluamona, comini comeciaina feidocana jaidimaci. Illaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomomo naimie micorina uitimaci. ¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. ¹⁴ Naimiedi Jesús bie jofona judaillena llote. Moisés micori caimo llogafuiai fainonocaillena jiai llote. Iena cacadicai.

¹⁵ Iemo nana illaicomini naimiemo eruaidimacimo, naimie uieco Jusiñamui jaienici isoi eruaide.

7

Esteban micori abi ríidua rafue

¹ Jusiñamui diga nanoca ñairaima Esteban micorimo jicanote:

—¿Ua ie isoi naimaci llucacino ite?

² Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jai bairede. Cai eirue jitodi Abraham micori. Mesopotamiamomo naimie micori nia ia, Harámo naimie micori nia jaiñenia, Jusiñamuidi naimie micorimo bairiano ³ llote: “O enriuemona mai jai. O cominimona mai jai. Omo cue acatalle enriuemo jaitio”. ⁴ Ie jira Caldea railla enriuemona naimie micori jaide. Harámo rillanona, diga iruilla; nainomomo ite. Naimie moo micori fiodailla mei, omoi birui illa enriuemo Jusiñamui naimie micorina oretate. ⁵ Nainomomo

rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajititue” raite. “O uruiaimo feca-jititue” jiai llote; iadedi naie facaise Abraham micori uruenide. ⁶ Jusiñamui jiai llote: “O uruiaí jiaie comini eniruemo jaianitimaci. Egiptomo jaianitimaci. Naimacina duere finoitimaci. Cuatrocientos años llegi cacajititimaci. ⁷ Naimacina majitaite nairaina duere finoititue. Ie mei o uruiaí naie eniruemonna biititimaci. Bie illanomo cuemo iobillacinona fecajititimaci” llote. ⁸ Ie cominina naimaci jaillena, Jusiñamui Abraham micorimo iisaiái diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

⁹ 'Caimaci, José micorina Jacob micori uruiaí micoriaí uradoillamona, Egipto cominimo naimiena fecadimaci; ¹⁰ iadedi Jusiñamui naimiena eo sedade. Ie llegi ie cacajamona naimiena jillotata. Naimiemo uifloracinona facade. Ie jira Faraón micori naimiena jiai gaide. Faraón micoridi Egipto illaíma. Ie muidona Faraón Joséna fetode, nana Egiptomo itinona sedallena. Ie jofona jiai sedatate. ¹¹ Naie facaiseconi nana Egipto comini aime gutimaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiai micoriaí naimaci illanomo guillena baiñedimaci. ¹² Egiptomo guille illana Jacob micori fidiano, guille ollena, nano facaise ie uruiaí micorina nainomo oretate. ¹³ Ie mei José ie amatiaína naimiena uifnotade. Faraóni José comini illana fidide. ¹⁴ Ie jira Joséi ie moona uaidote. Nana ie cominina uaidote. Setenta y cinco digamie ite. ¹⁵ Ie jira Egiptomo Jacob micori jaide. Nainomo fiodaite. Ie uruiaí micoriaí nainomo jiai fiodaitimaci. ¹⁶ Siquem railla nairai illanomo naimaci comini naimaci micoriaína uillano, nofici ie raiafomo jonetimaci. Siquemmo Abraham micori naifona Emmor uruiaí micoriaimona jaie ibade.

¹⁷ 'Caimaci, Jusiñamui Abraham micorimo lloga rafue suille iaírei illa fa-caiseconi, Egiptomo cai cominidi eo jebuidimaci. Abraham micorimo: “Egiptomona o uruiaí biitimaci” Jusiñamui jaie llote. ¹⁸ Naie facaise jiaie illaíma Egiptona sedade. José micorina uifnoñede. ¹⁹ Ie jira cai cominina jifuiano majitauide. Uruiaí fiodaillena, naimacina imaci uruiaina fainonocaitate. ²⁰ Ie facaiseconi Moisés micori jeiciga. Jusiñamuiimona naimie micori eo ebire eruaiide. Ie moo jofomo daje amani fivui ite. ²¹ Ie mei naimiedi fainonocai. Faraón jisa micoridi naimie micorina uanona, naiñaiño jito isoi naimie micorina uiuicaide. ²² Naimie micori nana Egipto comini uifnuacinona fueote. Illaíma uai isoi naimie uaidi ite. Eo abina uifnotimie.

²³ 'Caimaci, naimie micori cuarenta años illa facai, ie comini dine ie jaillemo ie comecina facade. Naimie cominidi cai judiaí comini. ²⁴ Egipto imiemona damie llegi cacajana ciuano, naimiena riidote. Riiduanona, Moisés micoridi Egipto imiena meinete. ²⁵ Moisés micori comecina facade: “Cue muidona Egiptomona Jusiñamuidi cue cominina oretaite”. “Cue comini buena uifnotimaci” raillanona comecina facade; ie iadedi iena uifnoñedimaci. ²⁶ Ie arediruendo Moisés micoridi mena come iaímaiaí fuirillana ciodo. Iaimaína marena itataicade. Raite: “¿Bue ñellena conimana duere finoacadimico? ¿Bue ñellena o come diga fuiridomico?” ²⁷ Duere finoacadimie naimiena oni ñuitade. Jicanote: “¿Bu odi cai illaimana jonegao? ¿Bu caímo ona llotatate juez isoi? ²⁸ ¿Na are Egipto imie o meinia isoi cuena jiai meineiacadio?” ²⁹ Iena cacajano, come fajana naimie llinua

jira, jacinaillanona, Moisés micori aicide. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

³⁰ Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. ³¹ Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote: ³² “O usumatiai imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillanona Moisés micori abi docaide. Jaciruillanona, erodañede. ³³ Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidailanodi eo mareno. ³⁴ Egiptomo cue comini legi cacajana raise cidicue. Naimaci duere sefuillana uiñoticue. Ie jira omo baireducue, naimacina Egiptomona jilloitallena. Mai jai. Egiptomo ona oretaiticue” llote; ³⁵ iadedi comini dinena Moisés micorina jaie jitaiñenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiai itatate. ³⁶ Egiptomona Moisés naimacina atide. Egiptomona ia, diga siño rafuena finode. Jiairede monaillai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

³⁷ Caimaci, Moisés micoridi cai judíuai cominimo llote: “Omoimona Jusiñamuidi damiena ie rafue lloraimana ico oretaitie, naimie cuena oretaja isoi”. ³⁸ Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoriai diga naie jaienici facaina Moisés ñaite. Caimo fecallena, naimiedi cominina itatate uaina feiñote; ³⁹ iadedi cai usumatiai micoriai naimiena inoiacaiñedimaci. Naimiena jitaiñedimaci. Egiptomo abido jaillemono naimaci comeciai facadimaci. ⁴⁰ Ie jira comini dinena Aarón micorimo llotimaci: “Egipto eniruemona Moisés caina atide; iadedi naimie cai diga illana ja uiñoñedicai. Cai facaina Jusiñamuina eruaiide jiraraina fino, Egiptomo abido caina ifollena”. ⁴¹ Iemo jurareta urue joreña finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. ⁴² Ie jira Jusiñamui naimacimona oni jaillanona, naimacina fainonocaide. Iemona jitomana sedauaidimaci. Fivuina jiai sedauaidimaci. Ucuaina jiai sedauaidimaci. Jusiñamui rafue lloraime ie rabenicomo buena jaie iese cuega: Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiiai fecañedomoi;

⁴³ iadedi cuemo omoi comeciaina facañeno Moloc railla jiraraina sedadomoi. Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoina oretaiticue”

cuega. Naie facaise cai usumatiai micoriai Jusiñamuina jitaiñedimaci.

⁴⁴ Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofo aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega nificidi naicomo eenoga. ⁴⁵ Josué diga bie eniruemo naimaci billa facaise, cai usumatiai micoriai naiconataidimaci. Bie enirue jiaie nairaiamo jainaiaside; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. ⁴⁶ Jusiñamui

David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: ⁴⁷ ia Salomón micoridi jofona Jusiñamui iena finode; ⁴⁸ iadedi Jusiñamuidi iima finoca jofomo i-ife. Jusiñamui facaina lloraima micoridi Jusiñamuina iese cuete:

⁴⁹⁻⁵⁰ Cai Nama raite: “Monamo cue illamona, nana comini cue anamo itimaci. Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.

⁵¹ 'Ero, omoi comeciai jaiarede. Omoi comeci inoñede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiái micoriai isoi itomoi. ⁵² Omoi usumatiái micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue. ⁵³ Jusiñamui jaieniciaimona Moisés micori llogacinona feiñotomoi; iadedi iena inoñedomoi.

Judúuai Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite. ⁵⁵ Jusiñamui Joreño nana Esteban micori comecimo namatajamona, monamo eruailano, naimiedi Jusiñamui ebirenana cide. Naimiedi Jusiñamui nabeimo Jesús naidaillana cide. ⁵⁶ Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

⁵⁷ Esteban lluaana cacajano, jefo oroisite. Eo cuirillano, naimie dine aiscaidimaci. ⁵⁸ Jerusalémona naimiena jino dotadimaci. Naimacimo ite emodomo itiroina duñuanona, Saulo railla conirue ecimo iniroina joneside. Iemei Estebana noficido fairinoside. ⁵⁹ Estebana nofici diga fairinuano, Estebadi Jusiñamuimo ado jide:

—Cue Nama Jesús, cue joreño feiño.

⁶⁰ Ieconai caiñici ifodo rainadacaida ado jide:

—Naimaci bie jeacino finua muidona, ibana oñeno.

Iese naimie jiaa mei, fodaite.

8

Saulo creyentiaina duere finua rafue

¹⁻² Saulo dinena Esteban meiniana jiai jitaide. Cristo rafuena eo inotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiaí duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jaiñodi Samaria railla eniruemo jaidimaci; iadedi Cristo oretagano nine jaiñedimaci. ³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiai gaitade.

Felipe Samariamo illa rafue

⁴ Tuficaida jaidino naga illanomo Jesús rafuena llocana uitimaci. ⁵ Samariamo Felipedi daje nairaímo jaide. Nainomo Cristo rafuena llofueuide. ⁶ Ailluena cominidi Felipe llofuiana eo raise feiñotimaci, naimie siño rafuena finua jira. ⁷ Felipedi diga jananiaí anamo ite cominiona jananiaina oretate. Riire cuirioillano, jaidimaci. Ailluena tisitaitinona jillotate. Ailluena ñuja-ñujacaidinona jiai jillotate. ⁸ Ie jira naie nairaímo ite comini eo iobidimaci.

⁹ Naie nairaimo Simóna mameciredimie ite. Naimie siño rafuena finouide. Iemona Samaria cominina rajjicaitade. Naimie raite:

—Siñomiedicue.

¹⁰ Nana comini naimiena innotimaci. Abina uifioñedino innotimaci. Abina uifiotino jiai innotimaci. Raitimaci:

—Naimie uaidi Jusiñamui ie. Naimiedi siño jito —raitimaci. ¹¹ Iese naimacina are jifue. Naimaci rajjicailla jira, naimaci naimiena cacadimaci.

¹² Te mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llote. Naimaci Felipe llofuiana innotimaci. Inuamona, Felipe naimacina bautizade. Ifiñaina bautizade. Rifioniaina jiai bautizade.

¹³ —Jiai innoticue —Simón di raite. Naimie bautizaja mei, Felipe diga jaiocaide. Felipedi diga siño rafuena finua jira, Simón naiena ciuano, rajjicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaimaiai Juan diga, batine oredimaci. ¹⁵ Iaimaiai rillano, naimaci Jusiñamui Joreña feiñollena Jusiñamuimo jiidiaimaiai, ¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreña nia feiñoñedimaci. ¹⁷ Iecon iaimaiai onolli naimacimo joniano, Jusiñamui Joreña feiñotimaci.

¹⁸ Naimaci Jusiñamui Joreño feiñuana Simón di ciuano, ucubena iaimaiaimo fecacade. ¹⁹ Raite:

—Cuemo omico uaina ine, bumo cue onollna cue joniamona, naimie Jusiñamui Joreña feiñollena.

²⁰ Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena jamai fecade. ²¹ Bie rafuedi omo duiñede. Jusiñamuimona o comeci nia marañede. ²² O comeci iuai meido. Naimie o comecimo ite marañede facajacinuaina oni dotallena, cai Namamo jica.

²³ Omo ailluena marañedicino illana uifioticue. O comeci eo uradoide. Marañedicinona o comecimo namaredio.

²⁴ Simón uai ote:

—O llua cuemo suiñellena, o Nama diga cue facaina ñaino.

²⁵ Cristo rafuena iaimaiai llua mei, Jerusalémo abido bitiaimaiai. Abido billano, Samariumo diga comini illanuaimo Jesús ie mare rafuena llocana bitiaimaiai.

Etiopía imie creyentena jailla rafue

²⁶ Naie facaise Jusiñamui jaienisaimona damie Felipemo llote:

—Beicido joide naido mai jai. Jerusalémona Gazamo joide naisona jai —llote. Naie naiso jofue iñenanodo joide. ²⁷ Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaño diga mañjuide. Naiñaiño mamecidi Candace. Naimiedi nana naiñaiño gobierno ucubena sedade. ²⁸ Naimie jai abido jaillano, ie carretamo raíta, Isaías micori cuela rabenicono ado facade. ²⁹ Jusiñamui Joreño Felipemo llote:

—Naimie dine iairei jai. Carreta dine jai.

³⁰ Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uifotio?

³¹ Naimie uai ote:

—¿Niese uññoiticue, bu cuena canoñenia?

Felipemo jicanote, naimie diga a jaillano danomo raillena.

³² Naimie facaca cuegafue iese raite:

Toica llauda fallena uilla isoi, naimiena uitimaci.

Toica llauda itirai garedino dine eefena isoi, naimie ñañede.

Ie abina riddollena, uaina oñede.

³³ Marañede rafuena naimie finoñede; ia naimiena duere finodimaci.

Naimie uruiai iñededí, ¿bu naimie rafuena lloite?

Meinia meinoconi, naimie jai iñede.

³⁴ Etiopía imie Felipemo jicanote:

—¿Bie lloraima bu iena llote? ¿Dama naimie iena llote? ¿Jiaimiena iena llote? Cuemo llono.

³⁵ Iemei Felipedi bie cuegafuimona naimiemo Jesús ie mare rafuena llote.

³⁶ Naisona jaidiaimaiaimo, jinui illanomo ridiaimaiaia. Etiopía imie dinena raite:

—Ero, bie jinui itemo, ¿bue ñe cuedi bautizañellucue?

³⁷ Felipe uai ote:

—O comecimona o ñnoia, cuemona mare.

Naimie uai ote:

—Jesucristodí Jusiñamui Jitonana ñnoticue.

³⁸ Naimie ie carreta jorodate. Iemei jinui dine jaidiaimaiaia. Felipedi naimiena bautizade. ³⁹ Jinuimona iaimaiaia bia, Jusiñamui Joreño Filipena oni uite. Etiopía imie Filipena dane cioñede; iadedí Etiopía imie iobicana jaide.

⁴⁰ Jusiñamui Joreño Azotomo Filipena uite. Cesarea dine naimie jaillanona, naga nairaiaimo Jesús ie mare rafuena llocana uite. Ie mei Cesareamo ride.

9

Saulo creyentena jailla rafue (Hch 22.6-16; 26.12-18)

¹ Naie facaise Saulo cai Nama Cristona ñnotinona eo duere finoacade. Icirillamona, naimacina meineiacad. Ie jira Jusiñamui diga nanoca ñairaima dine jaide. ² Judíuai comini naie ñairaima anamo illamona, creyentiaina duere finollena, Saulo cartana naimiemo jicajaide. Damascómo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano,

Jerusalémo atillena, naimiena canollena, cartana jitaide. ññiaia baia, riññonia baia, naimacina Jerusalémo atiacade. ³ Cartana ua mei, naimie jaillano, Damascómo iaie ia, ieconí monamona damie naimie abina quetiñote.

⁴ Eniruemo naimie ana uaillano, monamona damie naimiemo lluana cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadio. ⁶ Naidacai. Damascómo mai jai. Nainomo o finolle rafue omo lloiticue.

⁷ Saulo diga jaidinodí ñañeno naidaidimaci. Naie uaina cacaidimaci; iadedí buna cioñedimaci. ⁸ Ieconí Saulo naidacaide. Ie uisí ecoricaillamona,

erodatemo, jai buena cioñede. Ie onollina llinocaida, naimiena Damascocomo uitimaci. ⁹ Darui amani cioñede. Jusiñamuimo comecina facajamona, guiñede. Jiai jiroñede.

¹⁰ Damascocomo Ananiana mameciredimie ite. Naimiedi creyente. Inñenamona, Ananías nicairilla isoi cacallena, Cristodi naimiemo rafuena llote:

—Ananías.

Naimie uai ote:

—Jii, bene iticue.

¹¹ Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jii. ¹² Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

¹³ Ananías uai ote:

—Nama, diga cominimona naimiena fididicai. Jerusalémo naimiedi marañede rafuena ona innotinomo finode. ¹⁴ Jusiñamui diga nanoca ñairaima uai naimiemo ite, nana bene ite creyentiaina gaitallena.

¹⁵ Cai Nama naimiemo llote:

—Mai. Naimie jai cue fetoca, judíuaiñedinomo cue rafuena lollena, illaicominimo cuena lollena, judíuai cominimo cue rafuena jiai lollena. ¹⁶ Cuena naimie jai inua muidona, naimie nie isoi legi cacajite. Naimiemo iena lloiticue.

¹⁷ Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

¹⁸ Ieconí Saulo uisimona lliciaí ico isoide ra uaide. Dane ciuana, naidaide. Ie mei jai bautizaga. ¹⁹ Ie mei jai guite. Dane mairide. Diga irui Damascocomo ite creyentiaí diga naimie ite.

Damascocomo Saulo illa rafue

²⁰ Judíuai ofiracomó naimie jaillanona, Jesús ie rafuena llofuede. “Jesúdi Jusiñamui Jito” raillanona llofuede.

²¹ Nana naimiena cacadinodi rajicaide. Raitimaci:

—Bimie Jerusalémo Jesúsna innotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús díbeimo jai ite.

²² Saulo nagarui jacitaiño llofuíamo fibioicaide. Llofueuide:

—Jesúdi cai Jilloitaraima. —Naimie raise llofuia jira, judíuai dinena iena uaitanidimaci.

²³ Digarui illa mei, judíuai comeciaina facadimaci, naimiena meinellena.

²⁴ Naimie aisii raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano,

²⁵ naiona creyentiaí naimiena oni uitimaci. Naimie jillobillena, llaigafó jinofebeimo cirigaimo rainajanona, naimiena ana ñuitadimaci.

Jerusalémo Saulo illa rafue

²⁶ Jerusalémo naimie jaide. Naimie ria, creyentiaina nabaiacade; ia naimiena jaciruitimaci. Creyentena naimie jaillana inoñedimaci. ²⁷ Ie jira Bernabé naimiena Cristo oretagano dine uillano, naimacimo naiso motomo

Saulo cai Namana ciuana llote. Naiso motomo cai Nama Saulomo lluaña jiai llote. Damasco naimie ia, Jesúna jacitaiñeno llofuiana jiai llote. ²⁸ Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. ²⁹ Iena cacajanona, griego uaina ñaite judúuaidi naimie llofuiana uaitatimaci. Naimiena meineiacadimaci. ³⁰ Creyentiaí iena fidiano, Cesareamo Saulona uitimaci. Ie mei Tarsomo naimiena oredimaci.

³¹ Judeamo, Galileamo, Samariamo nana creyentiaí uri itimaci. Cai Namana iinocana jaidimaci. Cai Namana jaciruioicaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaína jaidimaci.

Eneas jillua rafue

³² Naie facaise diga illanuaimo Pedro macarite. Lidamo ite creyentiaí dine ride. ³³ Nainomo damie biiramo biidena ciode. Naimiedi Eneas. Ocho años tisitailamona biide. ³⁴ Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O biira feri. —Ieconí naimiedi naidate. ³⁵ Nana Lidamo ite comini, nana Sarónmo ite comini diga, naimiena jilluana ciuanona, creyentiaína jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaiño ite. Griego uaimona oni dobañuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. ³⁷ Naie facaise naiñaiño duicotaide. Ie mei fiodaite. Naimaci einamací finua isoi, ie nabaiñiai naiñaiño abina jocodimaci. Iemei aneba ie cuartomo naiñaiñona jonetimaci. ³⁸ Lidamona Jope iaire ite. Pedro Lidamo creyentiaí illana fidiano, menámie naimie dine oredimaci. Iaimaiaína llotatimaci:

—Buena sedaño cai dine raire bi.

³⁹ Ie jira Pedro naidacaida, naie iaimaiaí diga jaide. Naimie ria, aneba ie cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci. ⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raíta, Jusiñamuimo jüide. Abido dobaicaida, naiñaiñomo erodate. Raite:

—Tabita, mai rainaícai.

Ieconí naiñaiño uisi oni erodate. Pedrona ciuano, a rainadate. ⁴¹ Naiñaiño onolli llinuanona, a naidanete. Ie mei Pedrodi feciñuaina, jiaie creyentiaí diga, uaidote, naiñaiño jai cajenana naimaci cioillena. ⁴² Nana Jopemo ite comini naie rafuena fididimaci. Ie jira ailluena comini cai Namana iñotimaci. ⁴³ Jopemo Pedro diga irui Simón jofomo ite. Simóndi ocaina igoina cuidoraíma.

10

Cornelio comeci uai meidua rafue

¹ Cornelio raillamiedi Cesareamo ite. Naimiedi capitán. Italiamona bite soldaduai naimie anamo itimaci. ² Naimiedi Jusiñamui llogacínodo jaide. Nana ie comini diga Jusiñamuina iñnote. Judúuai cominimo ailluena rana jamai fecauide. Jusiñamuimo jüuide. ³ Jitoma ana ia, naimiemo jai nicaírilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

⁴ Naimiena Cornelio jaciruioicaida eruaide. Jicanote:

—Nama, ¿buena jitaídió?

Naimie uai ote:

—Jusiñamui o jiacinuaina jai cacade. Jusiñamuidi duerede cominina o canuana jiai feitañede. ⁵ Mai, Jopemo damerie o mullaiaimona oreta, Simón raillamiena atillena. Naimie jiaie mamecidi Pedro. ⁶ Naimiedi igoi cuidoraïma jofomo ite. Naie cuidoraïma mamecidi Simón. Monailai fuemo naimie jofu ite.

⁷ Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai ñnote. ⁸ Nana naimiemo Jusiñamui jaienici lluaana naimacimo llua mei, Jopemo oretate. ⁹ Ie are naimaci jaillano, Jopemo ianori riacanano, jítoma naidai ia, jofu emodomo Pedro jaide, Jusiñamuimo jillena. ¹⁰ Naimie aimetaite. Guacade. Guillena comini finodemo, naimiemo ñicairilla isoi ite. ¹¹ Mona oni econuana ciode. Aillue sávana isoi, buena ana billana ciode. Eniruemo naga muiduedo maigado ana bite. ¹² Naiemo jiaïforie eruaiðe ocainaiaï ite. Diga eniruemo jorode raniai ite. Diga nuiciniai jiai ite. Nana Moisés micori fimaidoga rille radi ite. ¹³ Naimiedi monamona damie lluaana cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micori fimaidoga rille rana jaca riñedicue.

¹⁵ Monamona damie lluaana dane cacade:

—Jusiñamui jai fimaidoñede. Ie jira iese lloñeno.

¹⁶ Dacaiño amani iese suide. Ie mei naie radi monamo abido jaide.

¹⁷ Pedro ie comecina facade: “¿Ñiese illana cidicue?” Ie dacaiño Cornelio oretagano bite. Simon illa jofu jicanuano, naie nasemo ride. ¹⁸ Simón Pedrona naie jofomo illana jicanotimaci. ¹⁹ Pedro ie ñicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode. ²⁰ Naidacaida, ana jai. Naimaci diga buena sedaño mai jai. O ñine naimacina oredicue.

²¹ Pedrodí comini ñine ana jaide. Raite:

—Omoi jenocamedicue. ¿Bue ñiaibitomoï billa?

²² Uai otimaci:

—Cornelio raillamie anamo iticai. Cornelio mo Jusiñamui jaienici birui llote: “Pedro ñine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina ñnotimie. Nana judíuái comini ñinena naimiedi mareuidimie.

²³ Iena Pedro cacajano, naimie jofomo ñillena naimacina fo uaidote. Ie are naimaci diga jaide. Damerie Jopemo ite creyentiai naimie diga jiai jaidimaci.

²⁴ Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote. ²⁵ Pedro fo jaia, Cornelio ñinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena. ²⁶ Pedrodí naimiena a naidanete. Raite:

—Mai a naidada. Cue jiai jamai ñimadicue.

²⁷ Naimie diga ñaiano fo jaidiaimaiaï. Ailluena comini ofillana ciode.

²⁸ Naimacimo llote:

—Moisés micori judío imie judíuñedimie nabairillana rairuide. Iena uñotomoi. Judíuñedimie jofomo illana jiai rairuide. Ie areruido Jusiñamui ñicairilla isoidífuena cuemo acatate. Iemona jai fueotícue. Jiaie nairai diga cue nabairillena, Jusiñamuimona marenana jai uñotícue. Jusiñamui omoïna

cue jearuillana jai jitañede. ²⁹ Ie jira buena sedañeno biticue, cuena o uaidua jira. ¿Bue ñellena cuena uaidotomoi? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconí Jusiñamui jaienici cuemo bairede. Naimie iniroi quenirede. ³¹ Cuena raite: “Jusiñamui o jiana cacade. Naimiedi duerede cominina o canuana feitañede. ³² Ie jira Jopemo damieriena oreta, Simón Pedrona uaidollena. Jiaie Simón jofomo ite. Simóndi igoí cuidoraima. Ie jofó monaillai fuemo ite”. ³³ Iemona ona uaidotícue. O comeci marena jira, bene bitio. Jai nana bene iticai. Jusiñamui cai diga jiai ite. Cai Nama nana omo llana cacareillena, bene iticai.

Corneliomo Pedro llua rafue

³⁴ Pedro uai ote:

—Jusiñamui nana comini naimie ñnuana jitaillana jai uifotícue. ³⁵ Naga nairaimona Jusiñamuidi cominina jai jitaide. Bu naimiena ñnoia, bu mare rafuedo jaja, Jusiñamui naimiena jai jitaide. ³⁶ Cai judíuai cominimo Jesucristo llumona, Jusiñamui díbeimo cai illena jai uifotícai. Iemona Jusiñamui diga cai uri illana jai jiai uifotícai. Jesúdi nana cai Nama. Bie rafuena navui janore fididomoi. ³⁷ Nana Judeamo bie rafue llocana jai jaide. Juan micorí bautizajana llua mei, Galileamo Jesús naimie llofuiana tainede. ³⁸ Jusiñamuidi ie Joreña Jesúmo fecade. Jesúdi Nazaret imie. Naimiemo ie uaina jiai fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. ³⁹ Judíuai eníruemo nana naimie siño finoca rafuena ciodícai. Iena birui llocabitícai. Cruzmo jonianona, cai illaicomini naimiena meinetimaci; ⁴⁰ iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiai ciodícai. ⁴¹ Nana comini naimiena ciodimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guitícai. Naimie diga jamai jirodícai. Naimiena cai raise uifua jira, Jusiñamui caina fetode, naie rafuena llollena. ⁴² Cominimo bie rafuena llua caimo llote. Jusiñamui Jesúna jai fetode, naimiena ñnoñedinona duere finollena. Nia fiodañedinona duere finoite. Jai fiodaitinona jiai duere finoite. Ie jira Jesús rafuena llocana jaidícai. ⁴³ Jesú muidona naga naimiena inotimie ie marañedicinodi Jusiñamui dotalle. Iena nana Jusiñamui facaina lloraini micoríai jai llotimaci.

Judíuañedinó Jusiñamui Joreña feiñua rafue

⁴⁴ Pedro biena nia llofueia, Jusiñamui Joreña nana bie rafuena cacadinomo bite. ⁴⁵ Iena cianona, Pedro diga bite creyentiaí rajicaidimaci. Naimacidi judíuai comini. Judíuañede cominimo Jusiñamui ie Joreño jai fecaja jira, rajicaidimaci. ⁴⁶ Jusiñamui Joreño naimacimó illamona, judíuañedinodi jiaie nairai uailaído ñaitimaci. Naie ñaia uailaina uifañedinomaci. Jusiñamuimo iobillacinona jai fecadimaci. Pedro diga bitino iena cacajano, rajicaidimaci. Iemei Pedro raite:

⁴⁷ —Cai feiñua isoi, Jusiñamui Joreña jiai feiñotomoi. Omoi bautizallena jaca budí rairuíñeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

11

Jerusalémo Pedrodi naimiemo jai suide rafuena lloste

¹ Judeamo ite Cristo oretagano, jiaie creyentiaí diga, judíuáiñede comíni Jusiñamui uaina feiñuana fididimaci. ² Pedro Jerusalémo abido ria, judíuái comíni naimiema icidimaci. ³ Jicanotimaci:

—¿Bue ñellena judíuáiñedino jofomo jaidio? ¿Bue ñellena naimaci diga guitio?

⁴ Pedro uai uanona, naimacimo naie rafuena nagacinuaina lloste:

⁵ —Jopemo navui cue ia, Jusiñamuimo cue jiaia, nicañilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride. ⁶ Nainomo eruaidicue, diga rana ciodicue: ocainaiaia, eniruemo jorocana jaidinona, nuiciniaina. Iena ciodicue. ⁷ Monamona damie cuemo lluaana cacadicue. Raite: “Pedro, naidacailanona, fajanona, rino”. ⁸ Naie uai oticue: “Nama, dama ite. Moisés micori fimaidoga rille rana jaca riñedicue”. ⁹ Monamona dane cuemo lloste: “Jusiñamui iena jai fimaidoñede. Ie jira iese lloñeno”. ¹⁰ Dacaiño amani iese suide. Ie mei monamo nana abido dane jaide. ¹¹ Ieconí daje amani iima cai illa jofomo ridimaci. Cesareamona cue ñine damie naimacina orede. ¹² Jusiñamui Joreño di naimaci diga buena sedaño cue jaillena cuemo lloste. Cue diga seis creyentiaí jai jaidimaci. Cuenaa uaidotimie jofomo jaidicai. ¹³ Nainomo cai rilla mei, naimie ie jofomo Jusiñamui jaienicina navui ciuana caimo lloste. Naie jaienicí naimiemo lloste: “Jopemo cominina oreta, Simón Pedrona atillena. ¹⁴ O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comíni diga” lloste. Ie jira naimie cuena uaidote. ¹⁵ Nainomo cue llofuaí facaiseconí, nano dofoconí caimo billa isoi, Jusiñamui Joreño naimacimo bite. ¹⁶ Iena cue ciuamona, cai Nama Jesús lloga uaina comeciticue. Naimie navui lloste: “Juan micori rafuena comíni feiñuamona, Juan naimacina bautizade; iadedi cue rafuena omoi feiñuamona, cue Moo ie Joreño birui feiñoitomoí”. ¹⁷ Cai Nama Jesucristona cai iñuamona, Jusiñamuidi ie Joreño caimo navui fecade. Naimacimo daje isoi birui fecademo, ¿ñiese Jusiñamui dibeimo iñeiticue?

¹⁸ Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuáiñede comíni comeciaí iuai meiduaa jai jitaide. Naimie dibeimo naimaci illana jai jitaide. Ie jira naimieri iobidicai.

Antioquíamo ite creyentiaí illa rafue

¹⁹ Esteban micorina duere finua facaise, creyentiaí tuficaida jaidimaci. Feniciamo damierie jaidimaci. Chipremo damierie jai jaidimaci. Antioquíamo damierie jai jaidimaci. Dani judíuái cominimo naimaci rafuena llotimaci; ²⁰ iadedi tuficaidinomona jaiño Chripremona billanona, Cirenemona billanona, Antioquíamo rillano, judíuáiñedinomo cai Nama Jesús rafuena llotimaci. ²¹ Cristo uai naimacimo illamona, ailluena comíni iñotimaci. Cai Nama dibeimo jaidimaci. ²² Jerusalémo ite creyentiaí iena fidiano, Antioquíamo Bernabéna oretatimaci. ²³ Naimie ria, naimaci marena illamona, naimiedi Jusiñamui naimacina dueruillana uñote. Ie jira iobide. Imaci comeciaí ocuiñocana iñocana jaillana naimacimo lloste. ²⁴ Naimiedi maremie Jusiñamui Joreño nana naimie comecimo namatadimie. Jusiñamuina eo iñotimie. Naie facaise ailluena comíni creyentiaína jaidimaci.

²⁵ Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. ²⁶ Daje año creyentiai diga nabairillanona, naimacina llofuetiiaimaiai. Antioquíamo creyentiaidi cristianona nano mameciredimaci.

²⁷ Iemei Jerusalémona Antioquíamo damierie Jusifamui rafuena lloraini bitimaci. ²⁸ Naimacimona Agabo raillamie ite. Jusifamui Joreñodi naimiena llotatate:

—Nana comini ico aime guitimaci. —Claudio illaimana illa facaiseconi iese jai suide. ²⁹ Ie jira Antioquíamo ite creyentiaidi, Judeamo ite creyentiaimo, ucubena oretaiacadimaci. ³⁰ Nagamiiai imacimo illa dierise ucubena oredimaci. Creyentiaina llofuerainimo Bernabé diga, iaimaiai Saulo diga, naie ucubena oredimaci.

12

Herodes Agripadi creyentiaina duere finua rafue

¹ Naie facaise Herodes railla illaimadi creyentiaimona damieriena gaitatate, naimacina duere finollena. ² Lloebi diga Jacobo cimaiona jaitatate. Jacobodi Juan ama. ³ Ieri judíuai illaicomini iobidimaci. Iena uifnuamona, Herodes Pedrona jiai gaitatate. ⁴ Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomona naimiena meineiacade. ⁵ Ie jira Pedro cárcelmo fiebide; iadedi creyentiai naimie facaina eo jidimaci. ⁶ Herodes naimiena meineiacanarui nai Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci. ⁷ Ieconí cai Nama ie jaienici di cárcelmo bairede. Cácelmo lligaiñote. Naimiena casitallena, jaienici Pedro ciragina jetade. Raite:

—Raie naidacai.

Ie mei naimie onollimo ite lloeodi oni uaide. ⁸ Jaienici naimiena raite:

—O iniroina jita. O zapatona jiai jita— Iena jítaja mei, naie jaienici dane raite—. O iniroi o abimo ferino. Cue diga mai bi.

⁹ Naie jaienici jinafona Pedro jino jaide. Pedrodi naie jaienici naimiemo finoca rafuena uifnoñede.

—Nicañilla isoi comequina facadicue —raite. ¹⁰ Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaimaiai. Daje calle jaillanona, jaienici naimiena fainonocaide. ¹¹ Iemona Pedro naimiemo suide rafuena jai uifnoñe. Raite:

—Cue Nama ie jaienicina uanai oretate. Herodemona cuena jillobitade. Judíuai illaicomini cue meinellena cue sedajamona cuena jillobitade.

¹² Iena jai naimie uifnuano, María jofomo jaide. Mariadi Juan Marcos ei. Jusifamuimo jüllena, naicomona ailluena comini ofidimaci. ¹³ Rillanona calle fuemo ite nasena tute. Daje mullaiño bite. Naiñaiño mamecidi Rode. ¹⁴ Naimie uaiduamona, naiñaiño Pedro uaina uifnote. Iobilla jira, nase econoñede; iadedi abido fo aiside. Pedro nasemo illana llote. ¹⁵ Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

¹⁶ Pedro nasena nia tua jira, nasena econuaibitimaci. Econuamona naimiena naimaci ciuamona, rajjicaidimaci. ¹⁷ Fo jaillano, Pedro ie onolli jaidide, naimaci llcaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jiaínomo jaide.

¹⁸ Monaidemo, Pedro nainomo iñena jira, soldaduai rajjicaillanona, siadotimaci. ¹⁹ Herodes iena fidiano, naimiena jenotate. Naimiena baiñena, soldaduaímo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

Herodes micori fiodailla rafue

²⁰ Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidiñiedi Blasto. Blasto diga naie cominidi nabairite, naimaci díbeímo naimie illena. Herodes enruemona naimaci guille billa jira, uri illena naimie mo jicanote. ²¹ Naie cominina Herodes feiñollena, ie ebirede iniroina jitade. Naimacina feiñollena, ie rairabicímo raide. Iemona raíta, rafuena are llote. ²² Iena cacajano, comini ado cuiriidimaci:

—Jamai iimadi ñaiñena. ¡Jusiñamui ñaia!

²³ “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiai naimiena aite. Iemona naimiedi fiodaite.

²⁴ Naie facaiseconi Jusiñamui uai llocana jaide. Ailluena comini iena iinotimaci.

²⁵ Iaimaiai uiga ucube illanona, Bernabé, Saulo diga, Jerusalémona Antioquíamo abido bitiaimaiai. Juan Marcos jiai atidiaimaiai.

13

Bernabéna, iaimaiai Saulo diga, fetua rafue

¹ Antioquíamo creyentiai motomo Jusiñamui facaina lloraíni itimaci. Llofueraíni jiai itimaci: Bernabé, Simón. Simón di jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enrue gobernador. Saulo jiai ite. ² Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

—Bernabé iaimaiai Saulo diga fetu, cuejena. Cue rafuena iaimaiai llollena, iaimaiaína jai fetodicue.

³ Jusiñamuimo naimaci jia mei, Jusiñamui iaimaiaína fetuana naimaci uíñuamona, naimaci onolli iaimaiaímo jonía mei, iaimaiaína naimacimona oni oretatimaci.

Pablo, iaimaiai Bernabé diga, Chipremo illa rafue

⁴ Iaimaiaína Jusiñamui Joreño oretaja jira, Seleuciamo jaidiaimaiai. Nainomona botedo Chipremo jaidiaimaiai. Chipredi uiasi. ⁵ Chipremo ria, Salaminamo judíuai ofracuaímo Jusiñamui uaina llofuetiaimaiai. Juan Marcos iaimaiai diga jiai jaide. ⁶ Nana naie uiasimo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raite; iadedi taino lloraíma. ⁷ Gobernador diga maijuiude. Gobernadordi Sergio Paulo. Gobernadordi abina uíñotimie. Jusiñamui uaina

cacaacana jira, naimie Bernabé iaímaiaí Saulo díga uaidote. ⁸ Barjesús ie jiaíe mamecidi Elimas. Naie iaímaiaí llofuiana uaitate. Gobernador ínuana jitaiñede. ⁹ Saulodi jiaíe mameci Pablo. Pablo dinena naimiena eo eruaillano, Jusiñamui Joreño nana Pablo comecimo namatajamona, ¹⁰ naimiemo llote:

—¡Eo jifueraimadio! ¡Eo marañedio! ¡Tañe díbeimo itio! Nana mare rafue díbeimo íñedio. Cai Nama ie mare uanaicinona dobairaidodio. ¹¹ Cai Nama ie uaido ona ja iracotaitaicue. Nano nigarui useredinona cioíñeitio.

Ieconí naimie cioíñede. Comínina jenuaide, ie onollido llinocaida ie uillena. ¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaita.

Jesús rafuena llocana jaidíiaímaiaí

¹³ Pafomona botedo Pablo ie nabaiñiaí díga jaide. Perge railla nairaimo ride. Perge Panfilia railla eniruego ite. Juan Marcos iaímaiaina fainonocaida, Jerusalémo abido jaide. ¹⁴ Pergemona Antioquíamo jaidíiaímaiaí. Pisidia railla eniruego Antioquía ite. Sábadoruimo judíuaí ofiracomo jaillano, ana raidíiaímaiaí. ¹⁵ Moisés micorí cuegafuena facaja mei, Jusiñamui facaina llorainí micoriaí cuegafuena facaja mei, judíuaí ofiraco sedadino iaímaiaímo llotimaci:

—Caimaci, comínimo bue omíco lloiacania, mai llono.

¹⁶ Pablo naidadajano, ie onollina jaidíe, comíní lliicaillena. Raite:

—Jusiñamuina sedallena bene itomoi. Omoimona damierie judíuidomoi. Jiaino judíuaíñedomoi; iadedi judíuaí isoi Jusiñamuina sedadomoi. Cue lluomo mai cacarei. ¹⁷ Iemona omoi fueollena, cai jaiagai rafuena lloiticue. Cai judíuaí comíní Jusiñamuina birui sedadicaí. Naimiedi cai jaiagaina jaie fetode. Egiptomo naimaci ía, naimacina eo jebuitate. Nainomona ie siño uai díga naimacina atide. ¹⁸ Jofue íñenanomo cuarenta años naimacina canode. ¹⁹ Canaán eniruego siete nairaina cuenode. Cai jaiagaimo, naimaci uruaí díga, naie eniruena fecade, naimaci íena. ²⁰ Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie díbeimo naimacina itatallena, Jusiñamui naie jueces fetode; iadedi Samuel micorí illa facaise juecesna jai jitaiñedimaci. Samuel micorídi Jusiñamui facaina lloraima. ²¹ Illaimana naimaci jitailla jira, Jusiñamui Saúl micorína fetode. Naimiedi Cis micorí jito. Naimie micorí nairaidí Benjamín. Cuarenta años Saúl micorí cai usumatiaí micoriaína sedade. ²² Naimie ifo meidollena, naimaci illaimana illena, Jusiñamui David micorína fetode. Naimiedi Isaí micorí jito. Jusiñamui naimie micorína llote: “Bimie eo cue comecido jaidimie. Nana cue jitaile rafuena finoite”. ²³ Jusiñamui llua isoi, David micorí uruaímona Jesúsdi cai judíuaí comíní Jilloitaraímana jaide. ²⁴ Jesús nia llofueñena, Juan Bautista micorí llofueuide. Juan micorí cai comínimo llouide: “Omoi jeacinona fainonocaida, Jusiñamui díbeimo omoi comeciaí uaillaí meido. Iena omoi meidoia, comíní íena uifotallena, mai omoi bautizallomoi”. ²⁵ Juan micorí ie llofuia fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoíñedicue. Jamaí bue isoídicue. Jamaí bue cue isoilla jira, naimiena cue canuana uifñedicue”.

²⁶ Caimaci, cai eirue jito Abraham micorímona comuidicaí. Jusiñamuina birui sedadicaí. Ie jira cai jeacinomona naimie jilloitalle rafue caimo duide. Jesúna ñaiticue. ²⁷ Jerusalémo ítinodi, cai illaicomíní díga, Jesúna

jaie meinetimaci. Naga sábadu Jusiñamui facaina lloraini micoriai ciegafuina facadimaci; iadedi iena raise cacañedimaci. Jesúna naimaci meini-
 amona, Jusiñamui lloraini micoriai ciegafuina jai suitatimaci. ²⁸ Jesús marañede rafuena finoñede; iadedi naimiena meinetimaci. Pilatomo jicanotimaci; naimiena meinellena. ²⁹ Nana Jusiñamui facaina lloraini micoriai ciegafuina suilla mei, cruzmona naimie ana uano, nofici ie raiafomo naimiena jonetimaci; ³⁰ iadedi fiodaillamona Jusiñamui naimiena jillotate. ³¹ Galileamona Jerusalémo naimie diga jaidino naimiena diga icaiño ciodimaci. Temei cominimo naimie rafuena jai llocabitimaci. ³² Jusiñamui cai jaiagaimo jaie lloga rafue jai suide. Iena omoimo ja lloiticoco. ³³ Jusiñamuidi cai jaiagaimo llogafue birui jai suide. Jesúna cai dine jai orde. Naiena salmos dosmo cuela: “Jusiñamui llote: ‘Cue jitodio. Birui ona jilloitaraimana itataticue’”. ³⁴ Fiodaillamona Jusiñamui naimiena jai jillotate. Ie abi jaca rifañede. Iena Jusiñamui jiai raite: “Davidmo cue llogacinona omoi facaina jaca fnojiticue”. ³⁵ David micori jaiie salmomo iena cuete: “O mareuidimie jaca rifaillana jitañedio” raite. ³⁶ Jusiñamui David micorina ñañede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; ³⁷ iadedi Jusiñamui Jito abidi ie isoi rifañede.

³⁸ Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi marañedicinomona omoina jillotañede; ³⁹ iadedi Jesúna birui omoi ñnoia, omoi jeacino anamona jilloitomo. ⁴⁰ Abina omoi rairui, Jusiñamui facaina lloraini micoriai jaie ciegafuina omoimo sui raillano. Jaie cuetimaci:

⁴¹ Ero, Jusiñamui uaina jamaidomoi. Ieri rajicaidomoi; iadedi faifidomoi.

Omoi motomo siño mare rafuena birui finodicue.

Bu omoimo iena iese lloia, bie rafuena ñnoñeitomoi.

Ie isoi omoimo suiñellena, Jesúna birui omoi mai ñno.

⁴² Ie mei Pablo lliicaide. Iaimaiaia jino jaidemo, comini iaimaiaimo jicanotimaci, jaiie sábadoruimo bie rafuena naimacimo dane lllollena.

⁴³ Comini jino jailla mei, ailluena comini Pablo, iaimaiaia Bernabé diga, ñaicana jaidimaci. Judíuai iese jaidimaci. Judíuaiñedino iese jiai jaidimaci. Naie judíuaiñedinodi judíuai isoi Jusiñamuina ñnotimaci. Pablo, iaimaiaia Bernabé diga, ñaicana jaillanona, naimacimo llotiaiaiaiaia:

—Jusiñamui omoina duenaillana omoi jai uiñua jira, Jesús rafuena mai omoi ñno.

⁴⁴ Jaiie sábadoruimo ailluena comini ofidimaci, Jusiñamui uaina cacareillena. ⁴⁵ Ailluena cominina ciano, judíuai comini dinena eo uradoidimaci. Pablo joreñona ñaitimaci. Naimie llofuaiacinuaina uaitatimaci; ⁴⁶ iadedi Pablo, iaimaiaia Bernabé diga, jacitaiñeno llofuetiaiaiaiaia:

—Omoimo Jusiñamui uaina nano lloiacadicoco. Iena jitañedomoi. Jusiñamui diga omoi jaca illena jitañedomoi. Ie jira judíuaiñedino dine jaiticoco. ⁴⁷ Iese Jusiñamui jaie llote:

Judíuaiñedinomo ona oretaticue, naimacimo cue rafue lllollena, naga eniruemo ite cominimo jeacinomona jilluana lllollena.

⁴⁸ Iena cacajano, judíuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci. ⁴⁹ Nana bie eniruemo cai Nama Jesús uaina llocana jaide;

⁵⁰ iadedi judíuai dinena diga cominina fuemo faicana uitimaci. Jusiñamuina

sedade riñoniaina fuemo faicana uitimaci. Naie riñoniai mameciai are soride. Illaicomini fuemo faicana uitimaci. Ie jira Pablo, iaimaiai Bernabé diga, duere finodimaci. Naimaci illanomona iaimaiaina jino dotadimaci; ⁵¹ iadedi jioracuai iaimaiai eillimona jaidinotiaimaiai, naimacimo ite jeacinuaina naimaci uiñollena. Ie mei Iconio railla nairaimo jaidiaimaiai; ⁵² iadedi Antioquíamo ite creyentiai eo iocire itimaci. Jusiñamui Joreño nana naimaci comecimo namatade.

14

Iconiomo Pablo, iaimaiai Bernabé diga, illa rafue

¹ Iconiomo judíuai ofiracomo, iaimaiai Antioquíamo jailla isoi, jaidiaimaiai, Cristo rafuena duere llotiaimaiai. Ie jira ailluena comini creyentiaina jaidimaci. Judíuai cominimona ailluena inotimaci. Judíuaiñede cominimona ailluena jiai inotimaci; ² iadedi inoñede judíuaidi judíuaiñedinona fuemo faitimaci. Naimacimo creyentiaina tainona llotimaci; ³ iadedi nainomo are fiebidiaimaiai. Cai Nama facaisena jacitaiñeno llotiaimaiai. Cai Nama Jesús iaimaiaina siño rafuena finotate. Ie jira cominidi cai Nama Jesús naimacina dueruillana fididimaci; ⁴ iadedi nana comini naiena inoñedimaci. Comeciaina daje isoi lloisiñede. Damierie judíuai facaisena itimaci. Damierie naie iaimaiai facaisena itimaci. ⁵ Judíuaiñedinodi, judíuai diga, naimaci illaicomini diga, naie iaimaiaina duere finoacadimaci. Noficina iaimaiaina fairigiacadimaci. ⁶ Iena fidiano, Licaoniam ite nairaimo aisanca jaidiaimaiai. Listra railla nairaimo jaidiaimaiai. Derbe railla nairaimo jiai jaidiaimaiai. Naie nairai ecimo ite eniruemo jiai jaidiaimaiai. ⁷ Nainomo Jesús ie mare rafuena llofuetiaimaiai.

Listramo iaimaiaimo suilla rafue

⁸ Listramo damie tisitaitaite. Nanomona naimie iese jeicia jira, jaca macariñede. ⁹ Pablo llofuiana naimie raise cacajamona, “Jusiñamui cuena jil-lotarede” raillanona, tisitaitimie inote. Pablo dinena naimiemo eruaillano, naimie inuana uiñote. ¹⁰ Naimiemo ado llote:

—A naidada.

Iemei daiacaida naimie macarite. ¹¹ Ailluena comini Pablo finoca rafuena ciodimaci. Naimaci uaido ado cuiriidimaci:

—Hiñiai isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiai sedauidimaci. ¹² Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira. ¹³ Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo fecaacadimaci. ¹⁴ Iaimaiai iena cuanona, “Comini maraiñede rafuena finoacade” raillano, iaimaiai iniroina cuaranotiaimaiai. Comini motomo aisanca jaidiaimaiai. Ado llotiaimaiai:

¹⁵ —Nabaiñiai, ¿bue ñellena cocomo iese finodomoi? Jamai iimadicoco. Omoi isoidicoco. Jusiñamuina omoi sedallena, jamai rana omoi sedañellena, mare rafuena omoimo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiai finode. Nana nainomo ite rana jiai finode. ¹⁶ Jai Jusiñamuidi nana omoi judíuaiñedinomoi jitailla rafuena finuana rairuiñede; ¹⁷ iadedi naimie finoca rafuemona naimiena

uiñoredomoi. Omoi facaina mare rafue naimie finocabide. Noci deitate. Omoi riara sicotate. Omoimo guille itatate. Iemona omoi comeciaina caimare itatate. Iemona Jusiñamuina uiñoredomoi.

¹⁸ Iese Pablo llot; iadedi iaiaiaimo juraretaiaina fecajana jaca faionocaiacaiñedimaci. ¹⁹ Nano nigarui illamona, Pisidiamo ite Antioquíamona judíuai comini bitimaci. Iconiomona jiai bitimaci. Judíuai dinena fuemo faiamona, naimaci díbeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fiodaitimiena naimie eruaiilla jira. ²⁰ Naimiena iese faionocailla mei, creyentiaí naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide. ²¹ Naie nairaimo Jesús ie mare rafuena llotiaiaiaia. Diga comini creyentiaina jaidimaci. Ie mei Listramo abido jaidiaiaiaia. Iconiomo abido jiai jaidiaiaiaia. Pisidiamo ite Antioquíamo jiai abido jaidiaiaiaia. ²² Creyentiaí comeciaina ocuiñotadiaiaiaia. Cristona nia ñnuana llotiaiaiaia. Raitiaiaiaia:

—Jusiñamui dine cai nia riñenia, eo duere sefuiticaí.

²³ Naga creyentiaí illanomo creyentiaina sedarainina fetodiaiaiaia. Guiñeno Jusiñamuimo jia mei, guiñena facaise mei, naimiena naimaci jai ñnua jira, cai Nama illa anamo naimacina faionocaidiaiaiaia.

Siriamo ite Antioquíamo abido jaidiaiaiaia

²⁴ Pisidiamo jaillanona, Panfiliamo ridiaiaiaiaia. ²⁵ Pergemo Cristo uaina llua mei, Ataliamo jaidiaiaiaiaia. ²⁶ Nainomona botedo Siriamo ite Antioquíamo abido ridiaiaiaiaia. Nano naie iaiaiaiaí illanomo abido ridiaiaiaiaia. Nainomona iaiaiaiaí navui nia jaiñenia, creyentiaí dinena Jusiñamui iaiaiaiaina duenaillana uiñuamona, iaiaiaiaina oredimaci. Jusiñamui rafuena iaiaiaiaí lllollena, iaiaiaiaina oredimaci. Naie maijia fuilla jira, jai abido bitiaiaiaiaia. ²⁷ Iaiaiaiaí rilla mei, creyentiaina ofitatiaiaiaiaia. Nana Jusiñamui iaiaiaiaimo finoca rafuena llotiaiaiaiaia.

—Jusiñamuidi judíuaiñedino naimiena ñnuana jai jitaide —llotiaiaiaiaia.

²⁸ Dinomo creyentiaí diga are itiaiaiaiaia.

15

Jerusalémo Moisés micori llogacinona siadua rafue

¹ Antioquíamo Jerusalémona janore comini billano, creyentiaina iese llofuetimaci:

—Moisés micori caimo llua isoi, omoi abina omoi detatañenia, jeacinomona jillobiñeitomoi.

² Ie jira creyentiaí uri iñedimaci. Pablo, iaiaiaiaí Bernabé diga, Jerusalémona bitino llofuiana eo uaitatiaiaiaiaia. Ie muidona creyentiaí dinena iaiaiaiaina, jiaie creyentiaí diga, Jerusalémo jaillena fetodimaci. Cristo oretagano diga, Jerusalémo ite creyentiaina sedaraini diga, bie rafuena siadoiacasite. ³ Creyentiaí naimacina oretaja mei, Fenicia railla enirue díbeido jaidimaci. Ie mei Samaria railla enirue díbeido jiai jaidimaci. Creyentiaí illanuaimo llofuecana jaidimaci. Judíuaiñedino creyentiaina jai jaillana naimacimo jiai llotimaci. Ie jira naie creyentiaí caimare itimaci.

⁴ Jerusalémo ria, creyentiaidí naimacina feiñotimaci. Cristo oretagano itimaci. Creyentiaina sedaraini jiai itimaci. Naimacimo nana Jusiñamui iaiaiaiaimo finoca rafuena llotiaiaiaiaia. Cristo rafuena iaiaiaiaí llofuiaimona, judíuaiñedino Cristona ñnuana llotiaiaiaiaia. ⁵ Iena cacajano, fariseuai díbeimo ite creyentiaimona jiaino naidaita raitimaci:

—Moisés micorí llogacínuaína ñnuamona, judúuaiñede creyentíai abína diana jitaídicaí.

⁶ Bie rafuena siadollena, Cristo oretaganodi, creyentíai sedaraini diga, danomo ofidímaci. ⁷ Iena are siadua mei, Pedro naidacaillano, raite:

—Amatíai, judúuaiñedinodi cuemona Jesús ie mare rafuena cacaillena, jaie omoimona Jusíñamui cuena fetode. Iena uñotomoi. Cue llofuaiamona ñnotímaci. ⁸ Nana comini comeciaina naimie uñuamona, judúuaiñedinodi naimiena ñnuana Jusíñamuidi uñote. Caímo fecaja isoi, ie Joreño naimacimo fecaja jira, Jusíñamuidi judúuaiñedinona jitaillana jai uñotícaí. ⁹ Jusíñamuidi naimacina caí isoi jai feñote. Naimiena naimaci ñnuua jira, naimie naimaci comeciámona jecinona jai dotade. ¹⁰ ¿Bue ñellena Jusíñamuina ñnoiacañedomoi? Jusíñamui jitaillacino omoi fínoacañena jira, naimie omoína duere finuana jitaídomoi. Caí jaiagai Moisés micorí llogacínodo jaidímaci; iadedi iena raise ñnoñedímaci. Nana ie llogacínona jaca fínonidímaci. Iedo jaie jai jaídicaí; iadedi iena jai fínonidícaí. ¿Bue ñellena iedo birui caí jaillana jitaídomoi? ¹¹ Jesucristo caína duenailla jira, caí jecinomona jilloíticaí. Judúuaiñedinodi caí isoi jilloítímaci.

¹² Iena cacajano, nana ofidino uai llícaídímaci. Iemei Bernabé lluana cacadímaci. Pablo lluana jai cacadímaci.

—Jusíñamui judúuaiñedinodi motomo cocona síño rafuena fínotate — llotíaiamaíai.

¹³ Iaimaíai ñaíai mei, Jacobo raite:

¹⁴ —Amatíai, cuemo cacarei. Judúuaiñedinomoni Jesús rafue Simón Pedro nano llua rafuena jai cacadicaí. Creyentíaina naimaci jaillena, Jusíñamui naimacina jai fetode. ¹⁵ Jusíñamui facaina lloraini micoríaí iena jaie cuetímaci:

¹⁶⁻¹⁸ Jusíñamui jaie llote: “David micorí illaíma isoi illaímana illena, cue Jitona íco oretaitícué.

David jicorí jito illaímana birui íñede;
iadedi David micorí ífomo illaímana cue Jito íite.
Iemona judúuaiñedinodi cuena ñnoítímaci.
Naimaci cue comínina jaillena jai jitaídícué.
Iena cue llua jira, iena fínoítícué” llote.

¹⁹ Ie muidona cue comeci raite: Judúuaiñedinomona creyentíaina jaidínona duere fínoñeíticaí. ²⁰ Naimacimo rabena oreta, dama buena lloíllena: “Jiraraimo fecaca llicisina riñeno. O añede riño diga íñeno. O íniñede íima diga íñeno. Llerínoga rana riñeno. Diruena jai riñeno”. ²¹ Jaiemona naga sábado naga judúuai ofiracomo judúuaiídi Moisés micorí cüegafuíaíamona naie isoide lletarafuena cacadímaci. Ie jira naie isoide rafuedo nia jaitícaí: iadedi jiaíe Moisés micorí lletarafuedo jaiñeíticaí.

²² Ie mei Cristo oretaganodi, creyentíaina sedaraini diga, comeciaina facadímaci, naimacimona comínina fetollena, Antioquíamo oretallena. Nana creyentíai comeciaina facajano: “Jee” raitímaci. Pablo, iaimaíai Bernabé diga, naimacina oretaiacadímaci. Judana fetodímaci. Naimie mameci jiaícidi Barsabás. Silana jai fetodímaci. Jiaie comini baífemo rafuena baitadíaiamaíai. ²³ Rabena cuetímaci, iaimaíai diga oretallena. Iese raillano, cuetímaci:

“Antioquíamo ítino, Siríamo ítino, Cilíciamo ítino, omoímo cuetícaí. Jerusalémo íticaí. Cristo oretaganodícaí. Creyentíaina sedarainídícaí. Omoidi caí amatíai. Omoímo jai cuetícaí. Judúuaiñediomoi; iadedi caí amatíaidomoi.

24 Cai motomona jiaie comini naimaci llofuiado omoina uri itatañenana fididicai. Omoi jeacinomona omoi jilloillena, Moisés micori llogacinodo omoi jaillana jitaïdimaci. Ie jirari omoi comeciai rucaicuerite. Naimacina oretañedicai. 25 Danomo cai ofilla mei, menamiëna fetodicai, omoimo oretallena, Bernabé, iaïmaiai Pablo diga. Bernabéna isiruiticai. Pablona jiaï isiruiticai. 26 Iaïmaiai cai Nama Jesucristo muidona navui niadedi fiodaitiaïmaiai. 27 Ie jira Judas, iaïmaiai Silas diga, oretaiticai. Omoimo bie rabe cuia isoi lloitiaïmaiai. 28 Jusiñamui Joreño caïmo illamona, bie rafuena omoimo lloiticai. Ailluena rafue omoi finuana lloñeiticai. Dani bie rafuena finojitomoï. 29 Jiraraïmo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno. Iese omoi iñenia, marena iitomoï. Macaibaite” cuetimaci.

30 Ie mei Antioquíamo jaidimaci. Ailluena cominina ofitaja mei, naimacimo cartana fecadimaci. 31 Iena facajano, naie luacinori iobidimaci. 32 Judas Jusiñamui facaina lloraima. Silas daje isoide. Diga rafuena creyentiaïmo llofuetiaïmaiai. Naimaci comeciaina jiaï ocuiñotadiaïmaiai. 33 Diga irui nainomo illa mei, iaïmaiaïna oretatinomo creyentiaï iaïmaiaïna marena abido oretatimaci.

34 Nainomo Silas comecina facajano, fiebide. Ie jira Judas dama abido jaide. 35 Antioquíamo Pablo, iaïmaiai Bernabé diga, cai Nama Jesús rafuena llofuellena fiebidiaïmaiai. Diga comini jiaï iese llofuetimaci.

Pablo jiaie eniruemo ite creyentiaï dine dane jailla rafue

36 Diga irui illa mei, Pablo Bernabémo lloite: p —Naga navui coco lua nairaïmo creyentiaï dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

37 Bernabédi, naie iaïmaiai diga, Juan Marcos uiacade. 38 Panfiliamo iaïmaiaïna navui Juan faïnonocaïde. Iaïmaiai diga llofuellena jaiñena jira, Pablo naimiëna dane uicaiñede. 39 Riire ñaitiaïmaiai. Comecina daje isoi lloñediïmaiai. Ie jira dajena jaiñediïmaiai. Bernabé Juan Marcona uillanona, Chipremo aillue botedo jaidiaïmaiai. 40 Ie mei Pablo Silana uite. “Jusiñamui omicono canoite” creyentiaï dina raïllanona, iaïmaiaïna oredimaci. 41 Siria railla eniruemo Jesús rafuena llocana jaidiaïmaiai. Cilicia railla eniruemo jiaï llocana jaidiaïmaiai. Creyentiaï comeciaina ocuiñotacana jaidiaïmaiai.

16

Timoteo iaïmaiai diga jailla rafue

1 Nano Derbemo Pablo, iaïmaiai Silas diga, ridiaïmaiai. Iemona Listramo ridiaïmaiai. Nainomo Timoteo railla creyente ite. Naimie eidi judía iñaiñio. Jiaï creyente. Ie moo micoridi griego imie. 2 Listramo ite creyentiaï, Iconiomo ite creyentiaï diga, naimiëna: “Mare” raitimaci. 3 Pablodi Timoteona uiacade, naimie diga jaillena. Timoteo moo micoridi griego imiëna jira, naimie abina nia detatañede; iadedi nainomo ite judiaï illa jira, Moisés micori lua isoi, Pablo Timoteo ie abina dete. Judiaïñedimie naimaci motomo ia, naimaci motomo inide. 4 Naga nairaïmo naimaci jaïllanona, Jerusalémo siadogacinona creyentiaïmo lloite. Jerusalémo Cristo oretagano, creyentiaïna sedaraïni diga, navui naicinona siadotimaci. Creyentiaï naie lluaana ñnollena, iena llocana jaidimaci. 5 Ie jira creyentiaï ñnocana jaidimaci. Nagarui ailluena comini creyentiaïna jaidimaci.

Pablo nicaírilla ra isoidena ciua rafue

⁶Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci. ⁷Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide. ⁸Ie jira Misiamona ecido jaillano, Troas railla nairaimo jaidimaci. ⁹Nainomo naie naiona Pablo nicaírilla ra isoidena ciode. Daje Macedonia imiedi uicomo naidaita naimiemo jica-jicanode. Raite: “Macedoniamu ruica o bi. Caina canuai bi”. ¹⁰Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uifnoticue, iena omo cuellena. Macedoniamu ruica dine cai jaille botena jenodica. Comecina facadica: “Jusiñamuidi caina uaidote, nainomo ie mare rafuena cai lollena”.

Filipomo illa rafue

¹¹Ie jira Troamona Samotraciamo monaillaido atona ie mamedo jaidica. Ie icotidiruido Neápolis railla nairaimo ridica. ¹²Dinomona Filipomo duide naisodo jaidica. Macedoniamu ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomo itica. ¹³Sábadoruido naie nairaimona nasedo jino jaidica. Comecina facajamona: “Dinomo niba comini oficabidimaci, Jusiñamui jüllena”, ille fuemo jaidica. Nainomo dañaiñorie riñoniai billanona, dinomo ana raidica, naiñaiñuaimo Cristo rafuena lollena. ¹⁴Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede inruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluana feifnotade. Naie facaise creyentena jaide. ¹⁵Naiñaiño ie jofomo itino diga bautizaja mei, caimo llote: —Cuedi cai Namana cue jai inuana omoi uifnuamona, cue jofomo mai bi, nainomo omoi fiebillesa. —Duere caina uai-uaidode.

¹⁶Jusiñamui jiranomo jairuido jaidicaimo, daje jitaiñomo dafaifidica. Naiñaiñodi jainomona ibacañaiño. Janaba anamo naiñaiño jiai ite. Iemona naiñaiño jairuido sulle rafuena llouide. Naie rafuena lluana ibatajano, naiñaiño namaiaidi ailluena ucubena feifnotidimaci. ¹⁷Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoi llocabitimaci.

¹⁸Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹Naiñaiño lluamona ucubena jai oñenana naiñaiño namaia jai uifnuua jira, Pablo, iaimaiai Silas diga, gaitadimaci. Iaimaiaina plazamo illaicomini illanomo sonocana uitimaci. ²⁰Dinomo iaimaiaina illaicomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañedi iaimaiai. Iaimaiai judiaui comini. ²¹Romanuai cominina cai illa jira, iaimaiai llogacinuaina cai inoia, iedo cai jai, marañede.

²²Tena cacajano, nana comini naie iaimaiaina fanaisitimaci. Illaicominidi naie iaimaiai iniroina cuaranuanona duiñode. Rasi diga, iaimaiaina diga icaiño fatatatimaci. ²³Iaimaiaina eo faja mei, cárcelmo jonetimaci. Cárcelna sedaraimamo iaimaiaina raise sedallena lotimaci. ²⁴Iese llua jira, iaimaiaina llaveracomu fo iaimaiaina uite. Donoramo iaimaiai eilliai ñuitajano, raise donode.

25 Naiona daferui facai Pablo, iaïmaiaï Silas diga, Jusiñamuimo ifuerillacinona ro-rodiaïmaiaï. Jiaï jüdiïaïmaiaï. Jiaïe llavecana naiena cacadimaci. 26 Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiaïdi ecocorinaite. Ie dacaiño nana llavecano imaci donua radi oni ecoride. 27 Cárcelna sedaraima casidemo, cárcel ie nasiaï ecocorinaillana ciode. “Llavecano jai aisidimaci” raillamo naimie comecina facade. Ie jira ie lloesi aiñoicaïda, dama abi faitaacade. “Illaïcomini bia, ¿bue lloiticue?” raillamona comecina facade; 28 iadedi Pablodi eo riire cuirioide:

—¡O abina dama meineño! Bene nana iticaïsa.

29 Lamparina atillena cárcelna sedaraima jicajanona, jarire fo jaide, Pablo iaïmaiaï Silas dine. Jacinaillano, naimie abidi docaillamona, iaïmaiaï uicomo caiñici ifodo ana rainadate. 30 Iaïmaiaïna jino ua mei, nai iaïmaiaïmo jicanote:

—¿Buena finojiticue, cue jeacinomona cue jilloillena?

31 Uai otiaïmaiaï:

—Coco Nama Jesúsna ñino. Iese na o jofomo ite comini diga o jilloillesa.

32 Iemei naimiena Jesús ie rafuena llofuetiaïmaiaï, nana ie jofomo itino diga. 33 Naie facaise iaïmaiaï bofellañoa jocode. Iemei naimiedi, nana ie comini diga, bautizaga. 34 Guillena, ie jofomo naie iaïmaiaïna uite. Jusiñamuina jai ñnua jira, na ie comini diga, naimie caïmare ite.

35 Ie oni monaidemo, illaïcominidi dajerie policiana cárcelmo oretatimaci, nai iaïmaiaïna jino orellena. 36 Cárcel sedaraimadi naie rafuena Pablomo lote. Raite:

—Omico jaillena, illaïcominidi omicono oredimaci. Mai marena jai.

37 Iadedi policiaïmo Pablodi llote:

—Cocodi romanuai cominidicoco; iadedi cocomo ite rafuena raise uiñoño cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

38 Illaïcominimo policias naiena lluaibitemo, illaïcominidi naiena cacajanona, eo jainaite, romanuai cominina iaïmaiaïna jira. Cai nanoca illaïcominidi romanuai nairai cominina jamai ebena duere finuana rairuidimaci. 39 Ie jira naie iaïmaiaï dine illaïcominidi jaidimaci, iaïmaiaïna: “Dama dino iesede” raillena. Jino atia mei, nairaimona jino iaïmaiaï jaillena oredimaci. 40 Cárcelmona jino billano, Lidia jofomo fo jaidiaïmaiaï. Creyentiaïna ciuano, naimaci comeciaina ocuiñotallena, naimacina dane llofuetiaïmaiaï. Ie mei oni jaidiaïmaiaï.

17

Pablo, iaïmaiaï Silas diga, Tesalónicaïmo illa rafue

1 Anfipolis railla nairaimo macaritiaïmaiaï. Apolonia railla nairaimo macaritiaïmaiaï. Ie mei Tesalónica railla nairaimo ridiaïmaiaï. Dinomo judiaï ofiracodi ite. 2 Pablo fibilla isoi, nainomo fo jaide. Daje amani sábadoruimo Jusiñamuina ciegafuiaïmona naimacina llofuede. 3 Iese naimacina llofuede:

—Cristo legi cacaita. Fiodaillamona naimie jilloite. Naimiedi Jesús.

4 Naiena cacadinomona ailluena ñnotimaci. Pablo, Silas iaïmaiaï dibeimo jaidimaci. Jusiñamuina ñnote grieguaimona ailluena comini creyentiaïna jaidimaci. Ie emodoconi ailluena nanocañaiñuaïdi creyentiaïna jiaï

jaidimaci; ⁵ iadedi judíuaidi uradoillano, jamai itinomona eo marañede iññaina uaiduanona, ailluena cominina ofitatimaci. Ie jira naie nairai uri iñedimaci. Iaimaiaina comini uicomo uillena, Jasón jofomo binaisite. ⁶ Iaimaiaina baiñenano, Jesóna, jiaie creyentiaí diga, illaicomini illanomo aiñocaida uitimaci. Cuirisite:

—Naga nairaimo cominina uri itañediiamaiaí. Benomo jai bitíiamaiaí. Jai benomo billanona, Jasón ie jofomo iaimaiaina feiñote. ⁷ Cai nanoca illaíma ie llogacinona jai iñofedimaci. Ie anamo jai icaiñedimaci. Raitimaci: “Jiaie illaíma anamo iticai. Jesús raillamie anamo iticai”.

⁸ Judíuai iese luamona, cominidi uri iñedimaci. Illaicominidi jiaí uri iñedimaci. ⁹ “Naie iamaiaí dane biñetiíamaiaí” illaicominimo creyentiaí raillano, illaicominidi Jasón jiaie creyentiaí diga, jino oretatimaci.

Bereamo Pablo, iamaiaí Silas diga, illa rafue

¹⁰ Naie naio creyentiaídi Pablona, iamaiaí Silas diga, Bereamo raire oretatimaci. Dinomo rillano, judíuai ofiracomo jaidíamaiaí. ¹¹ Nainomo ite judíuai eo mare. Tesalónicamo ite judíuai isoíñedimaci. Bereamo itinodi Cristo rafuena iocire feiñotimaci. Niedi unaicinoni raillanona, nagarui Jusiñamuina cuegafuaina facadimaci. ¹² Ie jira naimacimona ailluena iñotimaci. Judíuaiñedinomona ailluena nanocañaiñuái iñotimaci. Ailluena iññai jiaí iñotimaci; ¹³ iadedi Bereamo Pablo Jusiñamui ie uaina jai lluana Tesalónicamo ite judíuaidi fidiano, dinomo jaidimaci. Cominina fuemo faillena, jaidimaci. ¹⁴ Naie facaise creyentiaídi Pablona oni oretatimaci. Monaillai fuemo duide naisona oretatimaci. Silas, iamaiaí Timoteo diga, fiebidíamaiaí. ¹⁵ Pablo uigamací naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iamaiaí Timoteo diga, raire cue dine billesa” llono.

Atenamo Pablo illa rafue

¹⁶ Atenamo iamaiaí rillena Pablo sedademo, naie nairaimo ailluena jiraraína ciede. Iena ciuana, Pablo comecidi jearefcaide. ¹⁷ Naiena ciua mei, judíuai ofiracomo judíuai diga coniniri Jusiñamui rafuena siadote. Jusiñamuina jai iñote judíuaiñedino diga coniniri iena jiaí siadote. ¹⁸ Jamai comecina facadinomona damierie naimie diga jiaí ñaitimaci. Epicúreo railla rafuedo jaisoidimaci. Estoico railla rafuedo jiaí jaisoidimaci. Damierie naimacimona raitimaci:

—¿Buena nai ñaillareuidimie caimo lloiacade?

Jiaino raite:

—Jiaie nairai jusiñamuillaicaimo lloiacade isoide.

Jesús fiodaillamona jilluana Pablodi llouilla jira, iese raitimaci. ¹⁹ Ie jira naimiena naimaci siadouillanomo uitimaci. Naie illano Areópagona mameciredede. Jicanotimaci:

—¿Nie isoide o comocinuai? Caimo llono, cai uñollena. ²⁰ Eo feiredicinuaína cacadicai. ¿Buena nai llofuicacimodi llote? Iena uñoiacadicai.

²¹ Nana Atenamo ite comini, jiaie illanomona bitino diga, jamai ailli como imaci fidia rafuena ñai-ñaidimaci. Jamai ailli fidia rafuena caca-cacadimaci. Jiaie rafuena finoñedimaci.

²² Jicanua mei, Areópago railla illanomo Pablo naidacaida llote:

—Atenas imaci, omoimo rafuena lloiacadicue. Omoi jusiñamuillaína eo sedacabidomoi. ²³ Cue macarillamona, omoi jusiñamuillaína sedaja jiraraína

ciodicue. Daje jirarai abimo iese cuela: “Uiñoñega Jusiñamuina sedadicaí” cuela. Uiñoñeno naimiena sedadomoi. Ja omoimo naimiena lloiticue. ²⁴ Jusiñamui biniena jaie finode. Ie emodoconi Jusiñamuidi nana binie mo itinona jiai finode. Naimiedi mona ie Nama. Enirue ie Nama. Ie jira ima finoca jofomo naimie iñede. ²⁵ Naga jitaile rana naimie mo illa jira, naimiena canonicicaí. Naimie nana cominina comuitate. Jiai nagarui jafaici cai uadi caimo iga. Uanaí nana rana caimo iga. ²⁶ Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiai jonega. ²⁷ Iese jonega, naimaci naimiena jenollena. Jenuano, nibai naimiena baitimaci. Caimona naimie are iñede. ²⁸ Naimie jaca illa jira, cai jiai iticai. Jiai cajedicai. Ie isoi omoi rafue lloraini jiai llotimaci: “Naimie ie uruaidicaí”.

²⁹ Naimie caina comuitaja jira, Jusiñamuidi jirarai isoiñedena uiñoticai. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Ima ie onolli diga finoca ra isoiñede. ³⁰ Cominidi abi uiñoñeno jeacino jaie finouidimaci. Jusiñamui naimacina nia janafedede; iadedi jai birui Jusiñamuidi nana cominina naga illanomo naimaci comeciai iuai meidollena jitaide. ³¹ Naimaci comeciai iuai naimaci meidoñena, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúsna naimie jai jilloitaja jira, iena uiñoticai.

³² Fiodaillamona Jesús jilluana cacajano, damierie jaisitimaci. Ieconi jianodi raite:

—Jiairuido o lluana dane cacajiticaí.

³³ Iemei naimaci motomona Pablo jino jaide. ³⁴ Naie cominimona damierie naimie dibeimo jaidimaci. Inotimaci. Naimacimona damie Areópagomo siadoudimie. Ie mamecidi Dionisio. Jiañaiño inote. Naiñaiño mamecidi Dámaris. Daje facaiseconi jiaie cominidi inotimaci.

18

Corintomo Pablo illa rafue

¹ Atenamona Corinto railla nairaimo Pablodi jaide. ² Nainomo Aquila raillamiena baisaide. Naimiedi judío imie. Ponto railla eniruedi naimie comuilano. Ie ai mamecidi Priscila. Naiñaiño diga Romamona como bitiaimaiaí. Romamona Claudio nana judíuai cominina jai oretate. Ie jirari bitiaimaiaí. Roma ie nanoca illaimadi Claudio. ³ Pablo iaimaiaí daje isoi maijia jira, Pablo iaimaiaí jofomo fiebide. Iaimaiaí conima diga maijide. Chivos itraiaí ie nilla iniroina tiferisoidimaci, naiemona jofona finollena. ⁴ Naga sábadoruimo judíuai ofracamo llofuede, judíuaina inotallena, judíuaiñedinona iena jiai inotallena. ⁵ Macedoniamona Silas, iaimaiaí Timoteo diga, bitemo, Pablodi nagarui Jusiñamui uaina llofueuide. Judíuaimo: “Jesúdi cai Jilloitaraima” llouide; ⁶ ia naimie uaina inosiñedimaci. Jiai naimie jinafomo jeare ñaitimaci. Naimaci comeciai jeare cúa jira, Pablo ie iniroina jaidinote, naimacina raillano:

—Dani omoi muidona Jusiñamui omoína duere finojite. Cue muidonañeite. Jai judíuaiñedinone dine jaiticue, naimacina cue llofuellena.

⁷ Iese raillano, oni jaide. Justo jofomo jaide. Naimiedi Jusiñamuina inouidimie. Ie jofu judíuai ofraco ecimo ite. ⁸ Crispodi, nana ie jofomo

itino diga, cai Nama Cristona ñnote. Naimiedi judíuai ofiraco ie sedaraima. Ailluena Corintomo ite comini creyentiaina jaidimaci. Ie mei naimacidi bautizaga. ⁹ Daje naiona Pablo nicairilla isoidemona, Pablomo cai Nama Jusucristodi lote:

—Mai jaciruiño. Faicaiño cue rafuena llocana jai. ¹⁰ O diga iiticue. Budi ona maraiño finoñeite. Bie nairaimo ailluena cominidi cue dibeimo jaitimaci.

¹¹ Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

¹² Corinto railla nairaidi Acaya railla eniruemo jainaiáide. Naie facaise Acaya ie gobernadori Galión. Naie facaiseconi damierie judíuai comini Pablona faiacadimaci. Galión dine naimiena uitimaci. ¹³ Raitimaci:

—Cai illaima llogacino isoi bimiedi cominina Jusiñamuina sedallena llofueñede.

¹⁴ Pablo uai oiacademo, judíuaimo Galióndi lote:

—Judíuai, cacarei. Naimie maraiñede rafuena finodena, naimie omoina jifuetena, omoi lluomo nia cacarefidicue; ¹⁵ iadedi jamai naimie uailai cuemo llotomoi. Omoi usumatiai micoriai mameciai cuemo jiai llotomoi. Omoi einamaci llogacinauaina cuemo jiai llotomoi. Iena omoi coniniri siadotomoi. Bie isoide rafuena siadoiacaiñedicue.

¹⁶ Iemona naimiedi nainomona naimacina oni orede. ¹⁷ Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibañede.

Antioquíamo Pablo abido jailla rafue

¹⁸ Naifue suilla mei, nainomo Pablo are fiebide. Ie mei creyentiaina facaduano, Priscila iaimaiai Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. ¹⁹ Efesomo rillanona, iaimaiaina fainonocaide. Judíuai comini Jusiñamui rafuena siadollena, Pablodi judíuai ofiracomo fo jaide. ²⁰ Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue — ²¹ Naimacina facaduano, lote —. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide. ²² Cesareamo sijiano, Jerusalémo macarite. Creyentiaí dine jaide. Ie mei Antioquíamo jiai macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiama macarite. Nana creyentiaí imaci comeциаina ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai cuegafuiai raise uiñote. ²⁵ Naimiedi Jesús ie rafuena navui jai cacade. Ie comecimona iena eo lote. Jesús rafuena raise llofue; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feñuana jiai uiñoñede. ²⁶ Judíuai ofiracomo naimie llofuia, jacitaiño llofue. Priscila, iaimaiai Aquila diga, naimie cadaiñaimaiai. Ie jira naimiena oni eneno uitiaimiai. Ie uiñoñega rafuena eo raise naimiena llofuetiaimiai. ²⁷ Acayamo Apolodi jaiacana jira, creyentiaidi naimie comecina ocuiñotajano, naimiena oresite. Acayamo ite creyentiaimo rabemo cuetimaci. Jusiñamui naimacina dueruilla

jira, creyentiaina jai jaidimaci. Naimiena marena feiñollena iese cuetimaci. Nainomo naimie rillanona, creyentiaina eo canode. ²⁸ Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui cuela-fuaímona Jesúdi cai jilloitaraimana llofuede.

19

Efesomo Pablo illa rafue

¹ Corintomo Apolo nia ítemo, nairaiaí onifedo joide naído jailla mei, Pablo Efesomo ride. Dinomo rillanona, creyentiaina baite. ² Naimacimo jicánote:

—¿Cristona omoi ñnuaruimo Jusiñamui Joreñona feiñotomoi?

Uai otimaci:

—Jusiñamui Joreñona nia jaca cacaiñedicaí.

³ Dane jicánote:

—¿Ñie isoi omoi bautizagaomoi?

Uai otimaci:

—Juan micori lloga rafue facaina bautizagacaí.

⁴ Pablo uai ote:

—Mare. Juan llote: “Omoi comeciaí iuaina meido. Iemei bautizallomoi”. Ie ífo meidoitímiena comini ñnollena llote. Jesúna ñnollena llote. Jesús rafuena omoi mo raise lloiticue.

⁵ Iena cacajano, cai Nama Jesús díbeido bautizadimaci. ⁶ Naimacimo Pablo ie onollina joniamona, Jusiñamui Joreñona feiñotimaci. Ie mei naimaci uiñoñega nairai uaido ñaitimaci. Jusiñamui Joreño naimacimo llua rafuena jiai llotimaci. ⁷ Nibai nana naimacidi doce íñiaí.

⁸ Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui díbeimo naimaci comeciaí iuaina meid-uana Pablodi jaitaiñeno eo llouide. Nainomo daje amani ívui fiebide. ⁹ Naimacimona jainodi Pablo uaina uaitatimaci. Jiai ñnoiacaíñedimaci. Naimaci ñnoñena ira, ofiracomo bitinomo: “Cristo rafuedi maraiñede” llouidimaci. Ie jira Pablodi creyentiaí diga naimacimona eneno oni jaide. Tiranno ie lloracomo nagarui Pablodi llofueuide. ¹⁰ Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

¹¹ Jusiñamuidi Pablona siño rafuena finotate. ¹² Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jillodimaci. Janaba anamo ítinodi jiai jillodimaci. ¹³ Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiaí anamo ítinomona jananiaina oni oretaiacadimaci. Jananiaímo raitimaci:

—Pablo llua isoi, Jesús muidona bimacimona oni jai.

¹⁴ Esceva ie siete jitotiaídi iese finoacadimaci. Escevadí Jusiñamui diga ñairaima. ¹⁵ Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoiña uiñoñedicue.

¹⁶ Ieconí Janaba anamo ítimie naimaci emodomo daiacaide. Riire nana naimacina emodoficaide. Ie jira naie jofomona taimiiaina jino aisidimaci. Naimacidi bofellaiaí diga jino aisidimaci.

¹⁷ Nana Efesomo ítino iena fididimaci. Judíuai, judíuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci.

¹⁸ Ie jira ailluena creyentiaidi billano, imaci navui marañede finoca rafuena Jusiñamui llotimaci. Icorilla rafuena finouidimaci. Iena marefodo llotimaci. ¹⁹ Ailluena icorilla rafuia i llabia i atianona, marefodo jobaidimaci. Niga raifi rabia i jobaillana facadimaci. Cincuenta mil ucube diese facai rabia i na jobaidimaci. ²⁰ Cai Nama Jesús uaina eo llocana jaide. Cominidi naie uai siñonana uiñotimaci.

²¹ Naie rafue illa mei, Pablodi começina facajano raite: “Macedoniamos cue macarillamona, Acayamos cue jia i macarillamona, Jerusalémo riacadicue”. Ie emodoconi naimiedi raite: “Nainomona Romamos jia i jiacadicue”. ²² Naimie nia Asiamos nano nigarui illanona, mena canora i mana Macedoniamos oretate. Timoteona, iaimaia i Erasto diga, oretate.

Efesomos ite comini marañede rafue finoacadimaci

²³ Naie facaiseconi Pablo nia oni jaiñenia, Jesucristo rafue muidona Efesomos ite cominidi marañede rafuena comuitatimaci. ²⁴ Demetrio raillamie platamona diga rana finouide. Naimiedi Diana ie jofu joreñuaina finouide. Naimie anamos ailluena maijuuidimaci. Dianadi naimaci jusiñamui. ²⁵ Naimie isoi maijuuidinona Demetrio uaidote, nana naimaci danomos ofillena. Ie mei raite:

—Jai danomos ofidicai. Bie maijiamona cai ucubena uana raise uiñotomoi; ²⁶ iadedi Pablo raillamiedi diga cominina jai llofuate: “Comini finoca raniaidi jusiñamuillañede”. Naie llofuiamona ailluena comini naimie dibeimos jaidimaci. Dama Efesomos iese suiñede; iadedi ua nana Asiamos iese suide. ²⁷ Ie jira abina rairuicadicai, cai maijille faifi raillano, comini Diana jofona jia i sofe i raillanona. Cominidi naiñaiñona ebiruillana feitatimaci. Naiñaiñori raijicaiñeitimaci. Dianadi eo ebirede jusiñamui. Nana Asiamos ite comini naiñaiñona sedacabidimaci. Uanai nana bie eniruemos ite nairaidi naiñaiñona sedacabidimaci. Ie jira abina rairuicadicai.

²⁸ Iena cacajano, eo iciritimaci. Riire cuiroidimaci:

—¡Efeso ie Diana eo ebirede!

²⁹ Danirie siaduamona, nana comini eo failliaidimaci. Iemos nana comini dajena naimaci ofiracomo fo raire jaisite. Gayona, iaimaia i Aristarco diga, gaitajano uitimaci. Naie iaimaiaidi Pablo ie nabai iaimaia i. Iaimaia i comuilanodi Macedonia. ³⁰ Pablo ofiracomo jia i fo jiacade; iadedi creyentiaidi naimie fo jaillana rairuidimaci. ³¹ Ilaicomini mona damerie nabaiñia i naimiemos fo jaillana jia i rairuidimaci. ³² Fo itinomona damerie daje rafuena ebena cuiroidimaci. Jia i no jia i fuena ebena cuiroidimaci. Eo failliaidimaci; ie iadedi bue ñellena naimaci ofillana raise uiñoñedimaci. ³³ Comini motomona judia i dinena damie uicomo oredimaci. Ie mamecidi Alejandro. Cominina llicaitallena, ie onolli jaidianona, cominimo lloiacade; ³⁴ iadedi naimie judio imiena naimaci uiñuanona, nana daacaiño cuiroidimaci. Mena horas raifi cuiroiroidimaci:

—¡Efeso ie Diana eo ebirede!

³⁵ Iemei naie naira i rabe cueraimadi cominina llicaitatate. Naimaci llicaitalla meinoconi, naimie llucanona cacadimaci. Raite:

—¡Cacarei! Cai nairaidi Dianana sedacabidicai. Naiñaiño ebirediñaiño. Naiñaiñona eruaide jiraraidi monamona jae uaide. Iena jia i sedacabidicai. Nana bie eniruemos ite comini iena uiñotimaci. Bu naiena uiñoñedimiena jaca iñede. ³⁶ Bu cue luana jaca uaitaite. Ie jira omoi llicai. Comecia i fa-caño buena finoño. ³⁷ ¿Bue ñellena Gayo iaimaia i Aristarco diga, benomos atidomoi? Iaimaiaidi cai jusiñamui joreñona ñaiñedi iaimaia i. Naiñaiñona jeare finoñedi iaimaia i. ³⁸ Demetrio, ie maijira i diga, iaimaia i llogidoiacania,

cominina llogidoraco ite. Diga jueces jiai ite. Coniniri nainomo iena siado; ³⁹ iadedi jiai nicino omoimo ia, cai illaicomini ofia, biena siaduanu, caimo lloitimaci. ⁴⁰ Birui bie rafue cai finua jira, illaicomini nibai caina duere finoitimaci. ¿Niese cai nibaille? Illaicomini caimo biena jicanoia, ¿niese raiticai?

⁴¹ Naie llua mei, ofidinona jino orede. Iemei jai jono tuudimaci.

20

Macedoniamu Pablo dane jailla rafue

¹ Efesomo ite rafue suilla mei, Pablodi creyentiaina uaidote. Naimaci comeiaina ocuiñotafuena llote. Iemei naimacina naimie facaduanu, Macedonia railla eniruemo jaide. ² Nainomo ite nairaiimo macarite. Comecina ocuiñotallena, naimacina llofuecana jaide. Iese Macedoniamona Grecia railla eniruemo risaide. ³ Nainomo daje amani fivui illa mei, Siriamo botedo abido jaiacade; iadedi judiaidi naimiena meineiacanana Pablo fidiano, Macedoniamu abido macarite. ⁴ Jiaimo naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaiaiaia Segundo diga, jaide. Tesalónica nairai imie iaiaiaia. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaiaiaia Trófimo diga, jiai jaidiaiaiaia. Asia imie iaiaiaia. ⁵ Coco uicodo naimaci jaillano, Troamo cocona sedadimaci. ⁶ Llomenico guillaruillai railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamu Pablo illa rafue

⁷ Domingoruimo Jesús fiodaillana começillena, danomo ofidicaimo, Pablodi caina llofue. Icoiti naimie jaiacana jira, Pablo are ñaite. Naiona jitoma daferui illa facai nia ñaite. ⁸ Cai ofillanomo ailluena lampariniaia ite. ⁹ Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana cioidimaci. ¹⁰ Ie jira Pablo ana jaide. Naimie emodomo jitaadacaida, naimiena meniñote. Cominimo llote:

—Omoi rucaicueriñeno. Naimie cajede. Jafaicina nia faite.

¹¹ Abido a jaidimaci. Jesús fiodaillana começillena, llomeniconu tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. ¹² Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

¹³ Pablodi Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uia-cadicai. ¹⁴ Ie jira Asónmo naimiena cai baillanona, cai diga botemo bite. Ie mei Mitilene railla nairaimo jaidicai. ¹⁵ Nainomona dane monailaido cai jaillano, ie areruideo Quío railla nairaimo ruicafebellemo jaidicai. Dane ie areruideo Samos railla nairai mamedo atona jaidicai. Ie areruideo dane cai jaillano, Miletomo sijidicai. ¹⁶ Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinocni, cincuenta digarui illanona bie rafue ite. Asia railla

eniruemo naimie are iacaiñena jira, Pablo comecina facade: “Efeso ecido monaillaído jaiticai”.

Efesomo ite creyentiai sedarainimo Pablo llua rafue

¹⁷ Creyentiaina sedarainina uaidollena, Miletomona Efesomo Pablo cartana orede. ¹⁸ Naimie dine naimaci rillanona, Pablo naimacimo llote:

—Asiamo nano cue rillaruimona, niese omoi diga nagarui cue illana uifnotomoi. ¹⁹ Cai Nama diga abina iedoñeno maijuidicue. Eecana sure maijuidicue. Judiuai cuena duere uifnodosa jira, ie facaiseconi dueredicue.

²⁰ Cuemo ite marenona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoina llofueuidicue. Omoi jofuemo omoina jiai llofueuidicue. ²¹ Judiuaina llofueticue. Judiuaiñedinona daje isoi llofueticue. Jusiñamui dibeimo omoi comeciai iuaina meiduana lloticue. Cai Nama Jesúsna omoi iinuana jiai lloticue. ²² Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uifnoñedicue; ²³ iadedi Jusiñamui Joreño naga nairaimo cuemo llote: “Llaveracomona onaga gaitajano onajonesiite. Duere sefuitio”.

²⁴ Cue ille dinori are illemo comecina facañedicue. Dama cue ille dinori fuidoacadidicue. Cai Nama Jesúsmona cue feiñoga maijiana fuidoacadidicue. Mare rafuena omoimo lloiacadidicue. Jusiñamui omoina duenaillana jiai lloticue. ²⁵ Jusiñamui anamo omoi illa rafuena omoimo jai lloticue. Jai dane cue uiecona cioifneitomoi. Iena uifnoticue. ²⁶⁻²⁷ Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue comeci mare. Jusiñamui uaido omoi jaiñenia, cue muidonañeite. ²⁸ Mai omoi abi rairui. Jusiñamui Joreñodi omoina creyentiaina sedatate. Naimacina raise seda. Jusiñamui dibeimo itinona llofue. Naimie Jito fiodailla muidona, naimacina ote, naimie iena. ²⁹ Naimacidi toica laudaiaia isoidimaci. Nia abina raise uifnoñedimaci. Cue jailla meinoconi, taino llorainidi, janallari isoi, omoimo biite. Naimaci nana omoi sedaca cominina ramo faite, danomo abido naimaci jaillena, jiconiaia laudaiaia gaitaja isoi. ³⁰ Omoimona uanañedicinona llorainidi iite. Creyentiaina ramo faitimaci, omoi llucacina fainonocaillena, naimaci dibeimo illena. ³¹ Ie jira abina rairui. Bie rafuena feitañeno. Daje amani fiemona nana omoina jai llofueticue. Naiona omoina llofueticue. Aremona omoina jiai llofueticue. Omoina cue duenaillamona, eianona omoina llofueticue. ³² Mai. Cai Nama illa anamo omoina fainonocaiticue. Naimie uaimona naimie omoina duenaillana jai uifnotomoi. Naie uaidi omoina jiai ocuifnotaitite. Iemona Cristona inocana jaitomoi. Nana naimie fetocano diga naimie illanomo ico jaca iitomoi. ³³ Jiaino ie ucubena jaca nicidoñedicue. Bu ie iniroillaia jaca jiai iocaiñedicue. ³⁴ Cue jitaille rana dama cue maijiano oticue. Cue diga jaidinimaci jitaille rana jiai dama cue maijiano oticue. Iena nana omoidi uifnotomoi. ³⁵ Iese cue illamona omoina llofueticue. Iese maijiano duerede cominina canocana jaiacadicaia. Cai Nama Jesús ie llogacina uifnoticaia. Naimie raite: “Raruiaina cai feiñoia, iobidicaia; iadedi cai eo iobiacania, jainomona raruiaina fecadicaia”. ³⁶ Naie llua meino, naimaci diga cañicaia ifodo rainadajano, Jusiñamui jide. ³⁷ Nana naimacidi eo eedimaci. Pablona camaduanaona, naimiena llibanotimaci. ³⁸ “Cuena dana cioifneitomoi” naimacimo llua jira, eo sunaitimaci. Iecononaimie diga botemo jaidimaci.

¹ Naimacina cai facadua meinoconi, suiñodicai. Cos railla nairaimo atona jaidicai. Ie are Rodas railla uiasimo ridicai. Iemei Pátara railla nairaimo ridicai. ² Nainomo Fenicia railla eniruemo jaiacade botena baiticai. Nai botemo cai jailla mei, suiñodicai. ³ Chipre railla uiasina cai ciojia, cai nabei dibeiemo ite. Iemei Siria railla eniruemo jaidicai. Tiro railla nairaimo sijidicai. Botedo uiga raruiaina nainomo joneacadimaci. ⁴ Tiromo ite creyentiaí cai baillanona, siete digarui naimaci diga iticai. Jerusalémo naimiēna judúai meineñellena, nainomo naimie jaiñellena, Jusiñamui Joreño naimacina Pablomo llotatate. ⁵ Digarui illa meinomo oni jaidicai. Naie nairaimona nana naimaci cai diga jaidimaci. Riñoniai, naimaci uruiái diga, jaidimaci. Caiñici ifodo monaillai fuemo ana rainadajano Jusiñamuimo jiidicai. ⁶ Naimaci facadua meinoconi, botemo jaidicai. Naimaci imaci jofuemo abido jaidimaci. ⁷ Tiromona Tolemaida railla nairaimo jaidicai. Creyentiaína uaiduano, darui naimaci diga iticai. ⁸ Ie are jaillano, Cesareamo cai ria, Felipe jofomo jaidicai. Felipedi Jesucristo ie rafuena lloraima. Jerusalémo diáconuaina creyentiaí jaiē fetua facaise, Felipena fetodimaci. ⁹ Naimie dinomo fiebidicai. Naimie cuatro jisa ite. Naiñaiñuái nia iima abina uiñoñede. Jusiñamui naiñaiñuaimo llucacina llocabitimaci.

¹⁰ Digarui nainomo cai illamo Judeamona damie bite. Naimie mameci Agabo. Jusiñamui facaina lloraima. ¹¹ Caimo ria, naimiedi Pablo cinturóna aiñode. Naie diga ie eillina maite. Ie onollina jiaí maite raillano:

—Jusiñamui Joreño raite: “Jerusalémo judúai illaicomini bie cinturón jainaode iimana daje isoi maitimaci. Judúaiñedinomo naimiēna fecajitimaci” raite.

¹² Naiena cai cacajano, naie comini diga, Pablona caididicai, naimie Jerusalémo jaiñellena. ¹³ Pablo uai ote:

—¿Bue ñellena eedomoi? ¿Bue ñellena cue comecina ocuiñotañedomoi? Cue maiana jaca jitaicicue. Ua cue fiodaillana jaca jiaí jitaicicue. Cue Nama Jesús muidona cue fiodaiaidedi, damamai fiodaicicue.

¹⁴ Cai lloga uai naimie iñoñena muidona, raiticai:

—Cai Nama jitaile rafuena finuana jitaicicai. —Iemei llucaidicai.

¹⁵ Nano nigarui illanona, cai raruiaína finuano, Jerusalémo jaidicai. ¹⁶ Cesareamo ite creyentiaímona jiaíno cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainamona creyente.

Jacobo diga Pablo ñaia rafue

¹⁷ Jerusalémo cai ria, creyentiaídi caina caimare uaidotimaci. ¹⁸ Ie are Pablo, cai diga, Jacobo dine jaide. Nana creyentiaína sedaraini nainomo jai ofidimaci. ¹⁹ Uaidua mei, Pablo nagacinuaido Jusiñamui judúaiñedinomo finoca rafuena llote:

—Cue llofuiamona ailluena judúaiñedinomo creyentiaína jaidimaci —llote.

²⁰ Naie rafuena cacajano, Jusiñamuimo iobillacinona fecadimaci. Iemei naimiemo llotimaci:

—Ama, ero, judúaiamona ailluena comini jai creyentiaína jaidimaci; ia nana naimaci Moisés micori llogacinodo eo jaidimaci. ²¹ O finoca rafuena jai fididimaci. Ona comini ñaiana jai fididicai. Jiaie nairai motomo ite judúaiína Moisés micori llogacinona fainonocaillana llofuetio. Naimaci uruiái abina deñenana llofuetio. Moisés micori llogacinuaido jaiñellena llofuetio. ²² Ie jira ¿niese nibaiticai? O rillana jai fididimaci. ²³ Ie jira omo cai lluana fino. Cai ecimo cuatro iima jai ite. Nie isoide rafuena Jusiñamuimo jai

lloitimaci. ²⁴ Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomo. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicai. ²⁵ Judíuaiñedino Moisés micori llogacinodo jaillana lloñeiticai. Naimacimona creyentiaina jaidinomo navui cueticai: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cueticai.

²⁶ Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui llollena. Jusiñamuimo nagamiai rana fecajaruina jiai llote. Siete digarui illanona, Moisés micori llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillai fuiacanuillaimo Asiamona damierie judíuaidi bitimaci. Jusiñamui jofomo Pablona cuano, comini comeciaina feidocana uitimaci. Pablona gaitajanona, ²⁸ cuiriidimaci:

—Caimaci, caina cano. Bimie naga illanomo llofuiamona, cominina raise itatañede. Moisés micori llogacinuaído jaiñede. Bifona raise sedañede. Judíuaiñedino bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona ciodimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai cominimona judíuñedimie Jusiñamui jofomo jaillana maraiñede. ³⁰ Asiamona bitino cuiriillanona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. ³¹ Pablona meineiaciona, soldaduai ie comandantedi nana comini ieillana fidide. ³² Iecon naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina cuano, Pablona fajana fañonocaidimaci. ³³ Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

³⁴ Nana ieidinodi jiaiforie lloitimaci. Ie jira naie rafuena naimie jaca uiñoñede. Ie muidona cuatelmo naimiena uillena llote.

³⁵ Cuartel tidabacuimo naimaci ria, comini jarire jailla jira, soldaduai Pablona uitimaci. ³⁶ Ailluena comini racadimaci. Ocuioisite:

—¡Naimiena meine!

Pablo ie abi riidua llua rafue

³⁷ Cuartelmo jaiacania, Pablo comandantemo llote:

—O diga ñaiacadicue.

Raijicaillamona, naimie uai ote:

—Griego uaido ñaitio— ³⁸ Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue llollena, omo jicanoiacadicue.

40 —Jee —raite. Pablo tidabacui muidomo naidaide. Cominina llücaitallena, ie onollina jaidide. Comini llücailla mei, Pablo judüuai uaido naimacimo llotte:

22

1—Caimaci, einamaci, cue abi riiduacinomo mai omoi cacarei.

2 Naimie judüuai uaido lluana naimaci cacajano, llücaidimaci. Ie jira Pablo llotte:

3—Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue.

4 Jesucristo ñnotinona jaie eo duere finodicue. Diga creyentiaina maianona, cárcelmo joneticue. Ñiñiaina duere finodicue. Riñoniaina jiai duere finodicue.

5 Jusiñamui diga nanoca ñairaima cuena uiñote. Nana omoi illaicomini cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judüuaimo cuetimaci. Damascomo jaidicue, nainomo ite creyentia maiano, Jerusalémo atianona, naimacina duere finollena.

Pablodí Jesúna ñnuana llua rafue (Hch 9.1-19; 26.12-18)

6 Omoimo bie rafuena lloiticue. Jerusalémona jaidicue; iadedi Damascomo cue iaieicaia, jitoma naidai iacania, ieconi monamona damie cue abina eo quetiñote. 7 Eniruemo ana uaidicue. Monamona damie cuemo lluaana cacadicue: “Saulo, Saulo, ¿bue ñellena cuena duere finodio?” 8 Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”. 9 Cue diga itinodi cue quetiñua rana ciodimaci; iadedi cue diga ñaitimiena cacaiñedimaci. 10 Raiticue: “Nama, ¿bue ñeiticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

11 Cuena eo quetiñua jira, cioiñedicue. Cue diga itino cue onollido llinocaida, Damascomo cuena uitimaci. 12 Nainomo Ananías raillamiedi ite. Jusiñamuina eo ñnote. Moisés micori llogacinuaido eo jaisoide. Nainomo ite judüuaidi naimiena: “Mare” raitimaci. 13 Naimie cuemo bite. Cuemo llotte: “Saulo, ama, mai oni eroda”. Ieconi dane erodajanona, naimiena ciodicue. 14 Naimie raite: “Cai usumatiaí micoriaí ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacarellena. 15 Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio. 16 Mai cue lluaana ñno. Naidadajanona, o jecaino oni dotallena, Jusiñamuimo jica. Ie mei bautiza” raite.

Judüuaiñedinomo Pablo jailla llua rafue

17 Te mei Jerusalémo abido cue billa mei, Jusiñamui jofomo Jusiñamuimo cue jüia, ñicairiticue isoidicue. 18 Cai Namana ciodicue. Cuemo llotte: “Jerusalémona raire mai jai. Cominidi o cuena lluaana feiñoñeitimaci”. 19 Uai oticue: “Nama, naga judüuai ofracomo ona ñnotinona fauidicue. Cárcelmo naimacina joneuidicue. Nama, Jerusalémo itino iena uiñotimaci. 20 Esteban micori fiodailla facaiseconi nainomo iticue. Naimie o facaina lloraíma. Naimie fiodailla jira, iobidicue. Naimiena meineto iniroina sedadicue”; 21 iadedi cue Nama cuemo llotte: “Mai jai. Judüuaiñedinomo ona are oretiacadicue”.

Comandante anamo Pablo illa rafue

22 Bie lloga dinori comini Pablo lluaana cacadimaci. Iemei cuiiriidimaci:

—Bie isoide ima illana benomo jitañedicai. ¡Naimiena meine!

²³ Cuirillamona naimaci iniroina jaidisite. Icirisiano eniruena jiai fadosite.

²⁴ Judíuái uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimiena cuartelmo uiño. Naimiena fano. Naimiemo ite rafuena caimo naimie llolena, naimiena duere fino.

²⁵ Naimiena maiano naimiena fallena, Pablodí nainomo ite capitámo jicanote:

—¿Juez nia lloñenia, romano nairai imièna fajana mare? Romano nairai imiedicue.

²⁶ Capitán iena cacajano, comandante dine jaide. Iena llote. Jicanote:

—¿Nièse nibaiiticaí? Bimie romanuai nairai imie.

²⁷ Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

²⁸ Comandante dinena raite:

—Romanuai nairai imièna cue jaillena, eo ibadicue.

Pablo uai ote:

—Romanuai nairai imièna jeicigacue.

²⁹ Ieconí naimiena duere finoacadino naimiemona raire oni jaidimaci. Pablo romanuai nairai imièna jira, naimiena jai ebena maia jira, comandante jiai jacinaite. Comecina nibai facade: “Iese naimiemo cue finua jira, ie ibana ollena, cue illaimamo cuena jiai llogidoite”.

Illaicomini motomo Pablo illa rafue

³⁰ Comandantedí judíuái Pablona llogiduana ua raise uiñoiacade. Ie jira ie are Pabloana suiñollena llote. Jusiñamui diga nanoca ñairaini, nana judíuái illaicomini diga, ofillena llote. Pablona atiano, naimaci motomo uillanona, naimiena naidanete.

23

¹ Ie abina riidollena, Pablo naie judíuái illaicomini motomo ite. Naimacimo eruailano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue começi mare.

² Ananíadi Jusiñamui diga nanoca ñairaima. Pablo llua naimie gaiñenamona, Pablo ecimo itinona Pablo fuena farotate. ³ Pablo dinena naimiemo llote:

—Jusiñamui o fuena faroite. Mareuidimiena abina caitadio. Moisés micori llogacínuaí muidona benomo itio, cuemo llolena; iadedi cue finoca rafuena raise o uiñoñeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micori iena jaie cuiana uiñoticue. “Illaicomini na jeare ñaiñeno” cuete. Caimaci, naimie Jusiñamui diga nanoca ñairaima illana uiñoñedicue. Uñoticuedena, naimiemo iena lloñedicue.

⁶ Cominimo Pablo eruailamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacínomo ocuiriticue. Ie jira bene cuena llogidoiacadomoi.

7 Naimie iena lloia, naimaci comeciái daje isoi lloifñedimaci. 8 Saduceuai cominidi fariseuai comini isoi inoñedimaci. “Fiodaillamona jilloñeiticái” saduceuai comini raillana inoside. “Jusiñamui jaienisaí iñede. Comini joreñuái iñede” raillana inoside; iadedi fariseuai comini dinena nana naie rafue illana inotimaci. 9 Ie jira eo failliñaidimaci. Jaiseuái motomona jiaíno naidadajanona, llote:

—Bimiemo jeacino iñede. Jusiñamui jaienici naimiemo nibai jaie llumona, bie rafue naimiemo ite.

10 Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiema uillena llote.

11 Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiaí lloitio —raite.

Pablona meineiicana rafue

12 Monaidemo, judíuaimona jiaíno comeciaina facadimaci: “Pablona nia cai meineñenia guiñeiticái. Jiroñeiticái”. 13 Cuarenta baifemo ite comini iese comeciaina facadimaci. 14 Naimaci judíuái illaicomini dine jaillano, raitimaci:

—Dani comeciaina facadicaí: Pablona nia cai meineñenia, jaca buena guiñeiticái. 15 Omoi dine Pablona atillena, naimiemo eo raise jicanua isoi, comandantemo jicano. Pablo iaírei bia, naimiema cai meinellena, ocuidoiticái.

16 Pablo enaise naie rafuena fidiano, cuartelmo jaide, Pablomo llollena.

17 Iena cacajano, Pablodi capitána uaidote. Raite:

—Bie coniruena comandante dine uiño. Naimie diga ñaiacade.

18 Ie jira naimiema uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

19 Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

20 Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuái dani comeciaina facadimaci. 21 Naimaci jitailla isoi finoñeno. Cuarenta digamie baifemo naimiema reidano sedadimaci. Llotimaci: “Guiñeiticái, jiroñeiticái, Pablona nia cai meineñenia”. Naimacidi omo jicanolle rafuena o finollena sedadimaci.

22 Comandante coniruena facaduano raite:

—Jaca bumo cuemo o llua lloñeno.

Félix dine Pablo oretaja rafue

23 Comandante mena capitána uaidote. Llote:

—Doscientos soldaduaina uaido, imaci raruái finollena, Cesaremo navida baife imaci jaillena. Setenta caballuaido jaitino uaido. Doscientos ducirainina jiaí uaido. 24 Jiaie caballona ati, naie emodomó rainadacaida Pablo jaillena. Félix railla gobernador dine naimiema raise uiño —llote.

25 Cartana jiaí cuete. Iese cuete: 26 “Félix, omo cueticue. Claudio Lisiadicue. Cai mare gobernardordio. ¿Nigacino? Cue uai o dine oredicue.

27 Damie o dine oredicue. Judíuái naimiema meineiicana jira, soldaduái diga naimiema gaitaticue. Naimiema gaitataja meí, naimiedi romanuai nairai imienana fididicue. 28 Judíuái illaicomini dine naimiema uiticue, naimaci llogiduacinona raise cue uiñollena. 29 Naimaci einamací llogacínuaí muidona naimiema llogidotimaci. Iena fididicue. Naimie jaca buena finoñede.

Naimiena meinellena, naimie cárcelmo jonellena lloiacaiñedicue. ³⁰ Jiaïno naimiena dane meineiacanana fididicue. Ie jira o dine naimiena oretaticue. Ie llogidotino o dine jaïllena jiaï lloiticue. Naimaci naimiena omo lloitimaci” cuete.

³¹ Comandante llua isoi, soldaduai naïona Pablona Antípatrismo uitimaci.

³² Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide. ³³ Cesareamo railla nairaimo rillanona, gobernadormo cartana fecadimaci. Naimie dine Pablona jiaï uitimaci.

³⁴ Gobernador cartana facade. Ie mei Pablomo ie nairai illanona jïcanote. Pablo uai ote:

—Cilicia.

³⁵ Gobernador dinena raite:

—O llogidotino bia, o rafuena cacajiticue.

Soldaduaimo jiaï llote:

—Omoi anamo Herodes railla illaïma micori jofomo naimiena seda.

24

Félix ñine Pablo riidua rafue

¹ Dabecuiorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiaï bite. Naimiedi llogidoraima. Gobernadormo Pablona llogiduaitimaci. ² Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio. ³ Iobillamona, nana cai iena feiñoticai. ⁴ Ona iciaicaiñedicue; iadedi o fue maria jira, cue lluomo dallu cacarei. ⁵ Bimiedi eo cai abina aruire finode. Nana eniruemo ite judiuaïna uri itatañede. Naimiedi Jesús raillamie rafuedo jaidino illaïma.

⁶ Jusiñamui jofona jeare naimie finoacana jira, naimiena gaitadicaï. Moisés micori llogacïnuaido naimiena duere finoacadicaï; ⁷ iadedi comandante Lisias ride. Caïmona naimiena riire bairode. Naimiena cai llogidollena, o dine cai billena caïmo llote. ⁸ Pablomo o jïcanoïacania, naimiemona bie rafuena uiñoitio. Nana naimiena cai llogiduacïnona uiñoitio.

⁹ Judiuaï illaicomini, Tértulo llua isoi, dacïnode llotimaci.

¹⁰ Iemei gobernador dinena Pablomo llote:

—Mai o facaina o ñaïno.

Ie jira Pablo ñaite:

—Diga años cai nairai o anamo iticai. Ie jira cue abina riiduacïnona omo marefodo lloiticue. ¹¹ Doce digarui illanona, Jerusalémo como birui ridicue. Iena uiñoiacadïosa jiaïe cominimo jïcano. Jusiñamuina sedallena, Jerusalémo iticue. ¹² Bu diga conima uaina jaca uaitañedicue. Jusiñamui jofomo uaina uaitañedicue. Judiuaï ofracuaimo uaina jiaï uaitañedicue. Naisomo uaina jiaï uaitañedicue. Cominina uri itatañenana lloñedicue. ¹³ Nie isoide rafuena cue finuana coiñedimaci. Ie jira cuena raise llogidonidimaci; ¹⁴ iadedi jiaïe rafuena lloiticue. Cai usumatiaï Jusiñamuina sedadimaci. Naimiena jiaï sedadicue. Nana Moisés llogacïnuaina ñnoticue. Nana Jusiñamuina lloraini micriaï cuegafuïaina ñnoticue. Bimacïmona jiaïe llogacïnuaido jai jaidicue. Bimacïmona uanaïñedïnode jaidicue. ¹⁵ Fiodaïllamona comini ico jilloïllena ñnoticue. Jusiñamuina ñnotino jilloitimaci. Jusiñamuina ñnoñedïno jiaï jilloitimaci. Beno itino iena jiaï ñnotimaci. ¹⁶ Ie jira marena iacadicue, “Maraiñede rafuena Pablo finode” comini lloñellena, “Maraiñede

rafue Pablo finode” Jusiñamui lloñellena. ¹⁷ Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue. ¹⁸ Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. ¹⁹ Naie facaise Asiamona jiaie judíuai bitimaci. Cuemo nicino ia, ¿bue ñellena naimaci bene biñedimaci, cuena llogidollena? ²⁰ Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. ²¹ Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

²² Félixdi Jesús dibeimo itino rafuena raise uiñua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite. ²³ Félix capitámo Pablo cárcelmo sedajana lloste. Naimiena maiñellena jiai lloste. Naimiena canollena, naimie nabaiñiai naimie dine jaillena rairuiñede.

²⁴ Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiamaia. Jesúna iñuana cacadiiamaia. ²⁵ Jacino finoñellena, dama ie jitaila rafuena finoñellena, jiaruido Jusiñamui riicaillafue anamo iñellena cacadiiamaia. Pablo llofuamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

²⁶ Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena. ²⁷ Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fañonocaide.

25

Festomo Pablo llua rafue

¹ Naie provinciamo darui amani rilla mei, Cesareamona Jerusalémo Festo jaide. ² Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci. ³ Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeaiñena facadimaci. ⁴ Festo uai ote:

—Pablo Cesareamo fiebiite. Raire nainomo abido jaiticue. ⁵ Omoi illaicominimona damierie cue diga jaitimaci, nicino naimiemo ia, naimiena llogidollena.

⁶ Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena lloste.

⁷ Pablo billa mei, Jerusalémona bite judíuai naimie ecimo ofidimaci. Diga fododiconona naimiena llogidotimaci; iadedi tainuaido llogidotimaci. ⁸ Pablo uai ote:

—Judíuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

⁹ Iena cacade; iadedi Festo judíuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

¹⁰ Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue llole. Judíuaimo jaca buena finoñedicue. Iena raise uiñotio. ¹¹ Romanuai railla nairai illaicomini llogacinona cue iñoñenia, damamei jearede rafuena cue finoi, cue fiodaillamo

jaca ocuridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaima dine jaiacadicue.

¹² Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaimaia. Agripadi naie enirue illaima. ¹⁴ Diga irui nainomo itiaimaia. Naimiemo Festodi Pablo ie rafuena llote:

—Félix Pablona cárcelmo bene faínonocaide. ¹⁵ Jerusalémo navui cue ia, Jusíñamui diga nanoca ñairaimadi, judíuái einamací diga, naimiema llogidote. Naimiema duere finollena cuemo jicanotimaci. ¹⁶ Naimaci uai oticue: “Cai Romanos cominidi llogidogamiema jamai tainomo duere finoñedica; iadedi llogidogamiedi ie llogidotino uai nano cacareitica. Ie mei ie abi riidollcinomo jiai cacareitica”.

¹⁷ Ie jira naimaci cue dine benomo navui bia, ie are cominimo cue llouillanomo raídícue. Pablona cue dine uaidoticue. ¹⁸ Naimiema llogidotinodi lloia, naimiema marañede finoca rafue cue facaja isoi, llogidoñedimaci. ¹⁹ Dani naimaci inuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. ²⁰ Bie rafuena raise cue uíñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”; ²¹ iadedi Pablo nainomo jaiacañede. Cai nanoca illaima dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaima dine naimiema cue nia oretañenia.

²² Agripadi Festomo llote:

—Naimie ñaiana cacaacadicue.

Festo uai ote:

—Íco are naimie ñaiana cacareitio.

²³ Ie jira ie are Agripa, iaimaia Berenice diga, gobernador ofiracomo bitiaimaia. Finobillano ebire bitiaimaia. Soldaduai imaci illaicomini jiai bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote. ²⁴ Festo llote:

—Agripa, nana beno itino, bimiema ciodomoi. Jerusalémo ailluena judíuái naimiema llogidotimaci. Bene cue dine jiai bitimaci. Naimie meiniana eo jitaídímaci; ²⁵ iadedi naimiemo nicinodi iñenana jai uíñoticue. Naimiema meinellena cue llollena, nicinodi naimiemo iñede. Augusto dine naimie jaillena naimie jicanua jira, naimiema oretaiticue. ²⁶ Nicinodi nia iñede, cai illaímamo cue cuellena. Ie muidona omoi dine naimiema jai atidicue. Agripa, naimie ñaíamo raise cacarei. Naimiemo cai jicanua mei, nibaí nicino naimiemo illana uíñoitica. Iemona Augustomo cueitica. ²⁷ Augusto dine llavecami cue oretaia, naimiemo nicino iñenia, cuemona marañede.

26

Pablo ie abina dane riidua rafue

¹ Naie facaise Agripa Pablomo llote:

—Mai llono. O abi riiduacinona cacaacadicue.

Pablo: “Jí” raillanona, ie onolli a ñuitade. Raite:

² —Agripa, bene o illa jira, cuemona mare. Cue fue baillafuedo o uicomo cue abina riidoiticue. Judíuái cominidi diga rafuena cuena llogidotimaci.

³ Nana cai judíuai rafuena raise uifotio. Nana cai einamací rafuena jiai uifotio. Cuemo raise cacarei. ⁴ Jerusalémo naimací motomo cue illa jira, diga judíuai cue coniruenamona cuena uifotimací. ⁵ Cuena naimací lloiacanía, fariseo imiēna cue illana are uifotimací. Jiaie comini baifemo fariseuaidi cai einamací llogacínuaína inotimací. ⁶ Jusiñamuidi cai usumatiaí micoriaimo fiodaillamona comini ico jilloillena jaiē llote. Ie suillemo jai ocuiridícue. Ie jira llogidoracomó birui jai itícue. ⁷ Nagarui Jusiñamuina naimací eo sedajamona, cai doce nairaidi naie llogacino suillemo jiai nia ocuiridimací. Ore illaíma, bie ocuirillacino muidona judíuai illaicomini cuena llogidotimací.

⁸ ¿Bue ñellena Jusiñamuidi comini fiodaillamona jillotajana inoiacañedomoi? ⁹ Jaiē ie isoidícue. Nazaret ie Jesúna inotinona diga jearede rafuena jaiē finoacadícue. ¹⁰ Jerusalémo iena finodícue. Cárcelmo ailluena Jesúna inotinona jonetícue. Jusiñamui diga nanoca ñairaini uaido iena finodícue. Naimacina meínelle cai illaicomini raia: “Jee” raisoidícue. ¹¹ Diga judíuai ofiracomó, diga icaiño, naimacina duere finodícue. Naimací Jesúna jeare ñaiana jitaídícue. Naimací diga cue eo icirilla jira, jiaie eniruemó ite nairaimo jiai jaidícue, naimacina duere finollena.

*Pablodi Jesúna inuana llua rafue
(Hch 9.1-19; 22.6-16)*

¹² Ie jira Damascomó jaidícue. Jusiñamui diga nanoca ñairaini uaido jaidícue. ¹³ Ore illaíma, jitoma naidai ia, monamona quetiñotena cidícue. Naidi jitoma baifemo quetiñote. Cue abina quetiñote. Cue diga itino abina jiai quetiñote. ¹⁴ Eniruemó cue ana uaia, damie lluaana cacadícue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riccaillamona raise maiga jurareta suiñoacana isoi. Ie isoidio. Riccaillamona, cuena duere finoacadío”. ¹⁵ Uai otícue: “¿Budiota?” Cai Nama cuemo llote: “Jesúdícue. Cuena duere finodio. ¹⁶ Mai a naidacai. Cue rafuena o llofuellena ona fetodícue. O birui cúa rafuena lloitio. Ona cue uifotalle rafuena jiai lloitio. ¹⁷ Naimací ona duere finoia, omoi cominimona ona jillotaitícue. Judíuaiñedinomona ona jiai jillotaitícue; iadedi judíuaiñedino dine ona oretaitícue, ¹⁸ naimací comeciaí tainomó inellena. Taife anamona Jusiñamui anamo naimacina itataitio. Jeacino anamo naimací birui illa jira, jítiredinomó jai itimací isoidimací. Jusiñamuina uifñuamona, useredinomó itimací isoidimací. Iemei Jusiñamui naimací jeacinona dotajite. Cuena naimací inuamona, nana cuena inotino diga cue illano ico jaca iitimací”.

¹⁹ Ore Agripa, monamona cue cacaja rafuena inotícue. Jesúdi Jusiñamui jítóna inotícue. ²⁰ Damascomó itinomó iena jiai llotícue. Diga Judeamo itinomó iena jiai llotícue. Judíuaiñedinomó iena jiai llotícue. Llotícue: “Omoi comeciaino iticinona meido, Jusiñamui díbeimo omoi illena. Omoi comeciaino iticinona omoi meidua mei, mare rafuena finocana jai”. ²¹ Ie jira judíuai illaicomini Jusiñamui jofomó cuena gaitadimací. Cuena meineiacadimací; ²² iadedi Jusiñamui cuena canode. Ie jira birui bene itícue. Illaicomínimo beno nia llotícue. Illaicominiñedinomó jiai nia llotícue. Dama Jusiñamui facaina lloraini micoriaí ico suille cuegafuena birui llotícue. Dama Moisés micori ico suite cuegafuena jiai birui llotícue. Jiaie rafuena lloñedícue. ²³ Jaiē cuetimací: “Cristo legi cacajite. Fiodaillamona jilloite. Naimiedi nano dofoconi jilloitimie. Iemona cai judíuai comini jeacinomona jilloillena

uiñoitimaci. Iemona judíuainfedino jeacinomona jilloillena uiñoitimaci”. Ie jira bie rafuena llocana jaidicue.

Creyentena Agripa jaillena Pablo jitailla rafue

²⁴ Iese Pablodi abi riiduano, Festo riire llote:

—Pablo, odi uairico isoidio, eo comecina o facaja jira.

²⁵ Pablo uai ote:

—Uairicoñedicue. Festo, odi cue illaimadio. Cue llucinodi uanaicino. Ebena ñai-ñaiacaiñedicue. ²⁶ Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede. ²⁷ Ore Agripa ¿Jusiñamui lloraini ciegafuiaina ñnotio? omo jicanoticue. Iena o ñnuana jai uiñoticue.

²⁸ Agripa dinena uai ote:

—Dallu o ñaiamona, cuena creyentena nibai itataiacadio.

²⁹ Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoi bie lloeo diga maiana jitañedicue.

³⁰ Iemona Agripa naidacaide, Festo diga, Berenice diga. Nana raidino jiai naidacaidimaci. ³¹ Jino jaillano, Pablo joreñona siadotimaci:

—Bimie jaca buena finoñede, naimiena cai meiniana llolena. Buena finoñede, cárcelmo illena.

³² Agripa Festomo llote:

—Naimie cai nanoca illaima dine jaillana jicanoñedena, niadedi naimie jino marena oreca.

27

Romamo Pablo jailla rafue

¹ Itialiamo Augusto dine Pablo oretajana Festo llua mei, Pablona jiaie llavecana diga capitámo fecade. Naie capitádi Julio. Augustona mameciredede batallómo jainaiaide. ² Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai. ³ Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaillena rana ote. ⁴ Temei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai. ⁵ Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia. ⁶ Naie bote Roma dine jaiñena jira, capitádi jiaie botena jenode. Capitádi Alejandriamona bite botena baite. Naie bote Itialiamo jaiacade. Ie jira naie botemo cai jonecaida, caina uite. ⁷ Diga irui fecuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai. ⁸ Uiasi iaireise iese sefuicana jaillanona, Maregobe railla illanomo ridicai. Lasea railla nairai jiai ianori ite.

⁹ Digarui cai faifilla jira, noci deisoilla facaise jai illa jira, jaillena eo jaciredede. Ie jira botemo maijidinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticaí. Botena jiai nibai faifiticaí. Cai nibai jiai faifiticaí —llote.

11 Iese llote; iadedi naie bote piloto oni jaiacade. Naie bote nama jiai oni jaiacade. Capitán iaímaiaí lluana Pablo lluana baífemo ñnote. 12 Igobe marañena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide. 13 Beici dinena aifidi bia, “caí jitailla aifidi bite” raillanona, suiñodicaí. Creta iaírei monaillai fuemo jaidicaí. 14 Ie mei raire caí dine eo riire aifi bite. Naie aifi noci deisoilla dinena bite. 15 Botena oni uite. Botena atona eronenidicaí. Ie muidona jamai ebena jaidicaí. Aifidi caina iese uite. 16 Janorede uiasi fuemo aifi raise iñenanomo jaidicaí. Nai uiasi mameci Claudia. Faiññellena bote ie janorede nocaí sefuire a aiñodicaí. 17 A aiñua mei, rao diga botena ruica maíticaí. Sirte railla conillie illanomo caí joodai raillano, velaiaína duiñodicaí. Iemei aifi jamai uigacaí. 18 Ie areruido aifi riire illa jira, cargana oni dotadicaí. 19 Dane ie are bote ie raruaí, caí onolli diga, oni dotadicaí. 20 Diga irui jitoma bainide. Diga irui ucuaí jiai bainide. Aifi eo riire nia ite. Caí jillobiñellemo jai ocuirñedicaí.

21 Diga irui caí guiñena mei, Pablo naimacimo llote:

—Nabaiñiaí, cue uaina navui ñnotiomoidena, niadedi bie isoi sefuiñedicaí. Cretamo caí fiebidicaína, bie isoi sefuiñedicaí. 22 Omoi comeciaina ocuiño. Bie botedi faifite; iadedi caimona jaca buna faifiñeite. 23 Jaive naiona Jusiñamui jaienicidi cuemo bairede. Jusiñamuimo jainaiaidicue. Naimiena sedadicue. 24 Naie jaienicí cuemo llote: “Pablo, jaciruiñeno. Romamo o nanoca illaíma dine iitio. Jusiñamui ona duenailla jira, nana o diga jaidino jilloitimaci”. 25 Ie jira omoi comeciaina ocuiño. Cuemo llua isoi, naimiedi bie rafuena suitaite. Jusiñamui iena finuana ñnoticue. 26 Nibaí uiasimo jutadaiticaí.

27 Catorce digarui naio illamona, Adria railla monaillaimo jamai caí jaiá, naiona daferui facai marineruaidi: “Enirue iaíre ite” raillanona comeciaina facadimaci. 28 Ie jira ie aforedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. 29 Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci. 30 Naie facaise marineruai botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

31 Iena ciuano, Pablo capitámo llote. Soldaduaimo jiai llote:

—Botemo bimaci fiebiñeniadedi, jilloñeitomoi.

32 Ie jira soldaduaidi nocaí maía raona jaitadimaci. Jai dinomo nocaena faínonocaidimaci. 33 Nia monañenia, Pablo nana caímo llote:

—Guiño. Catorce digarui illanona, jai guiñedomoi. 34 Ie jira guiño, omoi maírillesa. Ua faifiñeitomoi.

35 Iese naimie raillanona, Jusiñamuimo iobillacinona fecade, nana comini illa uicomó. Llomeniconá taíruano, guite. 36 Nana naimaci comeciái ocuiñocaida, jiai guitimaci. 37 Botemo doscientos setenta y seis diese iticaí. 38 Caí monillamona, fiebide trigona monaillaimo oni fadodicaí, bote meenaiñellena.

39 Ie oni monaidemo, erodatemo, naie eniruenta uíñoñedicaí. Igobemo conillici illana ciodicai. Nainomo jamai ebena sijiacadicaí. 40 Ie jira lloelluna nainomo oni faínonocaidicaí. Datarabe maiana suiñodicaí. Vela aífimo sebiñoticaí. Monaillai fuemo enirue dine jai jaidicaí. 41 Iemei jaiciridifomo

ridicai. Eniruemo jodate. Bote muido eniruemo jaiaire jodate. Eo baguamona jillaci taicosite. ⁴² Naimaci iamona jillobi raillano, soldaduai llavecanona meineiacadimaci. ⁴³ Pablona jillotaicana jira, capitán iena rairuide. Llote:

—Nano iana uifnotino diese monaillaimo ana daia. Eniruemo jai. ⁴⁴ Jiaino bote ie rabicido juicaida icana jai. Jiaino bote ie raruiaido juicaida icana jai. —Iese eniruemo nana marena ridicai.

28

Maltamo naimaci illa rafue

¹ Jai cai jillua mei, Malta railla uiasimo cai illana uifnoticai. ² Nainomo ite comini caina marena feifnotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. ³ Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide. ⁴ Jaio naimie onollido lliillana Malta comini ciuano, coniniri fñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. ⁶ Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi ñibai Jusiñamui.

⁷ Naie illanomona uiasi illaïma enirue iaire ite. Naimie mamecidi Publio. Caina marena feifnote. Darui amani ie jofomo caina marena itatate. ⁸ Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate. ⁹ Bie rafue suilla jira, naimie dine nana uiasimo ite duidino bi-bidimaci. Naimacina jillotate. ¹⁰ Ie jira caïmo iobillacinona eo fecadimaci. Cai oni jaiadedi, cai jitailla ra caïmo fecadimaci.

Romamo Pablo rilla rafue

¹¹ Daje amani fivui illa mei, Alejandriamona bite botedo jaidicai. Naie uiasimo nana rollime facaiseconi naie bote ite. Mena jusiñamui iaïmaïai joreño bote muidomo ite. Damie Cástorna mameciredede. Jiaïmie Póluxna mameciredede. ¹² Naie botedo oni cai jaillanona, Siracusamo sijidicai. Darui amani nainomo iticai. ¹³ Nainomona jaillano Regiomo sijidicai. Darui illa mei, aïfi beici ñinena billa jira, ie areruido Puteolimo ridicai. ¹⁴ Sijia mei, nainomo creyentiaïna baiticai. Naimaci diga siete digarui cai illana jitaïdimaci. Ie mei Roma ñine jaidicai. ¹⁵ Romamo ñia cai riñenia, nainomo ite creyentiaï cai billana fididimaci. Cai ñine bitimaci. Foro de Apio railla nairaimo damerie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiaï ocuiñote. Cai diga Romamo jaidimaci. ¹⁶ Romamo cai ria, capitán llavecanona ie illaimamo fecade. Cárcelmo Pablona naie illaïma oreñede; iadedi Pablo ie ibauiga jofomo eneno oni orede. Aisiï raillano, daje soldado nainomo naimiena sedade.

Romamo Pablo llofuia rafue

¹⁷ Darui amani illa mei, Pablo Romamo ite nanoca judiaïna uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacínuaína jaca ñnotícue; ¹⁸ iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira; ¹⁹ iadedi judíuai: “Dama ite” railla jira, cai nanoca illaíma dine jaillena jicanotícue; iadedi cue nairai diga jaca iciriñedicue. ²⁰ Omoi diga ñaillena, omoína cioacadícue. Fiodaillamona ico comini jillollena cue llofuecabilla jira, bie lloeo diga maigacue.

²¹ Uai otimaci:

—Judeamona jiaíno ona cuega cartana jaca feiñoñedícai. Caimo o rafuena lollena, jaca buna biñede. Bene jaca bu ona jeare ñañede. ²² Ie jira omona naie rafuena cacacadícai. Naga illanomo comini o llofuiana uaitajana uiñotícai. Creyentiaina jeare ñaitimaci. Iena fididícai. Ie jira caimo iena raise llono.

²³ Naimie dine dane billíruína llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofue. Moisés micorí llogacínuaímona, Jusiñamui facaina lloraíni micoríai cuegafuaímona, Jesúsna llofue. ²⁴ Jiaíno naimie llofuiana ñnotimaci. Jiaíno ññoñedimaci. ²⁵ Nana naimaci comeciaina daje isoi lloññedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorina cai usumatiaimo raise llotatate. Omoi usumatiaí micoríai illa isoi nia itomoi. Isaías micorídi omoína jai cuega rafue jai suide. Naimie micorí cuete:

²⁶ Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷ Omoi comeciái jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisínidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue díbeimo iacaiñedomoi, omoína cue jilloitai raillanona’ ”.

²⁸ Jusiñamui rafuena omoi ññoñena muidona, judíuaiññedímodi Jusiñamui naimacína jilloitaiacanana jai fididimaci. Naimaci iena cacareitimaci.

²⁹ Iese naimie llua mei, judíuaiídi coniníri siadocana abido jaidimaci.

³⁰ Mena años Pablo ie jofomo ite. Ie illa dínorí naie jofona íbauide. Nainomo nana naimie dine bite comínina feiñote. ³¹ Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofue. Marefodo llofue. Naimíedi cai Nama Jesucristo rafuena llofue. Jaca budí naimie llofuiana rairuíñede. Teofilo, jaca digacino omo jai llotícue. Mai. Lucadícue.

ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo Pablo cartana orede

¹ Romamo ite creyentiai, omoi dine cartana oredicue. Pablodicue. ¿Nigacino? Jesucristo dibeimo maijidicue. Jusiñamui fetocamedicue. Ie mare rafuena cue lollena, cuena orede.

² Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiai cuega. Iemona birui facacabidicai. ³ Bie rafuedi Jusiñamui Jitona llote. Naimie jaie ite usumadi cai illaïma David micori. ⁴ Naimie Jusiñamui Jitonana uifnoticai. Jusiñamui Joreñodi siño rafuedo caina iena uifnotade. Jusiñamui Jito fiodaïllamona, Jusiñamuidi ie Jitona jillotate. Jusiñamui Jitodi Jesucristo. Cai Nama. ⁵ Caina duenaïllanona, caina oretate, naga nairaïaina naimiena inotallena, naimiena naimaci iobitallena. ⁶ Naimacimona itomoi. Naimiemo omoi duïllena, Jesucristo omoïna jai fetode.

⁷ Romamo ite creyentiai, Jusiñamui isiruiganodomoi. Naimie isoi mareuidinona omoi illena, fetocanodomoi. Cai Moo Jusiñamui, cai Nama Jesucristo diga, omoïna duenaite. Iena uifnocana mai omoi jai. Iaimaïai omoïna uri jai itatatiïaïmaïai. Iena omoi uifnocana mai omoi jai.

Roma dine Pablo jaiacade

⁸ Diga comini, diga illanuaimo, Jesucristona omoi inuana jai fididimaci. Ie jira nano dofoconi omoi facaina Jesucristomo iobillacinona fecaacadicue, Jusiñamuimo iena naimie fecallena. ⁹ Jusiñamuimo cue jïïa, omoïri jïidicue. Jusiñamui iena uifnote. Naimie Jito rafuena cue lluanona, cue comecimona naimiena sedadicue. ¹⁰ Jusiñamuimo cue jïïa, naimiemo jicadicue, cuena canollena. Naimie jitaïa, omoi dine ja muidomo cue riiticue. Iena jicadicue. ¹¹ Omoïna eo cioacadicue. Jusiñamui Joreño uai cuemo illamona, omoi comeciaina ocuifnotaiacadicue. ¹² Jesucristona omoi inuamona, naimiena cue inuamona, coninina cai comeciaina ocuifnotaiticai.

¹³ Cue amatiai, diga icaiño omoi dine jaiacadicue. Iena omoi uifnuana jitaïdicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaïe nairaïai jai inotimaci. Omoi dine Jesucristo rafuena lluaiacadicue, iena omoïmona dajerie inollena. ¹⁴ Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaifnedinomo iena jiai lloiacadicue. Abina uifnotinomo iena lloiacadicue. Abina uifnoñedinomo iena jiai lloiacadicue. ¹⁵ Ie jira omoïmo Jesucristo rafuena eo lloiacadicue.

Jesucristo rafue siño

¹⁶ Jesucristo rafueri iobidicue. Naie rafuedi siño. Jusiñamuidi naga iena inotinona naimaci jeacinomona jillotate. Juduïaidino nano iena cacadimaci. Ie mei juduïaifnedino iena jai cacadimaci. ¹⁷ Naie rafuemona Jusiñamui caina feifnuana uifnoticai. Jusiñamui caina marebicaitajana uifnoticai. Naimiena cai inuamona iena uifnoticai. Jusiñamui facaina lloraïma micori jaie cuega: "Jusiñamuina inuamona marebicaidimiedi Jusiñamui dibeimo ico jaca iite" cuega.

Comini jeacinona fnoïadedi, dani naimaci muidona

18 Nana Jusiñamuina jitañedinodi naimie duere finollifue anamo jai itimaci. Iena uiñoticaí. Jusiñamui caína iena uiñotade. Maraiñede rafue naimaci finuanona, Jusiñamui ie uanaicinona jamaidimaci. 19 Jusiñamui naimacina naimiēna uiñotaja muidona, imaci comeciāmona Jusiñamui illana uiñotimaci. 20 Enirue finua facaisemona naimie finoca ramona naimie illana uiñotimaci. Naimiēna cionidimaci; iadedi naimie finoca ramona naimiēna uiñotimaci. “Naimiēna uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñofñedicaí” rainidimaci. 21 Jusiñamui uiñotimaci; iadedi naimie uaina ñnoñēdimaci. Naimiemo comeciāina facañēdimaci. Naimiemo iobillacinona fecañēdimaci; iadedi ebena comeciāina facacabidimaci. Naimaci comeciāi jai tainomo ite isoide. Jai marebificañēdimaci. 22 “Abina uiñoticaí” raitimaci; iadedi abina uiñofñēdimaci. Jamai ebe isoidimaci. 23 Jusiñamui jaca ite. Naimie uai siño. Naimiēna sedaacañēdimaci; iadedi jiaie rana sedaacadimaci. Fiodairuide ñmana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

24 Ie jira Jusiñamui naimacina fañnonocaide, naimaci jitailla jearede rafuena imaci finollena. Ie meí conini diga eo meirede rafuena finouidimaci. 25 Jusiñamui ie uanaicinona jitañēdimaci. Uañañedicinodo jaidimaci. Jusiñamui finoca rari iobidimaci; iadedi naie rana finodimieri iobiñēdimaci. Ero, daní Jusiñamuimo iobillacinona jaca caí fecacabillasa. Uanaicinona lloticue.

26 Iese naimaci illa jira, naimaci jitailla meirede rafuena finollena, Jusiñamui naimacina fañnonocaide. Coniñona aifuedotimaci. 27 Naimaci jitailla jira, conimana aifuedotimaci. Naimaci maraiñede finoca rafuemona duere sefuellemona ñbana feiñoitimaci.

28 Jusiñamuina naimaci uiñoiacañēna jira, maraiñede rafuemo naimaci comeciāi facallena, Jusiñamui naimacina fañnonocaide. Naimaci finorainiga rafuāina finocana jaidimaci. 29 Naga isoide maraiñedicinona finouidimaci. Naga isoide jearedicinona finouidimaci. Jiaie comini rana nicidouidimaci. Jiaie cominina duere finouidimaci. Jiaima raconi uradoisoidimaci. Cominina jaca meinētimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñañillaredimaci. 30 Jiaie comini joreñona ñañoidimaci. Jusiñamuina jaca gañēdimaci. Cominina jeare ñañoidimaci. Abina ñedouidimaci. Abina biriuidimaci. Diga jearede rafuemo comeciāina facauidimaci. Naimaci moo uaina ñnorainidimaci. Naimaci ei uaina ñnorainidimaci. 31 Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiaí dueruirainidimaci. Iese jaisoidimaci. Iese nia jaicabidimaci. 32 Jusiñamuidi jaiē lloite: “Bie isoide rafuena finodino iraimo jaca duere sefuitimaci. Cue illanomo jaca ññēitimaci” lloite. Jusiñamui lluaña uiñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macai mare iese imaci finua” raitimaci.

2

Jusiñamuidi maraiñede rafuena finodinona duere fñoite

1 Ero, omoi judiuaimona damie comecina nibai facade: “Bie isoide maraiñede rafuena fñoñēdicue. Iena finuamona, jiaie comini Jusiñamuimona duere sefuitimaci. Cue duere sefuiñēiticue” raillamo naimie comeciāina

facade; iadedi naie isoide maraiñede rafuena naimie finua jira, Jusiñamui naimiena jiai duere finoite. ² Jusiñamuidi uanaicinona uiñuamona, maraiñede rafuena finodimiena duere finoite. Iena uiñoticaí. ³ “Jusiñamui duere finollicino anamona jilloñeitimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiai duere finoite. ⁴ Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie dibeimo o illana naimie jitaide. Naiena jamaiñeno. ⁵ O comeci jaiairena jira, o comeci Jusiñamui dibeimo meidoiacaiñedio. Ie jira ico eo duere sefuitio. Ie riicaillifuemona Jusiñamuidi nana naimiena iñoñedinona duere finoite. Iena Jusiñamui finoaia, Jusiñamuimona mare. ⁶ Nagamiiái imaci finua ille dinori Jusiñamui naimacina duere finoite. ⁷ “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite. ⁸ Maraiñede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona iñoñedimaci. ⁹ Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedinó cominina jiai duere finoite; ¹⁰ iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite, ¹¹ naga nairaina daje isoi naimie finua jira.

¹² Judíuaiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci iñoñena jira, jiai jaca daje isoi duere sefuitimaci. ¹³ Moisés micori llogacinona cacajamona, Jusiñamuimona jaca buna marebicaiñede; iadedi iena iñuamona marebicaide. ¹⁴ Judíuaiñedinodi Moisés micori llogacino anamo iñedimaci; iadedi naimaci comeciaí facajamona, marecinona finuana uiñotimaci. Marecinodo jaillana jiai uiñotimaci. ¹⁵ Moisés micori llogacino anamo naimaci illa isoi, naimaci comeciainona marecinona naimaci finoiadedi, iena uiñotimaci. Ie jira maraiñedicinona naimaci finoiadedi, iena jiai uiñotimaci. ¹⁶ Biena llofuecabiticue. Ico Jusiñamui llua jira, Jesucristodi cominimo imaci comeciaino iticinona juez isoi lloite. Maraiñedicinona finouidinomo duere finollicinona lloite. Marecinona finouidinomo duere finollicinona lloñeite.

Moisés micori llogacinodo judíuai comini raise jaiñedimaci

¹⁷ Abina iedumona, omoimona damierie raitomoi: “Judíuai imacidicaí. Moisés micori llogacino anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi. ¹⁸ Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi. ¹⁹ Jusiñamuina uiñoñedinona llofueiacadomoi. Naimiena naimaci uiñoñena jira, jitreñedinomo itimaci isoidimaci. Uanaicinona naimacimo omoi llumona, naimaci comeciaina lligaiñoiacadomoi. Naimacina uanaicinona uiñotaiacadomoi. ²⁰ Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi. ²¹ Jiaie cominina llofueiacadomoi; iadedi ¿niese omoi comeciaino fueoiacaiñedomoi? “Rana fiñeno” llotomoi; iadedi fiidomoi. ²² Omoi aiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiidomoi.

²³ Moisés micori llogacinori abina iedotomoi; iadedi iena omoi inoñena jira, Jusiñamuina jeare finodomoi. ²⁴ Iena Isaías micori jaie cuete: “Omoi muidona judíuainedínodi Jusiñamuina jeare ñaitimaci” cuete.

²⁵ Jusiñamui dibeimo jai omoi illana jiaie comini uiñollena, omoi abina detatatomoi. Moisés micori llogacinona omoi inoiadedi, omoi abina detatajái mare; iadedi naicinona omoi inoñena, abina detatañedino isoi jai itomoi. Jusiñamui dibeimo iñedomoi. ²⁶ Moisés micori llogacinona judíuainedino inoiadedi, naimaci abina detatañenia, Jusiñamuimona naimie dibeimo ite judíuái isoidimaci; iadedi abina detatañedimaci. ²⁷ Moisés micori llogacinuaina uiñotomoi. Omoi abiaína detatatomoi; iadedi Moisés micori llogacinona judíuainedínodi inua jira, Moisés micori llogacinuai omoi inoñena jira, Jusiñamuimona omoi baifemo uaidimaci. ²⁸ Omoi jeiciamona Jusiñamui ua comiñedomoi. Omoi abiaína detatajamona, Jusiñamui ua comiñedomoi; ²⁹ iadedi omoi comeciaí marena illamona, Jusiñamui ua cominidomoi. Abi detataja jira, Jusiñamui comiñedomoi; iadedi omoi comeciaí marena illa jira, Jusiñamui cominidomoi. Raise naimiena inotinodi cominimona iobillacinona feiñuana jitañedimaci; iadedi Jusiñamuimona iobillacinona jitañedimaci.

3

¹ Bie cartana omoi feiñuanona, iena facallemona, damierie comecina faichte: “Judíuaidicai; ia naiemona, ¿niese jiaie comini baifemo faiticai? Cai abiaína detataticai; ia naiemona jaca buena oñedicai”. ² Ie jira omoimo lloiacadicue: “Judíuaina cai illana eo mare”. Jusiñamuidi dani caimo ie rafuena llote. Jiaie cominimo lloñede. ³ Cai cominimona dajerie Jusiñamui rafuena inoñedimaci; iadedi Jusiñamuidi ie lloga rafuena jaca finode. ⁴ Comini tainona llotimaci; iadedi Jusiñamuidi uanaicinona jaca llote. David micori iena jai llote:

O lloga uaimona uanaicinona o llouillana uiñotocai.

O finoca rafuena jiaie comini uaitaia, o dinena jaca anafenodio.

Iena uiñotocai.

⁵ Dane damierie comecina facaite: “Jusiñamuidi mareuidimie. Cai baifemo uaide. Cai marañedicinona cai finuamona caina Jusiñamui jitaia, jiaie cominidi Jusiñamui jaca mareuillana uiñoitimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira”. Omoimona iese dajerie comeciaina facadimaci; ⁶ iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiaí duere finonite.

⁷ Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. ⁸ Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, marañedicinona finocana cai jailla’”. Iese cue lloñena jira, Jusiñamui naimacina duere finoia, cuemona mare.

Jecinona nana cai finodicai

⁹ Judíuaidicai; iadedi jecinona nana comini finua jira, jiaie nairai baifemo fañedicai. Judíuaidicai; iadedi jecinona finodicai. Judíuainedínodi jecinona jiaí finodimaci. ¹⁰ Jusiñamui facaina lloraini micoriai iena jaie cuete: Marebicaidino jaca iñede. Nana comini marañedimaci.

11 Jaca buna Jusiñamuina raise uifioñedimaci. Naimiena raise uifioicaiñedimaci.
 12 Mare rafuedo nana jaiñedimaci. Maraiñedicinona finooidimaci. Jaca buna marecinona finoñedimaci.
 13 Jeare ñaicabitimaci. Tainona llocabitimaci. Naimaci ñaiamona diga jearede rafue comucabide.
 14 Naimaci fuiái eo borede.
 15 Icirillamona jaiie cominina raire meinetimaci.
 16 Nine naimaci jaiia, diga maraiñede rafuena comuitatimaci.
 17 Uri illana uifioñedimaci.
 18 Jusiñamuina jaciruiñedimaci jaiie iese cuete. 19 Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uifnuamona, dani abi imaci ridolle uai ifñede. Nana comini Jusiñamui duere finollicino anamo itimaci. Iena uifnoticai. 20 Moisés micori lloga uaina inuamona, Jusiñamui jitailla isoi, jaca buna marebicaifñeite; iadedi naie lloga uaina cai uifnuamona, jeacinona cai finuana uifnoticai.

Jesucristona cai inuamona jillobidicai

21 Jusiñamuidi birui caina marebitatajana jai uifnotade. Moisés micori lloga rafuedo iena birui uifnoñedicai; iadedi Moisés micori iena jaiie llote. Jusiñamui facaina lloraini micoriai iena jiai llotimaci. 22 Jesucristona cai inuamona, Jusiñamuidi caina marebicaitate. Nana Jesucristona inotinona marebicaitate. Nie isoide cominina cai ia, caina marebicaitallena, caina daje isoi feifnoite. 23 Nana caidi jeacinona finodicai. Jusiñamui caina jitailla isoi, marena ifñedicai. 24 Caina naimie duenaillamona, naimie jitailla jira, Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai inoia, caina duere finoñeite. Jusiñamuina mareuidimiena uifnoticai. 26 Naimiena iese oretajamona, Jesús inotimiena Jusiñamuidi marebicaitaja jira, Jusiñamuina mareuidimiena uifnoticai.

27 Cai jeacinomona marena cai illena, buena finoñedicai. Ie jira cai finuamona abi iedoñedicai. Buena finoñedicai; iadedi Jesucristona cai inuamona, jillobidicai. Ie jira cai finoca rafueri abina iedoñedicai. 28 Moisés micori lloga uaina cai inuamona, marebicaifñedicai; iadedi Jesucristona cai inuamona marebicaidicai.

29 Jusiñamuidi dani judíuai imaci Mooñede; iadedi naimiedi nana comini imaci Moo. 30 Cai Moodi jaca damiena jira, naimiena naimaci inua jira, judíuaina marebicaitate. Naimiena naimaci inua jira, judíuainñedinona jiai marebicaitate. 31 Cai inuamona cai marebicailla jira, Jusiñamui facaina lloraini micoriai jaiie lloga uaina caitañedicai; iadedi iena ua inocana jaidicai.

4

Abraham micorimona fueoticaí

1 Abraham micori rafuena ja ñaiacadicue. Naimie marebicaillafuena omoimo lloiacadicue. 2 Ie finoca rafuemona naimie micori marebicaidena, naimie micori abina iedote; iadedi ie finoca rafuemona naimie micori marebicaifñede. Ie jira Jusiñamuimona naimie micori abina iedoiacaiñede. 3 Iena Moisés micori jaiie cuela: "Jusiñamuina Abraham micori inua jira, Jusiñamuidi naimie micorina jeacinona jaca finoñedimiena isoitate. Naimie

mícorina marebicaitate” cuega. ⁴ Maijillena buna damie ocuiadedi, ibajana jamai fecañeite; iadedi maijia facaina fecaite. ⁵ Ero, ie maijiamona jaca bu jeacinona jaca finoñedimiena isoiaçaifede. Jusiñamuina naimaci ñnua jira, Jusiñamuidi marañedinona marebicaitate. ⁶ Bie rafuena David mícori jiai jaie cuega:

Te maijiamona bu marebicaiñena jira, Jusiñamui marebicaitagamiedi iocire iite.

⁷ Naimaci marañedicinona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

⁸ Naie jeacinomo Jusiñamuidi comecina dane facañeite.

Naimiedi jai feitaite.

Te jira iocire iitimaci.

⁹ Dani abina detatino iocire illena lloñede; ia abina detatañedinomo iena jiai llote. Jusiñamuina Abraham mícori ñnua jira, Jusiñamui naimiena marebicaitate. ¹⁰ Naimie mícori abina nia detatañenia, naimie mícori marebicaide.

¹¹ Naimie mícori marebicailla mei, Jusiñamui dinena Abraham mícorimo abi detatajana llote. Abraham mícori ie abina detatajamona, Jusiñamuina naimie mícori ñnuana uiñoticaí.

Te abina detatajamona, judío imiena jai jaide; iadedi Jusiñamuina ñnuamona, naimie mícori marebicaide. Te jira Abraham mícoridi nana Jusiñamuina ñnotino moo. Nana comini abiaina detatañedimaci; iadedi naimaci ñnua jira, Jusiñamui naimacina marebicaitate. ¹² Cai comini abiaina detatimaci; iadedi cai moo Abraham mícori isoi naimaci ñnua jira, Abraham mícori isoi marebicaidimaci. Te jira Abraham mícori nana naimaci moo.

Abraham mícori ñnuamona, Jusiñamui lloga uaidi suide

¹³ Abraham mícorimo Jusiñamuidi: “Nana enirue omo iiticue” llote. “O uruaiamo iena jiai iiticue” llote. Moisés mícori llogacinona Abraham mícori ñnua jira, iese Jusiñamui lloñede; iadedi Jusiñamui lloga uaina Abraham mícori ñnua jira, iese Jusiñamui llote. Abraham mícori ñnua jira, Jusiñamuidi naimiena marebicaitate. ¹⁴ Moisés mícori lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese iñede. Dani naimiena ñnotinomo: “Nana eniruena omoimo iiticue” llote. ¹⁵ Moisés mícori lloga uaina naimaci raise ñnoñenia, Moisés mícori lloga uaido jaidino Jusiñamui riçaillifue anamo itimaci; iadedi Moisés mícori lloga uai iñedena, Jusiñamuimona buna duere sefuiñeite.

¹⁶ “Eniruena omoimo iiticue” naimiena ñnotinomo Jusiñamuidi llote. Due-naillamona llote. Nana Abraham uruai mícoriaimo iena llote. Dani Moisés mícori lloga uaido jaidinomo lloñede; iadedi Abraham isoi ñnotinomo jiai llote. Abraham mícori isoi cai jailla jira, naimiedi cai moo. ¹⁷ Jusiñamui iena jaie llote: “Ona diga nairai imaci moona jai itataiticue” llote. Jusiñamui fiodaitinona jilloitarede. Nia iñede rana ie uaido jiai comuitate. Te jira Jusiñamui Abraham mícorimo llua isoi, suide. Jai fiodaitino illa isoi Abraham mícori abi illa jira, Jusiñamui naimie abina mairitate. Te ai oiniñomo urue comuillena llote.

¹⁸ Jusiñamui Abraham mícorimo jiai llote: “Ailluena uruai omo iite. Diga nairai omona jebuite” llote. Abraham mícoridi naie ñnorainiga rafuena ñnote. ¹⁹ Jaca ñnote; iadedi cien años naimie mícorimo illamona, naimie jai eeiroma. Naimie mícori aidi, Sara mícoridi, oiniñona jira, nairaiño uruedi comuñede. ²⁰ Abraham mícoridi Jusiñamui llua ñnote. ñnocana jaillano,

iobillacinona Jusiñamuimo fecade. ²¹ Abraham micoridi Jusiñamui lloga uaina finuana eo ñnote. ²² Ie jira Jusiñamui naimiena marebicaitate.

²³ Naie rafue jaie cueba; iadedi dama Abraham micorimo duñede; ²⁴⁻²⁵ iadedi caimo jiai duide. Jusiñamuina ñnotinona marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fiodaite. Caina marebicaitallena, naimiena jai jillotate.

5

Jai cai marebicaidicai

¹ Jusiñamuina cai ñnuamona cai marebicailla jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. ² Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridicai; ³ iadedi duere cai sefuiadedi, jiai iobidicai. Duere sefuillamona, cai comeciai ocuiñocana cai jaillana uiñoticaí. ⁴ Cai comeciai ocuiñuamona facacifidicai. Facacifillamona, Jusiñamuimo ocuridicai. ⁵ Jusiñamui caina isiruilla jira, tainomo ocuriñeiticai. Ie Joreñoña caimo fecade. Ie Joreño cai comeciaino illa jira, ie Joreño Jusiñamuidi caina naimie caina isiruillana uiñotade.

⁶ Cai jeacinomona dani jillonidicaino, Cristo cairi fiodaite. Maraiñedicai; iadedi naie facaiseconi cairi fiodaite. ⁷ Maraiñedimie facaina caimona jaca buna fiodaicaiñede. Caimona nibai damie maremie facaina fiodaite; iadedi nana comini lese fiodaicaiñedimaci. Maraiñedimie facaina jaca buna fiodaicaiñede; ⁸ iadedi nia maraiñedicaino, Jusiñamui caina isiruillamona, Cristo cairi fiodaite. ⁹ Cristo cairi fiodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite. ¹⁰ Cai dinena Jusiñamuina cai enoilla facaiseconi naimie Jito cairi fiodailla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uiñoticaí. ¹¹ Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

Adán micori finoca rafue

¹² Bie rafue jai suide. Adán micori jeacinona finuamona, nana caimo jeacinodi jai comuide. Jeacino caimo illa muidona, cai jeacino ite diga nana fiodaicana jaidicai. ¹³ Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede. ¹⁴ Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana comini fiodaicana jaidimaci. Adán micori isoi jeacinona finoñedimaci; iadedi fiodaicana jaidimaci. Adán micoridi Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

¹⁵ Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena. ¹⁶ Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicai; iadedi marebicaidicai. ¹⁷ Dama Adán micori jeacinona finuamona, cai jeacino ite diga nana

cai fiodaicana jaidicai. Jusiñamui caina eo duenaillamona, Jusiñamui caina marebicaiillamona, dama Jesucristo muidona, Jusiñamui diga jaca iiticaí.

¹⁸ Dama Adán micorí muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairedimaci. ¹⁹ Adán micorí Jusiñamuina inoñenamona, nana comini jeacinona finodimaci. Jesucristo Jusiñamuina inuamona, ailluena comini marebicaitimaci.

²⁰ Jusiñamui Moisés micorimo rafuena llote. Iena comini inoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite. ²¹ Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicaiillamona, cai Nama Jesucristo muidona, Jusiñamui diga jaca iiticaí.

6

Jesucristomo cai duillamona, jeacino anamo jai iñedicai

¹ Jeacino anamo jai iñedicai; iadedi omoimona damierie comecina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticaí. Iemona cai jeacinona oni dotajamona, naimie caina duenaillana eo raise uiñoiticaí”. ² Iese comecina facañeno. Jeacino anamo jai cai iñena jira, jeacinona finocana cai jaiñena. ³ Biena uiñotomoi. Cristo Jesús díbeimo cai illamona, nana caidi bautizagacai. Cristo fiodailla jira, cai comeciaino ite jearedicino anamo jai iñedicai. ⁴ Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie díbeimo cai illamona, cai jeacino anamona jillodicaí. Cai comeciaino jaie rafue birui illa jira, jaie rafuedo jai jaidicai.

⁵ Cristo fiodaite; iadedi naiemona jillode. Naimie díbeimo cai illanona, cai comeciaino ite jearedicino anamona cai jillua jira, Cristo ie mare rafue anamo birui iticai. ⁶ Cristo fiodailla jira, cai comeciaino ite jearedicino anamo jai iñedicai. Caimo jai jainaiñena jira, jeacino finocana cai jaiñena. ⁷ Jeacino anamo jai cai iñena jira, jeacinona finocana cai jaiñena. ⁸ Cristo fiodaite; iadedi jillode. Naimie fiodailla jira, cai jearedicino anamo jai iñedicai. Naimie jillua jira, jaie rafuedo birui jaidicai. ⁹ Fiodaillamona Cristo jillua jira, naimiedi dane fiodaiñeite. Naimie fiodaitemo, cai jeacino facaina naimiedi jai fiodaite. Jai dane fiodaiñeite. ¹⁰ Jeacino facaina jeacinona oni dotallena, naimie dacaiño fiodaite; iadedi ie Moona jaca iobitajanona, naimie ie Moo díbeimo jaca ite. ¹¹ Ie jira jeacino anamo iñenanomo omoi comeciaina faca. Cristo Jesús díbeimo jai omoi illanona, Jusiñamui jitailla rafuena finollemo omoi comeciaina faca.

¹² Jeacinona finocana jaiñeno. Omoi comeciai jeacinona finoacania, iena inoñeno. ¹³ Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina ino. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaitino isoidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaie naimiemo duiñedomoi; ia birui naimiemo jai duidomoi. ¹⁴ Moisés llogacinuai anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micorí llogacinodo jaiñedomoi; iadedi

jeacino omoï finoñellena, omoïna Jusiñamui duenaillamona, naimie omoïna birui canocabide.

Patrón anamo itinomona cai fueolle

¹⁵ Moisés micori llogacino anamo jai iñedicai; iadedi omoïmona damierie comecina facade: “Moisés micori llogacino anamo cai iñenamona, jeacino cai finoia, Jusiñamui caïna duere finoñeite”. Iese comecina facañeno. Jeacinona finocana cai jaiñena. ¹⁶ Biena uiñoticaï. Patrón anamo bu ia, ie patrón comeci jitailla rana finode. Ie ocuica rana ñnote. Ie isoide. Jeacino anamo omoï ia, jeacinona finocana jaidomoi. Jeacino omoï finuamona omoï jeacino ite diga fiodaicana jaidomoi. Ie jira Jusiñamui illanomo ico iñeitomoi. Jusiñamui anamo omoï ia, Jusiñamui jitailla rafuena finocana jaidomoi. Naimie illanomo ico iitomoi. ¹⁷ Jeacino anamo jai itomoi. Iemei omoïmo jiaie comini Jesucristo rafuena jai llotimaci. Iena cacajanona, iena raise ñnotomoi. Ie jira Jusiñamuimo iobillacinona fecadicue. ¹⁸ Jeacino anamona jai jillobillamona, marecinona finocana jai jaidomoi.

¹⁹ Cue lluana omoï raise cacaillena, bie isoide rafuena lloticue. Omoï comeciaï railla jira, jeacinona navui finodomoi. Maraiñedicinona finocana navui jaidomoi. Cristo ðibeïmo omoï jai illa muidona, marecinona omoï finocana birui mai omoï jai. Iese omoï jaillamona, omoï comeciaï Jusiñamui jitailla isoi marena iitomoi.

²⁰ Jeacino anamo navui omoï ia, Jusiñamui jitailla isoi, marecinona finoñedomoi. ²¹ Jeacinona navui omoï finuamona mare rafuena oñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico iñeitimaci. ²² Jeacino anamona jai jillobidomoi. Jusiñamui anamo omoï jai illa jira, naimie ocuica rafuena finodomoi. Iena omoï finuamona, Jusiñamui jitailla isoi, marecinona finocana jaitomoi. Ja muidomo naimie diga iitomoi. ²³ Jeacinona finocana omoï jaia, omoï jeacino ite diga fiodaitomoi. Jusiñamui illanomo ico iñeitomoi; iadedi cai Nama Jesucristona omoï ñnuamona, Jusiñamuidi omoïna jaca itataite. Naimie illanomo ico iitomoi.

7

Inirede riñomona cai fueolle

¹ Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo ðuiñede. ² Ie isoide. Nana naimie ille ðinori, inirede riño ie inimo ðuide. Iese Moisés micori jai lote. Ie ini fiodailla mei, ie inimo jai ðuiñede. Naimie anamo naiñaiño jai iñena jira, jiaimiena naiñaiño oia, ie inina illena, Jusiñamuïmona mare. ³ Ie ini nia fiodaiñenia, jiaimie diga naiñaiño ia, ie ini abïmo jeacinona jai finode, Moisés micori lloga uai naiñaiño ñnoñena jira. Ie ini fiodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

⁴ Ie isoide. Cristo fiodailla jira, Moisés micori llogacinuai anamo jai iñedicai. Iemo jai ðuiñedicai. Ie jira Cristomo jai ðuidicai. Jusiñamui jitailla rafuena finocana cai jaillena, fiodaillamona Cristo jai jillode. ⁵ Jusiñamuina nia cai ñnoñena, cai jitaille rafuena finocana jaidicai. Moisés micori llogacinona uiñoticaï; ia cai maraiñede jitailla rafuena finocana jaidicai. Cai jeacino ite diga fiodaicana jaidicai; ⁶ ia Moisés micori llogacino jai saide. Caimo jai ðuiñede. Navui ie anamo iticai; iadedi birui ie anamo jai iñedicai.

Jusiñamuina cai sedajamona, Jusiñamui Joreño rafuedo jai jaidicai. Moisés micori cuegafuiaido jai jaiñedicai.

Cue comecimo ite maraiñedicino

⁷ “Moisés micori llogacino maraiñede” lloñeiticai; iadedi naie llogacino iñedena, jeacinona uiñoñedicue. Jiaimie mo ite rana cue niciduana maraiñenana jai uiñoñedicue. Moisés micori jai llote: “Jiaimie mo ite rana nicidoño” llote. Ie jira naiemona niciduanana maraiñenana uiñoticue. ⁸ Naie llogacino muidona cue comeci jeacinona finoacade. Ie muidona rana nicidotie. Naie llogacino iñedena, jeacino finuana uiñoiacaiñedicai. Naie llogacino iñedena, jeacino anamo iñedicai. ⁹ Moisés micori llogacinona nia cue uiñoñenia, caimare uri iticue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue. ¹⁰ Nano cue comecina facadicue: “Naiedo cue jaillamona, Jusiñamui diga ico jaca iiticue”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede. ¹¹ Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona oticue. Naimie dibeimo Moisés micori llogacino cuena itatañede; ia naimie dibeimona cuena itatate.

¹² Iese ite; iadedi Moisés micori llogacinodi mare. Jusiñamuimona ite. ¹³ Naie llogacino mare. Naie rafue muidona fiodaiñeiticue; ia jeacino muidona fiodaiticue. Jeacinona cue finua jira, Jusiñamui illanomo ico jaca iñeiticue. Naie mare llogacinomona jeacino cue finuana eo maraiñenana uiñoticue.

¹⁴ Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana iticue. ¹⁵ Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidicue. ¹⁶ Cue maraiñede finoacaiñega rafuena cue finojade, Moisés micori llogacino marenana uiñoticue. ¹⁷ Cue comeci iena dama finoñede; iadedi cue comecimo ite jeacino cuena finotate. ¹⁸ Cue comecimo marecino iñede. Mare rafuena finoacadicue; iadedi iena finonidicue. ¹⁹ Cue mare finoacaga rafuena finoñedicue; iadedi cue maraiñede finoacaiñega rafuena finodicue. ²⁰ Cue finoacaiñega rafue cue finojade, cue comeci iena dama finoñede; iadedi cue comecimo ite jeacino cuena iena finotate. ²¹ Biese cuemo suicabide. Mare rafuena cue finoacaniadedi, jeacinona finocabidicue. ²² Cue comeci Jusiñamui lloga uaina gaide; ²³ iadedi cue comecimo maraiñede rafuena illana uiñoticue. Cue comecina namataacade. Cuena jeacinona finotaiacade.

²⁴⁻²⁵ Eo dueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuiticue. Jusiñamui illanomo ico jaca iñeiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

8

Jusiñamui Joreño cai comeciaina namatacana cai jailla

¹ Cristo Jesúmo duidinodicai. Ie jira Jusiñamuidi caina duere finoñeite. ² Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeiticai. Duere sefuiticai; iadedi

naiemona Jusiñamui Joreño caina jai jillotate. Jesucirstomo cai duillanona, caina jaca itataite. ³ Moisés micori llogacinona cai raise ñnoñena jira, jeacinomona dani jillonidicai. Ie jira Jusiñamuidi ie jitona orede, ñmana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fiodaillena, naimiena orede. Naimie uaidi cai jeacinona anafetate. Ie jira jeacino anamona jai caina jillotate. ⁴ Iese finode, cai marena illena, Moisés micori llogacino llua isoi. Ie jira cai comecimo ite marañede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

⁵ Cai comecimo ite marañede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai. ⁶ Marañede jitaillacinomo comeciaina facacabidino Jusiñamui diga ico jaca ññeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci. ⁷ Jiaño Jusiñamuina enoidimaci. Jusiñamui lloga uaina jitaññedimaci. Iena ñnonidimaci. ⁸ Iese itino Jusiñamuina iobitanidimaci.

⁹ Iese ññedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño ññenia, Cristomo nia duiñede. ¹⁰ Jeacinona omoi finua jira, fiodaítomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira. ¹¹ Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiodaiaide, Jusiñamuidi ie Joreño uaido omoi abiaina jiai jillotaite.

¹² Cue amatiai, iese caimo suite. Ie jira cai comeciaino ite maraññedincinodo cai jaiñelli. ¹³ Naicínodo cai jaiia, Jusiñamui illanomo ico jaca ññeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iiticai.

¹⁴ Nana Jusiñamui Joreño namatadinodi Jusiñamui uruiai. ¹⁵ Jusiñamui Joreñoña feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: "Cai Moo" raillanona, Jusiñamuina uaidotomoi. Ie jira naimiena jai jaciruiñedomoi. ¹⁶ Cai comeciaina Jusiñamui Joreño uññotajamona, cai comeciainona Jusiñamui uruiaidicaina jai uññoticai. ¹⁷ Naimie uruiaidicaina jira, ie uruiaimo fecaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticai.

¹⁸ Biena uññoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira. ¹⁹ Iese cai illemo nana Jusiñamui finoca radi iocire birui ocurridimaci. ²⁰ Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocurridimaci, ²¹ naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fiodaññeitimaci. ²² Biena uññoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocurridimaci. ²³ Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uññoticai. Monamo Jusiñamui uruiaina ico cai illemo ocurridicai. Cai fiodaia, fiodaillamona cai abiaina jillotaite. Jaiño eruaito cai abiaimo meidollemo ocurridicai. Ie mei cai abiai dane fiodaññeitimaci. ²⁴ Naiemo cai ocurillamona, cai jeacinomona navui jillobidicai. Bumo

ie jitailla ra ia, iemo naimie ocuiriñede. Ie feiñoñega ramo ocuriride. Ie isoidemo ocuridicai. ²⁵ Caimo suiñede rafuemo cai ocurilla jira, iemo fecuise ocuridicai.

²⁶ Birui duere cai sefuaia, ico marena cai illemo ocuridicai. Jusiñamui Joreño caina jiai canode. Jusiñamuimo cai jiiia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo lloste. ²⁷ Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidicai. Ie Joreño cai facaina ñaiana cacade.

Jusiñamui caina isiruite

²⁸ Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñoticai. ²⁹ Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiëna. ³⁰ Caina iese jaie itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iiticaí.

³¹ Iese caina itataja jira, Jusiñamuidi cai facaina illa jira, bu cai facaina iñellena, damamai iesedicaí. ³² Jusiñamuidi ie Jitona duere sefuillamona jillotañede; iadedi naimie jitailla jira, cai facaina ie Jitona orede, cairi fiodaillena. Ie muidona naimie dibeimo marena cai ille rafuena caimo jiai iite. ³³ Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite. ³⁴ Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite. ³⁵ Cristo caina isiruite. Jaca buna Cristo caina isiruillacinona baíronide. Jiaie comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaie comini caina meineaia, Cristo caina nia isiruite. ³⁶ Iena Jusiñamui facaina lloraíma micori jaie cueda:

Jusiñamui muidona caina jaca meinetimaci, mercadomo toica llaudaíai fallena illa isoi

³⁷ Cristo caina isiruilla jira, caina naimie canuamona, naga bie isoide rafue caimo suaia, cai comeciái ocuiñocana cai jailla. ³⁸ Jusiñamui caina isiruite. Naimiemona jaca budi caina baíronide. Cai fiodaia, cai nia ia, Jusiñamui caina nia isiruite. Jusiñamui jaienisaídi, Taifedi, Janabadi Jusiñamui isiruillacinomona caina baíronidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo suaia, Jusiñamui caina nia jaca isiruite. Jaca buna ie uaido Jusiñamui isiruillacinomona caina baíronide. ³⁹ Monamo ite radi Jusiñamui isiruillacinomona caina baíronide. Eniruemo ite radi Jusiñamui isiruillacinomona caina baíronide. Nana Jusiñamui finoca radi Jusiñamui isiruillacinomona caina baíronide. Cai Nama Cristo Jesúmo cai duilla jira, Jusiñamui caina isiruillana uiñoticai.

9

Jusiñamuidi judtúai railla cominina fetode

¹⁻² Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comeciina uiñotajamona, iena uiñoticue. Cue cominiri sunaiticue. ³ Cue comini Cristo

rafuena #noiacaifedimaci. Ie muidona Jusiñamui riicaillifue anamo birui itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amatiai. ⁴ Israel railla cominidimaci. Jiaicidi judiua railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena ciodimaci. Iena naimaci inollena, Moisés micorimo Jusiñamuidi rafuena jiai llote. Naimiena sedallena jiai llote. Naimaci dine naimaci jilloitaraimana oretallena jiai llote. ⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

⁶ Cai cominimo Jusiñamuidi ie uaina llote; iadedi nana cai comini iena inoñena jira: “Jusiñamui ie lloga uaina finoñede” raiñeiticai. Jusiñamuina naimaci raise inoñena muidona, nana Israel micorimona comuide cominidi Jusiñamuimo duiñedimaci. ⁷ Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacna comuidinodi ua Abraham uruai?”. ⁸ Naie lluamona nana Abraham micorimona comuidinona ie uruaiñenana uiñoticai. Jusiñamui lloga uaina innotinodi naimie ua uruai. ⁹ Jusiñamuidi Abraham micorimo jaie llote: “Jiaie año bie facaiseconi o dine abido biiticue. Naie facaiseconi o ai Saradi jitona jocoite” llote. Ie mei iese suide.

¹⁰ Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaimai micorina jocode. Nano doforamiedi Esaú micori. Jiaimiedi Jacob micori. ¹¹⁻¹³ Naiñaiño micori nia jocoñena, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraima micori Jusiñamui lluana jiai cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaimai micori nia jeicifüenia, iaimai micori marecinona nia finoñena, iaimai micori marañedicinona nia finoñena, Jusiñamuidi iaimai micorina iese llote. Ie finoca rafuemona Jacob micorina fetoñede; iadedi Jusiñamui jitailla jira, Jacob micorina fetode.

¹⁴ “Jusiñamuidi dama Jacob micorina fetuana marañede” raiñeiticai. Jusiñamuidi marañedicinona jaca finoñede. ¹⁵ Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitañenanona duenaiticue” llote. ¹⁶ Comini naimiena jitaillanona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite. ¹⁷ Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomio siño rafuena finodicue, cue uai siñonana jiaie comini uiñollena, nana cominido cue mameci sorillena”.

¹⁸ Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiena innotañede.

¹⁹ Nibai comeciaina facadomoi: “Cominina iese Jusiñamui itataia, ¿bue ñellena naimacina duere finoacade?” ²⁰⁻²¹ Iese comeciaina facañeno. ¿Niese nainona naimiemo ducañitomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. ²² Ie isoide. Nana comini dajena eruaiñedicai. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiai uiñotaacade; iadedi naimacina nia duere

finoñede. ²³ Cominina Jusiñamuidi jiai duenailla jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate. ²⁴ Jusiñamui caina iese itatate. Da judíuaina iese itañede; ie iadedi judíuainñedinona jiai iese itatate. ²⁵ Jusiñamui iena jaie llauana Oseas micori jaie cuete:

Cue cominiñedinodi cue cominina jaitimaci. Isiruiñeganona isiruiticue.

²⁶ Dane jiai cuete:

Navui cue cominiñedomoi; iadedi jiaie comini omoina ico lloitimaci: “Naimacidi jaca cajede cai Jusiñamui ie uruiaidimaci” lloitimaci

cuete. ²⁷ Isaías micori railla lloraíma jaie cuete: “Monailai fuemo conillie eo ite. Ie isoi Israel micori uruiái eo jebuitimaci; iadedi Jusiñamuidi nana naimacina jillobitañeite. Dajeriena jillotajanona, ²⁸ jiaínomo ie lloga uaina raire finoite. Naimacina duere finoite” cuete. ²⁹ Isaías micori jiai cuete: Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiai jaie cuenode.

Naimaci micoriái isoi iñedicaí, nana cai cominina naimiedi duere finoñena jira.

Judíuaidi Cristo rafuena jitañedimaci

³⁰ Biemo comeciaina faca. Judíuainñedinodi Jusiñamui jitailla isoi, marena illana navui uiñoiacaiñedimaci; iadedi iena jai uiñotimaci. Jesucristona naimaci inuamona, marena illana jai uiñotimaci. ³¹ Jusiñamui jitailla isoi marena naimaci illena, judíuaidi Moisés micori llogacinodo jaidimaci; iadedi Moisés micori llogacinona naimaci raise inoñena jira, marena illana jaca uiñoñedimaci. ³² Naimaci finoca rafuemonona marena iacadimaci. Marena naimaci illena, Jesucristona inoiacaiñedimaci. Naimie muidona marena iñeitimaci. ³³ Isaías micori iena jaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiena naimaci inoñenia, faifitimaci;

iadedi naimiena inotinodi tainona inoñeitimaci.

Suubicaiñeitimaci” llote.

10

¹ Cue amatiaí, judíuai comini jilluana eo jitaídícue. Jusiñamui diga cue ñaía, iena jicadícue. ² Jusiñamui jitaillacinona eo finoacadimaci. Iena uiñoticue. Iena finoacadimaci; iadedi iena finuana raise uiñoñedimaci. ³ Jusiñamui naimacina marena itatallena uiñoñedimaci. Naimaci finoca rafuemonona marena iacadimaci. Jusiñamui llua isoi jaíacaiñedimaci. ⁴ Nana Cristona inotiniedi Moisés micori llogacinodo naimie marena illena jai jaíñede. Cristona inuamona, Jusiñamui jitailla isoi, naimie marena jai ite.

⁵ Moisés micori jaie cuete: “Naimie marena illena, cue lluado jaidimiedi jaca iite, cue lluana naimie raise inoía” cuete. ⁶ Iese jaie cuete; iadedi jaca buna iese inoñede. Cristona inuamona, marena Jusiñamui jitailla isoi, birui iticai. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticai. ⁷ Fiodaitino dine jaiticai, Cristona cai jillotallena’. Iese comeciaina facañeno” llote. Cristodi eniruemo jaie bite. Fiodaite; ia naiemona jai jillode. ⁸ Jusiñamui uai llote: “Naie rafue cai dine jai ite. Iena jai uiñoticaí”. Cai jilloillena Cristona cai inuana birui lloticaí. ⁹ Jiaie cominimo: “Cristodi cai Nama” omoi lloía, Cristo

fiodaillamona Jusiñamui naimie jillotajana omoi ñnoia, jilloitomoí. ¹⁰ Cai comecimona cai ñnua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

¹¹ Isaías micori iena jaie cuete: “Cristona ñnotinodi tainona ñnoñeitimaci. Suubicaiñeitimaci” cuega. ¹² Naie rafuedi nana cominina ñaite. Judíuaina ñaite. Judíuainedínona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite. ¹³ Cristodi naga naimiemo jicanotimiena jillotaite; ¹⁴ iadedi Cristona naimaci nia ñnoñenia, naimiemo jicanonidimaci. Cristo naimaci facaina fiodailla rafuena naimaci nia cacaiñenia, naimiena ñnonidimaci. Naimacimo naie rafuena jiaie comini lloñenia, iena cacaiñeitimaci. ¹⁵ Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidicai” cuete.

¹⁶ Iese cuete; iadedi ailluena comini naie rafuena nia jitaiñedimaci. Isaías micori iena jiai jaie cuete: “Jusiñamui, ailluena comini cai llwana ñnoiacañedimaci” cuete. ¹⁷ Cai llwamona Cristo rafuena cacadimaci. Cristo rafuena cacajamona, damierie naimiena ñnotinomaci.

¹⁸ Judíuái comini naie rafuena jai cacadimaci. Jusiñamui facaina lloraima micori iena jaie cuete:

Naga eniruemo ite cominimo Jusiñamui lloraini micoriaidi naie rafuena jai llotimaci

cuete. ¹⁹ Judíuái comini naie rafuena cacadimaci; iadedi iena ñnoñedimaci. Moisés micori iena jaie cuete:

Jusiñamuidi lloite: “Cue rafuena naimaci feiñua jira, judíuainedino diga uradoitomoí.

‘Naimaci abina uifioñedimaci’ raitomoí;

iadedi cue rafuena naimaci feiñua jira, naimaci diga iciritomoí” lloite.

²⁰ Isaías micori marefodo jiai cuete:

Jusiñamui lloite: “Cuena jenoñedino cuena jai baitimaci.

Naimacina cue jilloitallena cuena jicanoñedonomo jai bairedicue” lloite.

²¹ Jusiñamui judíuái cominina jiai lloite: “Naimacina cue dine jaca uaidoticue; iadedi ñnoiacañedimaci. Cuena jitaiñedimaci” lloite.

11

Judíuái cominimona dajerie ñnoitimaci

¹ Jusiñamuidi judíuaina fañonocaillamo omoi comeciaina facañeno. Judío imiedicue. Abraham uruai micoriaimona comuidicue. Benjamín railla nairai imiedicue. ² Naimacina jaie naimie fetua jira, Jusiñamui judíuaina fañonocañede. Elíamo jaie ite rafuena uifiotomoí. Jusiñamuimo naimiedi judíuaina lloite: ³ “Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuena jiai meineiacadimaci”. ⁴ Jusiñamui dinena uai ote: “Dama ññedio. Siete mil ññiaí cue díbeimo nia eenoticue. Baal railla jiraraina jaca sedañedimaci. Cuena nia sedadimaci” lloite. ⁵ Birui ie isoide. Naimacina duenaillamona, naimacina Jusiñamui fetua jira, dajerie Jusiñamui díbeimo itimaci. ⁶ Naimacina duenaillamona, naimacina fetode. Naimaci finoca rafue muidona naimacina fetofede. Naimaci finoca rafue muidona naimacina fetodena, naimacina duenaillamona naimacina fetofede.

⁷ Ie jira iena iese lloiticue. Ailluena judíuaidi marena Jusiñamui jitailla isoi illana ofñedimaci; iadedi Jusiñamui fetocano iena otimaci. Ailluena

comini iena #noiacaifedimaci. ⁸ Jusiñamui facaina lloraini micoriai iena jaie cueda: “Jusiñamuidi naimacina abina uifnotañede. Jusiñamui finoca rana naimaci cioia, iena uifnoñedimaci. Jusiñamui rafuena naimaci cacajia, iena cacaiñedimaci. Birui iese nia itimaci” cueda. ⁹ David micori iena jiai llote: Naimacimo aillue ra illamona, Jusiñamui naimacina duere finoite.

¹⁰ Naimaci comeciari Jusiñamui rafuena uifnoñeitimaci.

Naimaci finoca rafue anamo duere sefuicana jaca jaitimaci.

Judiuaifedimona dajerie #noitimaci

¹¹ Naimie rafuena judiuaifedimona jitaifena jira, Jusiñamui naimacina duere finode; iadedi naimacina sofeñede. Jusiñamuina judiuaifedimona jira, Jusiñamuidi judiuaifedimona jai jillotate. Naimacina jai jillotate, judiuaifedimona jira, Jusiñamuidi uradoillena. Uradoillamona Jusiñamuidi naimaci naimiena #nollena jitaide. ¹² Cristona judiuaifedimona jira, Jusiñamuimona judiuaifedimona diga marecinona birui feifnotimaci. Cristo dibeimo ico judiuaifedimona, Jusiñamuimona judiuaifedimona ailluena feifnoitimaci.

¹³ Judiuaifedimona, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue, ¹⁴ cue comini cuena uradoillena, Cristona dajerie #notallena. ¹⁵ Cristona naimaci nia #noñena jira, judiuaifedimona jai #notimaci. Cristona ico judiuaifedimona, Jusiñamuidi diga jai itimaci. ¹⁶ Janore jisa juilliruñu marenia, nana juilliruaidi mare. Riara ie jainauai marenia, nana ie igailai mare. Judiuaifedimona ie isoidimaci. Naimaci jaiagai micoriai jainauai isoidimaci. Naimaci jaiagai marenia, naimacidi jiai mare. Birui ite judiuaifedimona igailai isoidimaci.

¹⁷ Taide igailaidi ie amenamo jai duifede. Ie isoidimaci. Naimacimona Cristona jaino #noñena jira, Cristono jai duifedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feifnocabitomoi. ¹⁸ Naimaci ifomo omoi illa jira, abina uradoifeno. Igaillaimona jaino cajellena, ie ijina ofede; iadedi iemo duilla jira, jainomona igailai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feifnocabitomoi.

¹⁹ Comeciaina facadomoi: “Taide igailai ifomo iticai isoidicai. Jusiñamui judiuaifedimona oni dotade, caina fetollena”. ²⁰ Unaicinsona comeciaina facadomoi. Naimaci #noñena jira, Jusiñamuidi naimacina oni dotade. Omoi #nua jira, naimaci ifomo itomoi. Ie jira abina uradoifeno; iadedi Jusiñamuina omoi jacirui. ²¹ Naimiena naimaci #noñena jira, judiuaifedimona duere finoite. Naimiena omoi #noñena, daje isoi omoina duere finoite. ²² Biemo comeciaina faca. Naimiena #noñedimona jai duere finode; iadedi omoina duenaite. Naimiena #nocana omoi jai, naimie omoina nia duenaite. Iese omoi jaiñena, naimie omoina dotaite. ²³ Judiuaifedimona Cristona #noñeno navui jaidimaci; iadedi Cristona naimaci birui #noia, naimie dibeimo Jusiñamui naimacina itatade, igai riaramo sotaja isoi. ²⁴ Ailli riarana cueticue. Naie amenamo nano duifedomoi. Judiuaifedimona nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judiuaifedimona abido oite.

Eo ailluena judiuaifedimona jilloitimaci

²⁵ Bie rafuena omoi uifnuana jitaidicue. Iena navui uifnoñedicai. “Judiuaifedimona baifemo faiticai” omoi raiñellena, biena omoimo lloticue. Diga judiuaifedimona Cristona birui #noiacaifedimaci. Jusiñamui jitailla diese judiuaifedimona jillua

facaisena, iese iitimaci. ²⁶ Ie mei eo ailluena judiuaí jilloitimaci. Jusiñamui facaina lloraini micoriai iena cuetimaci:

Jerusalémona cai jilloitaraima biite.

Jacob micori uruaimona jeacinona dotaite.

²⁷ Naimaci jeacinona oni dotajanona, Jusiñamui jaie lloga uai suite.

²⁸ Cristona birui ñnoiacañedimaci. Jusiñamuina enoidimaci. Jusiñamuina naimaci jitañena jira, naimie omoína fetode. Ie jira jillodomo; iadedi Jusiñamuidi judiuaína nano jaie fetode. Naimaci jaiagai micoriaimo ie lloga uaina jira, naimacina nia isiruite. ²⁹ Jusiñamui ie lloga uaina saiñede. Naimacina fetua jira, naimacina fañonocaiñeite. ³⁰ Jusiñamuina navui ñnoñedomoi; iadedi Jusiñamuina naimaci ñnoñena jira, Jusiñamui omoína jai duenaite. ³¹ Jusiñamuina jai ñnoñedimaci; iadedi omoína naimie duenailla isoi, Jusiñamuidi naimacina ico jiai duenaite. ³² Jusiñamui nana cominina naimiëna ñnoñenana uiñotade, naimacina naimie duenaillena. ³³ Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicai. Naimie finoca rafuena raise jiai uiñofedicai. ³⁴ Jusiñamui facaina lloraima micori iena jaie cuete: “Jaca buna cai Nama Jusiñamui comeci facajacinona uiñofede. Jaca buna naimiemo ie finoca rafuena lloñede. ³⁵ Jaiñruído ibana feiñollena, jaca buna naimiemo rana fecañede” cuete. ³⁶ Naga ra naimiemo illa jira, naga ra naimiëmona bite. Naga rana finode. Naimiemo iobillacinona cai fecacabillasa. Iena jitaídícue.

12

Jusiñamui anamo raise omoi i

¹ Cue amatiai, omoimo bie rafuena lloiticue. Jusiñamui caina duenailla jira, omoi jeanide comeciámona, naimie jitailla rafuena omoi finuamona naimie anamo raise omoi i. Naimie jitailla isoi omoi i. Naimiedi omoi iese illana gaide. Omoi comeciámona naimiëna raise omoi seda. ² Cristona uiñofedino isoi omoi iñeno; iadedi omoi comeciai iuaina meiduanona, jiaie rafuedo mai omoi jai. Ie mei Jusiñamui jitailla rafuena finuana uiñoitomoi. Mare rafuena finuana uiñoitomoi. Naimiëna iobitajacinona jiai uiñoitomoi. Eo mare rafuedo jaillana uiñoitomoi.

³ Jusiñamui cuena duenaillamona, bie rafuena omoimo cue lloñena, naimie uai cuemo ite. “Jiaie comini baifemo faitícue” raillamo o comecina facañeno; iadedi: “Ñie isoidimedicue” o raillamo o comecina raise faca. Jusiñamuimona o feiñoga diese ñnuacinomo o comecina faca. ⁴ Nagamie ie abimo diga ra ite. Ie onolli ite. Ie uisi ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiáide. ⁵ Ie isoide. Cristona jai ñnoticai. Aillosiedicai; iadedi daajena naimiemo jainaiáidicai. Dani caimo jiai jainaiáidicai.

⁶ Jusiñamuidi daje isoide uaina naimie dibeimo cai maijillena, caimo fecañede. Ie jitailla diese caimo fecade. Ie jira omoi feiñoga uaido naimie facaina maiji. Rafuena omoimo Jusiñamui lloia, iena raise llono. Roracomo omoi maijillena Jusiñamui lloia, nainomo raise maiji. Omoi llofuellena Jusiñamui lloia, naimie rafuena raise llofue. ⁷ Roracomo maijiacinona uiñotimiedi nainomo raise maijia. Llofuiacinona uiñotimiedi raise llofua. ⁸ Comeci ocuiñotajacinona uiñotimiedi comini comeciáina ocuiñotacana jailla. Rana fecajacinona uiñotimiedi rana caidíñeno fecaja. Cominina sedajacinona uiñotimiedi cominina raise sedaja. Dueredinona canodimiedi

dueredinona iocire canua. Cristomo daajena cai jainaiaillamona, iese coninina canocana jaiticai.

Cristo rafuedo cai jailla

⁹ Omoi comeciainona nana cominina isirui. Maraiñedinona gaiñeno; iadedi mare rafuedo omoi jai. ¹⁰ Coninina isirui, omoi cominina omoi isiruilla isoi. Omoina jaiimie nia iobitañenia, naimiena raire omoi iobita.

¹¹ Cristo rafuena sefuiruiñeno finocana omoi jai. Cai Namana iocire seda.

¹² Naimie dine omoi illemo iocire omoi ocuiri. Duere omoi sefuiua, omoi comeciaina ocuiño. Jusiñamui diga ñaicabillanona omoi jai.

¹³ Jiaie creyentiai rania, naimacina cano. Omoi jofuemo creyentiai ria, naimacina nafue.

¹⁴ Jusiñamui ðibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoñeno.

¹⁵ Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

¹⁶ Daje isoi omoi comeciai lloillamona uri omoi i. Abina birioicaiñeno. Jamai bue isoidino diga nabairi. “Jiaie comini baifemo uiñoticaí” raiñeno.

¹⁷ Jiaie comini omoina jeare finoia, naimacina daje isoi jeare finoñeno. Hana oñeno. Omoi marena illana jiaie comini uiñollena, marena omoi i.

¹⁸ Omoimona rafuena suiñoñeno. Nana comini diga uri omoi i. ¹⁹ Cue isiruigano, bu omoina jeare finoia, ibana oñeno. Jusiñamui naimacina duere finoite. Moisés micori iena jaiie cuete: “Cai Nama llote: ‘Cominina duere finodicue. Hana oiticue’ ” cuete. ²⁰ Hana oñeno. Jusiñamui facaina lloraima iena jaiie jaiie cuela: “Omoi enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoimo eruaite. ²¹ Jiaie comini omoina jeare finoia, iciriñeno; iadedi naimacimo mare rafuena fino. Iese omoi finoia, naimacina omoi ðibeimo itataitomoí.

13

¹ Nana illaicominina naimaci ifomo Jusiñamuidi itataja jira, illaicomini lloga uaina nana cai ñnua. ² Illaicomini uaina bu ñnoñenia, Jusiñamuina jiai ñnoñede. Ie mei Jusiñamui naimiena duere finoite. ³ Mare rafuena finodinodi illaicominina jaciruñedimaci; iadedi maraiñede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaiia, omoina marena ñaitimaci. ⁴ Jusiñamui facaina omoina canodimaci. Maraiñede rafuena omoi finoia, naimacina jacirui. Omoina duere finollena, naimacimo uai ite. Maraiñede rafuena finodimiena Jusiñamui facaina duere finoitimaci. ⁵ Ie jira naimaci uaina ñno, Jusiñamuimona omoi duere sefuiñellena. Omoina: “Mare” jiai raitimaci. ⁶ Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷ Gobierno omoina ibataia, iena iba. Illaicominimo iobillacinona fecu. ⁸ Ra omoi oia, ibaño jaiñeno; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode. ⁹ Moisés micori diga lletarafuena jaiie cuete: “O aiñede riño diga iñeno. O iniñede iima diga iñeno. Jaiimiena meineño. Rana fiñeno. Jaiimiemo ite rana nicidoñeno” cuete. Jiai lletarafue ite: “Dani omoi abiaina omoi isiruilla isoi, jiaie cominina omoi isiruilla”. Bie lletarafuena omoi ñnoia, nana lletarafuena jai ñnotomoí. ¹⁰ Jiaie cominina omoi isiruia, naimacina jeare jai finoñedomoi. Jiaie cominina omoi isiruia, nana Jusiñamui lloga uaina jai ñnotomoí.

¹¹ Iena birui cai finua. Jesucristo billiruidi iairei jai ite. Naimiena cai nano inua facaiseconi, naimie billirui mo cai comeciaina facadica; iadedi nagarui naimie billirui iairei inoicaide. ¹² Jesucristo nia dane biñena jira, eniruemo cai illa jira, jitiredinomo iticai isoideicai. Naimie bia, naimie diga cai illemona, maredinomo raire ja iticai isoitica. Ie jira jeacinona finocana cai jaillana mai cai fainonocailli. Jesucristo rafue anamo raise cai illesa. ¹³ Cai marena illana nana comini uinollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai furiñena. Cai abina uradoiñena. ¹⁴ Iese cai iñena; iadedi naimie caina namatallena, cai Nama Jesucristona raise cai nabaiilli. Cai jearede navui jitaillacinona finoacanamo cai comeciaina facañena.

14

Jiaie creyentena jeare ñaiñeno

¹ Cristona inotimiena omoi dine biade, naimiena raise feiño. Naimie Cristona nia raise inoñena, naimiena nafue; iadedi omoi isoi naimie inoñena, comina uina caitañeno. ² Dajerie naga rana gutimaci; iadedi jiaimie difai guiga rana guite. Naimie riñede. Ie comecina facade: “Cue riia, jeacinona jai finoiticue”. ³ Naga rana guinēdimiena miñeno. Naga rana gutimiena miñeno. Jusiñamuidi naimacina jai feiñote. Ie jira miñeno. ⁴ Omoi facaina maijñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi raillanona, Jusiñamuidi naimacina canoite.

⁵ Dajerie creyentia comeciaina facadimaci: “Judíuai rafue finuaruilla; Jesuñamuina sedajitica; nairuilla; jiairuilla; baifemo uaila jira”. Jiaino raitimaci: “Nagarui daje isoide” raitimaci. Nagamie ie comecina raise facajamona, ⁶ cai Namana iobitallena, nagamie ie jitaillarui mo cai Namana sedaite. Naga rana gutimie iobillacinona Jusiñamuimo fecajano, cai Namana iobitate. Naga rana guinēdimie iobillacinona Jusiñamuimo fecajano, cai Namana jiai iobitate.

⁷ Cristomo cai duilla jira, dani cai jitailla rafuena finonidica. Cai fiodailliruina jiai llonidica. ⁸ Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticai. ⁹ Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiai iticai.

¹⁰ Naimie baifemo omoi iñena jira, jiaie creyentena miñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iticai. Jusiñamuidi marañedinona duere finoite. Maredinona duere finoite. ¹¹ Isaías micori jiaie iena cuete: Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

¹² Nainomo Jusiñamuimo nana cai finouiga rafuena lloitica. Ie jira jiaie creyentia; diga marena omoi i.

Jiaie creyentena jeacino finoi raillano, mare rafuedo cai jailla

¹³ Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla. ¹⁴ Cai Nama Jesús mo cue duilla jira, naga riga radi cuemona mare. Iena raise uinotice. Iena cue riia, jeacinona finoñedicue. Iena uinotice; iadedi jiaimie comecina facade: “Biena cue riia, jeacinona jai finodicue”. Naimie comecina iese

facajamona, iena naimie riia, naimiemona jeacinona jai finode. ¹⁵ O riga ra muidona jiaie creyente comeci marañeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañellena. ¹⁶ Ie jira o jitailla rana finoñeno. Jiaie comini ona miñellena, naie rana riñeno. ¹⁷ Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite. ¹⁸ Iese cai jaia, Cristona raise sedadica. Jusiñamuina iobitadica. Jiaie comini caina marena jiai ñaitimaci.

¹⁹ Ie jira uri icana cai jailla. Dani cai comeciaina ocuiñocana cai jailla. ²⁰ Omoi riacaga ra muidona, jiaie cominina Jusiñamuina fainonocaitañeno. Naga radi mare, rillena; iadedi bue isoide omoi ria muidona, jiaimie Jusiñamuina fainonocaiia, jeacinona jai finodomoi. ²¹ Bue isoide omoi ria muidona, jiaimie jeacino finoi raillanona, iena riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide. ²² Mare ra omoi finoa, omoi comeciaina iena uiñotomoi. Jusiñamuidi omoi comeciaina uiñua jira, iena marefodo lloñeno. Omoi comeciaina jeacinona omoi finoñenana uiñotomoi. Ie jira iocire itomoi. ²³ “Nie isoide ra cue riia, jeacinona finodicue” raillanomo bu iese comeciaina facaia, iena naimie riñena. Iena naimie riia, Cristona naimie raise ñinoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

15

Jiaie creyentena cai canua

¹ Cristo rafuedo raise jaidica; iadedi jiaino Cristo rafuedo cai isoi nia jaiñedimaci. Naimacina cai canua. Ie jira dani cai jitaille rafuena finoñeitica; ² iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena. ³ Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete. ⁴ Naiemona cai fueollena, naiemona cai comeciaina ocuiñotallena, Jusiñamuina jaiie cugafuiaidi caimo ite. Naiemona Jusiñamui illanomo cai illemo ocuridica. ⁵ Jusiñamui cai comeciaina ocuiñotade. Naimie coniniri omoina uri itatajana jitaidicue. Cristo Jesús llua isoi, omoi uri illana jitaidicue, ⁶ daje isoi omoi comeciaina lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

Judíuainedini Cristo rafuena jiai cacadimaci

⁷ Jiaie illanomona creyente omoi roracomu bia, Cristo caina feiñua isoi, Jusiñamuina iobitallena, naimiena raise omoi feiño. ⁸ Iena nia lloiticue. Judíuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico suille rafuena jaiie llote. Eniruemo billanona, Cristo iena fuiduabite. ⁹ Judíuainedino Jusiñamuina iobitallena, Jusiñamui naimacina duenaila jira, Cristodi bite. David micori Cristo llua jaiie cuete:

Judíuainfedino motomo cue illamona ona iobitaitimaci.
Ruamona cue muidona ona jiai iobitaitimaci.

¹⁰ Moisés micori jiai cuete:

Judíuainfedino, Jusiñamuimo duide comini diga iobi.

¹¹ David micori jiai cuete:

Nana judíuainfedino, Jusiñamuimo iobillacinona feca.

Nana comini naimiemo iobillacinona fecacabillasa.

¹² Isaías micori cuete:

Isai micori uruiaimona damie comuitajamona, naimiedi judíuainfedinona sedaite.

Naimie naimacina jillobitallena, naimiemo ocuiritimaci.

¹³ Jusiñamui iemo omoína ocuiritate. Naimiena omoi ñnuanona, naimie omoína caimare itatajana jitaidicue. Uri itatajana jiai jitaidicue. Iemei Jusiñamui Joreño naimie siño uai diga omoi jilluamo omoína ocuiritaite.

¹⁴ Cue amatiai, omoína uíñoticue. Eo maredomoi. Cue lloga rafuena eo uíñotomoi. Coninina llofueredomoi. ¹⁵ Iena omoi comecillena, dafuerie rafuena omoimo marefodo cueticue. Jusiñamui cuena fetuanona, ie rafuena cue llollena, cuena orede. ¹⁶ Judíuainfedinomo Jusiñamui ie mare rafuena cue llollena, Cristo Jesús facaina maijidicue. Jusiñamui dibeimo naimacina cue itatajana, Jusiñamui naimacina feiñollena, naimacimo lloticue. Jusiñamui Joreñodi naimacina jiai maretate.

¹⁷ Jusiñamui dibeimo cue maijia jira, Cristo Jesús muidona cue maijiri iobidicue. ¹⁸ Cue maijiana marefodo lloticue. Judíuainfedinona Jusiñamuina ñnotallena, Cristodi cuena canode. Cue lluaana cacadimaci. Cue illana cioidimaci. ¹⁹ Cristodi cuena siño rafuena finotate. Jusiñamui Joreño uaido cuena finotate. Iemei Cristona jai ñnotimaci. Jerusalémona Ilirico railla enirue dinomo Cristo ie mare rafuena ailluena cominimo raise jai lloticue.

²⁰ Nainomo Cristona nia uíñoñedino dine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue. ²¹ Isaías micori biena jai e cuete:

Cristo rafuena nia cacaiñedinodi iena cacaitimaci.

Naimiema uíñoitimaci
cuete.

Romamo Pablo jaiacade

²² Nainomo cue maijiacana jira, Romamo omoi dine nia jaiñedicue. ²³ Diga nairaimo Cristo rafuena bene jai cue llua jira, cue maijille bene jai iñede. Diga años omoi dine cue jaiacana jira. ²⁴ España mo cue jaia, omoi dine jaiticue. Omoi diga nano nigarui caimare ñaiticue. Ie mei España mo cue jaillena, cuena canoitomoi. ²⁵ Omoi dine jaiticue; iadedi Jerusalémo ite creyentiaína cue canollena, nainomo nano jaiticue. ²⁶ Macedoniamo ite creyentiaídi ucubena ofitatimaci. Acayamo ite creyentiaídi ucubena jiai ofitatimaci. Jerusalémo ite duerede creyentiaína canoacadimaci. Jerusalémo ite creyentiaína canollena, iena birui uiticue. ²⁷ Iena feacaacadimaci. Judíuainfedinomaci; iadedi judíuaina canoacadimaci, naimacimo Cristo rafuena navui judíuain llua jira. Ie jira naimacina birui canodimaci. ²⁸ Naimacimo bie ucubena raise cue fecaja mei, España mo cue jaillemona, omoi dine nano jaiticue. ²⁹ Omoi dine cue ria, naimie rafuena cue llollena, Cristo cuena raise canoite.

³⁰ Cue amatiai, cai Nama Jesucristomo omoi duilla muidona, Jusiñamui Joreño coniniña omoína isiruitaja muidona, Jusiñamuimo omoi jia, cue facaina jiai omoi jii. ³¹ Judeamo ite creyenteñedinomona cue jillobillena,

Jerusalémo ite creyentiaimo cue fecaacalle ucubena naimaci raise feiñollena, cue facaina omoi jii. ³² Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue. ³³ Jusiñamui omoína uri itatajana jitaídícue.

16

Romamo itinomo Pablodi ie uaina orede

¹ Febe raillañaiño omoi dine jaité. Naiñaiñoña omoi uiñuana jitaídícue. Naiñaiñodi creyente. Cenrea railla nairai ñaiño. Cristo dibeimo maijiano, nainomo ite creyentiaína canocabide. ² Cristomo omoi duilla muidona, jiaie creyentiaína cai feiñoiacacabilla isoi, naiñaiñoña raise feiño. Diga cominina naiñaiño canua jira, naiñaiño jitaillé diese cano. Curna jiaí canode.

³ Priscila dine cue uaina oredícue. Naiñaiño ini Aquila dine cue uaina jiaí oredícue. Cristo Jesús facaina cue diga maijidiiaimaiaí. ⁴ Cue facaina niadedi fiodaitiaimaiaí. Ie jira iaímaiaíri iobidícue. Diga nairaimo judúaiñede creyentiaí itimaci. Cuemona Cristo rafuena cacadimaci. Cue facaina iaímaiaí niadedi fiodailla jira, iaímaiaíri jiaí iobidimaci. ⁵ Iaímaiaí jofomo rollena bitino dine cue uaina oredícue. Epeneto dine cue uaina jiaí oredícue. Cue isiruigamie. Asia railla eniruemo itinomona naimiedi Cristona nano ñnotimie.

⁶ María dine cue uaina oredícue. Omoína canollena, omoi motomo maijide. ⁷ Andrónico dine cue uaina oredícue. Junias dine cue uaina oredícue. Naie iaímaiaídi cue comini. Cárcelmo danomo navui iticai. Jesucristo oretaganodi iaímaiaína marena ñaitimaci. Naimiena nia cue ñnoñena facaise Cristona ñnotiaímaiaí.

⁸ Amplias dine cue uaina oredícue. Cristomo naimie duilla jira, naimiedi cue isiruigamie. ⁹ Urbano dine cue uaina oredícue. Cristo facaina cai diga maijicabide. Estaquis dine cue uaina oredícue. Cue isiruigamie. ¹⁰ Apeles dine cue uaina oredícue. Cristomona naimiedi mare rafuedo jaicabide. Aristóbulo jofomo itino dine cue uaina oredícue. ¹¹ Herodión dine cue uaina oredícue. Naimiedi cue comini. Narciso cominimona dajerie ñnotimaci. Naimaci dine cue uaina oredícue. ¹² Trifena dine cue uaina oredícue. Trifosa dine cue uaina oredícue. Cai Nama facaina maijidiiaíñuai. Pérsida dine cue uaina oredícue. Cue isiruigañaiño. Cai Nama facaina eo maijide. ¹³ Rufo dine cue uaina oredícue. Cai Namana eo raise ñnote. Naimie ei dine cue uaina jiaí oredícue. Naiñaiñodi cue ei isoide. ¹⁴ Asíncrito dine cue uaina oredícue. Flegonte dine cue uaina oredícue. Hermas dine cue uaina oredícue. Patrobas dine cue uaina oredícue. Hermes dine cue uaina oredícue. Naimaci illanomo ite creyentiaí dine cue uaina oredícue. ¹⁵ Filólogo dine cue uaina oredícue. Julia dine cue uaina oredícue. Nereo dine cue uaina oredícue. Naimie miriño dine cue uaina oredícue. Olimpás dine cue uaina oredícue. Nana naimaci illanomo ite creyentiaí dine cue uaina oredícue.

¹⁶ Conini caimare omoi uaido. Diga nairaimo creyentiaí itimaci. Nana naimacidi omoi dine naimaci uaina oredimaci.

¹⁷ Cue amatiaí, daje rafuena nia lloiticue. Omoi comeciaí daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiño. ¹⁸ Cai Nama Jesucristo facaina maijinedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci. ¹⁹ Ailluena cominidi Cristona omoi ñnuana uiñoñimaci. Ieri iobidícue. Marecinona finuana raise omoi uiñuana jitaídícue.

Maraiñedicinona omoi finuana jitañedicue. ²⁰Jusiñamuidi omoína uri itatate. Naimie omoína canoite, Taiñena anafefitallena. Cai Nama Jesucristo omoína duenaillesa.

²¹Omoi ñine Timoteo ie uaina orede. Cue ñiga jiai maiñicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

²²Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

²³Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

²⁴Erasto ie uaina orede. Naimiedi bie nairai ie ucube eenoraíma. Cuarto ie uaina orede. Naimiedi jiai creyente.

Jusiñamuimo iobillacinona jaca cai fecajasa

²⁵Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo ñaie rafuena jaie uiñotañede; ²⁶iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini ñinollena, nana cominido bie rafuena llocana birui jaide. Jusiñamuidi jaca ite.

²⁷Jusiñamuidi naga rana uiñote. Naimie mo Jesucristo mamecido iobillacinona jaca cai fecajasa. Mai. Macaibaite. Pablodice.

CORINTOMO ITE CRISTONA HNOTHINOMO PABLO NANO ORETAGA RABE

Corintomo ite creyentiaimo Pablo cartana orede

1-2 Corinto railla nairaimo ite creyentia, ¿nie isidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue llolena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoina jai marebicaitate. Jusiñamui omoina fetode, naimie iena. Ua nana cai Nama Jesucristona sedadinodicaidi Jusiñamui iena. ³ Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaia omoina uri jai itatatiamaia. Iena omoi uiñocana mai omoi jai.

Cristo muidona Jusiñamuimona ailluena feiñotica

⁴ Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoina jai duenaite. Ie jira naimiemo omoi facaina iobillacinona jaca fecadicue. ⁵ Jusiñamui omoina duenaillamona, ie rafuena omoi llolena, naimiemon ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoina eo canode. Omoina naimiemo ite rafuena raise uiñotade. ⁶ Ie muidona Cristo rafuena raise ñnotomoi. Cristo rafuena cai jino llumona, naimiemo raise ñnofidomoi. ⁷ Ie muidona Jusiñamuimona omoimo jaca buena febiñede, naimie dibeimo omoi raise maijillena. Naimie dibeimo omoi raise maijiamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo iocire omoi ocuirillanona, Jusiñamuimona ailluena rafuena feiñotomoi. ⁸ Jeacinona omoi finocabi raillano, naimie nia abido biñelle dinori Jesucristo omoi comeciaina raise seditaite. Cai Nama Jesucristo abido bia, nicino omoimo iñena muidona, omoina duere finoite. Naimie bia, naimacimo jeacino nia illa jira, naimiema ñnoñedinona duere finoite. ⁹ Jusiñamui ie lloga uaina jaca finoite. Naimie ñnogamie. Naimie jitona omoi nabaillena omoina fetode. Naimie jitodi cai Nama Jesucristo.

Naimaci comeciái daje isoi lloñedimaci

¹⁰ Cue amatiaia, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciái daje isoi lloillana jitaicicue. Daje isoi omoi comeciái facajana jitaicicue. ¹¹ Cloé raillamie cominimona bie rafuena cue fidia jira, iese omoimo lloticue. “Omoi comeciái daje isoi iñedomoi” naimie llote. ¹² Omoimona damierie raitomoi: “Dani Pablo llofua dibecinodo jai jaidicaí”. Damierie raitomoi: “Dani Apolos raillamie llofua dibecinodo jai jaidicaí”. Damierie raitomoi: “Dani Pedro llofua dibecinodo jai jaidicaí”. Damierie raitomoi: “Dani Cristo llofua dibecinodo jai jaidicaí” raitomoi. Nana iese itomoi. Iemona omoi comeciái daje isoi iñedomoi. Cloé cominimona iese fididicue. ¹³ Ero, diga omoi Jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fiodañedicue. Cue dibeimo omoi illena cue bautizañegaomoi. ¹⁴ Omoina cue bautizañena jira, omoimo ite rafue cuemona comuiñena jira, iobidicue. Dama Crispona bautizadacue. Gayona jiaie bautizadacue.

15-16 Estéfanas jofomo ite cominina bautizadicue. Jiaie cominina cue bautizajana comeciñedicue. Ie muidona: “Pablo facaina bautizadica?” llonidomoi. Daje isoi omoi comeciai lloifienia, cue muidonañede. 17 Ailluena cominina cue bautizallena, Cristodi cuena oretañede; iadedi naimie rafuena cue llofuellen, cuena oretate. Eo abina uifioraima isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uifioraima isoi omoimo llofueñedicue. Cristo fiodaillamona, omoi jeacinomona naimie omoina jillotate. Iena omoi feitañenana jitaidicue.

Cristo finoca rafuemonu Jusiñamui uai siñonana uifioticai

18 Cristona inoñedinomona cruzmo Cristo fiodailla rafuedi jamaifue. Naimacidi faifcana jai jaidimaci. Jusiñamuimona naie rafue illa jira, caimona naie rafuedi siño. Naie uaidi diga comini comeciai meidorede. Caidi naie rafuena inotinodicai. 19 Ero, Jusiñamui facaina lloraïma micori Cristona inoñedinona jae cuete:

Jusiñamui llote: “Abina uifioraini imaci uifiuacinona saitaiticue.

Abina baitadino imaci baitajacinona saitaiticue” llote.

Ie muidona naie isoide comini jilloñenana jai uifioticai.

20 Naie isoide comini uifiuacinomona jaca jillonidicai. Abi uifioraima uifiuacinodi Cristo fiodailla rafue baifemo faifñede. Moisés micori cufafuena uifioraima uifiuacinodi Cristo fiodailla rafue baifemo faifñede. Uaina uaitatimie birui ite uifiuacinodi Cristo fiodailla rafue baifemo faifñede. Jusiñamuidi naimiena uifioñedino imaci abi uifiuacinona jai jamaitate. Iena naimie jamaitajamona, naimaci uifiuacinodo naimaci jilloñenana jai uifioticai. 21 Ie jitaillacino diese Jusiñamui finua jira, naimaci abi uifiuacinomona naimiena inoñedimaci. Ie jira naimie mare jitaillacinomona, naimiena inotinona jai jillotate. Naimaci jeacinomona naimacina jai jillotate. Cristo rafuena cai llumona inotimaci. Jusiñamuina inoñedinodi naie rafuena: “Jamaifue” raitimaci.

22 Siño rafuena naimaci cioacana jira, judiuaï railla cominidi iese raitimaci: “Siño rafuena Jusiñamui finoia, omoi lloga rafuena inoiticai” raitimaci. Grieguai railla comini dinena raitimaci: “Omoi lloga rafuena cai abina uifiuacino ie isoi itena, iena inoiticai” raitimaci; 23 iadedi Cristo rafuena llocana jaidicai. Cruzmo naimie jai fiodaillana lloticai. Ie jira judiuaïdi cai lloga rafue muidona iciritimaci. Naiena oiacañenano iciritimaci. Damie naimaci illaimana jaillemo ocuridimaci. Naimaci ocurillamie fiodaillamo naimaci comeciaina facañedimaci. Cristo fiodailla jira, raitimaci: “Naimiedi cai ocuriñenamie” raitimaci. Judiuaifñedino dinena raitimaci: “Omoi lloga rafuedi jamaifue” raitimaci. Ailluena comini cai lloga rafuena jitañedimaci; 24 iadedi Jusiñamui damierie judiuaïna jai fetode. Dajerie judiuaifñedinona jiai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uifiotimaci. Cristo finoca rafuedo naimaci jilluamona, Jusiñamui abina uifiuana jiai uifiotimaci. 25 Jusiñamui Cristona orede, cai jeacino facaina naimie fiodaillena. Jusiñamuina inoñedinomona Cristo finoca rafuedi jamaifue. Ebinidifue. Caimona Cristo finoca rafuedi Jusiñamui inoñedino uifiuacino baifemo faite. 26 Cue amatiai, Jusiñamui omoïna navui fetode; iadedi ¿nie isidomoi? Jamaï bue isidomoi. Omoi comeciaina iemo faca. Jusiñamuina inoñedinomona abina uifioñedomoi. Omoi creyentiai dibeïmo eo abi uifiotino raise iñedimaci. Omoi creyentiai dibeïmo illaicomini raise iñedimaci. Omoi creyentiai dibeïmo ucuberedino raise iñedimaci. Jusiñamui

ie isoidinona eo fetoñede; ²⁷ iadedi abina uiñoñedinno raillanodomoína fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena. ²⁸ Jamai bue isoidinona fetode, jamai bue isoiñedinno baifemo faillena. Jusiñamuimona jamai bue isoiñedinodi jamai comini. ²⁹ Ie muidona jaca buna Jusiñamui uicomo abina iedoñena. ³⁰ Caina ie cominina Jusiñamui jaitaja jira, Jesucristomo duidicai. Cristomona Jusiñamuína uiñoticaí. Cristo fiodailla jira, Jusiñamui cai jeacinona feitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate. ³¹ Jusiñamui facaina lloraima micori iena jaie cuete: “Bu abina iedoiacania, nana Cristo finoca rafue diga naimie abina iedua” cuete.

2

Pablodi cruzmo Cristo fiodailla rafuena llocabite

¹ Cue amatai, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñotícuedena, iese niade llofueñedicue. ² Daje rafuemo cue comecina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue. ³ Omoi motomo navui cue ia, meiruiocaillamona jacinaioidicue. Jusiñamui facaina cue raise jino lloñeni raillano jaciroidicue. ⁴ Comini abi uiñuacinodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoína cue lloga rafue siñonana uiñotade. ⁵ Jusiñamuidi cue iese llofuiana jitaide. Comini abina uiñuacinona omoi cacajamona, Cristona iñoñedomoi; iadedi Jusiñamui omoína jillotaja jira, jai iñotomoi.

Jusiñamui Joreñodo bie rafuena uiñoticaí

⁶ Comini abi uiñuacinodo llofuecabiñedicue; iadedi Jusiñamuimona ite abi uiñuacinodo llofueticue. Cristona raise iñofidinomona abi uiñuacinodo llofueticue. Cristo facaina llorainidi cue isoi jiai llofuecabitimaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico faifitimaci. Ico jiai uainicaitimaci. Ie jira naimaci uiñogacinodo llofueñedicai; ⁷ iadedi Jusiñamuimona abi uiñuacinona cai feiñuamona, iedo llofueticai. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede. ⁸ Birui ite illaicominiñidi Jusiñamuimo ite rafuena nia uiñoñedicai. Iena uiñotimacidena, cruzmo cai ebirede Namana meineñedicai. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedicai; iadedi Jusiñamui caina iena uiñotade. ⁹ Jusiñamui facaina lloraima micori iena jaie cueba:

Jaca buna naimiëna iñotino facaina Jusiñamui finoca rafuena cioiñede.
Jaca buna iena cacaiñede.

Jaca buna iemo comecina facañede
cueba. Jusiñamui rafuena uiñoñedinno naie rafuena jaca uiñoñeitimaci; iadedi naimiëna isiruitino naie rafuena uiñotimaci. ¹⁰ Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

¹¹ Jaca budi jiaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote. ¹² Jusiñamuimona ie Joreñoña jai feiñoticaí. Jiaie cominimona naie Joreñoña feiñoñedicai. Jusiñamui Joreñodi caina Jusiñamui

caimo caidiñeno fecaca rafuena uiñotade. ¹³ Omoimo naie rafuena llofuecabiticai. Cominimona fueoga uaido llofueñedica; iadedi Jusiñamui Joreño caimo llofuia uaido llofueticai. Ie jira Jusiñamui Joreño ite cominimo naie rafuena llofuecabiticai. ¹⁴ Jusiñamuina iñoñedinodi Jusiñamui Joreñomona iticinona feiñoñedimaci. Naimacimona naie rafue jamaifue. Iena ca-caiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci. ¹⁵ Nana Jusiñamui jitailla rafue diese cacadimaci. Jusiñamuina iñoñedinodi Jusiñamui Joreño illa comini illa rafuena jiai raise uiñoñedimaci. ¹⁶ Jusiñamui facaina lloraima micori iena jaie cuega: “Jaca buna Jusiñamui comecimo iticinona uiñoñede. Budi naimiena jiai llofuenide” cuega. Ero Cristo comecimo iticinona cai uiña jira, Jusiñamuina iñoñedinodi caina raise uiñoñedimaci. Caina jiai llofuenidimaci.

3

Danomo Jusiñamui dibeimo maijidimaci

¹ Cue amatiai, Jusiñamui Joreño anamo itinona omoi raise itomoidena, omoina llofueñedicue. Omoi jitaillacinodo nia omoi jailla jira, omoina llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaina omoi jailla mei, Cristo rafuedo eo jaiñedomoi. ² Feinide rafuena navui llofueticue. Eo feirede rafuena omoimo llofueñedicue. Omoina iena nia llofueñedicue. Omoi uruai; janore moonailla mei, guitimaci. Ie isoide. Cristona cai iñua mei, naimie rafuena iñocana cai jailla; iadedi omoi raise jaiñena jira, Jusiñamuimona nia moonaiñedinoo isoidomoi. ³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloñedomoi. Jusiñamuina iñoñedinoo isoi nia itomoi. Jamai ebe isoi nia itomoi. ⁴ Omoimona damierie: “Pablo llofuia dibecinodo jaidica;” raitomoi. Jiaino: “Apolos raillamie llofuia dibecinodo jaidica;” raitomoi. Iese omoi raia, Jusiñamuina iñoñedinoo isoi itomoi. Ie jira iese rañeno.

⁵ Jamai bue isoidicue. Apolos jiai jamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena iñotomoi. Jusiñamui cocomo llua isoi, ie rafuena lloticoco. ⁶ Naie rafuena cue llofuiamona nano iñotomoi. Ie mei Apolos iena dane llofute. Iese llofueuidicoco; iadedi dama Jusiñamui omoina naie rafuena iñotacana jaide. ⁷ Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoina iñocana jaitate. ⁸ Daje uaina Apolos diga maijidicue. Coco maijia diese Jusiñamuimona coco ibana feiñoticoco. ⁹ Jusiñamui facaina maijidicoco; iadedi naimiedi omoina iñocana jaitate. Naimiedi omoi comeciaina marena itatacana jaitate. ¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue lluaamona Cristona iñotomoi. Birui jiaimie omoina naie rafuena jai llofute. Omoi comeciaino naie rafue raise itabillena, omoina llofute. Bu omoina llofueia, omoi comeci marena illacinomo naimie comecina facajanona, omoina naimie llofuecabilia. ¹¹ Omoi jeacinomona omoi jilloillena, jaca daje rafue ite. Jiaie rafuedi iñede. Iena omoimo jai llofueticue. Naie rafuedi Jesucristona ñaite. ¹² Iena raise atona bu llofueia, uanaicinona jaca llofuiaamona, cominina Cristona iñocana jaitate. Naie rafuedi naimiaci comeciaino raise itabide. Iena raise atona bu llofueñenia, uanaicinona jaca llofueñenia,

cominina Cristona inocana jaitañede. Naie rafuedi naimaci comecimo raise itabiñede. ¹³ Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina majjidino lluana lloite. Naimaci llogacinona eo facaciite. ¹⁴ Ie mei Cristo rafuena raise atona llotinodi Jusiñamuimona ibana feiñoitimaci. ¹⁵ Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jiai faifitimaci; iadedi faifñeitimaci. Jusiñamui diga jaca itimaci; iadedi tainomo majjidimaci.

¹⁶ Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentia. ¹⁷ Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatatimiena duere finoite.

¹⁸ Bie rafuedo omoi raise jaillena, dani omoi abiaina jifueño. Creyenteñedinu uiñuacinodo jaiñeno. Omoimona bu iedo jaiacania, naimiemo llono: “Naie isoide rafuedo o jaiñeno”. Iedo naimie jai, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedinu uiñuacinodo omoi jaiñeno. ¹⁹ Jusiñamuimona naimiena inoñedinu uiñuacinodi jamaifue. Jusiñamui facaina lloraima micori jai e cuela: “Jusiñamuidi comini abi uiñuacinona uiñuana, naimacina jai emodofide. Naimacina jai duere finode”. ²⁰ Jiai e cuela: “Jusiñamuidi abi uiñotino railla comini imaci comeciaino facajacino jamaifueña uiñote”. ²¹ Ie jira omoi llofuerainiri abi iedoño. Jusiñamuimona nana rafue omoimo jai illa jira, naimaci abi uiñuacinodo abina iedoño. ²² Marena omoi comeciaino illacino jitai raillano, Cristo omoi dine caina oretate. Cueno oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suide. Omoi jitai raillano, jiairuido nana omoimo ite rafuedi suite. Nia omoi fiodiaña, Cristo omoina canoite. Omoi fiodiaña, naimie dine jaitomoi. Naiemona marena omoi comeciaino illacino jitai raillano, ua nana rafue omoimo jai ite. ²³ Cristomo omoi jainaiaila jira, naimie anamo itomoi. Jusiñamuimo Cristo jainaiaila jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

4

Cristo fetocano naimie dibeimo majjide

¹ Caimo omoi comeciaina faca. Cristo dibeimo majjidicai. Jusiñamui rafuena llocana jaidicai. Iena jai uiñoñedicai; iadedi naimie caina uiñotaga rafuena birui llofueticai. ² Ero, naga patródi naimie dibeimo majjidino naimie lloga uaina inuana jitaide. Ie isoide. Jusiñamuidi ie facaina lloraini naimiena naimaci inuamona naimie rafuena raise lluana jitaide. ³ Cue uaina omoi uaitañenia, iena omoi uaitaia, jiaino iena uaitaia, iemo comecina facañedicue. ⁴ Cuemo nicino ia, iena uiñoñedicue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite. ⁵ Ie jira: “O llucino mare” cuemo lloño. “O llucino marañede” cuemo jiai lloño. Cai Nama nia abido biñenia, iena cuemo omoi lloño. Naimie bia, nana comini comeciaino ite rafuena uiñotaite. Naimaci comeciaino ite jitaillacinona uiñotaite. Iemona naimaci majjia dinori Jusiñamuimona iobillacinona feiñoitimaci. Naie facaise cuemo ite rafuena lloite. Ie jira nia cuemo lloño.

⁶ Cue amatiai, naie rafuena omoi raise uifollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cuegafue llua isoi, omoi illana jitaidicue. Omoi llorainiri tainomo iobiñeno. Omoi Cristo facaina llorainimona damie jiaie lloraima baifemo faiamo omoi comeciaina facañeno. ⁷ Nana omoi llofuerañidi daje isoidimaci. Jusiñamuimona nana naimacimo ite uaina feifotimaci. Dani naimaci comeciainimona iena naimaci oflena jira, ie diga abina iedoñeno.

⁸ “Nana Jusiñamuimona iticinona jai feifoticaí. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticaí” omoi comeciaina facadomoi; iadedi nia iese ifnedomoi. Nainomo itomoidena, nainomo coco jiai illa jira, cuemona eo mare. Nainomo iticodena, cuemona eo mare; iadedi jiaie rafuemo cue comecina jai facadicue. ⁹ Jusiñamuidi nana omoína cue baifemo faitatate raillanomo cue comecina facadicue. Cristo rafuena llorainidicaí; iadedi cue baifemo omoi faiamo cue comecina facadicue. Omoimona jamai bue isoidicaí. Nana comini duere cai illamo raise eruaidimaci. Jusiñamui jaienisaídi duere cai illamo jiai eruaidimaci. ¹⁰ Cristo rafuena cai llua muidona, omoimona ebe isoidicaí. “Cristo rafuena raise inuanona, iedo raise jaidicaí” raillanomo omoi comeciaina facadomoi; iadedi Jusiñamuimona iese ifnedomoi. Omoimona cai uaidi raise baifede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese ifnedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese ifnedomoi. ¹¹ Cai guille buedi jaca ifnede. Iniroinidicaí. Jiaie comini caina duere finodimaci. Jofonidicaí. ¹² Cai ra ollena, cai onollí diga duere maijidicaí. Comini caina jeare ñaitimaci; iadedi ibana ofnedicaí. Naimaci diga marena ñaiticaí. Caina duere finodimaci; iadedi uai ofeno ibana ofnedicaí. ¹³ Cai joreñona jeare ñaitimaci; iadedi cai dinena naimaci diga marena ñaiticaí. Naimacimona jamai bue isoidicaí. Iese caimo naimaci comeciai nia facadimaci; ia Cristo ñibeimo ie rafuena nia llocana jaiacadicaí.

¹⁴ Bie carta cue cuiamona, omoína meiruitaicaíñedicue; ia omoína nia llofueiacadicue. Isiruiga uruaidomoi isoidomoi. Ie jira bie rafuena omoi raise uifluana jitaidicue. ¹⁵ Omoína Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruaina jai jaidomoi isoidomoi. ¹⁶ Ie jira omoimo cue llogacinodo mai omoi jai.

¹⁷ Iedo omoi jaillena, omoína canollena, omoi dine Timoteona jai oredicue. Naimiena isiruticue. Naimiedi Cristo ie inogamie. Cuemona Cristo rafuena naimie cacajanona, iena inote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoína llofuede. ¹⁸ “Pablo caina jaciruilla jira, naimie cai dine biñeite” raillanomo omoi comeciaina facajamona, omoimona damierie jai abina biridomoi. ¹⁹ Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie isoide uai naie abina biridinomo illana uifnoticue. Naimaci ñaiacinodo iena uifnoticue; iadedi naimaci finoca rafuemonona iena uifnoticue. ²⁰ Ero, jamai ñaiamona, Jusiñamui anamo naimie jitailla isoi ifnedicaí; iadedi naimie finoca rafuedo cai jaillamona, naimie jitailla isoi iticaí. ²¹ Omoi dine ico cue ria, ¿niese omoi diga ñaiticue? Cuemo llono. Cue lluana omoi inoñenia, omoimo raire lloiticue. Cue lluana omoi inoia, omoína cue isiruillamona, omoimo fecuise lloiticue. Ie jira cuemo llono.

5

Pablo eo jearede rafuena finodimiena riire llote

¹ Jiaie rafuena omoimo lloticue. Eo jearede rafue omoi motomo jai illana jai fididicue. Jusifamuiña inoñedino naie isoide rafuena finoñedimaci; iadedi omoimona damie ie eicañona ote, ie aina. ² Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunañedomoi? Omoi rocabillacomo naimie bia, naimie fo billana rairui. ³ Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue ifena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uifnoticue. ⁴ Cai Nama Jesús facaina cue ñaiaimona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite. ⁵ Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo ðibeimo dane iite. Cristo ico abido bia, naimiedi Cristo ðibeimo dane raise illa jira, Cristo naimiena duere finoñeite.

⁶ Jearede rafue omoi motomo illa jira, ¿buena abina iedotomoi? Janorede siritate ra juilliruaimo fajamona, nana naie juilliruai sircana jaitate. Iena uifnotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa. ⁷ Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciaimo ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judíuai cominidi toica laudaiai fajamona, naimaci jeacino facaina Jusifamui ðbana oñede. Cai facaina Cristo jai fiodailla jira, cai jeacino facaina Jusifamui ðbana oñeite; iadedi iemona naimiena nabaidicai. Ie jira jeacinona finocana cai jaiñeno. ⁸ Cai facaina Cristo fiodailla jira, cai jeacinona fainonocailanona, Jusifamui jitailla isoi mai cai i. Jeacinona finocana cai jaiñelli. Uanaicnodo mai cai jailli.

⁹ Jiaie cartana omoimo navui oredicue. Imaci añede riñoniai diga itino diga nabairiñellena lloticue. Naiñaiñuiai iniñede iñiaai diga itañaiñuiai diga nabairiñellena lloticue. ¹⁰ Nibai iena raise cacañedomoi. Ie jira iena dane lloticue. Cristona inoñedinona ñañedidicue. Naimaci añede riñoniai diga ia, naiñaiñuiai iniñede iñiaai diga ia, naimaci rana nicidoia, rana naimaci fiia, jiraraina naimaci sedajia, naimaci diga omoi nabairiñenana ñañedidicue. Iena rairuididicue. Iena cue rairuidicuedena, naganomo Jusifamuiña uifnotedino illa jira, ¿ninomo niadedi iticai? ¹¹ “Cristona inotocai” raitinona ñaiticue. Naimaci añede riñoniai diga naimaci ia, naiñaiñuiai iniñede iñiaai diga naiñaiñuiai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci ficabia, naimaci diga nabairiñeno. Naie isoidino omoi jofuemo feiñoñeno. ¹²⁻¹³ Cristona inoñedinona ñañedidicue. Naimaci rafue cuemo duifñede; iadedi marañediciona naimaci finoia, Jusifamui naimacina duere finoite; iadedi Cristona inotino marañediciona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

6

Cristona ñnoñede juezmo jiaie creyentena llogidoñeno

1 Jiaie omoï finoca rafuena fididicue. Jiaie creyentedimie diga omoï nicino ia, ¿bue ñellena jiaie creyentiaï dine jaiñedomoï, naicinona siadollena? ¿Bue ñellena Cristona ñnoñede juez dine naimiena meiruiñeno llogidotomoï? 2-3 Jesucristo abido bille mei, Cristona ñnotinodicaiði Cristona ñnoñedinona duere sefuillena lloiticai. Taiife comini duere sefuillicinona ico jiaï lloiticai. Iena uiñotomoï. Naimacimo omoï ico llua jira, ¿bue ñellena birui omoïmo ite rafuena dani omoï raise finonidomoï? 4 Nicino omoïmo ia, ¿bue ñellena Cristona ñnoñedino dine jaidomoï? Omoïmona naimaci jamai bue isoidimaci. Naie isoide jueces omoïmo ite rafuena raise uiñoñedimaci. 5 Omoï meidaillena, iena omoïmo jai lloticue. Naie nicinona raise omoï siadollena, iena raise finollena, omoïmona nibai damie ite, iena raise finollena. 6 Iese finocabiñedomoï; iadedi nicino omoï creyentiaïmo ia, Cristona ñnoñedimie mo jiaie creyentena llogidocabitomoï.

7 Jiaie creyentena omoï llogidoia, Cristo ðibeimo raise iñedomoï. Naicino raise omoï finoñena, uai oñeno anamo ee. Naimiemona omoï duere sefua, dama ite. 8 Iese iñedomoï; iadedi dani conini jiaie creyentiaïna duere finocabitomoï. Naimaci rana fiidomoï. Omoï amana duere finodomoï.

9 Jusiñamui sedajanomo naimiena ñnoñedino ðuiñeitimaci. Naimaci isoi nia iacadomoï; iadedi Cristo ðibeimo omoï illa jira, naimaci isoi inidomoï. Ie jira naimaci illamo omoï abina rairui. Bie isoidino Jusiñamui ie cominina sedajanomo jaca ðuiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conioño aifiedotino, 10 rana bainino fiicabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo ðuiñeitimaci. 11 Omoïmona dajerie iese jaietomoï; iadedi jiaie rafuedo birui jaidomoï. Cai Nama Jesucristo fiodailla jira, Jusiñamuidi omoï jeacinona jai oñi dotade. Iena jai feitate. Ie Joreño uaido omoïna ie cominina jai jaitate. Ie muidona naimiemona jai marebicaidomoï.

Jearede rafuemona abina rairui

12 Cristo ðibeimo omoï illa jira, ¿niese dani omoï jitaillacinodo jaiacadomoï? Diga Jusiñamui rairuiñega rafue ite. Creyentiaï iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi. 13 Raitomoï: “Ñie isoide guille cai guiacania, ñie isoide rafue cai finoacania, caimona mare” raitomoï. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. 14 Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaite, ie uaido na cai abiaï diga caina ico jillotaite. Cai abi jaca illa jira, jearede rafuena birui cai finoñena.

15 Cristomo jainiaïdicai. Iena uiñotomoï. Omoï ainiaïñede riño diga omoï ia, naiñaiñuaimo jai ðuidomoï. Cristo naie isoide riño mo jaca ðuiñena jira,

naiñaiño diga iñeno. ¹⁶ Ie aiñede riño diga bu ia, ie ai illa isoi, jai dajena jaidiaimaiai. Ie jira Jusiñamui jaie llote: “Riño diga iima illa jira, jai dajena jaidiaimaiai” llote. ¹⁷ Cai Nama Cristomo bu duia, dajena jai jaidiaimaiai. Jusiñamui Joreño iaimaiaimo illa jira, iaimaiai comeci daje isoi jai lloide.

¹⁸ Ie jirari naie jearede rafuemona abina rairui. Iesede bu finoa, jearede rafue ie abimo jai finode. Caimanide rafue ie abi diga finode. Jiaie maraiñede rafue bu finoa, naimie abimo jearede rafue finoñede. ¹⁹ Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentiai. Jusiñamuimo jai jainaiaidomoi. Ie muidona omoi jitaillacinodo jaiñeno. ²⁰ Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

7

Pablodi iima ie aina ua rafuena ñaite

¹ Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana jicanotomoi. Faidaima jaca dama iacania, cuemona mare. Faidaiño jaca dañe iacania, cuemona jiai mare; ² iadedi jeacino omoi finoi raillano, nagamie ie aina otena, jiai mare. Nagañaiño ie inina otena, jiai mare. ³ Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena. ⁴ Naiñaiño abi dañeñede; iadedi dañe ie ini abimo jiai duide. Naimie abi damañede; iadedi dama ie ai abimo jiai duide. ⁵ Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comequina raise o facallena, iemo omico comeci daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomo ramo fai raillano.

⁶ Dane lloiticue. Jeacinona omoi finoi raillano, nagamie ie aina otena, mare. Nagañaiño ie inina otena, jiai mare. Iese omoimo lloticue; iadedi iese ocuiñedicue. ⁷ Ainidicue. Cue illa isoi omoi illana jitaidicue; iadedi daje isoñedicai. Jusiñamui caina itataja diese iese iticai. Dajerie ainidimaci. Dajerie airedimaci. Dajerie ininidimaci. Dajerie iniredimaci.

⁸ Nia ainidinomo lloiticue. Nia ininidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare; ⁹ iadedi omoi ocuiñeniadedi, aina ono. Jiaie riño diga illemo o comequina facañellena, daje riñona ono, o aina. Jiaie iimamo o comequina facañellena, daje iimana ono, o inina.

¹⁰ Creyentiaimo nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jaie llote: “Riño ie inina sofeño. ¹¹ Iima ie aina sofeño” llote. Iese llote; iadedi nie riño ie inina sofeia, jiaie iimana naiñaiño ofena. Iimana naiñaiño oiacania, ie ini diga dane abido illasa.

¹² Nia lloiticue. Cai Nama biena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñona dotaño” naimiemo llono. ¹³ Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiñomo llono. ¹⁴ Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaimaiai uruiaina, jiaie creyente

iaimaia; uruia; isoi, omoi roracomo feiño. ¹⁵ Ie inina creyenteñede ai sofeiacania: “Naiñaiñoña dotañoño” naimiemo llono. “Naiñaiñoña jaillena rairuiñoño” naimiemo llono. Ie aina creyenteñede ini sofeiacania: “Naimiema dotañoño” naiñaiñoño llono. “Naimie jaillena rairuiñoño” naiñaiñoño llono. Sofeia mei, jai dajemo duiñeiiamaia. Jusiñamui naga creyente uri illana jitaide; ¹⁶ iadedi ie ini diga ie ai fiebia, ie ini creyentenamona, naiñaiñoña nıbaı creyentena jaite. Ie ai diga ie ini fiebia, ie ai creyentenamona, naimie nıbaı creyentena jaite.

¹⁷ Iena lloticue; iadedi Jusiñamui mona ie feiñoğa uaido nagamie jailla. Creyentiaına omoi jailla facaiseconi, omoi maijiuilla ramo nia raise omoi maiji. Naga creyentiaı illanomo buena llofuecabiticue. ¹⁸ Nia creyentiaına omoi jaiñenia, judıuaı isoi omoımona dajerie omoi abiaına detatamotoı. Naie detatafuemo omoi comeciaina birui facaño. Omoımona dajerie omoi abiaına nia detatañedomoı. Iemo omoi comeciaina birui facaño; ¹⁹ iadedi Jusiñamui uaina omoi iınuamo omoi comeciaina birui faca. Jiaie rafue baifemo faite. ²⁰ Creyentiaına omoi jailla facaiseconi, omoi maijiuilla ramo nia raise omoi maiji. ²¹ Creyentiaına omoi jailla facaise omoımona dajerie patrón anamo itinodomoı. Nia patrón anamo itino isoi omoi jai. Iemo omoi comeciaina jarire facaño. Jıairuido omoi patrón: “Cue anamo iñedomoı” raia, naimie anamona oni omoi jai; iadedi Cristo rafuedo jaca omoi jai. ²² Cristona omoi iınua facaise, patrón anamo omoımona damierie navui itomoı; iadedi Jusiñamui omoına fetode. Naimiema omoi iınuamona, omoi jeacino anamo jai iñedomoı. Patrón anamo omoımona damierie navui iñedomoı; iadedi Jusiñamui omoına fetode. Ie jira naimie anamo jai itomoı. ²³ Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie cominına jai jaidomoı. Ie jira comini jitaillacino anamo iñeno; iadedi Jusiñamui jitaillacino anamo i. ²⁴ Cue amatiaı, creyentiaına omoi jailla facaiseconi omoi maijiuilla ramo nia raise omoi maiji. Jusiñamui omoına canuanona, jearede rana omoi maijiñenia, nie isoide rana omoi maijiıa, Jusiñamui mona mare.

²⁵ Navui cuemo cartana oredomoı. Faidaiñıuaı illa rafuena uıñoıacadomoı. Cai Nama naie rafuena jaie lloñena jira, iena birui lloticue. Naimie cuena duenailla jira, naimie uaina iınoticue. Ie muidona comini iınogamedicue. ²⁶ Birui duere omoi sefuilla facaise illa jira, omoi illa isoi omoi i. ²⁷ Omoımona bu airenia, naiñaiñoña dotañoña. Bu ainia, dama ainide. Riñoña oña; ²⁸ iadedi o aina illena ininide riñoña o otiodena, jeacinona finoñedio. Omoımona o inina illena ainide imana o otiodena, jeacinona finoñedio; iadedi aina bu ua mei, inina bu ua mei, eo duere maijiıte. Iese omoi duere sefuiñellena, omoımo iena lloticue.

²⁹ Cue amatiaı, biemo omoi comeciaina faca. Jesucristo abıdo dane billıruı iaireı ite. Naimie jitailla rafuena omoi raise finollena, omoi ainiaımo ite rafuemo omoi comeciaina facaja; iadedi Cristo rafuemo omoi comeciaina eo facaja. ³⁰ Omoımona damierie sunaia, damierie caımare ia, iemo omoi comeciaina eo facaño. Damierie raruaına ibaia, naieri eo iobıño. ³¹ Omoımona damierie bene ite rana eburııtımacı; iadedi iemo omoi comeciaina eo facaño. Iemo omoi comeciaina eo facaia, abı juanide, Cristo rafuena omoi finollena. Cristo rafue nano finuamo omoi comeciaina eo faca.

³² Omoi comeciaina jarire iñenana jitaıdicue. Nia ainidımie abı juarede, dama Cristo rafuena maijillena. Naimiema iobıtaıacade; ³³ iadedi aıredımie bene ite rafuemo ie comeciaina facade. Ie aina iobıtaıacade. Naiñaiñoño ite

rafuemo naimie comecina facade. Cristo rafuemo ie comecina jiaie facade; ³⁴ iadedi mena rafuemo ie comecina eo facallemo abi juanide. Ininidiñaiño abi juarede, daño Cristo rafuena maijillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

³⁵ Aina uana rairuiñedicue. Inina uana jiaie rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaidicue. Dani Cristo rafuemo omoi comeciaina facajana jitaidicue.

³⁶ Ero, omoimona naiñaiño oiacaga imamo ie moo, ie jisa caidiñeno fecaca. Naiñaiño jai moonaila jira, naiñaiño jitailla jira, naiñaiño fecaia, ie moo jeacinona finoñede; ³⁷ iadedi inina naiñaiño oiacañenia, naimie comeci llumona, ie comecina eo facajamona, ie jisa fecaacaiñenia, jiaie mare. ³⁸ Ie jisana fecaia, mare. Cristo rafuena naiñaiño eo maijillena, ie jisa fecañenia, jiaie mare.

³⁹ Jiaie rafuena lloiticue. Riño ie ini nia fiodiañenia, naiñaiño naimiemo jaca duide. Ie ini fiodaille mei, jiaie imana ie ini ifomo naiñaiño oiacania, mare; iadedi creyentiñenia naiñaiño ua. ⁴⁰ Naie feciñodi imana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caimare iite.

8

Jusiñamuina eruaide jiraraimo llicisi fecaja rafue

¹ Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticai. Naie jiraraina naimaci navui sedaja jira, omoimona damierie naie isoide llicisi riana: “Maraiñede” raitimaci. Creyentiamona Jusiñamuina eruaide jirarai jamai rana illa jira, damierie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie ríia, jiaie creyentiamo comecina facañede. Jiaie creyentiaina bu isirua, naimacimo ie comecina facade. Cristo rafuedo jiaie creyentiaie raise jaillana jitaide. ² “Eo abina uiñoticue” ie comecina bu facaia, nia eo raise abina uiñoñede; ³ iadedi Jusiñamuina ua cai isiruillamona, jiaie creyentiaina cai isirua, jai abina uiñoticaí. Jusiñamui dinena caina jiaie uiñotaacade.

⁴ ¿Niese Jusiñamuina eruaide jiraraimo fecaca llicisina ñaiticai? “Jusiñamuina eruaide jirarai jaca cajeñenana uiñoticaí” raitomoi. “Jusiñamui jaca dajede. Iena uiñoticaí” raitomoi; ⁵ iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. ⁶ Iena sedacabidimaci; iadedi cai dani Jusiñamuina sedacabidicaí. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

⁷ Jusiñamuina eruaide jiraraidi jamai rana nana creyentiaie uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci ríia: “Naie jirarai sedadicaí” naimaci comeciaina facadimaci. Naie rafue naimaci raise uiñoñena jira: “Jecinona finodicaí” raitimaci.

⁸ Ero, nie isoide llicisi cai riamona, llicisi cai riñenamona, Jusiñamui caina

feñote. Naimena cai inuamona caina feñote. Buena cai riñenia, buena cai ría, jeacinona finoñedicaí. Naiemona marecinona jiaí finoñedicaí. ⁹ Naie llicisina riredomoi; iadedi omoi ama nibai Cristo dibeimo raise iñede. Naie llicisina omoi ría, naimiemona jeacinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaite. ¹⁰ Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoína nia Cristo dibeimo raise iñedimie cioia, nainomo jiaí guisaite, comecina facajano: “Cue ama Jusiñamuina eruaide jiraraina nia sedaja jira, naiena jiaí nia sedaiticue”. ¹¹ Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite. ¹² Iese omoi finoia, omoi amana jeacinona finotatomoi. Naimie comecina ocuiñotañedomoi. Ie muidona Cristomo jeacinona jiaí finodomoi. ¹³ Cristomo jeacino cue finoí raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina llorainidi naimaci jitailla rana jamai feñua

¹ Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuenja jaie fetua facaise cai Nama Jesuna cidodicue. Creyentiaina omoi jailla jira, cai Nama facaina cue maijana uiñotomoi. ² Jiaie comini Jesucristo oretagamiedicuenai nibai uiñotomoi; iadedi omoi iena uiñotomoi. Cristona omoi inua jira, Jesucristo cuena oretajana uiñotomoi.

³ Cue llofuiacinona bu uaitaia, iese cue llofuiacinona riidoticue. ⁴ Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa. ⁵ Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiaí macaria, omoi dine Pedro macaria, naimaci jitailla rana naimacimo jamai fecaidomoi. Ie jira, ¿nese cue jitailla rana cuemo jamai fecañeitomoi? ⁶ Jiaie llorainimo naimaci jitailla rana jamai fecacabidomoi; iadedi cue onolli diga cue maijana nibai nia jitaidomoi. Bernabé ie onolli diga naimie maijana nibai nia jitaidomoi. ⁷ Ero, soldadodi ie guille ibañede. Iena jamai feñote. Naga illimo maijiuidimie ie illimo maijide, naiemona naimie guillena. Naga toiniaina sedaudimiedi naimacina sedade, naimacimona ucube ie ollena. Omoi motomo cue maijia jira, cuena omoi nafua, omoimo Cristo rafuena llocabiticue. ⁸ Jamai comini uaido naiena llofueñedicue; iadedi Moisés micori cuezafuaimona iena fueotícue. ⁹ Naimie micori jaie cuela: “Jusiñamui llote: ‘Jurareta trigo oni juillena saisia, iemona ie guillesa, ie fuena maiñeno. Maiñenia, ie maijia fuemona guite’ llote”. Ie isoide. Omoi motomo cue maijia fuemona cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade. ¹⁰ Cristo rafuena cue llofuecabilla jira, cue llua fuemona cue jitailla rana jamai cue feñua. Iemo ocuridicue. Ie isoide. Ie illimo bu maijia, naiemona riana ollena, nainomo maijide. Iemo ocuride. ¹¹ Omoi motomo Cristo rafuedo omoi raise jaillena, navui llofueticue. Ie jira cue jitailla raruiaí

omoimona jamai cue ua. ¹² Omoimona raruiaina jiaie lloraini feiñocabilla jira, cuemona Cristo rafuena nano omoi cacaja jira, cue jamai jiai feiñua; iadedi omoimona raruiaina jicañedicue.

Cue jitailla raruiaie cue ollena, cue onolli diga duere maijidicue. Ie jira nana cue jitailla raruiaina oñedicue. Cristo rafuena omoi cacaiacaiñeni raillano, omoimona raruiaina jicañedicue. Raruiaina cue jicaia, omoi comeciaina nibai facaitomoi: “Raruiaie oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoimona raruiaina jicañedicue. ¹³ Ero, Jerusalémo judíuai comini Jusiñamuina sedauilla jofe ite. Nainomo naie comini toiniaina atuidimaci, Jusiñamuimo fecallena. Moisés micori jiaie llua isoi, naimaci jeacino facaina toiniaina fajanona fecadimaci. Nainomo maijiuidino comini atica toiniaina naimaci rillena, ibajanona ocabitimaci. Iena uifnotomoi. ¹⁴ Ie isoide. Cristo rafuena llorainidi naimaci rafuena inotinomona naimaci jitailla rana imaci ua. Cristo iena jai llote. ¹⁵ Omoimona raruiaina jaca jicañedicue. Raruiaie birui cue ollena, bie cartana jiai cueñedicue. Dama cuemo ite ra diga iiticue. Omoimona iena feiñoticuedena, meiruioicaida feiñoticue. Omoimona cue feiñoñena jira, omoi facaina Cristo rafue cue llumona, abina iedotícue. Raruiaie cuemo jamai omoi fecaia, ¿niese abina iedoiticue?

¹⁶ Jiaie lloraini rana feiñua isoi cue feiñoia, Cristo rafuena cue llumona abina iedoñeticue. Jusiñamui cuena oretaja jira, naie rafuena llotícue. Iena cue lloñenia, Jusiñamui cuena duere finoite. ¹⁷ Dama cue comeci jitaillamona Cristo rafuena cue lloiacania, Jusiñamuimona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidícue. ¹⁸ Ie jira, ¿niese ibana feiñoiticue? Ibana nibai feiñoiticue; iadedi omoimo Cristo rafue cue lloia, cuemona mare. Omoimona cue jitailla rana cue oñenia, cuemona mare.

¹⁹ Omoimona raruiaina cue feiñoñena jira, omoi anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidícue. Iese jaidícue, ailluena cominina Cristo dibeimo cue itatallena. Iese jaiñedicuedena, eo janore comini Cristo dibeimo nibai jai itataticue. ²⁰ Judíuai comini diga cue ia, naimaci diga cue nabairillena, naimaci mare finocana uiga rafuedo jaidícue. Cristo dibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidícue; iadedi naie llogacinodo cue jilloitañena jira, naie llogacino anamo iñedicue. ²¹ Judíuaiñedino diga cue ia, naimaci diga cue nabairillena, Moisés micori llogacino naimaci jaiñena jira, naiedo jiai jaiñedicue. Naimaci mare finocana uiga rafuedo jaidícue; iadedi Jusiñamui lloga uaido jiai jaidícue. Cristo lloga uaido jiai jaidícue. Naimacina Cristo dibeimo itataiacadicue. ²² Naimaci diga cue nabairillena, Cristo rafuena nia raise inoñedino diga cue ia: “Omoi baifemo Cristo rafuena uifnotícue” raiñedicue. Naimacina iciacaiñedicue, naimacimo jeacinona cue fino raillano. Naimacina cue isiruillamona, naimacina canoacadicue. Naimacina Cristo rafuena raise inuana itataiacadicue. Nana cominina cue canoacana jira, naimaci mare finocana uiga rafuedo jaidícue. Cue comecina facadicue: “Cue muidona damierie Cristona nibai inoitimaci”. ²³ Cristo rafuena ailluena comini inollena, iese jaidícue. Iena llocana jaidícue. Naimaci inua jira, iobidícue.

²⁴ Ero, dani cai jitaillacinodo cai jaiñena. Iemona omoi fueollena, jiaie uaido llotícue. Riire aisia rafuena omoi comini jifanoia, raire uicodo ridimie

rana ote. Ailluena comini aisidimacimona, damie naie rana ote. Ie isoide. Cristo rafuena inocana mai cai jailli, ico Jusiñamui illanomo monamo ibana nana cai feiñollena. ²⁵ Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Hana feiñollena, iese finode. Hana bu oia, dallu iobide. Ero, jeaciona cai finoi raillano, cai abiana cai enuua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobitica. ²⁶ Riire aisiacadimie ebena aisiñede. Onolli diga mena iaimaia; jamai jifanoia, jafaicina jamai ducoñediaimaia; iadedi conimana ducoidiaimaia. Ie isoide. Cristo rafuedo raise cue jaiacania, jamai ebena jaiñedicue; iadedi nana cue começimona iedo jaidicue. ²⁷ Cue começina raise sedadicue. Dama Cristo rafue anamo iacadicue. Dama iena inoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue começina raise sedadicue. Iemona omoi fueua.

10

Jiraraína sedañena rafue

¹ Cue amatia; bie rafuena feitaño. Cai jaiagai micoria; finoca rafuemona fueoitica. Egipto railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaiacania, Jusiñamuidi naie monaillai oni ñajitade, safefodo nana naimaci ruica jaillena. ² Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci. ³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci. ⁴ Nainomo jinui jiai iñena jira, Jusiñamui llua jira, Moisés micori noficina butajamona, toide jinuina nana jirodimaci. Naimaci nine macaria, Cristona cioñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; ⁵ iadedi Jusiñamuina naimaci inoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fioidatide.

⁶ Cai jaiagai finoca rafuemona cai fueua. Marañede jearede rafuena naimaci finua isoi ebiruiño. Abimo omoi oño. ⁷ Jusiñamuiñedimiena sedaño. Cai jaiagaimona damierie juraretana eruaide rana jaiie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oño. Jusiñamuiñedimiena omoi sedaño. ⁸ Naimaci jearede rafuena finodimaci. Naimacimona damierie naimaci añede riñonia; diga itimaci. Ie jira naimacimona daruidemo veintitres mil comini fioiditimaci. Jusiñamui naimacina fioidatide. Naimaci finoca rafue isoi abimo cai oño. ⁹ Cai jaiagaimona damierie Jusiñamui Joreña ñaitimaci. Naimaci guisoiga radi Jusiñamuimona bite. Naiena ñiamona, Egiptomio ite guillemo começiana facadimaci. Ie muidona naimiena ricaitadimaci. Ie jira Jusiñamuidi jaioniaina naimacina ainitate. Iemona ailluena fioiditimaci. Naimaci finoca rafue isoi abimo cai oño. Jusiñamuina ricaitaño. Cristona cai nia inoñena facai finoca rafuemo cai começiana facañeno. ¹⁰ Cai jaiagaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina

meinetasillena. Naimaci finoca rafue isoi abimo cai oñeno. Jusiñamui facaina lloraini joreñuaina cai ñaiñeno.

¹¹ Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona. ¹² Naie isoide rafue omoï suiñellena, omoï abiaina rairui. Omoï comeciaina nibai facadomoi: “Cristona cai eo raise inua jira, iena finoñeiticai” comeciaina facadomoi; iadedi omoï abiaina omoï rairuiñenia, jeacinona finoitomoi. ¹³ Taife ramo omoïmo faicabilla isoi, nana jiaie creyentiaïmo ie isoi ramo faicabite. Iena feitañeno. Jusiñamuidi inogamie. Ie muidona omoï comeciai ocuillacino baifemo Jusiñamuidi Taife omoïmo ramo faiana rairuite. Naiemona omoï jilloillena, Taife uai omoï inoñellena, Jusiñamuidi omoïna canoite.

¹⁴ Cue amatai, Jusiñamui omoïna canuamona, Jusiñamuiñedimie facaina finoca rafuemonona oni i. ¹⁵ Abina uñotomoi. Ie jira omoïmo cue llucacina omoï cacaja mei, iemo omoï comeciaina omoï faca. ¹⁶ Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruana, janore llomenicon guiticai. Jusiñamuimo iobillacina nano fecadica. Ie mei janore vino jirodica. Iena cai jiruamona, Cristona cai nabaillana uñotica. Cruzmo Cristo fiodailla jira, naimiena nabaidica. Naie facaise llomenicon cai tairuamona, naimiena cai nabaillana uñotica. Cristo fiodailla jira, iese iticai. ¹⁷ Diga creyentiaïdica; iadedi daje llomenicomona jaca guticai. Daje llomenicomona cai guilla jira, dajena Cristomo cai duillana uñotica.

¹⁸ Ero, judiaui railla cominimona cai fueua. Naimaci jeacino facaina iba oñellena, toñiaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. ¹⁹ Omoï illanomo Jusiñamuina inoñedinodi Jusiñamuina eruaide jiraraimo guillena fecacabidimaci. Cai creyentiaïdicaimona naie guiledi jamai guille. Naie jiraraidi jamai ra. Cajeñede; ²⁰ iadedi Jusiñamuina inoñedinomona jamai rañede. Naimacimona nanoca ra. “Iemo rille cai fecajia, cai moona sedadica” raitimaci; iadedi naie ramo naimaci comeciaina facañedimaci; iadedi imaci moomo comecina facadimaci. Ero, Jusiñamuiñedimie mo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoï jaja, Taife diga jai nabairitomoi. Taife diga omoï nabairillana jitañedicue. Taifemo omoï duillana jitañedicue. ²¹ Rollena omoï ofia, Cristo fiodaillana omoï comecillena, nainomo omoï jiruamona, nainomo omoï guillamona, Cristona nabaidomoi. Comini rafue dine omoï jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoï finoia, marañede. ²² Iese omoï finoia, Jusiñamuina jai iciritaitomoi. Naimiena omoï icia, iniese naimie ricaillafuemonona jilloitomoi? Jaca jilloñeitomoi.

Jiaie creyentiaïna canocana cai jailla

²³ Ero, Jusiñamui dibeimo omoï illa jira, iniese dani omoï jitaillacinodo jaiacadomoi? Diga Jusiñamui rairuiñega rafue ite. Creyentiaï iena finorede; iadedi dajerie Jusiñamui rairuiñega rafuena cai finoñelli, naiemona bue cai oña jira. Iena cai finoia, cai amana Cristo dibeimo itañedica. Iena cai finoia, cai amana Cristo rafuena inotacana jaiñeiticai. Naimiena ramo faicana uitataticai. ²⁴ Omoïmona nagamie dama naimie mo ite rafuemo comecina facañena; iadedi naga jiaie creyentemo ite rafuemo ie comecina jiai facaja.

²⁵ Ero, ninena o llicisina omoi ibaia, Jusiñamuiñedimie mo naie llicisina fecajana jicanoñoeno; iadedi jicanoñoeno iena jaricitaiñoeno rino. ²⁶ Iena David micori jaie cuega: “Jusiñamui bie eniruena finode. Nana rana finode. Cai guillena, cai guille rana nana comuitaga” cuega. Ie jira ¿niese fimaiticai? Naimie mare finoca rana cai ríia, jeacinona finoñedicai.

²⁷ Ero, naimie diga o guillena Cristona ñnoñedimiedi ona uaidoia, naimie dine o jaicania, naimie dine guisai. Nana omo ecaja guillena guiño. Jamai uainino guiño. “¿Ninena ibadiño bie llicisina?” jicanoñoeno. O comeci jarire finoñoeno; ²⁸ iadedi Cristona raise ñnoñedimie nainomo jiai guitemo, omo lloia: “Bie llicisidi Jusiñamuiñedimie jai fecaca llicisi”, iena o riñoeno. Iena o ríia, Cristona raise ñnoñedimie comecina facaite: “Jeacinona finodio. Taifemo fecaca llicisina ritio. Creyentedimie iena riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñoeno. ²⁹ Naimie comecina facajacinodo cai jaiñenamona, nana Jusiñamui comuitaga guillena guiredicai; iadedi Cristona nia raise ñnoñedimie mona nana guinidicai; iadedi naimie comecina facajacinodo jaiñedicai. ³⁰ Cai guia, Jusiñamuimona naie guille comuitaja jira, Jusiñamuimo iobillacinona fecadicai; iadedi cai guillamona damerie cai joreñoena ñaiamona, iena guiñeiticai. ³¹ Omoimo iena nia lloiticue. Nie isoide rana omoi guia, nie isoide rana omoi ríia, nie isoide rana omoi jiroia, nie isoide rafuena omoi finoia, naieri Jusiñamuina iobita. ³² Jusiñamuina nia ñnoñedino canocabi, naimie uaina naimaci cacailena. Jusiñamuina jai ñnotinona jiai canocabi, naimaci abido danomo uaiñellena. ³³ Buena cue finoia, nana cominimo cue comecina facadicue. Ie jira nagarui cue jitaillacinodo jaiñedicue; iadedi Cristo rafuena naimaci ñnollena, nana cominina canocana jaidicue.

11

1 Cristo lloga rafuedo jai jaidicue. Cue isoi omoi jai.

Roracomo riñoñia illa rafue

² Cuen a feitañedomoi. Cristo oretagano jaie llogacinona omoina llofueticue. Cue llofueuillacinodo nia jaidomoi. Ie jira omoi ríi iobidicue; ³ iadedi jiaie rafuena nia lloiacadicue. Cristo ie Moo anamo ite. Naga ñima Cristo anamo jiai ite. Nagamie ai ie ñi anamo ite. Omoi afemo itino uaina omoi ñnoñena, marañede. ⁴ Roracomo omoi comini oficabia, ie ñi anamo ie ai illa jira, omoi comini finocabilla isoi, naga riño ie ifogimo ñiroina bicuano jailla. Iese naiñaiño bicoñena, ie ñi anamo naiñaiño ñede isoi eruaide. Jusiñamui diga nie ñima ñaia, Jusiñamui uaina nie ñima jino lloia, naimie ie ifogi icona jitañoeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide. ⁵ Nie riño Jusiñamui diga ñaia, Jusiñamui uaina nie riño jino lloia, ie ifogimo ñiroina bicoñoeno jaia, ñima isoi naiñaiño iacana jira, ie ñi afemo illana eruaide. Ie ñi anamo iacaiñena jira, ie ñino meidaitade. ⁶ Nie riño ie ifogimo ñiroi bicoñoeno jaiacania, ñima isoi eruaillena, ie ifogidi rijiruda gareca. Iemona naiñaiño meidaillamona, ie ñi anamo illamona, ie ifogimo ñiroina bicuano naiñaiño jaite. ⁷ Jusiñamui diga naimie ñaia, Jusiñamui anamo naimie illa jira, ñima ie ifogi icona jitañena. Jusiñamui naga ñimana comuitate. ñimana naimie finuamona, naimiena cai iobitajamona, Jusiñamui cai afemo illana uñotica. Ie ñina iobitajamona, naiñaiño afemo ie ñi illa jira, riño ie ifogimo ñiroina bicuana jailla. ⁸ Ero, Eva micorimona

Adán micorí comuiñede; iadedi ie ini micorimona ie ciraiofemona naiñaiño micorí comuide. ⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai inollena, naimiena canollena, naiñaiño comuide. ¹⁰ Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiñoa naimaci ciuanona, Jusiñamui jaienisaïmona jiai mare. ¹¹ Naga riño ie ini anamo ite; iadedi Cristona cai inua jira, riño baifemo imadi faiñede. Ima baifemo riño jiai faiñede; iadedi daiñaiñai conimana iaïmaïai canua. Cristo naga imana, naga riñoa daje isoi feiñote. ¹² Naga comini Jusiñamui comuitaga. Nano facaiseconi Adán micorimona Eva micorina jaiie comuitate; iadedi birui naga ima riñomona comuide.

¹³ Biemo omoi começiaina omoi faca: Omoi roracomo Jusiñamui diga nie riño ñaia, omoi einamacï finocabilla isoi, ie ifogina bicoñeno jaia, çñiese omoi começiaidi raite? Cue começi: “Maraiñede” raite. Ie ini anamo naiñaiño iñedena eruaide. ¹⁴ Nana omoi biesedena raicabitomoi: “Nie ima ie ifotirai eo areniadedi, cai cominimona maraiñeno çode; ¹⁵ iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena sicotajamona, naiñaiño ifotie ie ifogina raise ibaide. ¹⁶ Iena jaca llofuecabitue. Jiaie creyentiaï illanomo cue isoi começiaina lloidimaci. Omoimona bu cue llogacinona uaitaïacania, damameï ite.

Cristo fiodailla rafuena raise começiñedimaci

¹⁷ Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena inocana jaiñedomoi; iadedi naiemona maraiñede rafue comuide. ¹⁸ Rollena omoi oficabia, omoi começiaina daje isoi lloïñenana jai fididicue. çBue ñellena omoi começiaina daje isoi lloïacaiñedomoi? Naie rafuena omoi diga ja ñaiacadicue. Omoi oficabia, nagamiiaï guillena aticabidomoi. Mare; iadedi danomo guiñedomoi. Omoimona damerie ucuberena jira, dueredino diga guiacaiñedomoi. Omoi guille caididomoi. ¹⁹ Omoi iese illana jitaiñedicue; iadedi daje isoi omoi começiaina lloïñenamona, Jusiñamui dibeïmo raise itinodi uifoga. Omoimona damerie danomo omoi guillamona, Jusiñamuina omoi isiruïllana uifoticaï. ²⁰ Cristona sedallena omoi oficabia, guitomoi; iadedi vino jiruanona, llomeniconna guillanona, cai Nama fiodailla rafuena raise começiñedomoi. Maraiñede rafuena omoi finua jira, iena nia lloiticue. ²¹ Nagamiiaï guillena aticabidomoi. Dani coniniri raise guiñedomoi. Danerie omoi atica guillena guitomoi. Jiaïnona guillena iñedomoi. Damerie omoïmo ailluena guille ite. Damerie omoïmo guille raise iñede. Jiaïnona guillena omoi iñena jira, damerie jaca aimetaïimaci; iadedi jiaïno monidimaci. Damerie guilla motomo jiai jifaidimaci. Conini nabaiñedomoi. Ie jirari Cristo fiodailla rafuena raise começinidomoi. ²² Ero, omoi jofue ite, jamai guillena. Omoi oficabia, çbue ñe guillaredomoi? çBue ñe jiaïnomo guille fecaacaiñedomoi? Jiaie creyentiaïna omoi isiruïñenamona, Jusiñamuina jiai isiruïñedomoi. Janore guille itinona duere finodomoi, naimacina omoi eacacaiñena jira. Iese omoi illa jira, omoiri iobiñedicue.

Cristo fiodailla rafuena llofuiacino

²³ Navui omoïna biena llofueticue; iadedi omoi raise inoñena jira, iena dane llofueitue. Cai Nama iena cuemo jaiie lloite. Cai Nama Jesús ie gaitatajarui facaiseconi, ie llofueoicaïgano diga ia, naimaci guia, llomeniconna llinote. ²⁴ Iena llinuanona, Jusiñamuimo iobillacinona fecade. Ie mei iena tairuanona raite: “Mai, biena guiño. Bie llomenicodi omoi guillamona,

cue fiodaillana omoi comeci. Cue fiodaillemona omoi jeacinomona jilloit-
 omoi. Biena omoi guillamona cuena comeci. Bie llomenicodi cue abi facai
 ie. Cue llua isoi iena omoi finocabi” raite. Ie mei iena guitimaci. ²⁵ Ie
 mei jiroracomo jai totaca vino Jesús llinuanona, Jusiñamuimo iobillacinona
 fecade. Ie comecina facade: “Adán micori facaisemona cominina imaci
 jeacino facaina Jusiñamui duere finoñellena, toiniaina atiuidimaci, naimiemo
 fecallena”. Iemo ie comecina facajano, raite: “Cue fiodaillemona, dama cue
 diaillemona, Jusiñamuidi omoimo jiaie rafuena birui llote. Omoi jeacinona
 oni dotajana llote. Bie vinodi naie rafue facai ie. Cue llua isoi, bie vinona
 omoi jiruumona, cuena comeci. Mai, iena jiro” raite. Ie mei jirodimaci.
²⁶ Naga icaiño Cristo facaina llomeniconna omoi guia, Cristo facaina vinona
 omoi jiroia, omoi jeacino facaina cai Nama fiodaillana uifotomoi. Naimie nia
 abido dane bille dinori naiena comeci.

Cristo fiodailla rafuena raise comeciadicai

²⁷ Cristo fiodailla rafuena raise comeci. Naie llomeniconna Cristo rafuedo
 raise jaiacaiñedimie ebena guia, Cristo rafuedo raise jaiacaiñedimie naie
 vino ebena jiroia, iena jamaide. Naimie jeacinomona Cristo naimie jilluana
 naimie ñnoñena jira, Cristomo jeacinona finode. ²⁸ Jeacino omoi comeciaino
 illamo omoi comeciaina faca. Jeacino omoi comeciaino ia, iena guiño. Iena
 jiroño. Jeacino omoi comeciaino iñenia, iena guiño. Iena jiro. Jeacino
 ia, Jusiñamuimo iena llono. Jiaimie diga nicino ia, iena raise fino. Ie mei
 iena guiño. Iena jiro. ²⁹ Jeacino naimie comecimo nia illamona, iena guia,
 iena jiroia, marañede. Naimie jeacino facaina Cristo fiodailla jira, Cristo
 fiodaillana naimie jai jamaide. Ie muidona Jusiñamui naimiēna duere finoite.
³⁰ Ie muidona omoimona ailluena irareside. Ie jira omoimona damierie
 fiodaite. ³¹ Cai comeciaina raise cai facajamona, jeacinona cai fainonocai,
 Jusiñamui caina duere finoñeite. ³² Jusiñamui caina birui duere finoia, caina
 naimie ñbeimo raise illena itataiacade. Jesucristo abido bia, naimiēna
 ñnoñedinona duere finoite. Naimaci diga cai duere sefuiñellena, birui caina
 duere finode.

³³ Cue amatiai, Cristo fiodailla rafuena omoi comecillena omoi ofia, daa-
 caiño omoi guillesa, jiaino riñedinona seda. ³⁴ Bu eo aimetaia, jofomo nano
 guilla. Guillanona omoi ofillinomo bi. Dani coniniri raise omoi guiacaiñenia,
 Jusiñamui omoina duere fino raillano, jofomo guiño. Nana naie rafuena nia
 lloñedicue; iadedi omoi dine dane cue ia, iena lloiticue.

12

Cristo facaina raise majillena, Jusiñamui Joreño naga creyentena canode

¹ Cue amatiai, jiaie rafuena cuemo jai jicanotomoi. Iena ja ñaiticue.
 Jusiñamuimona diga uaina feiñoticaí. Naimiemona naimie facaina majia
 uaina feiñoticaí. Naimie facaina cai majillena, jiaie creyentiaina cai canol-
 lena, naimiemona cai oga uaina ñaiticue. Iena omoi raise uifuanuaiticue.

² Ero, Cristona nia omoi ñnoñenia, Jusiñamuiñedimiede jiraraina
 sedauidomoi. Iedo jaie tainodo jai-jaisoidomoi. Taife iedo omoina jifue. ³ Ie
 jira biena omoi raise uifuanuaiticue. Jusiñamui Joreño uaido nie creyente
 ñaia, Jesús Joreño jaere ñañeite. “Jesúdi Jusiñamui Jitoñede” raiñeite; iadedi
 Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús
 cue Nama” raite. Naie isoide creyentedi Jusiñamui ie. Naimiemo cacarei;
 iadedi iese raiñedinona cacareiño.

⁴ Jusiñamui Joreño caimo jai illa jira, Jusiñamui Joreñomona cai maijia uaina oticai. Naga creyente daje isoi oñedicai. ⁵ Naga creyente Cristo facaina daje isoide uai diga maijiñedicai; iadedi Cristo facaina nana maijidicai. ⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena. ⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticai. ⁸ Damierie creyentemo Cristo rafue jino lolle uaina itatate. Damierie creyentemo Cristo rafue llofuelle uaina itatate. ⁹ Damierie creyentemo Jusiñamui siño rafue finuana innotaja uaina itatate. Damierie creyentemo duidinona jillotaja uaina itatate. ¹⁰ Damierie creyentemo siño rafuena finua uaina itatate. Damierie creyentemo jino lolle uaina itatate. Naimacimo Jusiñamuidi ie rafuena llocabite, jainomo jino lollena. Dajerie creyentemo uaina itatate, nie isoide uaido Cristo rafuena railla lloraïma llua uaiñollena. Jusiñamui Joreño uaido nie lloraïma lloia, iena uaiñote. Taife uaido nie lloraïma lloia, iena jiai uaiñote. Damierie creyentemo naimaci uaiñote uaido ñaia uaina itatate. Damierie creyentemo naie uaiñote uai oni dobaiñolle uaina itatate, comini iena raise uaiñollena. Iena naimaci nia dobaiñollena, iena jiai raise uaiñollena. ¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicai

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai. ¹³ Dama Jusiñamui Joreñodi dajena Cristomo nana creyentiaidicai; iadedi dajena Cristomo duidicai. Dajerie judiaidicai; dajerie judiaidicai; dajerie patrón anamo iticai; dajerie patrón anamo iñedicai. Diga nairaiaidicai; iadedi dajena Jusiñamui Joreñona nana feiñoticai.

¹⁴ Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai. ¹⁵ Ero, cai abimona cai eilli nibai facaite: “Onolli isoñedicue. Onolli cue baiñemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baiñemo fañede. Dafaconi ite. ¹⁶ Ero, cai jefo nibai facaite: “Uisi isoñedicue. Uisi cue baiñemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baiñemo fañede. Ie isoide. Dajena Cristomo omoi duilla jira: “Jiaimie baiñemo iticue” rañeno. Jiaie creyentena abina uradoñeno. ¹⁷ Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticai? ¿Niese niadedi ra sorillana cacadicai? Ie isoide. Dajena Cristomo omoi duilla jira, naga creyentena jitaïdomoi, Cristomo dajena innotaja omoi jaillena. Jiaie creyentena uaitaño. ¹⁸ Jusiñamui cai abimo diga rana comutate. Naimie jitailla isoi, cai abimo naga rana comutate. ¹⁹ Cai abimo diga ra iñedena, ¿buedo cajenitica? ²⁰ Diga ra cai abimo ite; iadedi jaca dajede cai abi.

²¹ Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comei ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena innotaja jaillana jitaïdicai. Jiaie creyentemona abina iedoñeno. ²² Naga cai abimo ite rana jitaïdicai, raise cai illena. Naga cai abimo ite ra jiaie ra baiñemo iñede. Nana daje isoi itena, mare; ²³ iadedi dajerie ra ebire eruallena, cai abi jifollena, iniroina jitaïdicai. Meiruiñellena, cai abi

bainillena, iniroina jiaí jítadicaí. ²⁴ Cai uiecomo meiredino iñena jira, iena jifoñedicaí. Ero, Jusiñamui cai abina finode. Dajerie ra jiaie ra baifemo iñede. ²⁵ Jusiñamuidi naga cai abimo ite ra dajena maijiana itatate. Dajena maijicana jaiđe. ²⁶ Cai abimona daje ra isireniadedi, nana cai abi daacaíño isirede; iadedi cai abi caimare marena ia, nana iobidicaí. Ie isoide. Cristomo dajena duidicaí. Jiaie creyente duere sefua, naimiena cai canoia, Cristo dibeimo caimare marena iticaí. Naimiena cai canoñenia, caimare marena iñedicaí.

²⁷ Ero, caidi naimie cominina jira, Cristomo dajena nagasaiaí duidicaí. ²⁸ Ie jira Jusiñamuidi naimiena inotinomona damieriena nano fetuanona, Cristo naimacina oretate, ie rafuena llollena. Ie mei jiaínona fetode, naimacimo ie rafuena llua mei, jiaínomo ie rafuena jino llollena. Jiaínona fetode, ie rafuena llofuellena, cominina ie rafuena raise uíñotallena. Jiaíno ie uaina itatate, naimie facaina naimaci maijillena, jiaie creyentiaína naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uíñoñega uaido ñaia uaina itatate. Iese omoína fetode, naimie facaina dajena nana omoi maijillena. ²⁹ Ero, Jusiñamui nana omoína fetofede, ie rafuena jino llollena. Damieriena fetode. Nana omoína fetofede, ie rafuena llofuellena. Damieriena fetode. Nana omoína fetofede, siño rafuena finollena. Damieriena fetode. ³⁰ Nana omoína fetofede, duidinona jilloitallena. Damieriena fetode. Nana omoína fetofede, omoi uíñoñega uaido ñaillena. Damieriena fetode. Nana omoína fetofede, naie uíñoñega uai jino dobaiñollena. Damieriena fetode. ³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoímo illena, Jusiñamuimo jica; iadedi jiaie rafuena omoi ollena, omoímo lloiticue. Nana jiaie rafue baifemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uíñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuenta ñaiticaí. ² Jusiñamui rafue jino lolle uaina caimo ia, nana Jusiñamui caina uíñotaga rafuena cai uíñoia, nana Jusiñamuimo ite rafuena cai uíñoia, Jusiñamui siño rafuena finuana cai eo inoia, cominina cai isiruiñenia, Jusiñamuimona jamai bue isoidicaí. ³ Jiaie cominina cai canollena nana caimo ite rana cai fecaia, Cristo rafuena cai llollena cai niadi fiodaiacania, cominina cai isiruiñenia, jaca buena ofedicaí. Jusiñamuina jaca iobitañedicaí.

⁴ Cominina cai isiruia, naimaci diga raire iciriñedicaí. Naimacina canocabidicaí. Naimaciri abina uradoñedicaí. Abina birioicaiñedicaí.

⁵ Cominina cai isiruia, abina iedoñedicaí. Naimacimo cai comeciaina facacabidicaí. Cai rana caidicabiñedicaí. Naimaci diga iciricabiñedicaí. Naimaci caina jeare finoia, ibana ocabiñedicaí. ⁶ Cominina cai isiruia, naimaci jeare finoca rari iobicabiñedicaí. Naimaci uanai mare finoca rari iobicabidicaí.

⁷ Cominina cai isiruia, naimaci caina duere finoia, ibana ocabiñedicaí. Cai joreña bu ñaia, caina taino lloia, iena inocabiñedicaí. Cai marena illamo ocuiridicaí. Cai comeciaina ocuiñocana jaidicaí.

⁸ Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uíñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina

jaca itatañeite; iadedi nai uai ico saite. ⁹ Nana Jusiñamui caina uiñotagacinona nia raise cacaiñedicaí. Nana Jusiñamui rafuena nia raise jino lloñedicaí; ¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticaí. Naimiemo ite rafuena jiai raise uiñoiticaí.

¹¹ Jiaie rafuedo iena llofueticue. Jaiie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fainonocadicue. Eimie comecina facajacinodo birui jaidicue. Urue isoi Jusiñamui rafuena birui janore uiñoiticaí; iadedi monamo cai ia, eimie isoi iena raise uiñoiticaí. ¹² Ero, jacaie acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiai raise uiñoiticue. ¹³ Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina ñnoticaí. Naimie llogacino suillemo jai ocuiridicaí. Jusiñamuina cai isiruillamona, jiaie cominina jiai isiruicaí. Naie isiruillacino jiacino baifemo faite. Ie jira coninina isiruicana omoi jai.

14

Omoi uiñoñega uaido omoi ñaia rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido. ² Ero, omoi uiñoñega uaido ñaia uaina omoi ñaicabia, jaca buna omoína cacaiñena jira, cominina canollena ñañedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciainomona ñaitomoi. ³ Jusiñamui rafuena jino omoi lloia, cominina canodomoi. Naimacina Jusiñamuina ñnotadomoi. Naimie dibeimo raise itatatomoi. Naimaci comeciaina ocuiñotadomoi. ⁴ Nana creyentiaína canodomoi; iadedi naie uiñoñega uaido omoi ñaia, daní omoi comeciaina canodomoi.

⁵ Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiaí iena raise cacareillena, iena omoi oni dobaññoia, cuemona jiai mare. Ie mei naie ñaiamona, Jusiñamui rafuena naimaci cacajamona, creyentiaína canodomoi. ⁶ Cue amatiaí omoi dine cue jaicanana uiñotomoi. Omoi dine cue ria, cue uiñoñega uaido cue ñaiticuedena, omoína canoñedicue; iadedi Jusiñamui cuemo jai lloga rafuena omoimo cue lloticuedena, omoína canodicue. Jusiñamui rafuena raise cue jai uiñua jira, omoína cue llofueticuedena, omoína jiai canodicue.

⁷ Ero, quena jamai tainuaido bu fia, ie figana uiñoñedicaí. Guitarra bu jamai tainuaido taia, ie taillana uiñoñedicaí. ⁸ Ejércitomo trompetana jamai tainuaido fia, soldaduai majillena raise uiñoñedimaci. ⁹ Ie isoide. Cai cacaiñena uaido omoi ñaia, omoi ñaiana uiñoñedicaí. Iese omoi ñaia, jamai tainona ñaite isoi cacadicaí. ¹⁰ Eo ailluena nairaii ite. Naga nairai ie uai ite daní naimaci ñaillena; ¹¹ iadedi nie nairai ie uaina cue uiñoñenia, naimacimona jiaie nairai imiena eruaidicue. Cuemona naimaci jiaie nairaina eruaidimaci. Conini diga ñaiana cacaiñedicaí. ¹² Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica,

dani conini Cristo rafuena inocana omoi jaillena. Jusiñamui Joreño mona dani daje uaina nicidoñeno; iadedi nana nicido.

13 Ie jira ie uiñoñega uaido bu ñaia, ie oni dobañiua uaina naimiemo illena, jiaie creyentiaie iena cacaillena, Jusiñamuimo jicaja. 14 Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue. 15 Ie jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jiaie ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiaie roiticue. 16 Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omoina cacaiñedino: “Jee” raitimaci? 17 Iobillacinona Jusiñamuimo raise fecadomoi; iadedi omoina cacaiñedinona Jusiñamuina uiñotañedomoi. Ie jira omoi uiñoñega ñaia uaina oni dobañotimie omoi roracomo iñenia, naie uaido ñaiñeno. 18 Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; 19 iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona marañede.

20 Cue amatiaie, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca. 21 Jusiñamui facaina lloraima micorai jiaie cueba: “Jusiñamui llote: ‘Cue comini dine jiaie nairaina cue oretajamona, cue cominina cuena inotallena, naie jiaie nairai uaido cue cominimo lloiticue; iadedi iena jitaiñeitimaci. Cuena jaca uiñoñeitimaci’ llote”. 22 Ie isoido. Uiñoñega uaido omoi ñaiamona, Cristona inoñedino iena raise cacaiñedimaci; iadedi Cristona inotino iena cacadimaci. Iemona fueotimaci. Jusiñamui rafuena omoi llofuiamona, Cristona inoñedino iena cacajamona, Cristona inoñedimaci; iadedi Cristona inotinona canodomoi. 23 Danomo nana omoi ofia, omoi uiñoñega uaido nana omoi ñaia, Cristona inoñedino iena cacajanona, omoina; “Uairico” raitimaci; 24 iadedi omoi ofia, Jusiñamui rafuena omoi jino lloia, iena Cristona inoñedimie cacajamona, naimiedi jeacino naimie comecimo illana uiñoite. Naie rafue naimiemo riire baite. 25 Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina inoite. Ie muidona raite: “Uanai, Jusiñamui omoi motomo ite”.

Roracomo omoi ia, raise marena omoi i

26 Cue amatiaie, rollena omoi oficabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobañiñote. Cristo dibemo creyentiaina raise itatallena, nana omoi finua rafuena raise fino. 27 Uiñoñega uaido bu ñaia, damie amani naiedo ñaite. Damierie ñaite. Jiaimie ñaillie ifomo jiaimie ñaite. Ie mei damie naie ñaiana oni dobañiñote. 28 Naie ñaiana oni dobañiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. 29 Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie lluacino billana uiñuanona llua. 30 Jusiñamui rafuena bu nia lloia, naimie ecimo jiaimierna rafuena Jusiñamui Joreño llotataia, nano llotimie riire llucailla. Iemei jiaimie lloite. 31 Iese damierie nana llotomoi, naie lluamona Jusiñamui rafuena raise omoi uiñollena, omoi

comeciai jiaie ocuifollena. ³² Naga llotimiedi ie uifua diese llua uifote. Ie jira jiaimie nia lloia, iena cacarei. Iemei jiaimie llua. ³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucacino omoi jai.

³⁴⁻³⁵ Jiaie creyentiaimmo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jiaie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, marañede, nainomo ite jino lloraima uaina naiñaiñuai raise cacaiñena jira.

³⁶ ¿Niese cue llucacino jaiacaiñedomoi? Jusiñamui rafue omoi mona comiñede. Dani omoi mo naie rafue duiñede; iadedi nana creyentiaimmo duide. Dani omoi mo Jusiñamui ie rafuena lloñede. Nana creyentiaimmo iena llote. ³⁷ “Rafuena Jusiñamui cuemo llote” omoi mona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoi mo cueticue” naimiedi uifote; ³⁸ iadedi naimie iese uifoenia, Jusiñamui Joreñomona naimie uai iñenana uifoticaia.

³⁹ Cue amatiaia, Jusiñamui omoi mo ie rafuena llua uaina naimiemo jica; iadedi naimaci uifonega uaido jiaie creyentiaia ñaia, iena rairuiñeno. ⁴⁰ Omoi ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amatiaia, iena omoi feitañellena, bie rafuena dane lloiticue. Cristo ie mare rafuena omoi na navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena inocana jaidomoi. ² Naiena omoi inuamona, Jusiñamui omoi jecacino omoi na jillotate. Naiedo nia omoi jiaia, iena raise omoi inoia, jai jillobidomoi.

³ Nanoca rafuena omoi na llofueticue. Jiaie creyentiaimona biena jai cacadicue. Jusiñamui facaina lloraini micoriaia jiaie cuégafuiaia isoi cai jecacino facaina Cristodi fiodaite. ⁴ Raiafomo naimiedi jonega. Darui amani illanona naiemona Jusiñamuidi naimiema jillotate, Jusiñamui facaina lloraini micoriaia jiaie llua isoi. ⁵ Te mei Pedro naimiema ciode. Te mei ie once llofueoicagano naimiema ciodicaci. ⁶ Te mei quinientos naimiema inotino naimiema daruido ciodicaci. Naimacimona damierie jai fiodaitimaci; iadedi ailluena nia fiodañedimaci. Cristo jilluana uifotimaci. ⁷ Te mei Jacobo naimiema ciode. Te mei nana ie oretagano naimiema ciodicaci.

⁸ Te mei naimiema jiaie ciodicue. Te jira fiodaillamona naimie jilluana uifoticaia. Te doce llofueoicagano fetua mei, diga años illanona, naimiema nia cue uifoneña facaise cuena fetode. Te mei ie rafuena cue lloiena, cuena oretate. ⁹ Ailluena creyentiaina jiaie cue duere finua jira, nana jiaie Cristo oretagano cue baifemo faitimaci. Jamaia bue isoidicue; iadedi Cristo cuena fetode. ¹⁰ Jusiñamui cuena duenaillamona, Cristo oretagamiena jaidicue. Jusiñamui cuena jamaia tainomo duenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue. ¹¹ Jiaie oretagano Cristo rafuena llofueia, iena cue llofueia, daje isoide rafuena llocana jaidicaia. Naie rafuena omoi cacajamona, iena inotomoi.

Fiodaillamona nana creyentiaí ico jilloitímaci

¹² Fiodaillamona Jusiñamui Cristona jillotajana llofuecabiticai; iadedi omoimona dajerie raitomoi: “Fiodaillamona, nana comini imaci abiai diga ico jilloñeitímaci”. ¹³ Ero, omoi llua isoi fiodaillamona comini ico jilloñedena, ie isoi Cristo jiaí nia raiafomo ite. Niade jilloñede. ¹⁴ Cristo jilloñenia, Cristo rafuena jai tainona lloticai. Naie rafuena jiaí tainona ñnotomoi. ¹⁵ Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiaína ico Jusiñamui jillotañenia, Cristona jiaí niade jillotañede. Jusiñamui rafuena tainona jai llofueticai. ¹⁶ Fiodaillamona nana creyentiaí ico jilloñenia, Cristo jiaí jaie jilloñede. ¹⁷ Cristo nia jilloñenia, naimiena tainona ñnotomoi. Jusiñamui omoi jeacinona niadedi oni dotañede. ¹⁸ Cristona ñnuanona jai fiodaítinodi jiaí jai faifidímaci. Jusiñamui illanomo jaca iñeitímaci; iadedi iraimo jaca iitímaci. ¹⁹ Nana cai ille ñinori ñani Cristo caína jilloitallemo cai ocuiria; iadedi naimie jilloñenia, jai duere iticai. Jai tainomo ocuiridicai.

²⁰ Ero, tainomo ocuiridicai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaítino jai itímaci; iadedi Cristo jai jillode. Ie jira nana jai fiodaite creyentiaí jiaí jilloitímaci. ²¹ Adán micorí jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiaí jaidicai; iadedi fiodaillamona Cristo jai jillua jira, fiodaillamona ico jiaí jilloitícaci. ²² Adán micorimona cai comuilla jira, nana fiodaicana jaidicai; iadedi Cristomo cai duilla jira, jilloitícaci, naimie diga jaca cai illena. ²³ Cristo jai jillode. Cai fiodailla mei, naimiemo cai duilla jira, ico ñane abido naimie bille faicase jilloitícaci. ²⁴⁻²⁵ Ie mei naimie ñinena nana naimie ñibeimo iñedinona anafefitaite. Nana naimie ñibeimo iñede joreñuaina jiaí anafefitaite. Ilaímana Cristo illamona, nana naimie ñibeimo iñedinona anafefitaite. “O uai cuemo o illamona, nana o jitailla rafuena jai fuidodicue” ie Moomo lloite. ²⁶ Nana naimie ñibeimo iñedinona naimie anamo jai illa mei, Cristo muidona naimie comini jai jilluamona ñane fiodaíñeitímaci. ²⁷ Jusiñamuidi nana cominina Cristo anamo itataite. Ie muidona creyentiaídicai ñane fiodaíñeitícaci; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede. ²⁸ Naga ra Cristo anamo illa mei, ie maíjia fuilla mei, Jusiñamui ie Moona jira, Jusiñamui anamo Cristo jiaí iite. Jusiñamui nanocaimena jira, nana naimie finoca ra naimie anamo iite. Nana comini naimie anamo iitímaci.

²⁹ Cristo jilloñedena, fiodaillamona jilloñeitomoidena, ¿ñiese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese ñnoñedomoi. Dajerie creyentiaí marena illamona, omoimona dajerie creyentiaína jaidomoi. Naimaci jai fiodaítímaci; iadedi fiodaillamona ico jilluana ñnotímaci. Iena omoi ñnuanona, bautizagaomoi. ³⁰ Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fiodaicabitícue? ³¹ Cue amatiaí, cai Nama Jesucristomo omoi duilla jira, omoi iobidícue; iadedi nagarui niadedi fiodaicabitícue. Cristo rafuena omoimo cue llocabilla jira, jaie comini iciritímaci. Icirillamona, cuena meineiacadímaci. ³² Efeso railla nairaimo birui cue illamona, diga comini cue lloga uaina eo uaitaside. Duere sefudicue. Cristo jilloñenia, cue llamona jaca buena oñeitícue. Ie muidona fiodaillamona cai jaca jilloñeitícaidena, Cristo rafuena fañonocaida, ico raire jamai cai fiodailla jira, jamai ua jai jaicaillafuena cai jaiacaiticai. Ie ia iese iñede. Cristo jai jillode.

³³ Ie jira omoi abiaina jifueñeno. “Jilloñeiticaí” railla comini diga omoi nabairía, naimaci llogacinodo jiai jaitomoi. Ie muidona naimaci diga nabairiñeno. ³⁴ Ie jira raise abina uññuanona, mai jai. Jeacinona finocana jaiñeno. Omoi mona dajerie Jusiñamuina raise uññoñena jira: “Jusiñamuidi cominina jillotañeite” raitimaci. Omoi meidaillena, omoi iese lloticue. Jusiñamui rafuedo raise mai omoi jai.

¿Niese creyentiaí jilloitimaci?

³⁵ Omoi mona damie nibai jicanoite: “¿Niese fiodaillamona creyentiaidicaí jilloiticaí? Naimaci abiaí nibai jai rifaidimaci. ¿Nie isoide abiaí diga dane iiticaí?” ³⁶ Iese bu jicanoia, raise comecina facañede. O illimo buena o ria, janore sicua meinoconi, o riga radi jai abidi rifaide. ³⁷ Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaífo eruaide. O riga rana eruaíñede. ³⁸ Naga riará daje isoi eruaíñede. Jusiñamui jitailla isoi, jiaíforie eruaide. Ie isoide. Naga fiodaítimie jillua mei, Jusiñamui jitailla isoi, ie abina jiaíforie itataite. ³⁹ Diga isoide caí abiaína Jusiñamui jai comuitate. Naga abí isoide ite. Caí maijillena, comini abí ite. Eniruedo macarillena, ocaina abí ite. Fellena, sillí abí ite. Jinuimo illena, lliciaí abí ite. Ua diga isoide abí ite. Jusiñamuidi caí jiaíforie eruaite abiaína finorede. ⁴⁰ Jusiñamui dine ico caí ia, caí abiaí iite, nainomo caí illena. Bene caí abiaí jiaí ite, bene caí illena. Monamo caí ia, ebireniticaí. Bene caí ia, jiaí ebire iticaí; iadedi daje isoi ebire iñedicai. ⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuaí isoi lligaiñoñede. Naga ucuaí daje isoi lligaiñoñede. Monamo caí ico illena, naimie jitailla diese caí abiaí caimo iite. ⁴² Ie isoide. Fiodaillamona caí jillua mei, caí abiaí jiaífo eruaite. Caí fiodaillamona caí abiaí rifaide; iadedi caí jilluamona, caí abiaí dane jai rifaiñeite. ⁴³ Caí fiodaillamona caí abiaí jai ebinide; iadedi caí jilluamona, caí abiaí ebirenite. Fiodaicana caí jailla jira, caí abiaí birui raise mairiñede; iadedi ico caí jilluamona, caí abiaí mairite. Nana Jusiñamui jitailla rafuena finoreniticaí. ⁴⁴ Caí fiodaia, come abiaí isoi caimo birui ite; iadedi caí jilluamona monamo ico caimo caí abiaí jiaí iite. Enirue iena caí abiaí birui caimo ite. Ie jira monamo caí jiaífo eruaite abiaí caimo iite.

⁴⁵ Adán micori comuilla rafuena Moisés micori jaie cuela: “Jusiñamuidi nano comuidimie dofomo jafaicina firaiñuamona, naimie micori comena jaide” cuela. Naimiemona caí comuilla jira, fiodaíticaí. Fiodaillamona Cristo jillua jira, ico caí jiaí jilloille jira, caina jiaífo eruaite abiaína ico itataite. ⁴⁶ Eniruemo birui caí illa jira, caimo birui ite abiaí diga iticaí. Fiodaillamona ico caí jillua mei, monamo caí ia, jiaífo eruaite abiaí diga iiticaí. ⁴⁷ Adán micoridi enirue ie. Imuicimona Jusiñamuidi naimiena finode. Cristodi eniruemo billanona, iimana jaide; iadedi Jusiñamui dinena monamona naimie bite. ⁴⁸ Imuicimona Adán micori finua jira, naimie fiodailla mei, dane imuicina jaide. Naimiemona caí comuilla jira, caí fiodaia, jiaí imuicina jaiticaí; iadedi Cristomo jiaí duidicaí. Caí jillua mei, naimie isoi ico iiticaí. ⁴⁹ Adán micorimona caí comuilla jira, naimiena eruaidicaí. Eniruemo Cristo jaie ia, naimie abí ite. Fiodaillamona naimie jillua mei, naimiemo jiaífo eruaite abí naimiemo ite. Caí jillua mei, Cristona eruaíticaí.

⁵⁰ Cue amatiaí, biena lloticue. Caimo jai ite abiaí diga monamo Jusiñamui ie cominina sedajanomo iñeiticaí. Caí abiaí rifailla jira, caí fiodailla facaise naie isoide abiaí diga nainomo jaca iñeiticaí. ⁵¹ Ero, Jusiñamui cuena uññotaga

rafuena omoimo ja lloiticue. Iena navui jaca uiñoñedicaí. Nana creyentiaídicaí fiodaiñeíticaí; iadedi Jusiñamui caí abiaína jiaífo meidotaíte. ⁵² Omoí uisi jarire cuirorilla isoi, iena ua raíre meidotaíte. Ie trompeta fillanona, jai fiodaíte creyentiaína Jusiñamuidi jillotajanona, naimaci abiaína meidotaíte. Nia fiodaiñedinodicaí caí abiaína jiaí meidotaíte. Dane fiodaiñeíticaí. ⁵³ Caí abiaí birui rifaíacade. Ie jira birui fiodaicana jaidicaí. Jusiñamuidi caí abiaína íco meidoíte. Íco monamo jiaífo abiaí caímo ía, caí abiaí rifaíñeíte. Fiodaiñeíticaí. ⁵⁴ Iese caímo sua, Jusiñamui facaina lloraima micorí jaie cueda uai jiaí suite. Cueda: “Nairuimona creyentiaí jaca fiodaiñeítimaci”. ⁵⁵ Caí jaca illa jira, fiodaicana jaiñeíticaí. Fiodaillana jacruíñeíticaí, dane caí fiodaiñeíticaina jira. ⁵⁶ Jeacino illa jira, birui fiodaicana jaidicaí. Moisés micorí jaie llogacino illa jira, iena caí raise finonina jira, jeacino caímo illana uiñoticaí; ⁵⁷ iadedi caí jeacino facaina caí Nama Jesucristo fiodailla jira, jeacino anamo jai ñedicaí. Caí fiodailla mei, dane fiodaiñeíticaí. Jusiñamui caína íemona jai jillotate. Ie muidona naimieri caí íobillasa.

⁵⁸ Cue amatiaí, fiodaillamona nana creyentiaí íco jillua jira, Cristo rafuena ñinocana jai. Naganomo ñeño; iadedi Cristo rafuena llocana omoí jai. Naimie jitaila rafuena finocana omoí jai. Naimie facaina omoí maijia, tainona maijñedomoí. Naiemona diga mare rafue comuite. Iena jai uiñotomoí.

16

Jerusalémo itinomo ucubena oredimaci

¹ Jiaíe rafuena cuemo jicanotomoí. Jerusalémo íte creyentiaímo ucubena oretaiacadomoí. Galaciamo íte creyentiaímo cue llua isoi, omoimo lloiticue. ² Naga domingo omoí ucubemona daje diese eneno oní eeno. Omoí maijia bailla diese ucubemona cue bille ñinorí iena eeno. Iese naga domingo omoí eenoña, íco cue bia, ¿ñiese dacaíño ofrendamo ailluena ucubena joneítomoí? ³ Omoí ñine cue rilla mei, omoí eenoga ucubena uillena, Jerusalémo íte creyentiaímo omoí fetocanona oretaiticue. Cartana jiaí oretaiticue, omoí fetocano mareuidinona Jerusalémo itino uiñollena. ⁴ Jerusalémo cue comeci jiaí jaíacania, cue diga jaitimaci.

Pablo jai macariacade

⁵ Macedonia railla eníruemo nano jaiticue. Creyentiaína cioillena, dajerie nairaímo jaiticue. Ie mei omoí ñine jaiticue. ⁶ Diga irui omoí diga ñibaí íiticue. Nana rollime facaise omoí diga ñibaí íiticue. Nibaí daje amani fivui íiticue. Ie mei cuena omoí canollemona oní jaiticue. Omoí ñinomona cue jaía, cue jaíllinona nia uiñoñedicue. ⁷ Omoí ñine birui nia jaiñeíticue. Omoí ñine birui cue jaía, dallu omoí diga íiticue; iadedi jiaíruido omoí ñine cue jaía, caí Nama jitaía, omoí diga are íiticue. ⁸ Beno Efesomo nia íiticue. ⁹ Beno diga comini Cristo rafuena cacaadimaci. Naimacimo iena llofueiacadicue. Diga comini cue llua uaitatimaci. Cue llua jitaíñedimaci Ie jira bene nia lloiacadicue. Pentecostés railla rafue fülle mei, jaiticue.

¹⁰ Omoí ñine Timoteo ría, naimiena raise marena nafue. Cue isoi caí Nama facaina naimie maijicabide. ¹¹ Ie muidona naimie lluacínona jamaíñeno. Omoimona naimie jaíacania, cue ñine abido naimie raise rillena, naimiena raise cano. Naimie jaíacania, naimie caímare caímaduano oreta. Jiaíe creyentiaí diga naimie billemo ocuiridicue.

¹² Apolona jicantotomoi. Jiaie creyentiaí diga omoi dine naimie jaillana naimiemo lloticue; iadedi naimie comeci nia jaiacaiñede. Jiairuido abi juarenia, omoi dine jaite.

Fuiduacino

¹³ Jeacinomona abina rairui. Cristo rafuena inocana omoi jai. Eimie isoi omoi comeciaina ocuiño. ¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amatiaí, Acaya railla eniruemo Estéfanadi, ie comini diga, nano creyentiaídimaci. Iena uiñotomoi. Naimaci jitailla jira, jiaie creyentiaína canocabidimaci. ¹⁶ Naie isoidino lloga uaina cacarei. Naga Cristo díbeimo maijidino uaina cacarei. Iedo omoi jai. ¹⁷ Omoimona cue dine Estéfanas bite. Fortunato diga, Acaico diga naimie billa jira, iobidicue. Cue dine iñedomoi; iadedi naimaci billa jira, omoi isoi cuena canodimaci. ¹⁸ Naimaci billamona cue comeci caimataide. Omoi comeciái jiaí caimataide. Naie isoidinomo: “Marena maijidomoi” omoi railla.

¹⁹ Diga creyentiaí Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiaí orediaímaiaí. Iaimaiaí jofomo dajerie creyentiaí rocabitimaci. Cristomo naimaci duilla jira, omoína isiruillanona, nana naie creyentiaí imaci uaina jiaí oredimaci. ²⁰ Nana bene ite creyentiaí imaci uaina oredimaci. Nana creyentiaína eo caimare uaido.

²¹ Omoimo cue uaina jiaí oredicue. Cuena canollena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena ñno. Pablidicue.

²² Omoimona Cristona bu isiruñenia, Jusiñamui naimiena duere finollesa. Cai Nama abido dane billesa.

²³ Cai Nama Jesús omoína duenailasa. ²⁴ Jesucristomo cai duilla jira, omoína cue isiruillana omoi uiñuana jitaídicue. Mai. Macaibaite.

CORINTOMO ITE CRISTONA HNOTINOMO IE EMODOMO PABLO ORETAGA RABE

Corintomo ite creyentiaimo Pablo cartana orede

¹ ¿Nigacino? ¿Nie isoidomo? Pablocue. Corintomo ite creyentiai, omoi dine bie carta oredicue. Nana Acaya railla eniruemo ite creyentiaimo bie carta jiai oredicue. Jusiñamui jitailla jira, ie rafuena cue jino lollena, Jesucristo oretagamiedicue. Cue diga Timoteo illa jira, naimie ie uaina omoi dine jiai orede. ² Cai Moo Jusiñamui, cai Nama Jesucristo diga, omoina duenaite. Iena uiñocana mai omoi jai. Iaimaiai omoina uri jai itatate. Iena omoi uiñocana mai omoi jai.

Pablo ie duere sefuilla rafuena cuete

³ Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade. ⁴ Nie isoide rafuemona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiaisona canoredicue. Nie isoide rafuemona naimaci duere sefuia, nie isoide ramo naimaci jiria, Jusiñamui caina ocuiñotaja isoi, naimaci comeciaina ocuiñotaredicue. ⁵ Cristomo jai cue duilla jira, naimie isoi cue duere sefuia, naimie cue comecina ocuiñotade. Iemona jiaino comecina ocuiñotajana raise uiñoticue. ⁶ Duere cue sefuillamona, omoina canoredicue. Jusiñamui jitaillacino omoi finocana jaillana jitaidicue. Cuen a naimie ocuiñotajamona, Cristona omoi faimonocaiñellena, cue isoi omoi duere sefuia, omoina ocuiñotaredicue. ⁷ Cue isoi omoi duere sefuia, cue isoi Cristo omoi comeciaina ocuiñotaite. Iena raise uiñoticue.

⁸ Cristomo cai duillamona, cue amatai isoi itomoi. Asia railla eniruemo jaie eo duere sefuicue. Iena omoi raise uiñollena, ie rafuena dane omoimo lloiacadicue. Eo duere cue sefuilla jira, cue comeci niadedi ocuiñofedicue. Niadedi fiodaiticue. ⁹ “Naie facaise fiodaiticue” raillanomo cue comecina facadicue. Cue finoca rafuemona dama jillonidicue; ia Jusiñamui uai siñona jira, naimie cuena jillotate. Fiodaitinona naimie jillotarede. Niadedi fiodaitinona jiai jillotarede. Naimiedi naimie cuena jillotajana cue inuana jitaide. ¹⁰ Naie facaise eo duere sefuillamona cuena jillotate. Ico cue duere sefuia, iemona dane cue jilloillena inoticue. ¹¹ Iena cue facaina omoi jicabi. Jusiñamui fairiua meinomo, ailluena comini cue facaina Jusiñamuimo iobillacinona fecaitimaci. Cuen a Jusiñamui canua jira, iobillacinona fecaitimaci.

Pablo Corintomo navui jaiñede

¹² Cuen a gaiñedino cuena nibai jeare ñaitimaci; ia daje rafueri abina iedoticue. Cue comecinona iena uiñoticue. Cristona inofedinona marena finodicue. Omoina marena finodicue. Jusiñamui jitaillacino finocana jaidicue. Jusiñamuimona jeacinona finoñecana jaidicue. Cue comecina facajacinomona iese jaiñedicue; ia Jusiñamui cuena canuamona, iese jaidicue.

¹³ “Iese cuetio; iadedi o comecimo jiaie rafue ite diga caimo cuetio” raitomoi. Omoina jifueiacaiñedicue. Cue cuela cartaina jai facadomoi. Cue cuela rafue omoi raise cacajana jitaidicue. ¹⁴ Cuen a nia eo raise uiñofedomoi; ia cuena uiñocana omoi jaillanona, cueri omoi iobillana jitaidicue. Cai Nama Jesús abido bia, omoiri cue iobilla isoi, cueri omoi iobillana jitaidicue.

15 Omoimo iese cue comecina facajamona, omoi dine navui jaiacaducue. Macedoniammo cue jaiacaducue, raise omoima cue iobitallena, omoi dine nano navui jaiacaducue. 16 Macedoniamona cue abido bia, omoi dine navui dane jaiacaducue. Judeamo cue diga jaillena, omoimona damieriena omoi oretajana jitaiducue. Iese cue jaillemo navui comecina facaducue. 17 Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci. 18 Iese iñeducue. Jusiñamui uanaicinona jaca llua isoi, cue comeci naganomo iñede. Omoimo cue lloga uai finoducue. 19 Jusiñamui Jito Jesucristo rafuena omoimo navui llotucue. Cristo ie llogacinona jaca meidoñede. Silvano iena jiai llofue. Timoteo iena jiai llofue. Nagarui daje isoide rafuena llofueticai. Jaiiruido jiaie Cristo rafuena llofueñedica. 20 Nana Jusiñamui jai lloga uai Cristo finoca rafuemonna suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai. 21 Jusiñamui Cristo dibeimo caina jai itatate. Ie rafuena cai lloiena, caina jai fetode. 22 Ie cominina caina itatate. Iena cai uiñollena, ie Joreño caimo jai itatate. 23 Jusiñamuidi cue uanaicinona llua uaiñote. Uanaicinona cue lloñena, Jusiñamui cuena duere finuana jitaiducue. Omoi finoca rafue jai cue uiñuamona, omoimo cue riire lloi raillano, omoi dine navui dane jaiñeducue. 24 Cristona jai omoi inuana uaiñotucue. Cristona inocana omoi jailla jira, omoi finolle rafuena lloñeducue; ia omoi iocire illana jitaiducue.

2

1 Omoi dine nia cue jaiñellemo comecina facaducue. Omoi dine navui cue ia, iocire coniniri iñedica. 2 Omoima jai iciducue. Cueri omoi iobillana jitaiducue; ia omoima cue dane icia, coniniri iocire iñeticai. 3 Omoimo cartana navui oreducue. Omoi dine ite rafuena raise finollena, iena oreducue. Cuen a iobitajana uaiñotomoi. Omoi dine ite rafuena omoi raise finoia, coniniri iocire iitica. “Cuen a iobitaitomoi” raillanomo cue comecina facaducue. 4 Cue comeci eo sunaillamona, cue comeci eo eiamona, carta navui oreducue. Omoima iciaicaiñeducue; ia omoima cue eo isiruillana omoi uiñuana jitaiducue. Ie jira omoi dine ite rafuena raise fino.

Maraiñede rafuena finodimie rafuena feita

5 Maraiñede rafue navui damie finua jira, sunaiticai. Naimie muidona cue comecido duere jaide; ia daje isoi omoi comeci jiai duere jaide. 6 Omoi nabei dine ite cominimona naimie jai duere sefuilla jira, dama iesede. Naimiena dane duere finoñeno; 7 ia naimie finoca rafuena mai feita. Iena dane linoñeno. Naimie comecina ocuiñota. Naimiena iese omoi canoñena, omoimona duere sefuillamona, abido danomo jaitate. 8 Ie jira: “Ona nia isiruiticai” naimiemo llono. Iena eo jitaiducue. 9 Nana cue llua omoi inuana cue facacillena, carta omoi dine navui cueticue. 10 Naimie finoca rafuena omoi feitaia, iena cue jiai faitaitucue. Cristo rafuena omoi inocana jaillana cue jitailla jira, naimie rafuena faitaitucue. Cristo cuena uiñuamona, iena faitaitucue. 11 Taiñe ramo cai faiana uaiñotica. Cristo rafuedo cai raise jaiñellena, naimie jitaillana uaiñotica. Cristo dibeimona caina Taiñe itatañena, omoi motomo itimie finoca rafuena faitaitica.

Troamo navui Pablo ia, uri iñede

12 Troamo navui jaiducue. Cristo rafuena cue lloiena jaiducue. Cai Nama comini comeciaina jetajamona, naimie dibeimo cue maijiamona, ie rafuena

llocicue. ¹³ Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiaina facaduanona, Macedoniamo jaidicue.

Jusiñamuidi Cristo dibeimo iñedinona anafesitaite

¹⁴ Jusiñamui fue eo mare. Cristo dibeimo iñedinona naimie anafesitanona, Cristo cominina cai illamona, naimie rafuena uicana jaidicai. Ie rafuena cai lloia, iena comini ñnoia, Jusiñamui naimacina jai caimare itatate. ¹⁵ Cristomo cai duillamona, ie rafuena cai lloia, Jusiñamuina iobitadicai. Cai llumona, damierie jillodimaci. Iena jitaiñenamona, damierie faifidimaci. ¹⁶ Iena cacajamona, damierie faificana jaidimaci. Jusiñamui illanomo jaca iñeitimaci. Iena cacajamona, jiaino Jusiñamui illanomo jaca iitimaci. Jamai bue isoidicue; ia bie rafue llocana jaidicue. ¹⁷ Damierie Jusiñamui rafuena llumona, ucubena oiacadimaci. Omoimo comecina facañedimaci; ia iese llofueñedicue. Omoimo cue comecina facajanona, bie rafue cue llumona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicinona jaca llocicue.

3

Cristo caimo lloga rafuedo birui jaidicai

¹ Omoï dine damierie llofueraini jaia, cartaiaina uicabitimaci. Naimaci cartaiaimo jiaïnodi: “Bie llofueraini mare” raillanona cuetimaci. Omoïmona jiaïno cuela cartaiaina: “Bie comini mare” raillana jitaiñedicue. Cuemona jiaïno cuela cartaiaina: “Pablo mare” raillana jiaï jitaiñedomoi. ² Omoï marenana jai uñotocue. Cue marenienana jai uñotomoi. Carta isoidomoi. Jusiñamui dibeimo omoï comeciï meiduamona, cue comecimona omoïna raise uñotocue. Omoï birui illamona, omoïna fidiamona, nana comini omoïna raise uñotimaci. Ie jira jiaïnodi: “Bie comini mare” raillana omoïmona jitaiñedicue. ³ Cristo rafuena omoïmo llocicue; ia Cristo omoï comeciaina jai meidotaja jira: “Omoï mare” raillanona naimie jai cuegadena, nana comini uñotimaci. Tinta diga naimie cueñede. Jusiñamui Moisés micorimo jaie lloga rafue jamai noficimo cuela. Cai cajede Jusiñamui birui iese cueñede; ia naimie Joreño uaido omoï comeciaina birui meidote. ⁴ Cristomo cue jai duilla jira, Jusiñamuina cue ñnuamona, omoïna iese llocicue. ⁵ Cue ñnoca rafuemona iese lloñedicue; ia Jusiñamui uai cuemo illamona, iese omoïmo llocicue. ⁶ Jiaie rafuedo birui cue jaïllena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue ñnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai ñnuamona, Jusiñamui Joreño Jusiñamui illanomo caina jaca itatate.

⁷ Moisés micorimo lloga rafuedo jaïllamona, Jusiñamui dine buna jaca iñena. Noficimo Jusiñamui cuela. Moisés micorimo Jusiñamui llua mei, Jusiñamui uai ebirena jira, Moisés micori uieco eo quenirecaide. Jusiñamuimona naimie abido bia, Israel comini Moisés micori uiecomo eruainidimaci. Nagarui Jusiñamui diga naimie ñaiñenia, naimie micori uieco ja muidomo queninide. ⁸ Jusiñamui Moisés micorimo jaie lloga uai ebirede; ia Jusiñamui Joreño birui caïmo lloga uai baïfemo ebirede. ⁹ Moisés micori rafuedo bu jaia, faificana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baïfemo ua eo faite. ¹⁰ Moisés micori rafue jaie ebirede; ia jiaie rafue birui

illa jira, Moisés micorí rafue jai birui ebinide. ¹¹ Birui ite rafue jaca saiñena jira, ua eo ebirede.

¹² Iena cai uñuamona, bie rafuena marefodo jaciruiñeno lloticue. ¹³ Iniroi diga, Moisés micorí isoi cue uiecona ibaiñedicue. Naimie micorí ie uieco ibaide, ja muidomo ie uieco quenirena feioicallana comini cioñellena; ia cue lloga rafuena marefodo llocabiticue. ¹⁴ Moisés micorí comini Jusiñamui rafuena jaca ñnoñedimaci. Naimaci comeciai jitaiñena jira, ñnoñedimaci. Moisés micorí rafuena birui judíuai comini facaia, iena nia raise cacañedimaci. Dani Cristona ñnuamona, naimaci comeciai raise cacareitimaci. ¹⁵ Cristo rafuena birui naimaci ñnoñena muidona, Moisés micorí rafuedo nia jaidimaci. ¹⁶ Cai Nama dibeimo bu jaia, naimie comeci raise cacade. Moisés micorí rafuedo naimiedi cai jaiñenana raise uñote. ¹⁷ Cai Nama Joreño lloiticue. Cristo dibeimo cai jaia, naimie Joreño caimo jai ite. Cristona cai nabaillamona, jeacino anamo jai ñnedicai. Moisés micorí rafue anamo jai ñnedicai. ¹⁸ Cristomo jai cai duilla jira, naimiena cai comeciainona raise uñua jira, ie ebirede uaina uñotícai. Acaranimo cai eruailamona, cai abina ciodícai. Ie isoide. Cai illamona jaiie comini Cristona uñotímaci. Cai Nama Joreño caina canuamona, naimie ebirena isoi cai illena, icana jaidícai.

4

¹ Jusiñamui cuena duenailamona, cue comecina ocuiñocaida, Cristo rafuena llocana jaidicue. ² Meirede rafuena llofueñedicue. Iena bainino llofueñedicue. Jifuiamona omoína llofueñedicue. Omoiri iobitallena, Jusiñamui rafuena meidoñedicue. Jusiñamui cuena ciuana cue uñuamona, naimie rafuena uanaicinona llofuecabiticue. Cue llofuiana bu raise cacacia, uanaicino cue llofuecabillana uñote. ³ Faifcana jaidinodi cue mare lloga rafuena raise cacañedimaci. ⁴ Taife anamo naimaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uñuana jitaiñede. ⁵ Cue finoca rafuena llofueñedicue; ia Jesucristodi cai Namanana llofuecabiticue. Naimie dibeimo cue maijiamona, omoína canollena, naimie rafuena llofuecabiticue. ⁶ Enirue finua facaise Jusiñamui llote: “Jitiredino nana eniruemo ñellena, useredino mai iite”. Naimiena cue nia uñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uñotaja jira, cue comeci useredinomo jai ite isoide. Jesucristo monamo illanona jaiie cue cuanona, Jusiñamui uai ebirede siñonana llofueticue.

Cai comeciai ocuiñocaida ñnocana jaidícai

⁷ Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona ñnenana uñotomoi; ia ie uai siñonana illamona, Jusiñamui illana uñotomoi. ⁸ Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacareñiñeno comecina ocuiñocana jaidicue. ⁹ Damierie cuena duere finodimaci; ia Jusiñamui cuena fañonocaiñeno cuena canode. ¹⁰ Eniruemo jaiie Jesús ia, duere sefuillamona, ja muidomo fiodaite. Jesús isoi duere sefucana cue jaia, naiemona niadedi nagarui fiodaiticue. Iemona cuena naimie jillogata muidona, Jesús siño uaina uñocana jaidicue. ¹¹ Jesús rafuena cue llua muidona, nagarui damierie cuena meineiade. Iemona cue jillocabilla jira, Jesús siño uaina uñotomoi. ¹² Naimie rafue cue llua muidona, cuena meineiacadimaci; ia bie rafuena omoi ñnuamona, Jusiñamui illanomo jaca iitomoi. ¹³ Jusiñamui facaina lloaíma jaiie cuela:

“Cue ñnua jira, iena llofueticue”. Naimie isoi cue ñnua jira, bie rafuena jiai llofuecabiticue. ¹⁴ Jesús fiodaillamona Jusiñamui naimie jaie jillotate. Iena cue uñuamona, cai fiodaille mei, caina jiai jillotaite. Jesúmo cai duilla jira, naimie illanomo danomo caina ico itataite. ¹⁵ Omoi facaina nana cue rafue finodicue. Cristo rafuena comini uñollena, duere sefuidicue. Iemona Jusiñamui naimacina duenaillana uñoitimaci. Jusiñamui ñibeimo naimaci illamona, naimiemo iobillacinona fecacabitimaci. Ieri naimiema iobitaitimaci. ¹⁶ Ie jira iena sefuiruñedicue. Cue mairici fuicana nagarui jaide; ia cue comeci nagarui ñnocana ocuricana jaidicue. ¹⁷ Birui duere sefuidicue; ia iemo cue comecina eo facañedicue. Cristo rafue muidona birui duere cue sefua, Jusiñamui illanomo ico cue ia, nainomo ebire marena iiticue. Iemo cue comecina eo facadicue. ¹⁸ Cuemo birui suide rafuemo comecina eo facañedicue. Jusiñamui illanomo cue nia cioñena rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

5

¹ Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo cai abi jaca rifaiñeite. ² Birui cue duere sefuillamona, Jusiñamui cuemo ico itatalle abina eo oiacadicue. ³ Cue fiodailla mei, Jusiñamui cue joreñomo jiaie isoide abina itataite. ⁴ Cue jiaie isoide abi cuemo illena, cue jamai fiodaicaiñedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaille abi ifomo jaca ille abina cuemo iite. ⁵ Jusiñamuidi ie Joreño caimo itatajamona, cai abiaia iese jiai itatajana uñoticaí. ⁶ Iena cue uñuamona, ñie isoide rafue ia, ñnocana jaca jaidicue. Nia cue fiodañenia, cai Nama illa ecimo nia ññedicue. ⁷ Naimiema birui cioññedicue; ia naimiema ñnocana jaidicue. ⁸ Iese jaidicue. Cue Nama diga cue illena, fiodaicadicue; ⁹ iadedi nia cue fiodañenia, naimiema jaca iobitaiacadicue. Cue fiodaia, naimiema jiai jaca iobitaiacadicue. ¹⁰ Naimie llua jira, Cristo uicomo ico nana iiticaí. Cai bene finoca rafuena uñotaite. Marañede rafuena cai bene finua diese, naimiemona ibana feññoñeticai. Mare rafuena cai bene finua diese, naimiemona ibana feññoñeticai. Ie muidona naimie jitaillacinona jaca fiocadicue.

Jusiñamui diga cai uri illafue

¹¹ Cue Nama uicomo ico cue illemona, iena cue jaciruillamona, naimie ñibeimo cominina jai itatcana jaidicue. Jusiñamui cue illana raise uñote. Cue illana raise omoi uñuana jitaidicue. ¹² “Cuedi mareññedicue” lloññedicue; ia cue abi facaina omoi riidollena, bie rafuena lloticue. Omoi motomo damerie llofuerañi naimaci llofuiacino diga abina iedotimaci; ia naimaci comeciaino iticino diga abina iedoññimaci. ¹³ “Naimiedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoññedicue. Omoia llofuellena, omoi facaina maijidicue. ¹⁴ Nie isoidicuena, Cristo cuena isiruillana cue uñuamona, jaca llofueiacadicue. Nana comini facaina damie fiodaillana jai ñnoticue. Naimaci jeacino ifomo naimie jai fiodaite. ¹⁵ Nana cai facaina naimie fiodaite. Fiodaillamona Jusiñamui naimiema jai jilloitate. Naimiema nia cai ññoñenia, ñani cai comeciaino ite rafue diga iobidicaí; ia naimiema jai cai ñnua mei, ñani cai comeciaino naimiema cai iobitajana naimie jitaide. Ie jira cue illana jai uñnotomoi.

16 Damierie llofuerainidi jiaínomo eruaiillamona, naimaci comeciaina facajamona: “Naimaci mare” raitimaci. Jiaicaiño: “Naimaci marañede” raitimaci; iadedi Cristona cue iinua facaisemona iese cominimo eruaiñedicue. Naimiena nia cue iñoñenia, Cristona jaie raise uññoñedicue. “Naimiedi jamai iima” raillamo comecina facadicue; ia iese naimiemo birui comecina facañedicue. 17 Cristona cai iinua mei, naimiemo jai cai duillamona, cai comeciai iuaina meidoticaí. Jai jiaie isoidicaí. Jiaie rafuedo jai jaidicaí. Jaie caimo ite rafuedo jai jaiñedicai. 18 Jusiñamui cai comeciai iuaina meidotade. Cristo fiodaillamona, Jusiñamui dibeimo caina itatate. Iemona naimiena jai nabairedicaí. Naimacimo ie rafuena lllena, cuena fetode, jiaie cominina ie dibeimo itatallena. 19 Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacañede. Bie rafuena lllena, cuena jai fetode. 20 Cristo cuena oretajamona, naimie facaina llofuecabiticue. Cue llogacinomona Jusiñamui uññotomoi. Omoimona naimiena bu nia iñoñenia, Cristo facaina cue illa jira, Jusiñamuina omoi nabaillanona, naimie diga uri i. 21 Cristo jeacino jaca fiñoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicaí.

6

1 Bie rafuena nia lliacadicue. Jusiñamui facaina cai maijiamona, naimie dibeimo cominina itataticai. Naimie caina duenaillana uññoticue. Iena omoi iñocana jaillana jitaidicue. 2 Jiaie Jusiñamui cuetatate: Cue jitailla facaise omoi jitaillacinona jai cacadicue. Omoi jilloillena, omoína jai canodicue.

Ero, Jusiñamui birui omoína cacaacade. Birui omoína canuanona, omoína jillotaiacade. Ie muidona naimiena iñocana jai. 3 Bie rafuena omoi iñoñellena, cue llofuiacinona omoi jamañellena, bu diga rafuena comuitaiaicaiñedicue. 4 Jusiñamui dibeimo cue maijiamona, nie isoide rafuemona ramo cue jiria, cue illamona naimiedi: “Mare” cuena raillana jitaidicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue. 5 Damierie cuena fatimaci. Cárcelmo cuena jonetimaci. Naimaci illanuaimona cuena riire dotadimaci. Eo cue maijia jira, diga icaiño eo raise iniñedicue. Aime guisoidicue. 6 Jearede rafuena ebiruiñedicue. Cristo rafuena uññocana jaidicue. Icirifñedicue. Jiaínona canocabidicue. Jusiñamui Joreño anamo iticue. Cominina raise isiruiticue. 7 Uanaicinona llocabiticue. Jusiñamui uai cuemo illamona, llofuecabiticue. Cue comecina riidollena, Taifena emodofillena, Jusiñamui jitailla isoi, marecinona finocana jaidicue. 8 Damierie cuena marena jai ñaitimaci. Jiaíno cuena jeare nia ñaitimaci. Damierie cueri jai ibodimaci. Jiaíno cue joreñoña jai ñaitimaci. Damierie: “Caina jifuetio” cuena raitimaci; ia nia uanaicinona llocabiticue. 9 Damierie: “Jamai bue isoidio” cuena raitimaci; ia jiaíno cuena raise uññuamona, naimaci dinena jamai bue isoiñedicue. Nagarui niadedi fiodaicabiticue; ia nia iticue. Duere sefuicana jaidicue; ia Jusiñamui cue comecina ocuiñotacana nia jaidicue. 10 Sunaiticue; ia iocire jaca iticue. Dueredicue; ia ailluena comini comeciaina eo caimaretadicue. Buenidicue; ia Jusiñamuimona ailluena marecinona feñoticue. Iese jaca jaidicue. Cue illamona: “Naimiedi mare” cuena omoi raillana jitaidicue.

11 Corintomo itino, cue nabaiñiai, cue comecimo ite rafuena marefodo jai loticue. Cue comecimona omoi diga marena iacadicue. 12 Cuemona omoína

raise isiruiticue; ia omoi dinena nia cuena eo isiruiñedomoi. ¹³ Cue uruia; omoi isoilla jira, omoi diga ñaiticue. Omoína cue isiruilla isoi, cuena omoi isirui.

Jusiñamui cai comeciaino illanodica;

¹⁴ Creyentedimie mo jearede ramo faitatai raillano, daje isoide rafuedo iaímaia; jaiñena jira, daje isoi rafuena iaímaia; comeci lloñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimiena creyentediñaiño oñena. Marecinodo jaiacadimiedi maraiñedicinodo jaiacadimie daje isoi diga nabairinide. Jusiñamuina uanaicínona uñotimiedi useredinomo jai ite isoide. Jeacino anamo nia itimie jitiredinomo nia ite isoide. Cristo rafuena naimie uñiñede; ia Cristo rafuena omoi uñuamona, useredinomo jai itomoi isoidomoi. ¹⁵ Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comecina façañede. ¹⁶ Creyenteñedimiedi Jusiñamuina sedañede; ia jiraraina sedade. Creyente comecimo Jusiñamui illamona, Jusiñamuina sedade. Nana creyentia; comeciaino Jusiñamui ite. Iena jai Jusiñamui llote:

Comini motomo iiticue.

Naimacina nabaiticue.

Naimaci Jusiñamuiniticue. Cue comininitimaci.

¹⁷ Ie muidona cuena iñoñedino diga daje rana namatañeno.

Naimaci jearede jetaca rafuena abimo oñeno.

Iemona omoína raise feiñoiticue.

¹⁸ Omoi Moona iiticue. Cue uruiaina jaitomoi.

Siño jitodicue.

7

¹ Cue isirui ganodomoi. Bie llogacino Jusiñamui caimo jai llua jira, naga maraiñede rafuena fañonocaida, cai jailla. Naga cai comeciaina jearetade rafuena fañonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo cuezacino diese finodimaci

² Omoi comeciainomona cuena raise feiño. Buna jeare finoñedicue. Buna jifueñedicue. ³ Maraiñede rafuena jai omoi finuana lloñedicue. Omoimo cue comecina nagarui facadicue. Iena ailli lloticue. Nia cue ia, raire cue fiodaia, omoína jaca uibiñocabiticue. ⁴ Cue llucacina omoi iñuana raise uñotiticue. Omoiri iobidicue. Omoi diga jai uri iticue. Duere sefuidicue; ia iocire iticue.

⁵ Macedoniamoi navui cue jaidicue, cue comeci uri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentia; naimaci itatallemo cue comeci jarire ite.

⁶ Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade. ⁷ Cue dine naimie ria, iocire iticue.

Omoimo ite rafue cue cacajamona, jai iocire iticue. Cuena omoi cioacanana llote. Cue comeci jarire illari sunaitomoi. Cuena riidoiacadomoi. Iena cue cacajanona, iocire iticue. ⁸ Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue. ⁹ Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cuela carta muidona iciriñedomoi; ia Jusiñamui jitailla isoi sunaitomoi. ¹⁰ Jusiñamui jitailla isoi, ie

jeacino facaina bu sunaillamona ie comeci iuai Jusiñamui dibeimo meidoia, sunañede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca iñeite. ¹¹ Jusiñamui jitailla isoi omoi sunaillamona, omoi comeciaina raise finodomoí. Maraiñede rafue dibeimo iacaiñedomoí. Iena eo jitañedomoí. Jusiñamui duere sefuitalicino anamo iacaiñedomoí. Cuena dane cioacadomoí. Jusiñamui jitaillacinona eo finoacadomoí. Jusiñamui dibeimo naimie illena, maraiñede rafuena finodimiena duere finodomoí. Nana bie rafuena raise fuidodomoí. ¹² Carta navui omoi dine cue oretaia, maraiñede rafuena finodimiemo cue comecina eo facañedicue. Naimiemo duere sefuidimiemo cue comecina eo facañedicue. Cuemo omoi comeciaina facajana omoi uiñollena, navui cueticue. Jusiñamui iena uiñote. ¹³ Ie jira cue comecina ocuiñoticue. Tito jiai iocire illa jira, dane iobidicue. Naimie comecina caimare omoi itataja jira, iobidicue. ¹⁴ Omoi dine Tito nia jaiñenia, naimiemo omoína lloticue. “Naimaci ona feiñoitimaci. Naimaciri iobidicue” naimiemo navui lloticue. Iese naimiema omoi feiñua jira, ieri meidaiñedicue. Omoimo uanaicinona jaca lloticue. Naimiemo cue llua isoi jiai suide. ¹⁵ Naimie llofuiacino omoi ñnoiacana jira, naimie omoína birui raise isiruite. Meiruiocaida, comeciái jarire illamona, naimiema feiñotomoí. ¹⁶ Omoína raise uiñoticue. Cristo ñnocana omoi jaillana raise ñnoticue. Omoiri iocire iticue.

8

Crezentiaí Jusiñamuimo ucubena fecaja rafue

¹ Cue amatiai, omoimo jiaie rafuena lloiacadicue. Jusiñamui naimacina canuamona Macedoniamo ite crezentiaína omoi uiñuana jitaidicue. ² Eo duere sefuidimaci. Jiai eo dueredimaci; ia iocire illamona, jiaie crezentiaimo ucubena caidiñeno fecacabidimaci. ³ Naimacimo ite ucube ñiese fecadimaci. Iena uiñoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue. ⁴ Naimacimo iese lloñedicue; ia iena naimaci eo fecacana jira, jiaie crezentiaína canollena, cuemo iena eo jicanotimaci. Ucube diga jiaíno crezentiaína naimaci canuana cue llua eo jitaidimaci. ⁵ Cue comecina facaja isoi, fecañedicue. Ucubena fecadimaci; ia: “Cai Nama dibeimo maijicadicaí” jiai llotimaci. Nie isoide rafuena naimaci finuana cue ocuillena, Jusiñamui jitailla isoi, jitaidimaci. ⁶ Omoi dine Tito dane jaillena jitaidicue. Omoi dine naimie navui ia, ucube omoi uana naimie canode. Iemona janore tainedomoí. Jiaie crezentiaína omoi canuana raise fuiduana jitaidicue. ⁷ Cristona ñnocana jaidomoí. Iena jiaíno mo llocabitomoí. Cristo rafuena raise uiñotomoí. Cristo jitaillacinona eo finocana jaidomoí. Cuena jiai isiruitomoí. Ie muidona omoi ucube diga, jiaie crezentiaína omoi raise canuana jiai jitaidicue. ⁸ Omoína iese riire lloñedicue. Macedoniamo ite crezentiaína eo canuana omoi uiñuamona, jiai crezentiaína omoi canoia, Cristona omoi isiruillana uiñoiticaí. ⁹ Cai Nama Jesucristomona cai fueua. Naimie caina duenaillana uiñotomoí. Ie Moo ecimo naimie nano illamona, naga ra naimiemo ite; ia eniruemo ie billamona, caina canollena, ñmana jaillanona, duere ite. Iemona Jusiñamui rafuena cai cacaja jira, duere iñedicai. ¹⁰ Ie jira omoimo bie rafuena lloiacadicue. Navuidi año ucube eenuana tainedomoí. Iena finoacadomoí. Ie fuiduana jai jitaidicue. ¹¹ Omoi jitaillamona bie rafuena fuido. Omoimo ite ucube ñiese fecu. ¹² Ailluena ucubena omoimo iñenia, dama iesede. Omoi jitailla jira, omoimo ite ucube ñiese omoi fecai, Jusiñamuimona mare; ¹³ ia omoi jitailla rana omoi ollena,

omoi ucube iñeni raillano, omoi jitailla baifemo omoi fecajana lloñedicue. ¹⁴ Jiaie creyentiaimo ra birui raise iñena jira, naimacina omoi canuana jitaidicue. Omoi ra ico iñenia, naimaci dinena omoina canuana jitaidicue, nana omoimo daje isoi omoi ra illena. ¹⁵ Moisés micori illa facaise ite cominimona cai fueua. Naimacina jaie iesee cuela: “Jusiñamui oretaga guiga ramona ailluena guillena, nagarui damierie iraiuidimaci. Jiaimo janore guillena, iraiuidimaci; ia coniniri fecajamona, imaci jitailla diese nagarui nana gutimaci”. Ie muidona omoimo ite ucubemona naimaci jitailla ra illena, jaie creyentiaimo omoi fecajana jitaidicue.

Pablo Titona ñaite

¹⁶ Omoi dine Tito dane oretaiacadicue. Cue isoi naimie omoimo comecina facade. Omoina canoacade. Naimie comecina Jusiñamui iesee itataja jira, Jusiñamui iobidicue. ¹⁷ Omoi dine jaillena naimiemo lloticuemo, naimie dinena: “Jee” raite. Naimiemo nia iesee cue lloñenia, omoina naimie eo canoiajana jira, naimie omoi dine jaillemo ie comecina facade. Omoi dine raire jaite. ¹⁸ Naimie diga jiaimie oretaiticue. Naga nairaimo ite creyentiaidi: “Cristo rafuena eo raise llofuecabite” naimiema raitimaci. ¹⁹ Cue diga jaillena, naimiema fetodimaci. Dueredinomo omoi ucubena cue uillena, cue diga naimie jaite. Iemona cai Namana iobitaitica. Iemona nana creyentiaidi naimacina cue canuana uiñoitimaci. ²⁰ Omoi ucubena raise cue sedajana jitaidicue. Iemona: “Pablo cai ucube fide” omoi llua jitañedicue. “Iena Pablo raise fecañede” omoi llua jitañedicue. ²¹ Iena raise marena sedaacadicue. Jusiñamui iena uiñote. Nana creyentia iena uiñuana jiai jitaidicue. ²² Iaimaiaia diga jiaimiena jiai oretaiticue. Naimie Cristona eo innocana jaillana raise uiñoticue. Omoi rafuena naimie fidiano, jaie creyentiaina omoi canuana naimie inuanona, omoi dine naimie eo jaiacade. ²³ Omoimo Titona bu jicanoia, naimacimo naimiema raise llono. Danomo Cristo dibeimo maijidicoco. Cue diga omoina canode. Jiaie iaimaiaia bu jicanoia: “Jiaie creyentia iaimaiaia fetuamona bitiaiaiaia” llono. Cristona iobitaiacadiaiaiaia. ²⁴ Cuen a omoi isiruillamona: “Omoi mare” omoina cue llua mona, naimacina raise nafue. Nana cue jitailla rafuena omoi finuana naimaci uiñuana jitaidicue. Omoi ucubena eenuana raise fuiduana jitaidicue. Iena omoi finuamona, abido naimaci bia, naimacina oretaga creyentiaimo iena lloitimaci.

9

Jiaie creyentiaina canollena, omoi ucube olle rafue

¹ Bie rafuena omoi jai uiñua jira, iena dane lloñeiticue. ² Ucubena omoi jai feaacana uiñoticue. “Benomo Macedoniamo ite creyentiaimo omoi iobidicue” llocabiticue. “Navuidi añomona feaacadomoi” llocabiticue. “Acaya railla provinciamo ite creyentia feaacadimaci” llocabiticue. Iese omoi illamona, bene ite creyentia jiaimo creyentiaina jiai canoacadimaci. ³ Iese uiñoticue; ia omoina cue canollena Titona oretaiticue, cue jitaillacino omoi raise fuidollena. Ucubena dajena uana raire jitaidicue. ⁴ Omoi dine Macedoniamo ite creyentia diga cue rillanona, omoi ucube dajena nia iñenia, iesee omoina cue lluaconi meidaiticue. Omoi jiai meidaitomoi. ⁵ Ie muidona Tito idai jaillana jitaidicue. Ucube dajena uana omoi llua isoi, omoina canoite. Omoi ucube dajena uana lloiacañedicue; ia omoi comeciama jiaimo creyentiaina canuana omoi jitailla jira, iena jitaidicue. ⁶ Jiaie rafuedo iena lloiticue. Janore iduaina bu ria, janore llisillana oite. Ailluena iduaina

bu ria, alluena llisillana oite. Cue llua jira, omoi ucube dajena oia, eo caimare iñeitomoi; ia omoi comeciai jitaillamona omoi ucubena dajena oia, eo caimataitomoi. ⁷ Ucube dajena omoi oia, nagamie ie comecina facajamona fecaja. Naimie jitañenia fecañena. Naimie jitailla jira, naimie fecaja. Jiaimie omoina ñai raillano, “Cai ucubena fecaiticaí” rañeno; ia o jitaillamona iena feca. Comeciai iocire illamona omoi fecaia, Jusiñamuina iobitadomoi. Iena Jusiñamui jitaide. ⁸ Jusiñamui omoi jitailla baifemo omoimo fecarede. Nana omoi jitailla ra omoimo naimie illamona, jiaínomo omoi fecaia, naimacina canorenitomoi. ⁹ Jusiñamui facaina lloraima micori iena jaie cuela: “Jusiñamuina ñnotimie dueredinona canocabide. Mare rafuena finocana jaide”. Ie omoi finollemo, Jusiñamui omoina canoite. ¹⁰⁻¹¹ Ero, illimo maijirainimo Jusiñamui iduaina itatate. Iena sicuamona, monaillamona, nainomo maijirainidi naiemona guicabite. Ie isoide. Omoimo Jusiñamui nana omoi jitailla rana jaca itataite. Iemona jiaie creyentiaina raise canorenitomoi. Omoi ucubena cai uia, iena jiai creyentiaí feñioia, Jusiñamuimo iobillacinona eo fecaitimaci. ¹² Ucubena omoi oretaia, duerede creyentiaina canodomoi. Omoi muidona naimaci Jusiñamuimo iobillacinona jiai fecadimaci. ¹³ Iemona Cristona omoi raise ñnuana uiñoitimaci. Ieri Jusiñamuimo iobillacinona fecaitimaci. Omoi iga ucube facaina iobillacinona Jusiñamuimo fecaitimaci. Naimacina canoitomoi. Iemona nana jiaie creyentiaina canoitomoi. ¹⁴ Omoi facaina Jusiñamuimo jiiitimaci. Omoina naimaci isiruillamona, Jusiñamui omoina eo canuana naimaci uiñuamona, omoi facaina jiiitimaci. ¹⁵ Jusiñamui caina eo canua jira, iobillacinona naimiemo cai fecallena, cai uai raise iñede. Uainicaidicaí. Naimie eo mare. Naimiena cai iobillasa.

10

Cai Nama Pablona fetua jira, ie uai Pablomo ite

¹ Jiaie rafuena lloiacadicue. Omoimona damierie llotimaci: “Cai dine Pablo ia, naimiedi caina jaciruite. Riire caimo naimie rafuena lloñede; ia cai dine naimie iñenia, riire caimo naimie rafuena lloite” llotimaci. Ero, Cristo iciricabiñena isoi iacadidue. Naimie isoi omoimo lloiacadicue. ² Riire omoimo lloiacañedicue. Omoimona damierie cuena raitimaci: “Pablodi Cristona ñnoñedimie isoi icabite”. Naimaci iese nia lloia, omoi dine cue ria, naimacimo jaciruiñeno riire lloiticue. ³ Comena iticue; ia comini diga cue rafue iñede. ⁴ Taife dibeimo itino diga cue rafue illa jira, jamai cue uai diga naimacina lliicaitañeticue; ia Jusiñamui uai diga naimacina lliicaitaiticue. ⁵ Cristo uai diga Jusiñamui dibeimo iñedino llucinoconi uainicaitaticue. Abina íedotimaci; ia Jusiñamuina uiñoiacañedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue ñnotallena. ⁶ Cristo anamo omoi raise ia, cue lloga uaina omoi raise ñnocana jaia, omoimona raise ñnoñedinona duere finoiticue. ⁷ Cominimo jamai eruailamona: “Naimaci mare” raitomoi. Jiaicaíño: “Naimaci marañedimaci” raitomoi; ia naimaci comeciaina uiñoñedomoi. Omoimona damie nibai comecina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie fañede”. ⁸ Abina íedoñedicue; ia cue abí íedoia, ieri meidañedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataicañedicue. ⁹ Omoimo riire lollena cue uai ite; ia cue carta diga omoina jainaitaicañedicue. Omoina canoiacadicue.

¹⁰ Omoimona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai riinide. Cristo rafue raise lluana raise uiñoñede”. ¹¹ Iese iñedicue. Omoi motomo cue ia, cartana cue: “Maredicai”. Iese coniniri naimaci comeciaina facaia, abina uiñoñedicue. Naimaci isoi cue illemo cue comeciaina facañedicue. ¹³ Jusiñamui cue maijiana cuemo llote. Naimie llua baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidicue. ¹⁴ Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue. ¹⁵ Jiaie llofueraini llofuamona buena oiacañedicue. Cristo rafuena omoi inocana jaillamona, omoi motomo cue illamona, Jusiñamui jitailla diese omoina canoacadicue. ¹⁶ Jiaie nairaii illanuaiimo Cristo rafuena nia lloiacadicue; ia nainomo jiaie llofueraima llofuamona buena oiacañedicue. ¹⁷ Bu abina iedioacania, cai Nama finua rafueri naimie abina iedua. ¹⁸ Ie llofuia diga bu abina iedioa, Jusiñamui naimie llofuacinona: “Mare” raiñeite; ia Jusiñamui finoca rafueri bu abina iedioa, Jusiñamui naimiena: “Mare” raite.

11

Pablodi Cristo oretaganona abi caitadinona llote

¹ Abina cue raise uiñoñenia, cue diga iciriñeno. Cue lluomo nia cacarei. ² Omoimo Jusiñamui comeciaina facaja isoi, omoimo comeciaina facadicue. Cue muidona Cristo rafuena omoi cacaja jira, Cristona uiñotomoi. Iima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina feaacadicue. Omoimo jeacino iñena isoilla jira, omoina Cristomo feaacadicue. ³ Jiaie rafuemo omoi comeciaina facacana omoi jaillamo jacinaiticue. Jiaie jaiona eruailamona, Taife Eva micorina jifute. Jiaie llofueraini Cristo rafuedo omoi raise jaiñenana itatajamo jacinaiticue. ⁴ Diga llofueraini feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedicue. Jusiñamui Joreño omoimo illana cue isoi llofuecabiñedicue. Cue mare lloga rafue isoi llofuecabiñedicue; ia naimacina jaca feiñotomoi. Ie jira Cristo dibeimona omoi jaillemo jacinaiticue. ⁵ “Cristo oretaganodica” raitimaci; ia naimaci cue baifemo faimo cue comeciaina facañedicue. ⁶ Naimaci isoi rafuena jino lluana eo uiñoñedicue; ia Cristo rafuena eo raise uiñoticue. Nana cue finoca rafuena omoina iena diga icaiño uiñoticue. Uanaicinona omoina jaca llofuecabiticue. ⁷ Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijidicue. Iese cue illa jira, damieriemona marañede rafuena finodicue; ia cuemona eo mare rafuena jai uiñotomoi. Iemona abina jai uiñotomoi. ⁸ Omoina cue canollena, jiaie creyentiamona ucubena feiñoticue. Omoi facaina naimacimona feiñoticue. ⁹ Rana cue jitailla facaise omoimona ucubena jicañedicue; ia Macedoniamona bite creyentia cuena canodimaci. Omoimona navui ucubena cue oñena jira, birui cue oñena jira, cuemona ibana oñeitomoi. ¹⁰ Cristo cue illana uiñuamona, naimie uanaicnodo cue jaillamona, nana Acaya railla provinciamo iena jaca lloiticue. ¹¹ Omoina cue isiruilla jira, ucubena omoina jicañeiticue. Jusiñamui cue comeciaina raise uiñote. ¹² Abina ieduumona omoi motomo damierie: “Pablo isoi llofueticai” raitimaci. Ucubena omoimona feiñotimaci. Naimaci isoi iacañedicue. “Daje isoi maijidica” naimaci raiñellena, ucubena

omoimo jaca jicañeiticue. ¹³ Cristo oretaganona abi caitadinodimaci. Cristo dibeimo raise maijiñedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci. ¹⁴ Ieri rajicaiñeiticue. Cominina jifuellena, Taifedi Jusiñamui jaienicina abi caitadimiena jaicabide. ¹⁵ Taife dibeimo itinodi Jusiñamui ie mare rafuena llofuerañina jaicabidimaci. “Cai lloga rafuedo omoi jaia, Jusiñamuimona marebicaitomoi” llofuecabitimaci. Naimaci finolle rafue diese Jusiñamuimona duere sefuitimaci.

Cristo oretagamiena naimie illa jira, Pablo duere sefuide

¹⁶ “Pablo abina uiñoñedimie” raillamo omoi comeciaina facañeno; ia iese cuena omoi comeciaina facaia, cue lluomo nia cacarei. Omoi motomo ite llofuerañi abina iedua isoi, iacaiñeiticue; ia janore cuemo iticino diga abina iedoticue. ¹⁷ Abina ieduañona cue lloia, cai Nama Cristo isoi lloñeiticue. Naimie cuemo llua jira, iena lloñeiticue; ia abina uiñoñedimie isoi lloiticue. ¹⁸ Omoi dine damerie llofuerañi naimaci illa diga abina iedua isoi lloiticue. ¹⁹ Abina uiñoñedimaci; ia: “Abina eo raise uiñoticai” omoi lluañona, naimaci llofuacinañona cacacabidomoi. ²⁰ Naimaci anamo omoiñona itataiacadimaci. Omoimo ucubena jicacabidimaci. Omoimo cuicabidimaci. Icirillamona, omoi uiecuaina bofedimaci. Iese omoimo finocabidimaci; iadedi buena naimacimo finoñedomoi. Ibana oñedomoi. ²¹ Iese omoimo finoñeiticue, omoimo cue jaciruilla jira.

Cue illana omoimo ja lloiticue. Nibai abina raise uiñoñeiticue; ia naie llofuerañi isoi cue illa diga abina iedoiticue. ²² Omoi motomo ite damerie llofuerañina ja lloiticue. Judúuai uaido ñaitimaci. Iena jiai ñaiticue. Judúuai nairai imaci. Daje isoidicue. Judúuai nairai imiedicue. Abraham micori uruiadimaci. Jiai naimie micori uruedicue. ²³ “Cristo dibeimo maijiticai” raitimaci. Abina uiñoñedimie isoi lloticue; ia naimaci baifemo Cristo dibeimo maijiticue. Naimaci baifemo duere sefuidicue. Diga icaiño cárcelmo iticue. Diga icaiño fajamona duere sefuidicue. Diga icaiño niadedi fiodaicabiticue. ²⁴ Judúuai comini cinco digacaiño cuena fatimaci. Naga icaiño treinta y nueve digacaiño rao diga cuena jicuidimaci. ²⁵ Dacaiño amani radosi diga cuena fatimaci. Nofici diga cuena dacaiño fairnotimaci. Dacaiño amani bote diga namo anabaiticue. Darui naio monaillamo botedo jamai fuiri baiticue. ²⁶ Eo jacirede illedo jaicabidicue. Firiruidino eo illa jira, jaciruioicaida jaicabidicue. Cue judúuai cominimona duere sefuicabidicue. Judúuaiñedinomona duere sefuicabidicue. Naimaci illanuaimo cue ia, diga icaiño duere sefuidicue. Naisodo cue macaria, duere sefuicabidicue. Monailaido cue jaia, duere sefuicabidicue. Cristo rafuena llorañina abi caitadinomona jiai duere sefuicabidicue. ²⁷ Cue ucube ollena, duere maijicabidicue. Diga icaiño raise iniñeiticue. Diga icaiño aime guiticue. Rollimemona duere sefuicabidicue. Iniroinamona jiai duere sefuidicue. ²⁸ Diga jiaie rafuemona duere sefuicabidicue. Duenailamona naga creyentia illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue. ²⁹ Nie creyente Cristo rafuedo nia raise iñoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue. ³⁰ Cue abina iedoiancaia, jamai bue isoidimedieuena lloiacadicue. ³¹ Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinañona cue lluañona uiñote. ³² Cue illana nia lloiacadicue. Damascomo jaiie creyentena cue jailla facaise cuena gaitatallena, Aretas railla illaiañona anamo

ite gobernador di nairai llaiga nasena sedatate; ³³ iadedi llaigafu ecimo ite jofu a ite ventanamona cirigai isoide diga ana jaillanona, naimona jillodicue.

12

Pablo nicairilla isoide rafuena ciodo

¹ Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. ²⁻³ Cristomo cue duillamona, catorce años jaiie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uiñoñedicue. Nibai dama cue joreña uite. Dama Jusiñamui iena uiñote. Naimie mare illanomo iticue. ⁴ Nainomo cue ñainina rafuena cacadicue. ⁵ Ie diga abina iedoñeiticue. Cue jamai bue isoidimie diga abina iedoiticue. ⁶ Uanaicinona cue llumona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitañedicue. ⁷ Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefuicabidicue. ⁸ Cuemona iena naimie oni oretallena, cai Namamo dacaiño amani jidicue; ⁹ ia cuemo llote: “Ona jillotañeiticue; ia cue ona duenaillacinodo jaca ocuiñoitio. O abi eo mairiñenia, ona cue canuana raise uiñoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uiñoiticue. ¹⁰ Cristo muidona duere cue sefua, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefua, cuena bu duere finoia, cue comecina ocuiñoiticue. Cue duere sefua, cue Nama cuena eo canode.

Pablo Corintomo ite creyentiamo comecina eo facade

¹¹ Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena riidoñedomoi; ia jiaño eo mare railla llofuerainina raise feiñotomoi. Jamai bue isoidicue; ia naimaci cue baifemo faiñedimaci. ¹² Omoi motomo ñiño rafuena cue finua jira, Jusiñamui cuena oretajana uiñotomoi. Cristo rafuena sefuiruiño omoi motomo iticue. ¹³ Cuemona duere sefuiñedomoi. Jiaie creyentiai omoi baifemo faiamo cue comecina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiai isoñedomoi. Iena omoi gaiñenia, iena feita. Cue diga iciriñeno.

¹⁴ Menacaiño navui omoi dine jaidicue. Omoi dine dane jaiacadicue. Omoimo ucubena jicañeiticue. Omoi rana jitañedicue; ia Cristo ñibeimo omoi illana, naimiena omoi raise ñuana jitañedicue. Cue uruai isoidomoi. Rana enoñedomoi, omoi mootiai iena; ia omoi mootiai rana enotimaci, omoiena. Ie isoide. Cue uruai isoi omoi illamona, omoimona rana jitañedicue; ia omoimo rafuena iacadicue. ¹⁵ Nana cuemo ite ra omoimo fecaacadicue. Nana cue comecimo iticinona omoimo jiai iacadicue. Omoina eo isiruiticue; ia cuena janore isiruitomoi. ¹⁶ “Caimona ucubena jicañedio; ia jifuecana caimona otio” raicabitomoi. ¹⁷ Ero, omoi dine menamiena cue oretajamona, omoimona ñie isoide rana otiaimaiai? ¿Ñiese omoina jifuetiaimaiai? ¹⁸ Omoi dine Titona oretaticue. Jiaisie creyente imiena Tito diga oretaticue. ¿Ñiese Tito omoina jifute? Omoimo coco comecina daje isoi facadicoco. Daje rafuedo jaca jaidicoco. Omoina jaca jifueñedicoco.

¿Niese omoi comeciaina raitomoi? ¹⁹ “Caimona ie abina riidote” cuemo nibai comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomo. Cristo dibeimo omoi raise illena, naimiēna raise omoi ñnollena, bie rafuena llocabiticue. ²⁰ Omoi dine cue ria, cue jitailla isoi omoi ññenamoi jacinaiticue. Iese omoi ia, omoi diga cue illana jiai nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi. Nibai nia omoi rana caidicabidomoi. Nibai nia jiaionna jeare ñaicabitomoi. Nibai nia jiaino joreña ñaicabitomoi. Nibai nia abina uradoidomoi. Nibai daje isoi comeciaina nia lloññedomoi. Omoi iese illari cue comecidi jarire ite. ²¹ Omoi dine dane cue ria, omoi muidona Jusiñamui cuena meidaitajamo jacinaiticue. Cristo dibeimo omoi raise ññenia, sunaiticue. Jearede rafuena omoi nia fañonocaiñenia, omoi aiññede riño diga illana omoi fañonocaiñenia, omoi iniññede ñima diga illana omoi fañonocaiñenia, sunaiticue.

13

Iraicaiño Pablo naimacina llofue

¹ Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jaiē llote: “Mena iaiaiaia daje isoi lloillamona, daje amani daje isoi lloillamona, maraiññedicinona finodimiena duere finua”. ² Maraiññede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciāi uai nia meidoñenia, naimacina duere finoiticue. ³ Iemona Cristo uai cuemo illana uiññotomoi. Naimiēna omoi ñnuamona, naimie uai siñonana uiññotomoi. Jamai uaido naimie omoina jillotañede; ia ie siño uaido omoina jai jillotate. ⁴ Jamai bue isoidimie isoi cruzmo naimie fiodaite; ia fiodaillamona Jusiñamui uaido jillode. Cristomo cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue. ⁵ Cristona ñnocana omoi raise jaillemo omoi comeciaina faca. Cristo jitaillacino omoi finollemo comeciaina faca. Cristomo omoi duillamona, Cristo omoi diga illana uiññotomoi. Cristomo omoi duiññenia, naimie omoi diga nia iññede. ⁶ Cristo omoi diga illana omoi uiñuamona, Cristo uai cuemo illana jiai uiññotomoi. ⁷ Maraiññedicino omoi finocana jaillana jitaññedicue. Jusiñamuimo iena jiiiticue. Omoi comeciāi uai omoi meidoñenia, Cristo uai diga omoina duere finoacaiññedicue. Omoi comeciāi uai meiduana jitaññedicue; ia Cristo uai diga omoina cue duere finoñenia, Cristo uai cuemo illana nibai uiññoitomoi. ⁸ Cristomona cue uai illana omoi uiññollena, maraiññedicino omoi finuana jitaññedicue. Mare rafuena omoi finocana jaillana jitaññedicue. Iena finocana jiai jaiacadicue. ⁹ Cristo rafuena ñnocana omoi raise jaiā, iobidicue. Omoimo cue riire lloññenia, iobidicue. Cristo jitaillacino eo raise finocana omoi jaillena jñcabiticue. ¹⁰ Birui bie rafuena cueticue. Omoi dine iññedicue; ia bie cartana omoi feiñua mei, omoi comeciaina raise finuana jitaññedicue. Cai Namamona cue uaina feiññoticue. Iedo omoimo riire lloiacaiññedicue; iadedi iedo naimie dibeimo omoi raise itataiacadicue. ¹¹ Cue amatia, bie carta cuiana jai fuidoacadicue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentia; comeciāi daje isoi lloicana jai. Coniniri uri omoi i. Iemona Jusiñamui omoina isiruillana uiññotomoi. Jusiñamui omoina uri itatajana uiññotomoi. ¹² Nana creyentia eo caimare uaido. ¹³ Nana cue diga ite creyentia; imaci uaina oredimaci. ¹⁴ Cai Nama Jesucristo omoina jaca duenaite. Jusiñamui omoina jaca isiruillamona, coninina omoi isirui.

Naimie Joreño omoimo illamona, coninina omoi nabai. Iese jitaidecuc. Mai. Macaibaite. Pabloducuc.

GALACIAMO ITE CRISTONA HNOTHINOMO PABLO ORETAGA RABE

Uaiduacino

¹⁻² Galaciamo ite creyentiai, omoi dine bie carta oredicue. Pablodicue. ¿Nigacino? ¿Nie isidomoi? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue lollena, cuena orediaimaiaia. Comini cuena orefnedimaci. Cue lloga uaina cominimona jiai ofnedicue. ³ Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatatiamaiaia. Iena omoi uiñocana mai omoi jai. ⁴ Cai Moo Jusiñamui jitailla isoi, birui ite marañedicinomona cai jilloillena, cai jecino facaina Cristo fiodaite. ⁵ Cai Moona jaca cai iobillasa. Iena jitaidicue.

Pablo lloga rafuedi jaca dajede

⁶ Jusiñamuina raire omoi fanonocaillari rajicaidicue. Cristo dibeimo omoi illena, omoina Cristo duenaillamona, Jusiñamui omoina jai uaidote; iadedi omoi jecinomona omoi jilloillena, jiaie rafuedo jai jaidomoi. ⁷ Jiaie mare rafue jaca iñede; iadedi Cristo rafuena jiaiforiedo llofuiamona dajerie omoi comeciaina uri itatañedimaci. ⁸ Jesucristo rafuena omoimo jaiie lloticai. Jiaie rafuena lloticaidena, Jusiñamui riicaillafue anamo nia cai illasa. Jusiñamui jaienici jiaie rafuena llotena, Jusiñamui riicaillafue anamo jiai naimie illasa. ⁹ Omoimo jaiie iese lloticue. Dane ja lloiticue. Cai llua isoi Cristo rafuena omoimo bu lloñenia, Jusiñamui riicaillafue anamo naimie illasa. ¹⁰ Comini cueri iobillana jitañedicue; iadedi Jusiñamui cueri iobillana jitaidicue. Cominina iobitaiacadicuena, Cristo dibeimo nia majiñedicue.

Ie oretagamiena jaillena, Cristo Pablona fetua rafue

¹¹ Cue amatiai, cue lloga rafuena omoi raise uiñuana jitaidicue. Omoi jecinomona omoi jilluana jaiie lloticue. Bie rafuena comini comeciai facajacinomona ofnedicue. ¹² Cominimona ofnedicue. Bu jaca cuena iena llofueñede; iadedi Jesucristo cuena uiñotade. ¹³ Jesucristona nia cue inoñenia, cue judiaui einamaci lloga rafuedo cue jaillana jai fididomoi. Cristona inotinona jaiie eo duere finodicue. Naimacina fuidoacadicue. ¹⁴ Cue einamaci jaiie llua isoi, Jusiñamuina raise inoticue. Naimaci llogacinuaido eo duere cue jailla jira, daje facai cue diga itino baifemo inoticue; ¹⁵ iadedi nia cue jeicñenia, Jusiñamui cuena fetode, naimie iena. Cuena duenaillanona, cuena uaidote. ¹⁶ Omoi judiañedomoimo naie Jito rafuena cue lollena, cuemo ie Jitona jaiie bairerate. Naie facaise cuemo jai suide rafuena bu diga ñañedicue; ¹⁷ ia Arabia railla eniruemo jaidicue. Nainomo comini iñena jira, cuemo jai suide rafuemo comecina facadicue. Jerusalémo Jesucristo nano oretagano dine jaiñedicue. Cuena Jesucristo nia oretañenia, naimacina orede, ie uai lollena. Arabia railla eniruemo cue illa mei, Damasco railla nairaimo abido jaidicue. ¹⁸ Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo quince digarui iticue. ¹⁹ Naie facaiseconi nana Jesucristo oretaganona cioñedicue. Pedrona ciodicue. Jacobona jiai ciodicue. Naimiedi cai Nama ie ama Jiañona cioñedicue. ²⁰ Omoimo nana cue cuegacinodi unaicino.

Tainona cueñedicue. Tainona cue cueia, Jusiñamui cuena duere finuana uiñoticue. ²¹ Jerusalémo cue illa mei, Siria railla eniruemo jaidicue. Cilicia railla eniruemo jai jaidicue. ²² Judeamo ite Cristona inotinodi cuena nia cioñedimaci. ²³ Cuena iese fididimaci: “Navui caina duere finocabidimiedi Jesucristo rafuena jai lote. Jesucristona cai inuana navui jitaiñede. Caina fuidoacade”. Jiaie cue finoca rafuena faiñedimaci. ²⁴ Ie fidiamona, cueri Jusiñamuimo iobillacinona jai fecadimaci.

2

Jerusalémo Pablo jailla rafue

¹ Catorce años illanona, Jerusalémo dane jaidicue. Bernabé cue diga jaide. Titona uiticue. ² Jusiñamui cuemo llua jira, nainomo ite creyentiaimo jaidicue. Judíuaiñedino Cristo rafuena jai inuana cue lollena, jaidicue. Cue llofuiana naimaci raise uiñollena, creyentiaí illaicominimo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaia mei, cue llofuiana: “Mare” raitimaci. ³ Tito cue diga ite. Naimiedi judío nairai imieñede; iadedi naimaci abina detacabilla isoi, creyentiaí illaicomini dinena naimie abi detatajana lloñedimaci. ⁴ Creyentiaína abi caitadino billa jira, Tito abina detatajana siadoticaí. Naimacina cai uaidoñeno bitimaci. Moisés micori llogacinuai anamo cai inenana naimaci uiñollena, bitimaci. Cristo Jesús cai inua jira, Moisés micori llogacinuaido jai jaiñedicai. Moisés micori llogacinuai anamo caina dane itatallena, iena uiñoiacadimaci. ⁵ Cai mare rafuena jiaiena jaca meidoñellena, naimaci ñaiana dallu cacareñedicai. Uanaicinona omoí uiñuana jitaídicaí. ⁶ Naie creyentiaí illaicomini omoimo lollena, cuemo jiaie rafuena lloñedimaci. Illaicominina raillanodimaci; iadedi cuemona jamai bue isoidimaci. Jusiñamui nana comini daje isoi feiñua jira, naimaci uai cue uai baiñemo faiñede. ⁷⁻⁹ Cue llofuiana rairuiñedimaci; iadedi creyentiaí illaicomini cuena Bernabé diga marena feiñotimaci. “Daje isoi comeciaina facadicaí” raillamona, cue llofuiana: “Jai mare” raitimaci. Creyentiaí illaicominidi Jacobo, Pedro, Juan digamie. Judíuai dine Pedrona Jusiñamui oretaja isoi, cue llamona judíuaiñedino dine Jusiñamui cuena oretajana uiñotimaci. Pedro llamona Jusiñamuidi ailluena judíuaina creyentiaína itatate. Cue llamona, Jusiñamuidi ailluena judíuaiñedinona creyentiaína jiaí itatate. Iemona Jusiñamui uai cuemo illana jai uiñotimaci. Judíuaiñedinomo Jesucristo rafuena llocana nia coco jaillana jitaídimaci; iadedi judíuaimo Jesucristo rafue llocana nia jaidimaci. ¹⁰ Daje rafue como llotimaci. “Duerede creyentiaína canocabi” llotimaci. Iena iocire finoacadicue.

Antioquíamo suide rafue

¹¹ Antioquíamo cue jailla mei, Pedro nainomo jiaí jaide. Nainomo Pedro bia, marañedifue naimie finua jira, naimie uiecomo naimiemo riire lloticue. ¹² Nainomo Pedro nano rilla mei, nana creyentiaí diga nainomo naimie guisoide. Judíuai creyentiaí diga, judíuaiñede creyentiaí diga, danomo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judíuaiñede creyentiaí diga Pedro jai guñede. Ie inoga rafuedo naimie jai jaiñede. ¹³ Naimie iese illamona, judíuai creyentiaídi judíuaiñede creyentiaí diga jai jiaí guñedimaci. Pedro

illa isoi, Bernabé iedo jiai jaide. ¹⁴ Naimaci iese illa jira, Jesucristo rafuedo raise jaiñedimaci. Uanaicinodo jaiñedimaci. Iena cue uiñua jira, nana comini uicomo Pedromo lloticue: “Judío nairai imedio; iadedi o jeacinomona o jilloillena, cai einamaci llucinodo birui jaiñedio. Ie jira, ¿bue ñellena judíuaiñedino cai einamaci llucinodo jaillana jai jitaideo?”

Judíuaidi creyentiaina jailla mei, Moisés micori llogacinuaido jai jaiñedimaci

¹⁵ Nia lloticue: Judíuaiñedinodi Moisés micori lloga uaina jaie uiñoñedimaci. Caidi judíuaina jeicigacai. Ie muidona Moisés micori llogacinuai anamo jaie jeicigacai. ¹⁶ Iese iticai; iadedi Moisés micori llogacinuaido jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona ñnuamona marebicaidicai. Iena uiñoticai. Ie jira Cristo Jesúsna ñnoticai, cai marebicaillena. Cai marebicaillena, Moisés micori llogacinuaina ñnoñedicai. Moisés micori llogacinuaina ñnuamona, jaca buna marebificainide. ¹⁷ Jusiñamuimona cai marebicaiacallena, Cristona cai ñnuamona jeacino finoraiñedicai. “Cuenta ñnuamona, marebicaitomoi” Cristo iese llofueuide. Naimie llua isoi cai marebicaiñenia, cai jeacinomona nia cai jilloñenia, Cristo muidona; iadedi iese iñedicai. ¹⁸ Moisés micori llogacinuai jai jamañocaidicue. Ie jira naicinuai dane abido cue oia, iena birui cue ñnoñena jira, jai jeacino finoraimedicue. ¹⁹ Iemona cue marebicaiñena jira, Moisés micori llogacinuai cuemo jai duiñede. Ie anamo jai iñedicue. Ie muidona Jusiñamui llogacinuaido jai jaidicue. Cristo anamo jai iticue. ²⁰ Naimie díbeimo jai iticue. Cristo cuemo ite. Cristo cuena namatade. Jusiñamui Jitona cue ñnocana jai jaidicue. Cuena isiruillamona, naimie jitaillamona, cueri fiodaite. ²¹ Jusiñamui caina duenaillena jamañedicue. Jusiñamui jitailla isoi, Moisés micori llogacinuaina cai ñnuamona marebicaidicaina, Cristo tainomo niade fiodaite.

3

Jesucristona ñnuamona judíuaidi Jusiñamui Joreña feiñotomaci

¹ Gálatas imaci, abina jai uiñoñedomoi. Jiaino omoína birui jifueete. Omoimo Jesucristo cruzmo fodailla rafuena jaie marefodo lloticue. Iena raise cacadomoi. ² Ie jira omoimo buena jicanoiacadicue: ¿Ñiese Jusiñamui Joreña jaie feiñotomoi? Moisés micori llogacinuaido jaillamona iena feiñoñedomoi. Jesucristo rafuena omoi cacajamona, ñnotomoi. Ie mei Jusiñamui Joreña feiñotomoi. ¿Ñiese birui abina uiñoñedomoi? ³ Omoi marebicaillena, Jusiñamui Joreño omoimo jai ite; iadedi Moisés micori rafuena dane omoi jaiacanamona, omoi jiaie finolle rafuemona jai marebicaiacadomoi. ⁴ Jusiñamui Joreñomona diga marecinuaina feiñotomoi; iadedi iena jai jitañedomoi. Iese omoi illana ñnoñedicue. ⁵ Dane jicanoiticue: ¿Ñiese Jusiñamuidi ie Joreño omoimo fecade? ¿Ñiese siño rafuena omoiri finode? Moisés micori llogacinuaido omoi jaillamona ie Joreño omoimo fecañede. Moisés micori llogacinodo omoi jaillamona, siño rafuena omoiri finoñede; iadedi Jesucristo rafue omoi cacajamona, iena omoi ñnua jira, ie Joreña fecade. Iemona siño rafuena omoiri jiai finode.

Abraham micori Jusiñamuina ñnua muidona marebicaide

⁶ Abraham micori ie rafuena lloticue. Naimie micorimona fueoiticai. Moisés micori naimiena cuete: “Abraham micori Jusiñamuina ñnua jira,

Jusiñamuimona naimiedi marebicaide”. ⁷ Iena cai cacajamona, Abraham micori isoi cai ñnuamona, naimie ua cominina cai illana uñotícaí. ⁸ Jusiñamuidi judíuñedino ico marebicailena jaie uñote. Naimiena ico naimaci ñnollena jaie jiai uñote. Iena uñuamona, Jusiñamuidi ico suille rafuena Abraham micorimo jaie llote. Mare rafue naimiemo llote: “Nana cuena o isoi ñnotinona marebicaitaicue” llote. ⁹ Abraham micoridi ñnote. Jusiñamui naimiena marebicaitate. Ie isoide. Nana Jusiñamuina ñnotinona marebicaitate; ¹⁰ iadedi nana Moisés micori llogacinuaido jaidino jai faidobidimaci. Moisés micori iena jaie cuega: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicai. ¹¹ Biena uñotícaí. Moisés micori llogacinuaido jaillamona, Jusiñamuimona jaca buna marebicaiñede. Jusiñamui facaina lloraíma iena jaie cuete: “Jusiñamuina ñnuamona marebicaidimaci. Ie mei jaca iitimaci”. ¹² Moisés micori llogacinuai daje isoñede. Nana Moisés micori llogacinuaina ñnuamona comini marebicaide. Moisés micori iena jaie cuega: “Cue lloga uai ñnuamona, marebicaidimaci. Iemei jaca iitimaci”. Jusiñamuina ñnuana lloñede: ia ie lloga uai finollena cominimo llote. Nana ie lloga rafuena ñnuamona, cominidi marebicaidimaci.

¹³ Moisés micori llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caína jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuega: “Cruzmo cuinacamei Jusiñamuimona jai faidobide”. ¹⁴ Jusiñamuina naimie ñnuua jira, Abraham micori jaie marebicaide. Jesucristo fiodailla muidona, naimiena judíuñedino ñnuamona, Abraham micori isoi marebicaidimaci. Jusiñamuidi ie Joreñona caímo fecallena jaie llote. Ie muidona Jesucristona ñnuamona, Jusiñamui Joreñona birui feñotícaí.

Jusiñamui lloga rafue

¹⁵ Cue amatiai, bie rafuemo comeciaina faca. Nie isoide rafuena menamié ñnoacania, naie rafuena feitañellena, rabemo cuetiñaimai. Iaimaiái namecina nainomo cuia mei, jiairuido damie naie rafuena jiaífo dama meidonide. ¹⁶ Ie isoide. Jusiñamuidi Abraham micorimo ico suille rafuena jaie llote. Iena naimie llua jira, iena meidonide. Ie uruiaímo ico suille rafuena lloñede; ia daje uruemo ico suille rafuena llote. Cristona ññate. ¹⁷ Biena lloiacadicue. Naimie jilloillena, Jusiñamuina naimie ñnuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jiaie rafuena llote; iadedi Abraham micorimo jaie lloga rafuena meidoñede. ¹⁸ Jusiñamui llua jira, Abraham micori jillode; iadedi Moisés micori llogacinuaido cai jaillamona, cai jilloiadedi, Abraham micori isoi jilloñedicai. ¹⁹ Iese itena, ¿bue ñellena Jusiñamui Moisés micorimo jiaie rafuena llote? Naiemona jeacinona cai uñollena, iena llote. Naie rafue ite, Cristo eníruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena ofedicai. Jusiñamuidi ie jaienisaimo naie rafuena llote, Moisés micorimo iena llollena. Ie mei Moisés naie rafuena cominimo llote; ²⁰ iadedi Jusiñamuidi Abraham micorimo ie rafuena atona llote. Jiaimiemo iese lloñede, Abraham micorimo iena llollena.

²¹ Moisés micorimo Jusiñamui rafuena llote; ia naiemona Abraham micorimo llogacino nia saiñede. Cai jilloillena, cai jaca illena, Moisés micorimo Jusiñamuidi rafue ñnuana llotena, naie rafuena cai ñnuamona marebicaidicai; ²² iadedi Moisés micori cuegafuiaidi nana comini jeacino

anamo illana llote. Moisés micori llogacinuaido jaillamona, jeacino anamona jilloñedicaí. Jesucristona cai ñnuamona Jusiñamui llua isoi, jeacino anamona jillodicaí. ²³ Jesucristona ñnuana nia cai uiñofenia, Moisés micori llogacinuai anamo iticaí. Jesucristo billamona, naimiena ñnuana uiñoticaí. ²⁴ Moisés micori llogacinuaidi cai lletarafue. Cristo dibeimo cai illena caina lletade. Cristona cai uiñuamona, naimiena cai ñnuamona, marebicaidicaí. ²⁵ Naimiena ñnuana jai cai uiñuamona, naie lletarafuena jai ofedicaí.

Abraham micori ua uruiái

²⁶ Cristo Jesúsna ñnuamona, nana omoi Jusiñamui cominidomoi. ²⁷ Cristo dibeimo omoi illamona, bautizagaomoi. Iemona naimie Moodi jiai omoi Moo. ²⁸ Jusiñamuimona dajena itomoi. Naimiedi nana cominai feiñote. Judíuaina omoi illamona, omoina feiñote. Judíuainedinona omoi illamona, omoina feiñote. Mullaiaína omoi illamona, omoina feiñote. Mullaiaíñedinomoidena, omoina feiñote. Iññaína omoi illamona, omoina feiñote. Riñoniaína omoi illamona, omoina feiñote. Jesucristona omoi ñnuajira, jaca damacidomoi. ²⁹ Cristomo omoi jai duiadedi, Abraham micori cominidomoi. Ie jira Jusiñamui Abraham micorimo lloga rafuemo jiai jainaiadomoi.

4

Jusiñamui uruiaina jaidicaí

¹ Moisés micori llogacinona dane lloiticue. Jiaie rafuedo iena lloiticue. Riaí uruiái moo fiodailla mei, ie moo raruiaidi nano doforamiemo fiebide. Naie nano doforamie uruena, naimie mamecido naimiemo jiide. Naimiemo nia raise jiñede. Naimiedi nia jamaí ite isoide. Naimie ie jofomo mullaiaí isoi ite. ² Naimie moo llua dinori jiaíno anamo naimie ite. Ie moo raruiái jiaíno anamo jai ite. Naimie jai eimiena illemona naimie moo raruiaidi naimiemo raise jai duite. ³ Jaie daje isoidicaí. Uruiaí isoidicaí. Cai jaiagai llogacinuai anamo iticaí; ⁴⁻⁵ iadedi ie jitailliruimo Jusiñamuidi ie Jitona orede, naicinomona caina jilloitallena. Jusiñamui uruiaina cai jaillena, ie Jitodi naicino anamo riñomona jeiciga. ⁶ Naimie uruiaidicaina jira, Jusiñamuidi ie Jito Joreño cai comeciámo orede. Naimiena cai feiñuanona, naimiedi caina Jusiñamuina: “Cai Moo” raitatate. ⁷ Ie jirari jiaíno anamo jai iñedomoi; iadedi Jusiñamui uruiadomoi. Jusiñamui uruiadomoina jira, nana naimie lloga rafue omoímo jai duide.

Moisés micori llogacinuai anamo omoi jaiá, danomo abido jaidomoi

⁸ Jaie Jusiñamuina nia omoi uiñofenia, ua jusiñamuillaíñede ra anamo itomoi. Naie isoide rana sedaidomoi. ⁹ Jusiñamuina jai uiñotomoi. Naimie omoina jai uiñote. ¿Bue ñellena omoina marebicaitañede rafuedo dane jaiacadomoi? Omoina jilloitañede rafue anamo dane iacadomoi. ¹⁰ Judíuai comini rafuena finocabillarumo jai finocabidomoi. Iemona: “Marebicaiticaí” raillanona iese finocabidomoi. ¹¹ Cue lloga uai omoi finoñena jira, omoímo tainona jai lloticue. Nibai jai tainomo maijidicue.

Pablo naimaci diga illana uibiñote

¹² Cue amataí, omoi dine nano cue jaia, Moisés micori llogacino anamo iñedomoi. Naie llogacino anamo jaie iticue; ia birui ie anamo iñedicue. Birui cue illa isoi omoi illana jai jitaoidicue. Omoi dine cue nano ia, cuena raise feiñotomoi. ¹³ Cristo rafuena omoímo nano cue llua facaiseconi duidicue. Iena uiñotomoi. ¹⁴ Cue duico omoimona jacire eruaide; iadedi

cuenta jearuñedomoi. Jusiñamui jaienici omoi dine billa isoi, cuenta feñotomoi. Jesucristo omoi dine billa isoi, cuenta jiaí feñotomoi. ¹⁵ Jaie caimare iticai. ¿Niese birui cue diga caimare iñedomoi? Cuenta omoi canoitena, cuemo fecallena, omoi uisi jaie jino juiconoiacadomoi. ¹⁶ Omoimo jicanoiacadicue: ¿Uanaicunai omoimo cue llua jira, omoi enoillamiena jai jaidicue? ¹⁷ Moisés micori llogacinuaido jaidino omoina eo nabairitimaci; iadedi mare rafuena finoacaiñedimaci. Naimaci diga omoi nabairillena, cue diga omoi nabairillana jai jitañedimaci. ¹⁸ Mare comeciainona cuenta omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiaí mare. ¹⁹ Cue uruai, Cristo omoi comeciaina raise namataja dinori, omoi ri cue comeci eo duere dane llicidaite. ²⁰ Omoi diga ja iacadicue, omoi diga atona raise ñaillena. Omoimona are cue illa jira, dane raise cai nabairillena, omoimo cue llua raise uiñoñedicue.

Jesucristo rafue Moisés micori llogacinuai baifemo faite

²¹ Moisés micori llogacinuai anamo iacadino, omoimo daje rafuena jicanoiacadicue: ¿Moisés micori cuezafuaina raise cacadomoi? ²² Moisés micori jaie cuezaga: “Abraham micorimo mena jito ite. Daje jito ie mullañomona comuide. Jiaie jito ie mullaiañediñaiñomona comuide. Naiñaiñodi ie nanoca ai. ²³ Abraham micori jitailla jira, ie mullaño jitona comuitate; iadedi ie mullaiañediñaiño jito comuide, Jusiñamui llua jira”. ²⁴⁻²⁵ Naie rafuemono cai fueolle. Ie iañuaidi mena jai lloga rafue isoidiañuai. Abraham micori mullaño mameci Agar micori. Naiñaiñodi Sinai railla anedumona lloga rafue isoide. Arabia railla eniruemona Sinaimona Jusiñamuidi Moisés micorimo rafuena llote. Naiñaiño mullañona jira, ie urue mullaimana jeiciga. Ie nama anamo jaca ite. Ie isoide. Moisés micorimo llogacinuaido jaidinodi naie rafue anamo itimaci. Jerusalémo itino Moisés micori llogacinuai anamo jai nia illa jira, Agar micori Jerusalén railla nairai isoide. ²⁶ Jiañaiñodi jiaie lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullañoñena jira. Nainomo jainaiaidicai, Moisés micori llogacinuai anamo jai cai iñena jira. ²⁷ Isaías micori iena jaie cuete:

Oiniño, mai iobi.

Urue nia jocoñediñaiño, ado iobi.

Ñirediñaiño baifemo eo uruaiarenitio.

Iemona Moisés micori llogacino anamo iñedinomona Cristona ñnotinona ailluena jaillana uiñoticaí.

²⁸ Cue amatai, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruaina jaidicai. ²⁹ Ero, mullaño jitodi mullaiañediñaiño jitona jaie duere finouide. Daje isoi Moisés micori llogacinuai anamo itinodi Jusiñamui Joreño anamo itinona birui duere finocabidimaci. ³⁰ ¿Niese cai nibaille? Moisés micori Sara micori llua jaie cuete: “Mullañona, naiñaiño jito diga, oni dota. Ie moo fiodailla mei, mullaño jito ie moo raruaina feñoteite. Dama mullaiañediñede jito ie moo raruaina feñoteite”. ³¹ Ie jira mullaño urue isoñedicai Moisés micori llogacinuai anamo jai cai iñena jira, mullaiañediñaiño urue isoidicai.

5

¿Nie isoide rafuedo jaitomoi?

¹ Moisés micori llogacínuaí anamona Cristodi caina jai jillotate. Ie jira omoi comeaiña ocuiño. Jaie omoi illa isoi, dane jaiñeno. Omoi marebicaitañede rafue anamo jaie itomoi. Ie jira Moisés micori llogacínuaí anamo iñeno. Iemona marebicaiñeitomoi. ² Jeacínomona omoi jillobillena, Moisés micori llogacínodo omoi jaiacanamona, omoi abiaña omoi detataia, Cristo rafuena jai jitaiñedomoi. ³ Dane lloiticue: Jeacínomona omoi jillobillena, naga abina detatagamie nana Moisés micori llogacínuaína ñnua. Nana iena ñnoñenia, naimie jilloñeite. ⁴ Moisés micori llogacínuaína ñnuamona omoi marebicaiacania, Cristo rafuena jai duiñedomoi. Jusiñamui caina duenailamona, Cristona jaie cai dine orede. Moisés micori llogacínodo omoi jaiacania, Cristo rafuena jai jitaiñedomoi. ⁵ Moisés llogacínuaína ñnuamona marebicaiñedicai; iadedi Jesucristona cai ñnuamona, Jusiñamui Joreño caina canuamona, cai marebicaillemo iocire ocuiridicai. ⁶ Abina detatajamona, cai jeacínomona jilloñedicai. Abina cai detatañenamona, jai jilloñedicai. Dama Cristona cai ñnuamona jillobidicai. Naimiëna cai ñnua jira, nana cominina isiruicana jaidicai. ⁷ Cristo rafuedo navui marena jaidomoi; ia damerie uanaicínona omoi ñnuana jai jitaiñedimaci. ⁸ Jusiñamuimona naimaci uaina oñedimaci. Jusiñamui omoína navui uaidote, naimie dibeimo omoi illena.

⁹ Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damie jiaie rafuedo jai, diga cominina jifuerede, naimie jailla dibeido jaillena. ¹⁰ Jiaie rafuedo omoi jaiñellemo cue comeina jai facadicue. Cai Nama cue ñnua jira, cue lloga uaido omoi jaillemo cue comeina jai facadicue. Omoi comeiaína naganomo itatatimiëna uifioñedicue; iadedi Jusiñamui naimiëna duere finoite.

¹¹ Cue amatiai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira. ¹² Omoi comeiai naganomo itatatinodi raitimaci: “Janore jisa abina detatajamona, cai jeacínomona jillobidicai”. Iese itena, Jusiñamuina uifioñedino finua isoi, namiëna naimaci abiai diana jiai jitaidicue.

¹³ Moisés llogacínuaí anamona Jusiñamui omoína jai jillobitade; iadedi marañede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiaie cominina cano. ¹⁴ Moisés micori iena jaie llote: “O abi o isiruilla isoi, o ecimo itinona isirui”. Iena omoi finoia, nana Moisés micori llogacínuaína jai finodomoi. ¹⁵ Iese omoi finoñenia, conima diga omoi riire iciria, jaca danomo iñeitomoi.

Jiaie cominina omoi isiruilla rafue

¹⁶ Omoimo nia lloiticue. Jusiñamui Joreño omoi comeiaimo namatajano omoi i. Omoi comeiaimo ite marañedicinodo omoi jaiñeno. ¹⁷ Cai comeiaimo ite marañedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; ¹⁸ iadedi Jusiñamui Joreño anamo omoi raise ia, naimie lluaña omoi raise ñnoia, Moisés micori llogacínona jai jitaiñedomoi. ¹⁹ Ero, marañede comeiaimo iticínodo omoi jai, bie isoidicínona finocabidomoi: añede riño diga illacina, iniñede ñma diga illacino, jeare ñaiacino, diga eo jearede rafuena finuacino, ²⁰ jiraraina sedajacino, aimar ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comeina facajacino, nana cominina uaitaillacino, damacina iñenacino, ²¹ dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jaie lloticue. Dane lloiticue: Bie isoide rafuena bu

finocabia, naimie cominina naimaci iñena jira, Jusiñamui ie cominina sedajanomo jainaiñeite. ²² Jusiñamui Joreño omoi comeciaino namataia, bie isoidicinona finocabidomo: nana comini isiruillacino, comeci caimare illacino, uri illacino, raire iciriraininacino, duenaillacino, jiaie cominina canuacino, ie lloga uaina finuacino, ²³ uai oñenacino, abina eenuacino. Moisés micori llogacinuai bie isoidicinona ñaíñede. ²⁴ Cristo Jesúsno jainaiñidinodi naimaci maraiñede comeciá jitaillacino anamo iñedimaci. ²⁵ Jusiñamui Joreño caimo illa jira, naimie cai comeciaina namatajacinodo cai jaillesa. ²⁶ Iemona abina cai birifñellesa. Abina jiaí cai iedoñellesa.

6

Jiaie llofuiacino

¹ Cue amatiai, omoimona damie ebena jamai jeacinona finoia, dane Jusiñamui díbeimo naimie raise illena, naimiemo fecuise iciñeno lloño. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoí raillano, nagamiái abi rairuillesa. ² Bu duere sefuia, bu Taife ramo faia, coninina cano. Iese omoi canoia, Cristo llogacinuaina jai ñnotomoi. ³ “Cuemo iese suiñeite. Dama abina sedadicue. Jamai bue isoíñedicue” comecina facadimie dama abina jifueite. Naimie jamai bue isoide. ⁴ Maraiñeni raillano, ie finoca rafueconi iobillena, nagamiái ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jaiñiemo ite maijia rafuedi naimiemo duiñede. ⁵ Naimie finoca rafuemona nagamie jeacinona finoia, dama naimie muidona. ⁶ Naga Jesucristo rafuena fueotimiedi ie llofegamiemo mare ra fecalle. ⁷ Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamuimona iba feiñoite. ⁸ Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca ite. Faifñeite. ⁹ Jusiñamui Joreño jitaillacinona finuana sefuiruiñeno. Cai comeciá cai ocuiñoia, Jusiñamui jitailla facaiseconi ibana feiñoiticaí. ¹⁰ Ie jira nana cominina canocabi. Nana creyentiaina ua eo canocabi.

Facaduacino

¹¹ Ero, jerie cuiano omoimo bie facaimo cueticue. ¹² Jiaie cominimona iobillacinona omoi abiaína detatajana jitaidino feiñoiacana jira, omoi abiaína detatajana jitaidimaci. Cristo rafue lloticainadedi: “Cristo rafuena uiñoñedinodi niade duere caina finodimaci” raillanomo comeciaina facajamona, iese jitaidimaci. ¹³ Omoi abiaína detatajana jitaidinodi Moisés micori llogacinodo raise jaiñedimaci. Nana iena iñoñedimaci. Omoi abina iedoiacana jira, omoi abiaína detatajana jitaidimaci; ¹⁴ iadedi Jusiñamuidi jiaie rafueri abina cue ieduanana jitaiñede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaiñedicue. Naie rafue anamo jai iñedicue. ¹⁵ Abina diamona cai jeacinomona jilloñedicai. Abina deñenanomona jaca jilloñedicai; iadedi Jusiñamui Joreño caina comonori comuitajamona jillobidicai. ¹⁶ Jusiñamuidi nana bie llucacinodo jaidino uri itatatesa. Naimie naimacina duenaillasa. Jusiñamui cominidi ua jaca iese illasa.

¹⁷ Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellaña jai oticue.

¹⁸ Cue amatiai, cai Nama Jesucristo omoína duenaillasa. Mai. Pablodicue.

EFESOMO ITE CRISTONA HNOTINOMO PABLO ORETAGA RABE

Efesomo ite creyentiaimo Pablo cartana orede

¹ Efeso railla nairaïmo ite creyentiaï, Pablocicue. Bie carta omoï dine oredicue. Ie rafue lollena, Jusiñamui jitailla jira, Jesucristo oretagamedicue. Naimiemo omoï jai jainaïailla jira, Jesucristona ñnocana jai jaidomoï. ² Cai Moo Jusiñamui, cai Nama Jesucristo diga, omoina duenaicabillana uiñocana mai omoï jai. Iaimaiaï omoï comeciaïna uri itatajacabillana uiñocana mai omoï jai.

Cristomo jai cai jainaïailla jira, Jusiñamui marena itatajacinona feiñoticaï

³ Cristomo cai jainaïailla jira, Jusiñamui caina eo marena itatate. Ie jira cai Moo Jusiñamui iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaïailla jira, cai comeciaï marena itatajacinona Jusiñamuïmona jai feiñoticaï. ⁴ Iena ja lloiticue. Enirue nia iñenia, Jusiñamui nana naimiena ñnotinona jaie fetode. Cai facaina Cristo ico fiodaillena naimie uiñuamona, caina jaie fetode. Naimiemona cai marebicaillena, jeacinona cai finoñellena, caina fetode. ⁵ Caina isiruïllamona caina fetode. Naimie eo jitailla jira, naimie uruiaina cai jaïllena, caina fetode. Jesucristo fiodaïllamona Jusiñamui uruiaina jaidicaï. ⁶ Naimie caina fetuamona, naimie caina duenaïllana jai uiñoticaï. Iemona naimiedi eo mareuidimiëna jai jai uiñoticaï. Ie isiruïga Jitomo cai jainaïaïllamona iena uiñoticaï. Naimiemo buena cai finoñenia, caina duenaite. Naimiena cai iobitallena, caina fetode. ⁷⁻⁸ Caina eo duenaïllanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jai oñeite. ⁹ Naimiena cai raise ñnollena, caina abina jai uiñotade. Jusiñamui caina naimie nana caina birui jilloitaïacanana jai uiñotade. Cai cominidi iena jaie uiñofedimaci; iadedi Jusiñamui jitailla dieise Cristo finoca rafuedo caina iena jai uiñotade. ¹⁰ Naimie jitailla facaiseconi, nana caïmo ie finoacalle rafue fuiduanona, Cristo anamo naimie nagamiëna raise itataite. “Cristo cai Nama” raitimaci.

¹¹ Ie jira naga suide rafue suïcana jaide, Jusiñamui jitaïllacinona fuidollena. Nana naimie jitailla dieise, naimie comeci jitailla jira, nana iena finode. Nano facaiseconi naimie cominina cai jaïllana naimie uiñuanona, caina jaie fetode. Ie muidona naimie cominina jai jaidicaï. ¹² Naimie caina fetuanona Cristona jaie ñnoticaï. Naimie diga ico jaca cai illemo birui ocuiridicaï. Naimiena cai iobitallena caina fetode. “Naimie fue eo mare” cai raïllena caina fetode. ¹³ Cristona jai birui ñnotomoï. Uanaïcino rafue omoï jai cacajamona, naie mare rafue omoï cacajamona, omoï jeacinomona jai jillobidomoï. Jusiñamui Joreño omoïmo illano, navui Cristo llua isoi, naimie dibeïmo omoï illana uiñotomoï. ¹⁴ Jusiñamui Joreño caïmo jaca illa jira, Jusiñamui diga ico cai jaca illena uiñoticaï. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raïllamona, naimiena iobitaïticaï. Naimiemo cai jainaïailla jira, naimiemona nana cai comeciaï marena itatajacinona feiñoticaï.

Naimiaï facaina Pablo jüde

¹⁵ Cai Nama Jesúna omoi iinuana jai fididicue. Nana jiaie creyentiaina omoi isiruillana jiai fididicue. ¹⁶ Ie jirari Jusiñamuimo cue jiaia, omoiina feitañedicue. Omoi facaina naimiemo iobillacinona jaca fecadicue. ¹⁷ Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jianona, omoi facaina jicanoticue. Naimie Joreño uaido naimie rafue raise uifocana omoi jaillena jicanoticue. Naimiena raise uifocana omoi jaillena jicanoticue. Iese omoi facaina jicanocabiticue. ¹⁸ Naimie dibeimo omoiina naimie jai uaidua jira, naimie diga ico jaca omoi illemona, iena omoi raise uifhuana jitaidicue. Naimie cominina omoi jai jailla jira, naimie illanomo ico eo marena iocire iitomo. Iena omoi raise uifhuana jitaidicue. ¹⁹ Naimie uai ua eo siñonana omoi uifhuana jitaidicue. Naimiena cai iinua muidona, ie uaido naimie caina canorede. Iena omoi raise uifhuana jitaidicue. ²⁰ Fiodaillamona Cristona ie uaido Jusiñamui jai jillotaja jira, naimie uai siñonana uifhotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate. ²¹ Ie jira Cristo nana Jusiñamui jaienisai afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaimaiai isoide joreñuai afemo naimie ite. Birui iese ite. Ico iese nia iite. ²² Jusiñamuidi naga ra Cristo anamo ua jai itatate. Cristona nana creyentiai imaci illaimana jiai ua jai itatate. ²³ Cristomo daajena nana cai creyentiaidicai duidicai. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

2

Jusiñamui caina isiruilla jira, cai jeacinomona jai jillobidicai

¹ Jusiñamuina jaiie omoi nia iinoñenia, naimiemo omoi duiñena jira, naimiemona fiodaitino isoidomoi. Jeacino anamo omoi illa jira, naimiemona fiodaitino isoidomoi. Jeacino finocana jaidomoi. Maraiñedicinona finocana jaidomoi. ² Jeacinoa eburuitomoi Jusiñamui dibeimo iñedino rafuedo jaidomoi. Taife dibeido jai jaisoidomoi. Jusiñamuina oiacañedino Taife jitailla rafuedo jaisoidimaci. ³ Naimaci isoi jaiie nana iticai. Cai comeciaino ite jearede jitaillacinona finodicai. Iedo jai jaisoidicai. Ie jira Jusiñamui riicaillafue anamo jaiie iticai. Iese jaiie nana iticai. ⁴⁻⁵ Jeacinona jaiie cai finua jira, jeacino anamo iticai. Jusiñamuina iñoñedicai; iadedi Jusiñamui caina eo duenaillanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iitcaci. ⁶ Cristona jillotaja mei, Jusiñamui ie ecimo naimiena dane itatate. Cristomo cai jai jainaiaila jira, Jusiñamui nainomo caina jiai jainaiatate. ⁷ Cristo finoca rafuejona caina iese jai itatate. Caina iese jai itatajamonana, nana cominidi Jusiñamui caina eo duenaillana uifhoitimaci. ⁸ Naimie caina duenaillanona, caina jai jillotate. Jaca buena cai finuamona jillobiñedicai; iadedi naimie jitailla jira, naimie caina jai jillotate. ⁹ Cai jilloillena jaca buena cai finoñena jira, abina iedoñedicai. ¹⁰ Jesucristomo cai jainaiailamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaiie facajano, mare rafuena finocana cai jaillena, naimiedi cai comeciaina marena itatate.

Cristomo jai cai duilla jira, jiaie nairaiiai diga birui uri iticai

¹¹ Omoi jaiie isoillana uifhotomoi. Iena comecitomoi. Jusiñamuina jaiie uifhoñedomoi. Juduaiñedinona omoi jeicifhena jira, cai juduai comini isoi

abiaina detatañedomoi. Ie jira cai cominimona maraiñedomoi. ¹² Omoi jeacinomona Cristo omoina jilloitaiacanana naie facaiseconi uiñoñedomoi. Cai judíuai nairaimo jainaiañedomoi. Ie muidona Jusiñamui cai judíuai cominimo jaie lloga rafuena uiñoñedomoi. Jusiñamuina nabaiñedomoi. Jusiñamui diga omoi ico jaca illena uiñoñedomoi. Jusiñamuina omoi uiñoñena jira, naimiena sedañedomoi. ¹³ Naimie dibeimo jaie jaiñedomoi; iadedi Jesucristomo birui duidomoi. Jusiñamui jaie ñnoñedomoi; iadedi Cristo jai fiodailla jira, naimiena birui ñnotomoi. Naimiena omoi jai ñnuamona, cai diga naimie dibeimo jai itomoi. ¹⁴ Naimie omoi comeciai jai uri itatate. Cai comeciai jiai jai uri itatate. Cai judíuaimona omoina jaie jearuiticai. Iese jaie iticai; iadedi Cristo muidona daní coninina nana birui nabaidicai. ¹⁵ Cristo fiodaillamona Moisés micori jaie llogacino anamo jai iñedicai. Naie llogacino daní cai judíuaimo duilla jira, Jusiñamui dibeimo jaie iñedomoi; iadedi Cristo finoca rafue muidona, birui daajena jaidicai. Omoina jaie cai gaiñena jira, omoina jaie nabaiñedicai; iadedi Cristomo daajena cai duilla jira, birui nabairedicai. ¹⁶ Cruzmo Cristo fiodailla jira, Jusiñamui dibeimo cai illamona, mena nairaimona caina daje nairaina jai itatate. Ie jira daje nairaina uri iticai. ¹⁷ Cristo jaie billanona, mare rafuena llote. Omoi judíuaiñedinomo, cai judíuaimo, comeciai uri illana llote. Nana caina jilloitaiacanana llote. ¹⁸ Naimie muidona Jusiñamuina jai nabairedicai. Jusiñamui Joreño caina canuamona, naimie diga birui nabairedicai. ¹⁹ Jusiñamui cominina omoi jai illa jira, nana naimiena ñnotino diga Jusiñamuimo daajena duidomoi. Caimona birui jiaie comiñedomoi. ²⁰⁻²² Jofo isoidicai. Jofona cai finoacania, naie ibiri nano finodicai. Ie mei diga rana cai atiamona, iena niticai. Ie isoide. Diga jiaie isoide cominaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena ñnoticai. Iena cai ñnuamona, naimie jitailla isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciaino jai ite.

3

Judíuaiñedinomo Pablo Cristo rafuena llofue

¹ Jesucristo rafuena omoi judíuaiñedinomo cue llofueuilla jira, cárcelmo iticue. ² Omoina naimie duenaiñanona, omoina llofueuilla, Jusiñamui cuena oretate. Iena jai uiñotomoi. ³ Jusiñamui cuemo jaie uiñoñega rafuena jai llote. Naie rafuena janore como jai cueticue. ⁴ Bie carta omoi facaia, Cristona jaie uiñoñega rafuena cue jai uiñuana uiñoitomoi. ⁵ Jusiñamuidi cominimo iena jaie raise uiñotañede; iadedi ie Joreñodo Cristo facaina llorainina iena birui jai uiñotade. ⁶ Iena lloiticue. Judíuaiñedomoi; iadedi Jusiñamui cuemo jaie llote: “Judíuaiñedinomo Cristona ñnuanona, omoi judíuai isoi jilloitimaci” llote. Omoi facaina Cristodi fiodaite. Naimiena omoi ñnoia, omoina ie uruiaina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi ñnuamona, naimie jai llua isoi, Jusiñamui diga ico jaca iitomoi. Jusiñamui cuena iena jaie uiñotade. ⁷ Jusiñamui jitailla jira, cuena naimie duenaiñanona, naimie uai cuemo illamona, naie mare rafuena llofuecabiticue. ⁸ Creyentena nia cue jaiñena facaiseconi, creyentaina jaie cue duere finouilla jira, jamai bue isoidicue. Nana jiaie creyentia cue baifemo faitimaci; iadedi Jusiñamui cuena duenaiñanona, ie rafuena cue lloilla, cuena oretate. Cristo caina eo raise marena canocabillana

llofuecabiticue. ⁹ Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitailla jira, naie jaie uiñoñega rafuena jaca buna jaie raise uiñotañede. Nana comini iena birui raise uiñollena, cuena oretate. ¹⁰ Judiuaiñedino judiuai diga creyentiaina jaillamona, Jusiñamui jaienisa naimie uai siñonana uiñoitimaci. “Naimie fue eo mare” raitimaci. ¹¹ Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitailla rafuedi suide. ¹² Cristona cai ñnua jira, Jusiñamui diga jaciruiñeno birui jai ñairedicai. Naimie caina cacajana jiai uiñotici. ¹³ Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoi comeci. Sefuiruisiño; iadedi Cristo rafue omoimo cue lluanona cue duere sefui, iobicana omoi jai.

Cristo caina eo isiruite

¹⁴ Cai Moo Jusiñamui caina eo canocabillanomo cue comecina facaia, naimiemo jidicue. ¹⁵ Naimiedi nana creyentia imaci Moona jira, naimiemo jidicue. ¹⁶ Naimiemo cue jñanona, omoi facaina jidicue. Naimiemo eo ebirede siño iticino illamona, ie Joreño naimie omoi comeciaina raise ocuiñotallena jicanoticue. ¹⁷ Cristona omoi ñnuamona, naimie omoi comeciaina raise namatallena jicanoticue. Jusiñamuina omoi isiruicana jaillana jidicue. Jiaie cominina omoi isiruicana jaillana jiai jidicue. ¹⁸⁻¹⁹ Cristo caina jaca eo isiruillana, nana jiaie creyentia diga jaca eo isiruillana, omoi eo raise uiñuana jidicue. Naimie caina eo isiruillacino cai comeci facajacino baifemo uailla jira, naimie caina eo isiruisoillacinona jaca raise uiñoñedicai; iadedi iena janore cai uiñuamona, Jusiñamui omoi comeciaina namatallena jidicue. Iese omoi facaina jicabidicue.

²⁰ Ie jira Jusiñamuimo iobillacino cai fecajasa. Ie uaido cai comeciarena icana jaitate. Naimiemo cai jicajacino baifemo naimie fecarede. Cai comeci facajacino baifemo naimie jiai finorede. ²¹ Ie muidona naimiemo iobillacinona nana cai creyentiaidicai fecacabillasa. Jesucristo finoca rafue muidona iobillacinona jiai cai fecacabillasa. Mai.

4

Jusiñamui Joreño jai caimo illa jira, cai comeci daje isoi lloide

¹ Cárcelmo nia cue illamona, omoimo rafuena nia lloiticue. Cristo rafuena cue llofua jira, cárcelmo iticue. Creyentia omoi jai jailla jira, Cristo jitailla isoi omoi i. Jusiñamui omoina jai fetode naimie jitailla rafuena omoi finollena. ² Ie muidona abina jaca iedoño. Raire iciriño. Jiaimie ona duere finoa, ibana oño; iadedi uai oño naimiena jaca isirui. ³ Jusiñamui Joreño omoimo illamona, omoi comeci daje isoi lloicana jai. Daje isoi omoi comeci lloillamona, omoi jitaillamona dan uri omoi i. ⁴ Iena nia lloiticue. Cristona cai ñnuamona, daajena naimiemo jainaiaidicai. Jusiñamui Joreño nana caimo illamona, dan omoi comeci lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuiridicai. ⁵ Jaca dajede Nama sedacabidicai. Caina jilloitallena, da naimiena ñnoticai. Dama naimie facaina bautizaganodicai. ⁶ Cai Moo Jusiñamui jaca dajede. Jaca dajede Jusiñamuina nana cai creyentiaidicai sedadica. Naimie anamo nana iticai. Naimie jitaillacinona cai finollena, caina canocabide. Caina canollena, naimie Joreño caimo jaca ite.

7 Naimie jitailla diese, caina fetuanona, naimie facaina cai majillena, ie uai caimo fecade. Jiaie creyentiaina naimiemo #notacana jaillena, ie uai caimo fecade. 8 Iena cai raise uiñollena, David micori jaie cuegafuemona fueoiticaí. Naimie cuela: “Monamo abido naimie jaillanona, illaimana naimie illanona, ie cominina naimie ifuanona, naimicamo rana fecade”. Cristona ñaite. Iemona Cristo cai majiacino caimo illana uiñoticaí. 9 Biemo omoi comeciaina faca. Monamo abido naimie jailla jira, monamona eniruemo Cristo nano billana uiñoticaí. 10 Eniruemo bite; iadedi monamo abido jaide. Nana cominina birui sedade. Naimie basfemo jaca buna iñede. 11 Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino lollena, ie uaina fecade. Ie rafuena nia #noñedinomo lollena, damieriemo ie uaina fecade. Creyentiaina ie rafuena llofuellena, damieriemo ie uaina fecade. 12 Iese ie uaina fecade, naimie facaina raise cai majillena, nana jiaie creyentiaina cai canollena, Ie mei Cristo rafuena daajena #nocana jaiticaí. 13 Iena cai #nuamona, Jusiñamui Jitona raise uiñocana jaiticaí. Cai comecidi daje isoi lloicana jaiticaí. Naimie jitaillacinodo raise jaiticaí. Naimie marena icana illa isoi jaiticaí. 14 Cai uruiaí facaise cai comeciá naganomo ite. Naie facaise nie isoide rafuena cai cacajia, iena raire #noticaí. Cristo #nocana cai jaillamona, uruiaí isoi cai iacaiñena. Damierie naga llofueraíma uaido jaidimaci. Damierie llofueraíni di Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena; 15 iadedi jiaie cominina cai isiruillamona, uanaicínodo cai jailla. Cristo isoi icana cai jaillamona, abina uiñoiticaí. Cristodi cai illaimana jira, caina ocuide. 16 Naga creyente naimiemo jainaiáide. Aillosiedicaí; iadedi daajena naimiemo jainaiáidicaí. Daajena naimiemo cai jainaiáillamona, naimie jitaillacino cai finoia, naimiena #nocana jaiticaí. Iemona dani cominina isiruicana jaiticaí. Daajena naimiemo cai jainaiáilla jira, cai comeciá daje isoi lloicana cai jailla.

Cristomo jai cai duilla jira, naimie rafuedo birui jaidicaí

17 Omoimo nia lloiticue. Cai Namamo cue duilla jira, biena lloiticue. Jusiñamuina #noñedino isoi dane omoi iñeno. Jiaie naimaci isoi itomoi. Naimaci comeciáidi tainomo jai jaide isoide. Cacarefiacaiñedimaci. 18 Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui díbeimo illana jaca uiñoñedimaci. Uanaicínona uiñoiacaiñedimaci. 19 Jearede rafuena naimaci finoia, meiruñedimaci. Naimaci comeciá oíacana rafuedo jai jaidimaci. Naga jearede isoide rafuena eo finocana jaidimaci; 20 iadedi Cristo rafuena omoi cacajamona, naimiena omoi raise uiñuamona, naimaci isoi omoi illena fueoñedomoi. Cristo rafuena omoi cacajamona, jaiena illena jai fueotomoi. 21 Naimiena cacajanona iena #notomoi. Naimiena cue llofuíamona, naimiena Cristo facaina lloraini llofuíamona, danomo omoi roracomo omoi ofia, Cristo uanaicínona cacadomoi. 22 Biena omoína llofuecabiticue. Cristona jiaie nia omoi #noñena isoi, omoi jaiñeno. Omoi comeciáimo jiaie iticínodo jaiñeno. Naga jearede rafue omoi comeciá oíacanamona faifcana jiaie jaidomoi. Iedo birui jaiñeno; 23 iadedi Cristo díbeimo omoi jai illanona, naimiemo omoi comeciá facajano, Jusiñamui omoína canuamona, omoi comeciá iuailaina meidocana jai. 24 Cristo rafuena birui #notomoi. Naimie jitaillacínodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide. 25 Ie jira tainona lloñeno. Cristomo daajena jai jainaiáilla jira, cominimo uanaicínona jaca omoi llono.

Jiaínona omoi jifueñeno. ²⁶ Maraiñedicinona bu finoia, naimiemo riire lloño; iadedi iese o lloia, naimiena jeare ñaiñeno. Jiaimie ona iciia, naimiena jeare ñaiñeno. Naimie diga o rafue ia, naie rafue nairuido marena fino, ²⁷ Taife ramo o fai raillano. Bu diga o nicino ia, iena raire marena o finoñena, ibana oiacanito. Naie raire o feitañena jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido llinoñeno. ²⁸ Naimiemo ra illena, fiamona omoi mona navui bu ia, creyentena naimie jai jailla jira, naimie dane fiñena; iadedi ra naimie jitaia, naimie maijite. Ie maijiamona ie ra ollena, ucubena feñote. Ie mei dueredinona naimie jai canoite. ²⁹ Jeare ñaiñeno; iadedi nie isoide rafue ia, marecinona ñaino. Ie mei naie mona jiaie cominina canoitomoi, Jusiñamui dibeimo naimaci raise illena. ³⁰ Jusiñamuimo omoi jai jainaiailla jira, jeacinona finoñeno. Jeacino omoi finoia, Jusiñamui Joreñodi sunaite. Naimiena sunaitaño. Naimie caimo illamona, caina jillotajana uifotica. Cristo dane abido billemona, naimie dine cai jaca illena, caina jai jillotate. ³¹ Jiaie cominina iciñeno. Iciñeno. Uaina uaitaño. Jiaie cominina jeare ñaiñeno. Naimacina duere jeare finoñeno; ³² iadedi cominina canua. Jiaie cominina duenai. Jiaimie diga omoi nicino ia, naimie finoca rafuena faitajanona, naimie diga marena ñaino. Naie rafuena dane abido llinoñeno. Cristo finoca rafue muidona, Jusiñamui omoi jeacinona jai faitaja isoi, jiaimie diga omoi rafue ia, naifuena omoi feita.

5

Jusiñamui cominina jai cai illamona, naimie jitaillacinona fnoitica

¹ Jusiñamui isiruiğa uruiaidomoi. Naimie marecinona finua isoi, omoi fino. ² Cristo caina isiruilla isoi, cominina isiruicana omoi jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitate. ³ Jusiñamui cominidomoi. Omoi aifede riño diga iñeno. Omoi iniñede ima diga iñeno. Rana nicidoño. Jearede rafue finuamo omoi comeciaina facañeno. ⁴ Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobillacinona fecacana omoi jai. ⁵ Ie aifede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede ima diga icabitimiedi Cristo ie cominina sedajanomo jai duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi. ⁶ “Creyente naie isoide rafuena finorede” bu lloia, naimie omoina jifueiacade. Naimie iese lluaña iñoño. Jusiñamui naie jeacinona finocana jaidinona duere fnoite. ⁷ Ie jira naimaci jearede finoca rafuedo jaiñeno. Naimacina nabaiñeno. ⁸ Jusiñamuina jae omoi uifnoña jira, jitiredinomo itomoi isoidomoi; iadedi cai Namamo omoi duillamona, uanaicinona iñocana omoi jai. ⁹ Jusiñamuina omoi jai uifnoia, jeacinona omoi faimonocai, Jusiñamui jitaillacinona finocana jaitomoi. Uanaicinona llocana jaitomoi. ¹⁰ Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai. ¹¹ Jitiredinomo nia itino finoca rafuedo omoi jaiñeno. Naimaci finoca rafuemono marecinodi jaca comuiñede. Naimacimo: “Maraiñede” lloño. ¹² Iena cue meidailla jira, naimaci jearede bainino finoca rafuena ñaiacaiñedicue.

13 Marecinona omoi jaca finuamona, jiaie comini naimaci finoca rafue eo maraiñenana raise uñotimaci. 14 Cai ofia, naiena rocabitica: Mai casi. Inñeno.

Jai fioidaitino isoidomoi; iadedi omoi comeciaina Cristo jai lligaiñoite.

15 Ie jirari omoi marena illena, abina rairuicana omoi jai. Jusiñamuina ñnoñedino ebena jaicabidimaci. Naimaci isoi jaiño. 16 Diga maraiñede rafue birui comucabilla jira, cominina Cristo dibeimo raise omoi itatajallena, nagarui Cristo jitaillacinona finocana omoi jai. 17 Ie jira ebe isoi jaiño; iadedi Cristo jitaillacinona uñocana omoi jai. 18 Iocire omoi iacania, naiemona diga maraiñede rafue comuilla jira, jifaiño; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jai iitomoi. 19 Danomo omoi ofia, nana omoi comeciainona diga isoide ruana iocire ro-rona. Omoi ruamona jiaie creyentiai comeciaina ocuiñota. Cai Namamo omoi ruamona, omoi fillamona, omoi taillamona, naimiena iobitaitomoi. 20 Cai Nama Jesu-cristomo omoi duillamona, nie isoide rafue omoimo ia, cai Moo Jusiñamuimo iobillacinona jaca fecu.

Cristomo jai cai duilla jira, cai comini diga marena iacadica

21 Cristo anamo omoi illa jira, jiaie creyente baifemo omoi faiacinomo omoi comeciaina facañeno; iadedi coninina nagamüiaina cano.

22-23 Inirediñaiñuai, omoimo rafuena lloiacadicue. Cai Nama Cristomo omoi jainaiilla jira, naimie jitailla jira, omoi iniñiai anamo raise omoi i. Naimaci uaina raise ñno. Cristo nana creyentiai afemo illamona, naimacina naimie sedaja isoi, naga ini ie ai afemo illamona naiñaiñona sedaja. Cristodi nana creyentiai imaci jeacinomona jillotajamona, naimie anamo itimaci.

24 Cristo anamo nana creyentiai illa isoi, naiñaiñuai iniñiai uaina jaca ñnua.

25 Airedino, omoimo jai lloiticue. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaina omoi isirui. 26 Nana creyentiai marena illena naimie fiodaite. Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai ñnuamona, cai jeacinomona jai jillobidica.

27 Fiodaite, nana cai creyentiai comeciai marena illena. Cai comeciai jeaninana jitaide. Cristo abido bille facaisemo, Jusiñamui jitailla isoi cai marenana jitaide. 28 Naimie abi naimie isiruilla isoi, naga ini ie aina isiruilla. Iaimaijai daajena jira, ie aina isiruitimiedi ie abina jai isiruite.

29 Jaca bu ie abina enoiñede; iadedi ie abina sedade. 30 Naimiemo nana cai creyentiai duilla jira, Cristo caina isiruillamona, caina sedade. Ie isoi nagamie ie aina isiruilla.

31 Bie jai lloga uaimona iena uñotica. Moisés micori Jusiñamui lluaña jai cuga: "Ie aina ollena, iima ie moonu, ie ei diga fañonocaitate. Iemei dajena iitiaiñaijai". 32 Naie llofuiaicinomona jai rafuena fueoitica. Cristona ñaiticue. Creyentiaina ñaiticue. Naimiemo cai duillamona, daajena itica. 33 Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitañeno ñnua.

6

1 Uruiai, omoimo rafuena lloiacadicue. Cai Nama jitailla jira, omoi eiñiai uaina ñno. Omoi mootiai uaina jai ñno. Jusiñamuimona marenana jira, iaimaijai uaina ñno. 2-3 Moisés micori Jusiñamui lloga uaina jai cuga: "O moo uai ñno. O ei uai ñno. Marena o illena, raire o fioidañellena, iaimaiaina

o isiruillamona, iaímaiaí uaina ñno” cuela. Jusiñamui diga lletarafuena llote; iadedi bie nanoca rafuena llote. ⁴ Mootiai, omoimo lloiticue. Omoí uruiaina jamai icíñeno; iadedi naimacina cai Namana naimaci uiñollena llofe. Naimaci ñnoiacañenia, abina naimaci uiñollena, naimacina isiruillamona, naimacina duere fino.

⁵ Patrón anamo itino, omoimo lloiticue. Omoí patrones ocuica uaina ñno. Omoí maijiana naimaci ocuica, naimacina iobitallena, jaciruiocaida raise maiji. Omoí comeciáimona naimaci jitailla rana maiji. Cristo iedena, naimaci ocuica uaina ñno. ⁶ Omoimo naimaci eruaia, naimacina iobitallena, marena maiji; iadedi omoimo naimaci eruañenia, naimacina iobitallena, nia marena maiji. Naimacina iobitallena maiji; iadedi Cristomo omoí duilla jira, Jusiñamui jitailla jira, omoí comeciáí maiji raillamona, marena omoí maiji. ⁷ Patrón facaina maijiacínomo daní comecina facañeno; iadedi iocire maiji, cai Nama facaina omoí maijidomoidena. ⁸ Biena uiñoticaí: Marena bu maijila, cai Nama Cristomona ibana íco feiñoite. Patrón anamo itino iena feiñoitimaci. Patrón anamo ññedino iena jiaí feiñoitimaci. ⁹ Patrones, omoimo lloiticue. Omoí Nama Cristo monamona omoimo eruailla jira, Cristo monamona naimacimo jiaí eruailla jira, omoí anamo itinona marena fino. Naimacina riire ocuiñeno. Naimacina jeare finoñeno. Cristo nana naimie cominimo daje isoí comecina lloide. Ie jira omoí anamo itinona marena fino.

Cristomo jai cai duilla jira, naimie cai comeciaina ocuiñotaite

¹⁰ Ie muidona nia lloiticue. Cai Namamo omoí duilla jira, naimiedi omoí canocabillamona, omoí comeciaina ocuiñotacana omoí jai. ¹¹⁻¹² Ero, Taife caina ramo jifueocaida faite. Caina anafetitacade. Naimie isoidino caina jiaí anafetitacimaci. Naimacidi aillosie. Naimaci anamo nana Jusiñamuina ñnoñedino jai itimaci. Jitiredinomo naimaci illanona, Jusiñamui díbeimo ññedimaci. Beno eniruemo itimaci. Jusiñamui illanomo duññedimaci. Cominina ññañedícue. Taifena, Janabana, Dofina, jananiaina, Dusisiñona ññaitaci. Naimaci isoide joreñuaina ññaitaci. Cai díbeimo ññedimaci. Naimacimona abina omoí rairui. ¹³ Jobaime illa facaiseconi, soldaduáí imaci ra diga imaci abiaína riidotimaci. Cinturón jítadimaci. Lloemamona finocara jogobemo jítadimaci. Zapatona jítadimaci. Uico riidollena, naimaci uico riidua rana llinotimaci. Hfogi icona jítadimaci. Lloebina llinotimaci. Ie isoide. ¹⁴ Cristomo omoí comeciáí facajanona, uanaicinona jaca llono. Jusiñamui jitailla isoí, marecinona finocana omoí jai. ¹⁵ Cristo rafuemonona omoí comeciáí uri itatajmona, iena meiruiñeno llocana uiño. ¹⁶ Taifemona nana jearede rafuedi comuide. Naimiedi ramo faiacana jai jaide. Cristona omoí ñnuamona, Taife ramo faiacinona jamai. ¹⁷ Jusiñamui caina jai jilloitajana jai uiñotomoi. Iena omoí uiñuamona, Taife ramo faiacinona ñnoñeno. Taifena anafenollena, Jusiñamui joreñodo Jusiñamui uaimona fueo. ¹⁸ Jusiñamui joreño omoína canuamona, Jusiñamui diga ññaicabi. Taife ramo omoimo faia, iena omoí ñnoñellena, Jusiñamui omoína canoite. Iese abina omoí rairuia, Taifena anafetitaitomoi. Taife ramo faiacino naimaci ñnoñellena, nana jiaíe creyentiaí facaina jiaí jñcabi. ¹⁹ Cue facaina jiaí omoí jñ. Marefodo nana Cristo ie rafuena cue lluaana omoí jñ. Cristo nana cominina jilloitaiacanana nia lloiacadícue. ²⁰ Naie rafue cue lloñena, Cristo cuena oretate. Naie rafuena cue llua muidona, cárcelmo iticue. Cue jitailla díese iena marefodo cue lluaana mai omoí jñ.

²¹⁻²² Tíquico omoí díne oretaiticue. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoimo cue illana

lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciai ocuiñoitomoi. ²³ Cai Moo Jusiñamui, cai Nama Jesucristo diga, omoina uri itatajamona, Cristona jai omoi ñnuamona, coniniri uri icana jaillana jitaidicue. Iaimaiai omoina isiruillamona, iaimaiaina omoi ñnuamona, nana jiaie creyentiaina isiruicana omoi jai. ²⁴ Cai Nama Jesucristona omoi eo isiruilla jira, Jusiñamuidi omoina duenailasa. Mai. Pablodice.

FILIPOMO ITE CRISTONA HNOTINOMO PABLO ORETAGA RABE

Uaiduacino

1-2 Filipomo ite creyentiai, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeimo maijicabidicoco. Omoimo coco uaina oredicoco. Omoi creyentiai illaicominimo coco uaina ua oredicoco. ¿Nigacino? ¿Nie isoidomoi? Cai Moo Jusiñamui, cai Nama Jesucristo diga, omoina jai duenaite. Iena uifnocana mai omoi jai. Iaimaiaia omoina uri jai itatate. Iena omoi uifnocana mai omoi jai.

Jusiñamuimo iobillacino fecade

3 Naga icaiño omoina cue comecia, Cristo rafuedo omoi jailla jira, Jusiñamuimo iobillacinona fecadicue. 4 Naga icaiño Jusiñamui diga cue ñaia, omoi facaina caimare jiidicue, 5 Jesucristo rafuena cue llwana cuena omoi canua jira. Nano bie rafuena omoi cacajamona, cuena canodomoi. Cuena nia canodomoi. 6 Jusiñamuidi omoi comeciaina jaie marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiruimo Jusiñamui bie rafuena fuidoite. Iese fuidollemo ocuridicue. 7 Omoimo iese cue comecina cue facajia, omoina cue isiruilla jira, cuemona mare. Cárcelmo cue illamona, Jesucristo rafuena cue riiduano, Jesucristo rafuedi uanaicino cue llwano, Jusiñamui cuena canocabide. Iemona naimie caina duenaillana jai uifnoticai. 8 Cuena omoina Cristo Jesús isiruitajamona, nana omoina isiruiticue. Jusiñamuidi uanaicinona cue llwana uifnote. 9 Jiaie cominina eo isi-isiruicana omoi jaillena, Jusiñamuina raise omoi uifnollena, nie isoide rafue omoimo ia, abina raise omoi uifnollena, Jusiñamuimo jicabidicue. 10 Iese omoina jitaidicue. Mare rafuedo omoi jaicanana jitaidicue. Jiairuido Cristo abido biite. Ie jira omoi comeciai jeanillena jitaidicue, Jusiñamui jitailla isoi omoi comeciai marena illena. 11 Jusiñamui jitailla isoi omoi illamona, mare rafuena jaca omoi finuana jitaidicue. Jesucristona omoi inuamona, naimie omoina iena finotarede. Iese omoi finocana omoi jaia, Jusiñamuina eo iobitaitomoi.

Cárcelmo Pablo illamona, diga comini Jesucristo rafuena cacadimaci

12 Cue amatiai, bie rafuena omoi uifnuana jitaidicue. Cárcelmo cue illamona, diga comini Jesucristo rafuena cacadimaci. 13 Cai illaima jofomo itino cacadimaci. Nana bene itino jiai cacadimaci. Jesucristo rafuena cue llua jira, cárcelmo iticue. Iena jai uifnotimaci. 14 Cárcelmo iticue; ia jaciruiñeno Cristo rafuena nia lloticue. Iemona diga creyentiai naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

15 Cuena uradoillamona, cue afemo iacanamona, damierie Cristo rafuena llofuetimaci. Jiaie llofueraini marecinona finuacanamona llofuetimaci. 16 Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uifnotimaci. 17 Cue afemo iacadino mare comeciainona llofueñedimaci. Iemona cuena duere finoacadimaci. 18 Iese itimaci; iadedi uradoillamona naimaci llofua, marecinona finuacanamona naimaci llofua, cuemona damamei iesede. Cristo rafuena llocana jaidimaci. Iena

jai iobidicue. Nia iobiticue. ¹⁹ Cueri Jusiñamuimo omoi jiano, Jesucristo Joreño cuena canuano, nana cuemo ite rafuemona jilloiticue. Iena cue uiñuamona, nia iobiticue. Jesucristo Joreño ie Moo diga daje. ²⁰ Cue finolle rafuemona cue meiruifellena eo jitaidicue. Jaie cue finocabilla isoi, Cristona marefodo birui iobitaiacadicue. Cue nia fioldaiñenia, naimiēna iobitaiacadicue. Cue fioldaillemona naimiēna jiai iobitaiacadicue. Iemona jiaie creyentiaidi Jusiñamuimo iobillacinona fecaitimaci. ²¹ Nia cue fioldaiñenia, Cristo rafuena nia lloiticue. Mare; iadedi cue fioldai, naimie dine cue illena jiai eo mare. ²² Nia cue fioldaiñenia, diga cominimo Cristo rafuena nia lloiticue. Ie jira nie isoide cue illana cue comeci niese rainide. ²³ Nia raise uiñoñedicue. Jiaicaiño fioldaiacaiñedicue. Jiaicaiño fioldaiacadicue. Cue comeci Cristo dine jaicade. Nainomo cue illena cuemona eo mare; ²⁴ iadedi omoina cue canollena, nia fioldaiacaiñedicue. Cue nia fioldaiñenia, omoina nia canoacadicue. ²⁵ Cue comecina jai facajano, raite: “Nia fioldaiñeiticue. Omoi diga nia cue illana uiñoticue”. Cristona omoi innotacana omoi jaillana jitaidicue. Omoi innuamona, caimare omoi illana jiai jitaidicue. ²⁶ Iemei omoi dine dane cue illa jira, cueri Cristomo iobillacinona eo fecaitomoi.

²⁷ Cue fioldai, cue fioldaiñenia, Cristo ie mare rafuedo omoi jai. Omoina cue cioia, omoina cue cioiñenia, mare rafuena omoi finuana fidiacadicue. Cristo rafuena innotacana omoi jaillana, omoi comeciai daje isoi lloillana, Cristo rafuena omoi riduana fidiacadicue. ²⁸ Omoi dibeimo inñedinona omoi jaciruiñenana fidiacadicue. Iese omoi ia, Jusiñamuidi omoi dibeimo inñedinona faifillana uiñotaite; iadedi naimiedi omoina omoi jilluana uiñotaite. Naimie diga omoi jaca illena, omoina jai jillotate. ²⁹ Jusiñamui Cristona omoi inollena omoina fetode; iadedi Cristori omoi duere sefuillena omoina jiai fetode. ³⁰ Omoi nairaimo cue nano illa facaise Cristona inñedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jiai duere sefuidomoi.

2

Jiaie creyentiai diga raise omoi illacino

¹ Jiaie creyentiai diga omoi marena illena, dajerie rafuena lloiacadicue. Cristomo omoi duilla jira, coninina omoi comeciai ocuiñotajamona, Cristo omoina isiruillana omoi uiñuamona, Jusiñamui Joreño nana omoina nabaitajamona, coninina omoi comeciai eo duenaillacino illamona, ² cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata. ³ Jaca buena fiñoño, jiaimie afemo jamaí omoi illena. Abina ieduaamona buena fiñoño. Abina iedoño jiaimacimo comeciaina faca: “Naimaci cue baifemo faite”. ⁴ Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca. ⁵ Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. ⁶ Naimiedi jaca Jusiñamui; iadedi naimiedi Jusiñamui diga danomo jaca illana jitaifede. Naimie comecina iemo facañede; ⁷ iadedi iena fainonocaida, ie Moo ocuica rafuena finollena, imana naimie jaide. ⁸ Jamaí bue isoidimiena jaide; iadedi ie Moo uaina innote. Ie Moo jitailla jira, fioldai. Marañede rafue finodimie isoi, cruzmo fioldai. ⁹ Ie jira, naimiēna iobitallena, Jusiñamui naimie ecimo naimiēna abido ote. Nana jiaie mameci baifemo faite mamecina jitate.

¹⁰ Jesúna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisai naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiai fecaitimaci. ¹¹ Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

Maraiñedino comeciaina lligaiñotomoi

¹² Cue isiruiga amatiadomoi. Ie Moona Jesucristo ñnua jira, cue lluaña nia ñnocana omoi jai. Jaie omoi diga cue ia, Cristo rafuena raise ñnotomoi. Birui omoi diga ññedicue; iadedi Jusiñamuina omoi ñnua jira, naimie jitailla rafuena jaciruiocaida, ñnocana omoi jai. ¹³ Ie jitailla rafuena omoi ñnollena, Jusiñamui omoi comeciaina birui marena itatate. Naimie omoina iena ñnotaiacade. Naimie mare jitaillacinomona, omoina iena ñnotaitate. ¹⁴ Nana omoi ñnolle rafuemo abi jafueoicaiñeno fino. Uai uaitañeno fino, ¹⁵ jiaie comini omoiñi ñai raillanona, Jusiñamui uruiaina omoi illa jira, omoi comeciaina jeanidemona marena omoi i. Maraiñede comini motomo itomoi. Naimaci comeciaina jearede. Naimaci comeciaina lligaiñotomoi, naimacimo ite jeacinona uññotallena. ¹⁶ Jesucristo rafuena llocana uitomoi. Iena naimaci ñnuamona, bie rafue Jusiñamui ñne cominina jaca itatate. Cristo dane billirui omoiñi cue iobiacana jira, omoi ñne: “Tainona jaiel lloticue” cue raillano, Jesucristo rafuena llocana nia omoi jai. ¹⁷ Jusiñamuina omoi ñnua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiai jitaia, iobiticue. Omoi diga jiai caimataiticue. ¹⁸ Ie muidona caimare iitomoi. Cue diga caimataitomoi.

Pablo Timoteona orede

¹⁹ Cai Nama Jesús jitaia, omoi ñne Timoteona raire oretaiacadicue. Cue ñne abido naimie bia, omoi rafuena cue fidiano jiai iobiticue. ²⁰ Cue ñne jiaño naimie isoi ññede. Dama naimie omoi ite rafuemo comecina facade. ²¹ Jiaño ñani naimacimo ite rafuemo comeciaina facadimaci. Jesucristo rafuemo comeciaina facañedimaci. ²² Timoteodi mareuidimiena uññotomoi. Cue jito isoide diga, Cristo rafuena lloticoco. ²³ Cárcelmo cue illa rafuediña fuiñede. Iena cue uññollemona, naimie omoi ñne raire oretaiacadicue. ²⁴ Cárcelmona cue jino jaillena cai Nama jitaia, omoi ñne jiai raire jaiacadicue.

Pablo Epafroditona abido orede

²⁵ Epafroditodi cue ama isoide. Danomo Cristo rafuena lloticoco. Danomo Cristo rafuena riidoticoco. Naimiena oredomoi, cuena canollena. Naimiena omoi ñne abido oretaiacadicue, ²⁶ omoi ñne naimie illemo naimie comecina facaja jira. Naimie navui duillana omoi fidiã jira, naimie uri ññede. ²⁷ Navui niadedi fiodaiacanamona jillode, Jusiñamui naimiena duenailla jira. Naimie fiodaillamona, eo cue duere sefuiñellena, Jusiñamui cuena jiai duenaite. ²⁸ Ie jira Epafroditona eo raire oretaiacadicue, naimiena omoi cianona omoi iobillena. Iemei jiai uri iiticue. ²⁹ Cai Nama mamecido naimiena eo caimare feiño. Jiaie naimie isoidinona omoi ñne ia, naimacina iobita. ³⁰ Cristo facaina navui naimie llofuiamona, omoi facaina cuena canollena, niadedi fiodaite. Omoi facaina naimie cuena canuano, cue ñne omoi ññena jira, cue muidona niadedi naimie abina faifitate.

3

Moisés micori llogacinuaido jaidinomona abina rairui

¹ Cue amatiai, omoimo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite. ² Jearede rafue finode cominimona abina rairui. Jiconiaia isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeciaia nia raise finoñedimaci. ³ Cai abiaina detatajamona, cai comeciaia raise finobiñede. Cai comeciaia raise finuamona, Jusiñamui Joreñodi caina Jusiñamuina raise sedatate. Cristo Jesúsri iobidicai. Cai jillobillena, cai abiaina detatañedicai. ⁴ Buena cai finuamona cai illamona jillobidicaidena, cue jilluana raise uiñoticue. Cue cominimona jamai bue isoiñedicue. ⁵ Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judíuai imacina jira, cue uruenamona judíuai uaido ñaiticue. Fariseo cue imiena jira, Moisés micori llogacinuaido fañonocaiñeno iedo eo jaidicue. ⁶ Iena eo cue jitailla jira, Cristona ñnotinona duere finodicue. Nana Moisés micori llogacinuaido eo raise jaidicue. Iena raise finodicue. ⁷ Iese jai iticue. Cue comeci iena: “Mare” raite; iadedi Cristona jai cue ñnua jira, birui nana bie rafuedi cuemona ieñedicinuai. Naie isoide rafue cuemo illamona, cue jeacinomona jilloñedicue. ⁸ Dane lloticue: Cue Nama Cristo Jesúsna cue uiñoiacana jira, jiaie rafue cuemona ieñedicino. Naimiena cue uiñuacinodi nana jiaie rafue baifemo faite. Jeacuai isoi jai marañena jira, naimie muidona cue jaiie illacinona jai sofecaidicue. Iena sofeticue, Cristo dibeimo raise cue illena, ⁹ naimiemo raise cue duillena. Moisés micori llogacinuaido cue jillamona marebicaiñedicue; iadedi Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate. ¹⁰ Cristona raise uiñoiacadicue. Naimie fiodaite; ia iemona jillode. Naiemona cue comeci marena illena, naimiena jillotate uaina uiñoiacadicue. Naimie rafuena cue lluaamona, naimie isoi duere sefuiticue. Iemona nibai fiodaiticue. ¹¹ Cue fiodaille mei, fiodaillamona naimie isoi cue jilloillemo ocuridicue. Ie jira naimiena uiñocana jaiacadicue.

Pablo jitaillacino

¹² Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaiie uaidote. ¹³ Cue amatiai, iena nia iñedicue; iadedi jaiie cue finoca rafuemo comecina facañedicue; iadedi cuemo nia suiñede rafuemo birui eo ocuridicue. ¹⁴ Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena. ¹⁵ Caimona Cristo rafuena raise abina uiñocaidino, bie rafue diga cai comeciaia lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite; ¹⁶ iadedi caimo jai ite uiñuacinodo mai cai jailli.

Pablo illa isoi cai illa

¹⁷ Cue amatiai, Cristona cue ñnua isoi, naimie rafuedo cue jailla isoi, nana omoi jai jai. Cai illa isoidinomo omoi eruai, naimaci isoi omoi illena. ¹⁸ Jaiie omoimo lloudicue. Cue sunaillamona dane lloiticue. Ailluena comini Cristo fiodailla rafuena birui jitañedimaci. ¹⁹ Ja muidomo fañitimaci. Naimaci Jusiñamuidi imaci guille, dani guille ramo naimaci comeciaia facaja jira. Jearede rafue finuamona, meiruñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena. ²⁰ Monamo ite Jusiñamuimo cai jainaiilla jira, monamona cai jilloitaraima abido dane

billemo ocuiridicai. Cai Nama Jesucristodi cai Jilloitaraima. ²¹ Naimie bia, cai fiodable abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

4

¹ Ie jira Cristo rafuena #nocana nia omoi jai. Cue amatiai, omoina isiruiticue. Omoina cioacadicue. Omoiri iobidicue. Cue luamona Cristona jaie #notomoi. Ie rafuedo omoi jailla jira, iobidicue. ² Evodia raillañaiñomo rafuena lloiacadicue. Sintique raillañaiñomo jai lloiacadicue. Cai Namamo iaiñuai duilla jira, iaiñuai comeci daje isoi lloillana jitaidicue. Coniño diga icirillana jitañedicue. ³ Cue mare nabai, omo jicanoticue, iaiñuaina canollena, conioño diga iaiñuai dane marena ñailena. Cristo rafuena cue diga llotiaiañuai. Clemente diga llotiaiañuai. Cue diga llofueuidino diga llotiaiañuai. Monamo ite rabenicomo nana naimaci mameciai jai cuega. Jusiñamui diga monamo jaca ite comini mameciai diese cuega.

Iobillacino, uri illacino diga

⁴ Cai Namamo omoi duilla jira, jaca iobi. Dane lloiticue: Iobi. ⁵ Omoi rininana nana comini uiñuana jitaidicue. Cai Nama dane abido billirui iairei ite. ⁶ Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaia, naimiemo iobillacinona jiaia feca. ⁷ Iemei Jusiñamui omoi comeciaina uri itataite. Omoi comeciaina facajacino baifemo omoina uri itataite. Cristo Jesúna omoi #nuano, omoi comeciaina eenoite. ⁸ Cue amatiai, ie muidomo daje rafuena nia lloiticue. Uanaicnomo comeciaina faca. #nogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca. ⁹ Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi ciua rafuedo omoi jai. Iemei omoi comeciaina uri itatajanona, Jusiñamui omoi diga ite.

Filipomo ite comini Pablona eo canodimaci

¹⁰ Cai Namari iobidicue, diga irui illamona dane cuena omoi comeciaina jira. ¹¹ Cuemo comeciaina facadomoi; iadedi bu jaca binide, ucubena cue dine atilena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue. ¹² Duere cue illana uiñoticue. Duenino cue illana jai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue. ¹³ Nie isoide rafue cuemo ia, Cristo cue comecina ocuiñotaja jira, naga rafuena finocana jaiticue. ¹⁴ Cue duere sefuillamo cuena omoi duenaillamona, cuena omoi canua jira, cuemona mare. ¹⁵ Omoimo Cristo rafuena nano cue luamona, cuena canodomoi. Macedoniamona cue jailla mei, jiaie creyentiai cuena canoñedicue. Dani omoi cuena canodomoi. Iena uiñotomoi. ¹⁶ Tesalónicamo nia cue ia, diga icaiño ucube cuemo oredomoi; ¹⁷ iadedi omoi ucubena nicidoñedicue; iadedi cuena omoi canuamona, Jusiñamuimona ibana omoi feiñuana jitaidicue. ¹⁸ Nana cue jitaille rana jai feiñoticue. Ailluena cuemo ite. Epafroditomona cuemo omoi oretaga rana feiñoticue. Jusiñamuimo fecadomoi isoide. Jusiñamui dibeimo cue maijia jira, mare rana finodomoi. Ie jira Jusiñamui iena gaide, caimare soride rana cai gaia isoi. Naimie iena

jiaí feiñote. ¹⁹ Naimiemo ailluena ite ramona cue Jusiñamui nana omoi jitaille rana fecaite, Cristo Jesús mo cai duilla jira. ²⁰ Cai Moo Jusiñamuimo iobillacino jaca cai fecacabillasa. Iena jitaídícue.

Fuiduacino

²¹ Cristo Jesús mamecido cue facaina nana creyentiaímo cue uaina llono. Cue díga amatiaí imaci uaina jiaí oredimaci. ²² Nana benomo ite creyentiaí imaci uaina oredimaci. Cai illaíma César jofomo maijidino imaci uaina ua oredimaci. ²³ Cai Nama Jesucristo omoi comeciaina jaca caímare itatajana jitaídícue. Mai. Pablodícue.

COLOSAMO ITE CRISTONA HNOTINOMO PABLO ORETAGA RABE

Colosamo ite creyentiaimo Pablo carta orede

1-2 Colosas railla nairaimo ite creyentiai, Pablocue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue lollena, Jesucristo oretagamiedicue. Naimiemo jai duidomoi. Naimiena raise ñnocana jaidomoi.

Naimaci facaina Pablo jüde

3 Cai Nama Jesucristo Moodi Jusiñamui. Omoi facaina Jusiñamuimo coco jüia, naimiemo iobillacinona jaca fecadicoco. 4 Jesucristona nia omoi ñnuana coco fidia jira, nana creyentiaina nia omoi isiruillana coco fidia jira, iobillacinona jaca fecadicoco. 5 Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino. 6 Diga illanomo, diga comini iena jiai jai cacadimaci. Iena ñnuamona Cristo ñbeimo naimaci comeciai jai meidoga. Iena ñnuamona marecinodo jai jaidimaci. Ie isoidomoi. Jusiñamui omoi ñna duenaillana jai uññotomoi. Uanaicinona omoi raise uññuamona, iedo jaidomoi. Ie marecinona finocana jaidomoi. 7 Epafra llamona naie rafuena cacadomoi. Naimiena isiruiticai. Jesucristo ñbeimo coco isoi, naimie jiai llofuiana maijüde. Omoi motomo cai ñña jira, Cristo ñbeimo cai facaina naimie raise maijüide. 8 Naimiemona omoi ite rafuena fididicoco. Jusiñamui Joreño omoi ñna canuamona, jiaie creyentiaina omoi isiruillana fididicoco.

9 Ie jirari omoi facaina jaca jüdicoco. Omoi rafuena coco fidiamona, Jusiñamuimo omoi finolle rafuena omoi eo raise uññollena jüdicoco. Nana naimiemo ite abi uññuacinona omoi eo raise uññuana jitaidicoco. 10 Cai Nama: “Mare” omoi ñna raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uññocana jaillana jitaidicoco. 11 Nie isoide ramo omoi jiria, nana naimie siño ebirede uaido naimiedi omoi comeciaina ocuññotajana jitaidicoco. Iocire omoi illana jitaidicoco. 12 Caina ie cominina naimie jai itataja jira, nana ie comini diga naimie illanomo ico jaca iticai. Ie muidona naimiemo iobillacinona omoi fecacabillasa. 13 Jeacino anamo navui cai illa jira, jitiñedimomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate. 14 Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai feitate. Naiena ico abido llinofeite.

Cristo muidona Jusiñamui rücaillifue anamo ññedicai

15 Jusiñamuina cionidicai; iadedi Cristomona naimiena uññoticai. Jaca bue ñña ñña, Crsito nano jaca ite. 16 Cristo uaido Jusiñamui nana rana finode. Monamo ite rana finode. Enirüemo ite rana finode. Cai ciua rana finode. Cai cioñña rana finode. Cominina finode. Ie jaienisaina finode. Janabana finode. Dofina finode. Taiñena finode. Cristo uaido nana rana finode. Cristona iobitallena, nana rana finode. 17 Nano dofoconi Cristo jaca ite. Naimie uaido naga ra marena icana jaide. 18 Naimiedi nana creyentiai imaci illaima. Fiodaitinomona naimie nano jillodimiena jira, cai fiodaia, ico jiai

jilloiticaí. Naimiedi naga ra baífemo faite. Naimiedi nana comini baífemo jiaí faite. ¹⁹ Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite. ²⁰ Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo inedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai inoia, Jusiñamui ricallifue anamo jai inedicai. ²¹ Jusiñamui dibeimo navui inedomoi. Naimiena nabaillana jitainedomoi. Omoi comeciainona naimiena enoidomoi. Marainedicinona finouidomoi; ²² iadedi cruzmo naimie abi illanona, nainomo Cristo fiodailla jira, naimiedi naimie dibeimo omoína itatate. Jusiñamuimona mareuidinona omoi illena, omoimo nicino inellena, Jusiñamui dine ico omoi ia, naimie dibeimo omoína jai itatate. ²³ Naimiena raise inocana omoi jaia, danomo abido omoi jaiñenia, iese itomoi. Cristo rafuena navui cacadomoi. Ie jira Cristo dine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

Pablo Cristo rafuena llofuecabite

²⁴ Omoimo Cristo rafue cue llua muidona, duere sefuidicue; iadedi iocire nia iticue. Omoi creyentiaí facaina Cristo isoi duere sefuidicue. ²⁵ Jusiñamui cuena oretaja jira, naimie rafuena ailluena cominimo eo raise cue llollena, omoi creyentiaí facaina llofueticue. ²⁶ Cai jaiagai bie rafuena uiñofedimaci; iadedi Jusiñamuina inotinodi iena birui uiñotimaci. ²⁷ Jusiñamui naimacina iena uiñotade. Naie rafuedi eo ebirede. Judiuainedinodomoi; iadedi bie rafue omoimo jai duide. Omoi comeciaino Cristo illana jai uiñoticaí. Ie jira naimie ebirede illanomo ico omoi jaca illemo ocuridomoi. ²⁸ Cristo rafuena llofueticaí. Nana cominimo Cristo dibeimo naimaci iacanana lloticaí. Cristona naimaci eo raise inollena, Cristo isoi naimaci marebicallena, naimaci abi uiñuana lloticaí. ²⁹ Ie jira bie rafuena llofuecabiticue. Nana Cristo cuemo iga uaido eo llofuecabiticue.

2

¹ Omoimo eo comecina facadicue. Iena omoi uiñuana jitaidicue. Laodicea railla nairaimo jiaí eo comecina facadicue. Diga comini cuena nia cioinestimaci. Naimacimo jiaí eo comecina facadicue. ² Omoi comeciaina ocuiñotallena, iese omoimo comecina facadicue. Dani omoi isiruillamona, ni Jusiñamui rafuena omoi eo raise marena uiñollena, omoimo comecina facadicue. Naie rafuedi Cristona llote. ³ Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide. ⁴ Naimaci ñaiaimona omoína bu jifuei raillanona, biena omoimo lloticue. ⁵ Omoi dine inedicue; iadedi cue comecidi omoi dine ite. Omoimo cue comecina facadicue. Danomo omoi marena illa jira, Cristona omoi raise inocana omoi jailla jira, iobidicue. ⁶ Cai Nama Jesucristona omoi inuamona, naimie lloga rafue finocana omoi jai. ⁷ Naimie dibeimo raise icana omoi jai. Naimiena inocana omoi jai. Omoi lloraini omoína llofuia isoi, naimiena inocana omoi jai. Jusiñamuimo iobillacino eo fecacana omoi jai.

Cristona cai inuano, cai illa rafue

⁸ Jiaie comini naimaci jamai comeciaino comeciaina jamai facadimaci. Naimaci einamacimona iena otimaci. Naie rafuedo omoi jaillana jitaidimaci. Cristo rafuedo omoi jaillana jitainestimaci.

⁹ Ero, Cristomo nana Jusiñamui uai ite. Eniruemo billanona, Cristo imana jaide. Naimiemona Jusiñamuina uñotícaí. ¹⁰ Cristomo omoí jainaiálla jira, naimiemona nana omoí jitaillacinona oitomoí. Nana comíni naimie anamo itimaci. Nana illaicomíni naimie anamo itimaci. Taife naimie anamo ite. Janaba naimie anamo ite. ¹¹ Cristomo omoí duilla jira, omoí comeciáimo ite jeacino anamona omoína naimie jillotate. Omoí abiaína detatajamona naimie iena finoñede; iadedí omoí comeciáimo ite jearede iuai meiduumona jillobidomoí. Naimie iena finode. ¹² Naimie díbeimo caí illamona, jai bautizagacai. Naimie díbeimo caí illamona, caí jeacino anamo jai iñedícaí. Cristo fiodaite; iadedí fiodaillamona Jusiñamui naimiena jillotate. Jusiñamuina omoí inua jira, jeacino anamo jai iñedomoí. Naie anamona Jusiñamui omoína jiaí jillotate. ¹³ Jeacino anamo jaie omoí illamona, naimiemona fiodaitino isidomoí. Omoí maraiñede jitaillacino anamo jaie itomoí. Cristomo omoí jai duillamona, omoí jeacino ona dotajamona, naie anamona Jusiñamui omoína jai jillotate. Cristo díbeimo omoína itatate. ¹⁴ Moisés micorí jaie llogacinona jaie caí inoñena jira, Jusiñamui riicaillíue anamo iticai; iadedí cruzmo Cristo fiodailla jira, naie llogacino anamo jai iñedícaí. Ie muidona Jusiñamui caímo íbana oñeite. ¹⁵ Cruzmo Cristo fiodailla facaiseconí Taífedí anafefide. Janabadí anafefide. Dofidí anafefide. Dusisiñodí anafefide. Naimie siño rafuena finuamona, Cristo uai naimaci uai baífemo uaillana uñotícaí.

Cristomo ite rafuedo omoí jai

¹⁶ Cristo rafuedo omoí jailla jira, omoí guiga rana bu fimaía, naimaci ñaíamo cacarefiñeno. Judíuai einamací rafue díne omoí jaiñenia: “Omoí mareíñedomoí” bu raía, naimaci ñaíamo cacarefiñeno. ¹⁷ Naie isoide rafuedo jaie jaidícaí; iadedí iedo biruí jaiñedícaí. Cristo rafuedo biruí jaidícaí. ¹⁸ Dajerie llofueraíni jiaie rafuedo jaidímací. “Abína íedoñeno” raitímací. “Jusiñamui jaienísaina seda” raitímací. Nicairillacinodo jaidímací. Naimaci isoí omoí jaiñenia: “Maraiñedomoí” omoína naimaci raía, naimaci ñaíamo cacarefiñeno. Naimaci illa isoí iñeno. Naimaci llucacino anamo iñeno. Naimaci llucacino omoí jaia, omoí jitaillanomo Cristo díne riñeitomoí. Naimaci comeciáí jearena jira, jamai buena uñoñenano abína íedotímací. ¹⁹ Cristo rafuedo jaiñedímací. Cristomo caí duilla jira, naimie caina ocuicabide. Naimiemona caí illena Jusiñamui jitailla isoí, fueotícaí. Jusiñamui jitailla isoí, naimie díbeimo caí raise illena, naimiena caí raise inollena, naimiemona fueotícaí. Cristomo caí duilla jira, daní conínina nabaídícaí. ²⁰ Cristo fiodaillamona, jiaie rafue anamo jai iñedícaí. Naimiena inoñedíno rafue anamo jai iñedícaí; iadedí naie rafuedo nia jaidídomoí. Damíerie llofueraíndí diga rana fimaidímací. ²¹ “Biena jetañeno. Biena guíñeno” raitímací. ²² Ero, naie fimaica guille ra ite, caí guillena. Iena caí guilla mei, jai buena iñede. Naimaci fimaiduacino comínimona otímací. Jusiñamuimona oñedímací. ²³ Naie fimaiduacino dí eo abí uñuacino isoide. Naiedo bu jaia: “Jusiñamuina eo raise sedadícaí” raitímací. “Abí íedoñedícaí. Caí abína isiruíñedícaí” raitímací; iadedí naie isoide llucacino bu jaia, naimie comecímo ite jeacinomona jilloñede. Naimíedí jeacino finocana nia jaide.

3

¹ Jeacino anamo jaie itomoí. Fiodaillamona Cristo jillua jira, jeacino anamona jai jillobidomoí. Ie jira Cristomo ite rafuedo omoí jai. Monamo Jusiñamui ecímo Cristo ite. Jusiñamui naimíeri íobilla jira, naimie ecímo ite.

² Cristomo ite rafuemo omoi comeciaina facacana jai. Bene ite marañede rafuemo omoi comeciaina facañeno. ³ Bene ite marañede rafue anamo jai ifedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoi na naimie canoite. ⁴ Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

Omoi comeciaino ite jeacinona fañonocai

⁵ Cristomo omoi jai duilla jira, omoi comeciaino ite jeacinona fañonocai. Omoi añede riño diga ifeno. Omoi inañede iima diga ifeno. Jeare finoca rafuemo omoi comeciaina facañeno. Omoi marañede jitaillacinodo omoi jañeno. Rana nicidoñeno. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi. ⁶ Naie isoidicinona comini finua jira, naimiena naimaci inoñena jira, Jusiñamuidi naimacina duere finoite. ⁷ Naie isoide rafuedo jai jaidomoi. ⁸ Nana bie isoide rafuedo jañeno. Icirifeno. Omoi ecimo itinona jeare finoñeno. Jiaie cominina jeare ñañeno. Jearede rafuena ñañeno. ⁹ Tainona lloñeno. Omoi comeciaino ite jeacino anamo jai itomoi. Naicino anamo omoi jai ifena jira, naicinodo jañeno; ¹⁰ iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate. ¹¹ Cristo rafuedo birui omoi jailla jira, Jusiñamuimona nana creyentaidomoi; daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatinodomoi. Dajerie abina detatañedinodomoi. Dajerie abina uiñotinodomoi. Dajerie abina uiñoñedinodomoi. Dajerie patrón anamo itinodomoi. Dajerie patrón anamo ifedinodomoi. Cominimona iese itomoi; iadedi Jusiñamuimona daje isoidomoi. Cristo dibeimo omoi illa jira, jai amatiaina eruaidomoi. Cristomo omoi duillacino jiaie rafue baifemo faite. ¹² Jusiñamui omoi na fetode. Omoi comeciaina maretate. Omoi na isiruite. Ie jira jiaie cominina duena. Jiaie cominina cano. Abi iedoñeno. Abi biriñeno. Icirifeno. ¹³ Dani omoi ibana oñeno; iadedi bu diga omoi icirillafue ia, naiena raise fino. Iena raise finuanona, abido ietañeno. Iena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita. ¹⁴ Coninina omoi isiruicana jai. Isiruillacino nana jiaie lluacino baifemo faite. Coninina omoi isiruia, danomo marena iitomoi. ¹⁵ Jusiñamui omoi na fetua jira, Cristomo daajena jai duidomoi. Cristo omoi comeciaina uri itatajamona, nana comini diga uri i. Omoi comeciaino uri illamona, Jusiñamuimo iobillacinona feca. ¹⁶ Cristo rafuena omoi eo inuana jitaicue. Naie rafuena coninimo omoi llofue. Iena raise uiñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciainona iocire rono. David micori cuela salmos omoi roia, Jusiñamui Joreño omoi na birui cuetataga ruana omoi roia, omoi comeciainona iocire rono. ¹⁷ Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jiaie feca.

Coniniri creyentiai illa rafue

¹⁸ Inrediñañui, omoi mo rafuena lloiacadicue. Cai Namamo omoi jainaiilla jira, naimie jitailla jira, omoi inñiaie anamo raise omoi i. Naimaci uaina raise ino.

¹⁹ Airedino, omoimo jiai lloiacadicue. Omoi ainiaina isirui. Naiñaiñuai diga iciricabiñeno. Naiñaiñuaimo riire lloñeno.

²⁰ Uruiai, omoimo rafuena lloiacadicue. Nana omoi mootiai uaina ñno. Nana omoi eiñiai uaina ñno. Iena omoi ñnoia, cai Nama eo iobite.

²¹ Mootiai, omoi uruaina jamai icifeno. Naimacina omoi jamai icia, comecina facaitimaci: “¿Ñiese cai mootiai uaina raise ñnoitica? Iena eo sefuiruitica?”. Ie muidona omoi uaina raise ñnoñeitimaci.

²² Patrones anamo itino, nana omoi patrones ocuica uaina ñno. Omoimo naimaci eruaiñenia, omoi patrones facaina raise maiji. Cai Namana omoi ñnua jira, cai Namana raise omoi iobitaiacana jira, omoi patrones facaina raise maiji. ²³ Buena omoi maijia, omoi comeciainona maiji. Dani comini facaina maijiñedomoi; iadedi cai Nama facaina maijidomoi. Ie jira raise maiji.

²⁴ Naimie jai llua isoi, cai Namamona ibana ico feiñoitomoi. Cai Nama Cristo facaina omoi maijidomoi; ²⁵ iadedi Jusiñamui raise maijiñedinona duere fiñoite. Jusiñamuimona naga maijidimie ie maijia diese feiñoite.

4

¹ Patrones, omoimo lloiticue. Naimaci omoi anamo illa jira, omoi diga maijidinona raise iba. Naimacina jifueñeno. Omoi Nama monamo illamona, omoimo eruaide. Naimie anamo omoi illa jira, omoi anamo itinona marena raise fino.

² Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca. ³ Cristo rafuena llocana cue jailla jira, cárcelmo birui iticue; iadedi naie rafue ñia lloiacadicue. Jusiñamui nana comini Cristo ðibeimo jai jitaillana lloiacadicue. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadicue. ⁴ Naimaci iena raise cacaillena, naie rafuena raise lloiacadicue. ⁵ Creyentiañedinomo omoi ia, marena omoi i. Naimacimo Cristo rafuena llono. ⁶ Bu diga omoi ñaia, caimare ñaio. Nie isoide Cristo rafuena omoimo bu jicanoia, raise marena fairio.

Damierie ie uaina orede

⁷ Tíquicodi nana cuemo ite rafuena omoimo lloite. Naimiena isiruitica. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide. ⁸ Cai illana omoi uñollena, omoi ðine naimiena oredicue. Omoi comeciaina ocuiñotaite. ⁹ Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruitica. Naimiedi omoi comini imie. Nana bene jai suide rafuena omoimo lloitiainiaia.

¹⁰ Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloticue. Omoi ðine naimie ria, naimiena feiño. ¹¹ Jesús ie uai jiai orede. Naimie mameci jiaicidi Justo. Judiuaimona dani naimaci cuena canode. “Naimaci jeacinona naimaci fañonocaillamona, Jusiñamui ie ðibeimo cominina jai jitaide” naimaci llumona, cue comecina ocuiñotadimaci.

¹² Epafras ie uaina jiai orede. Naimie omoi comini imie. Jesucristo ðibeimo naimie maijide. Jusiñamui diga naimie ñaia, omoi facaina jaca duere jicabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jicabide. ¹³ Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. ¹⁴ Cai médico Lucas ie uaina jiai orede. Naimiena

isiruiticai. Demas ie uaina jiai orede. ¹⁵ Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono. ¹⁶ Bie cartana omoï facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoï jiai faca. ¹⁷ Arquipomo llono: “Cai Nama fetocamedio. Naimie rafuena llocana raise o jai” llono. ¹⁸ Cue uaina omoïmo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoï jii. Jusiñamui omoïna duenaioillasa. Mai. Cue cuega rafue jai fuite. Pablodicue.

TESALÓNICAMO ITE CRISTONA HNOTINOMO PABLO NANO ORETAGA RABE

Uaiduacino

¹ Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uifocana omoi jaillana jitaidicai. Iaimaiai omoi uri itatajana omoi uifocana jaillana jiai jitaidicai.

Tesalónicamo ite creyentiai Jusiñamui uaina raise inotimaci

² Jusiñamuimo cai jiiia, naimiemo omoi facaina iobillana jaca fecacabidicai. Omoi facaina jicabidicai. ³ Cai Moo Jusiñamuimo cai jiiia, omoina comecitici. Jusiñamuina inotomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoina comecitici. ⁴ Omoina naimie isiruillamona, Jusiñamui omoina fetuana uifotici. ⁵ Jamai cai uaido Cristo rafuena omoina llofueñedicai; ia siño uaido iena llofuetici. Jusiñamui Joreño uaido iena llofuetici. Naie rafuena inuanona llofuetici. Omoi diga cai jaie ia, nie isoi cai illana raise uifotomoi. ⁶ Cai illa isoi ificaidomoi. Cai Nama illa isoi ificaidomoi. Iemona duere sefuidomoi; ia Jusiñamui Joreño omoina iocire itatajamona, Jusiñamui uaina iocire feifotomoi. ⁷ Ie jira nana Macedoniamite creyentiai omoimona fueotimaci. Nana Acayamo ite creyentiai omoimona jiai fueotimaci. ⁸ Omoimona Macedoniamite comini cai Nama uaina fididimaci. Acayamo ite comini jiai fididimaci. Ailluena nairai Jusiñamuina omoi inuana jai fididimaci. Ie jira naimacimo Cristo rafuena omoi inuana jai llofueñedicai. ⁹⁻¹⁰ Omoi dine nano cai ria, caimare caina feifotomoi. Cristo rafuena omoi cacajamona, jiraraina sedajana fainonocaida, cajede nanoca Jusiñamuina jai sedadomoi. Jusiñamui Jito abido billemo birui jiai ocuridomoi. Iese jiaie creyentiai omoina birui ñaicabitimaci. Cristo fiadailamona Jusiñamui naimiena jaie jillotate. Naimiena cai inuamona, Cristo Jusiñamui ricailliuemonona caina jai jillobitade.

2

Pablo Tesalónicamo llofuia rafue

¹ Cue nabañiai, omoi diga jaie cai ia, tainomo jaiñedicai. ² Omoi dine cai nia riñenia, Filipomo iticai. Nainomo itinodi caina jeare finodimaci. Iena jai uifotomoi. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoina llofuetici. Ailluena comini iena jitaiñedicai; ia iena llofuetici. ³ Uanañedicinona jaca llofueñedicai. Jearedicinona jaca llofueñedicai. Jifuerillacinona jaca llofueñedicai; ⁴ iadedi Jusiñamui uifoganodicai. Ie jira caina naimie oretajamona, ie rafuena llofuetici. Cominina iobitallena llofueñedicai; iadedi Jusiñamuina iobitallena llofuetici, Jusiñamui cai comecina raise uifua jira. ⁵ Cai llofuicino diga omoina bifueñedicai. Omoimona ucube ollena, iese llofueñedicai. ⁶ Cominimona iobillacinona jitaiñedicai. Omoimona jitaiñedicai. Jiaimona jiai jitaiñedicai; iadedi Cristo oretaganona cai illa jira, cai jitaia, omoimona iobillacinona jicaredicai. ⁷ Uruiaina raise sedaraño isoi, fecuise omoina llofuetici.

⁸ Jusiñamui rafuena omoi raise uifollena, omoina cai eo isiruillamona, niadedi omoi facaina fioidaicadicaí. ⁹ Omoi motomo cai ucube ollena, jiaie rana maijuuidicaí. Omoina cai duere finofllena, nagarui iese maijuuidicaí. Iena raise uifotomoi. Iese Jusiñamui rafuena omoina llofueticaí.

¹⁰ Omoi motomo cai illana raise uifotomoi. Jusiñamui jitailla isoi, nainomoi iticaí. Maraiñede rafuena finofledicaí. Mare rafuedo jaca jaidicaí. Iena uifotomoi. Jusiñamui iena jiai uifote. ¹¹ Omoi uruiaí omoi llofuia isoi, omoina llofueticaí. Omoimo diga icaifño Jusiñamui rafuena llofueticaí. ¹² Jusiñamui jitaillacinona omoi finollena, iena llofueuidicaí. Monamo ie cominina sedajanomo omoi jaca illena, naimie omoina jai fetode. Nainomoi ie siño uai anamo jaca iitomoi.

¹³ Jusiñamuimo cai jiaia, omoi facaina iobillacinona fecacabidicaí. Jusiñamui rafuena caimona omoi jaiie cacajamona, iena raise feifotomoi. Cominimona cai oga rafue isoi feifofnedomoi; ia Jusiñamuimona cai oga rafuena feifotomoi. Cai lloga rafue omoi comeciaí iuai meidocana jaide. Ie jira Jusiñamuimo iobillacinona fecacabidicaí. ¹⁴ Judeamo ite creyentiaí isoi duere sefuidomoi. Omoi cominimona duere sefuidomoi. Naimaci judúuai cominimona duere sefuidimaci. ¹⁵ Judúuai comini cai Nama Jesúna jaiie meinetimaci. Jusiñamui facaina lloraini micoriaina jiai jaiie meinetimaci. Caina jiai birui duere finodimaci. Jusiñamuina iobitañedimaci. Jusiñamui rafue dibeimo jiai iñedimaci. ¹⁶ Judúuaiñedinomo Cristo rafuena cai lluaana jitañedimaci. Jusiñamui judúuaiñedinona jillotajana jitañedimaci. Iese jeacino finocana nia jaidimaci; ia ja muidomoi Jusiñamui ricacillifue anamo jai itimaci.

Tesalónica comini dne Pablo abido jaiacade

¹⁷ Omoimona cai billa mei, nigarui illanona, omoina dane cioacadicai. Omoina cioifnedicaí; iadedi omoimo comecina facadicai. Omoi dne eo jaiacadicai. ¹⁸ Ua eo jaiacadicue. Diga icaifño jaiacadicai; ia Taiife cai jaillana jitañede. ¹⁹⁻²⁰ Caina omoi jaca iobitaja jira, omoina cioacadicai. Jesús abido bia, naie facaise omoiri eo iobiticaí. Iemo ocuiridicaí. Caina iocire itaitomoi. Omoi muidona iobiticaí.

3

¹ Cai comeci jarire illamona, Atenas railla nairaimo fiebidicoco; ² iadedi Timoteo omoi dne oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise inotallena, omoi comeciaina ocuifotallena, naimiena oretaticoco. ³ Duere sefuillamona bu bie uai sefuiruillana jitañedicaí. Creyentena cai illamona, jaca duere cai sefuillana uifotomoi. ⁴ Omoi motomo jaiie cai ia, iena llofueticaí. Omoi birui duere sefuillamona cai lluaana raise uifotomoi. ⁵ Cue comeci jarire illamona, Cristona omoi inuana raise uifoiacadicue. Omoina Taiife ramo faicabillamona, tainomoi cai maijiana jacinaiticaí. Ie jira Timoteona oredicoco. ⁶ Omoimona Timoteo jai abido billamona, omoie mare rafuena cocomoi llo. Cristona inocana jaidomoi naimie llo. Coninina isiruitomoi. Cocona caimare comecitomoi. Omoina coco cioacana isoi, cocona dane cioacadomoi naimie llo. ⁷ Birui duere sefuidicaí; iadedi omoie rafuena cai cacajano, cai comeci marena ite. ⁸ Cristo rafuena inocana omoi jaillana jai cai uifuumona, cai comeci marena ite. ⁹ Omoiri eo caimare jai iticaí. Ie jira Jusiñamuimo iobillacinona eo fecacadicai. ¹⁰ Omoina dane cai cioillena, naimiemo nagarui jidicaí. Naimiena nia omoi raise inoflenia, omoina naimiena raise inotaacadicaí. Ie jira omoina cioacadicai. ¹¹ Iese omoi

facaina, cai Moo Jusiñamuimo, cai Nama Jesúmo jicabidicai. Omoi dine caina naimie oretajana jidicai. ¹² Cai Nama coninina isiruitacana omoi jaillana jitaidicai. Caina omoi isiruilla isoi, nana jiaínona omoi isiruillana jidicai. ¹³ Omoi comeciai ocuifollena, omoi comeciai Jusiñamui jitailla isoi, marena illena jidicai. Nana ie comini diga cai Nama Jesús abido bia, Jusiñamui dine omoi ia, omoi comeciai marena illena jitaidicai. Iese omoi facaina jicabidicai.

4

Naimaci marena illena llofuate

¹ Jiaie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitaidicai. Iese birui itomoi; ia nagarui iese omoi illana jitaidicai. Ie jira cai llua isoi, omoi jai. ² Cai Nama Jesús jitailla jira, navui iena llofueticai. ³ Jusiñamui jitailla isoi omoi marena illena, omoi aifede riño diga ifeno. ⁴ Nagamiai riñona ie aina otena, mare; ia marañede rafuena finoño. Nagamiai dajena daje riño uana Jusiñamui jitaide. Dañaiño diga iaímaiai jionaillena jiai jitaide. ⁵ Naimiena inoñedino isoi, omoi ai uana jitaifede. Naiñaiñuai abina jamai cioillena riñona otimaci. ⁶ Jiaie creyentemo jeacinona finoño. Naimie aina jamai aifedoño. Naie isode rafuena bu finoia, cai Nama naimiena duere finoite. Iena navui omoimo lloticue.

⁷ Jearede rafuena cai finollena, Jusiñamuidi caina fetofede; iadedi mare rafuena cai finollena caina fetode. ⁸ Bie llofuiacino nie creyente inoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jiai jamaide. ⁹ Jiaie creyentiaina omoi isiruillana omoimo eo llofeiticue. Jusiñamui omoína coninina isiruillana jai uifnotade. ¹⁰ Nana Macedoniamo ite creyentiaina jai isiruitomoi; iade nia isiruicana omoi jai. ¹¹ Uri omoi i. Dani omoimo ite rafuena omoi uiuicai. Jiaínomona ucubena jicaño; ia omoi ucube ollena, omoi onolli diga rairuioicaiño omoi maiji. ¹² Ie mei omoi jitailla ra iite. Iemona Cristona inoñedino omoína jiai mameriñeitimaci.

Jesucristo dane abido billena llote

¹³ Omoi raise uifollena, daje rafuena lloiticue. Omoi creyentiaimona dajerie jai fiodaitimaci. Jesúna inoñedinomona bu fiodaia, fiodaillamona jilluamo naimaci ocuiriñena jira, sunaitimaci; iadedi naimaci sunailla isoi, omoi illana jitaifedicue. Fiodaillamona jilluamo jai ocuiridomoi. ¹⁴ Jesús fiodaillamona naimie jilluana inoticaí. Ie jira Jesús abido billa facaise, jai fiodaite creyentiaina Jusiñamui jilloitajana jiai jai inoticaí. ¹⁵ Cai Nama llofuia isoi, bie rafuena lloiticue. Jesús abido bia, jai fiodaite creyentiai, nia fiodaifede creyentiai diga, daacaiño naimie dine a jaiticai. ¹⁶ Cai Nama Jesús abido bia, Jusiñamui dinena naimie billanona, caina jidaite. Ie jaienici caina uaidoite. Jusiñamui ie trompeta daacaiño jiai fiite. Jai fiodaifino nano jilloitimaci. ¹⁷ Iemei nia fiodaifedínodi como jillodino diga uillie motomo naimiemo dafaiñillena, Jesús caina uite. Iemei naimie diga jaca iticai. ¹⁸ Bie llofuiacino diga conini comeciaina omoi ocuifno.

5

¹ Bie rafue suilliruina uifnoñedicai. Bie rafuena omoi jai uifua jira, iena dane eo cueñeiticue. ² Cai Nama abido billana jai uifnotomoi. Fñredimie naiona ebena billa isoi, naimie abido biite. ³ “Uri iticai. Marena iticai”

Cristona ñnoñedino raia, naie facaise naimacimo duere sefuillifue suite. Urue riño jigicomo casilla isoi, ebena suite. Naiemona jilloñeitimaci. ⁴ Naie facaise sua, Cristo billena omoi jai uñuamona, firedimie naiona ebena billa isoi, jacinaiñeitomoi. Cristona ñnoñedino isoi, iñedomoi. ⁵ Uanaicinona omoi jai uñuamona, Cristo ie cominina jai jaidomoi. Jeacino anamo omoi jai iñena jira, Cristona ñnoñedino ðibeimo jai ðuiñedomoi. ⁶ Ie jira abina sedacana omoi jai. Abina rairuioicaida omoi jai. Jifaidino isoi ebena omoi jaiñeno. ⁷ Cristona ñnoñedino abina sedacana jaiñedimaci. Rairuioicaida ebena jaidimaci. ⁸ Cristo ie cominina jai cai illa jira, ebena cai jaiñena. Imaci abina ridollena, soldaduai jogobe icodi ite. Imaci ifog; icodi jiai ite. Ie isoide. Cai comeciaina eenollena, Cristona ñnocana mai cai jailli. Jiaino isirucana mai cai jailli. Jusiñamui dine ico cai illemo ocuricana mai cai jailli. ⁹ Caina duere finollena, Jusiñamui caina fetoñede; iadedi cai Nama Jesucristo finoca rafue muidona, duere finollemona cai jilloillena, caina fetode. ¹⁰ Cristo cai facaina jai fiodaite. Ie jira birui cai fiodaia, naimie bille facaise nia fiodaiñedinona cai ie, naimie ðiga jaca iitica. ¹¹ Ie jira coninina ocuiñotacana omoi jai. Cristo ðibeimo coninina itatacana omoi jai. Iese birui jaidomoi; ia nia iese omoi jai.

Omoi creyentiaina llofuerañi uaina ñno

¹² Cue amatiai, jiaie rafuena lloiticue. Omoi creyentiaina llofuerañi uaina ñno. Cristo jitailla jira, omoi afemo itimaci. Cristo ðibeimo omoina raise itatallena, omoi facaina llofuetimaci. ¹³ Omoina naimaci canua jira, naimacina isiruillanona, naimaci uaina raise omoi ñno. Coniniri uri omoi i. ¹⁴ Omoi motomona majiacaiñedinona imaci majijillesa ocui. Duere sefuillamona jai comeciina ocuiñonidinona comeciina ocuiñota. Raise ñnollena, Cristona nia raise ñnoñedinona jiai cano. Fecuisse naimacina ui-uillanona, naimacina cano. ¹⁵ Omoina jiaimie duere finoa, ibana oñeno; iadedi naimiemo mare rafuena fino. Nana cominimo mare rafuena fino. ¹⁶ Nie isoide rafue omoimo ia, caimare omoi i. ¹⁷ Jusiñamuimo nagarui jii-jii. ¹⁸ Nie isoide rafue omoimo ia, Jusiñamui jitailla jira, naimiemo iobillacinona feca. Jesucristomona Jusiñamui jitaillacinona jai uñotica. ¹⁹ Jusiñamui Joreñoa jamaiñeno. ²⁰ Jusiñamui Joreño uaido llorañi llofuiana jamaiñeno; ²¹ iadedi Jusiñamui Joreño uaido naimaci llofuiana facaci. Mare rafuedo jaca omoi jai. ²² Nana maraiñede rafuemonona eneno oni omoi i. Naie isoide rafuena omoi abimo omoi oñeno. ²³ Ie jira Jusiñamuimo omoi facaina jiiiticue. Naimie omoina jai uri itatate. Naimie omoina nagarui marena itatacana jaillana jitaidicue. Iese omoi jai, cai Nama Jesucristo dane abido bille facaise, naimie jitailla isoi, omoi comeciiai marena iite. ²⁴ Jusiñamuidi ñnogamiena jira, iese omoina finoite.

²⁵ Cue amatiai, Jusiñamuimo cai facaina omoi jiiicabi. ²⁶ Cue facaido nana creyentiaina caimare uaido. ²⁷ Cai Namamo cai duilla jira, naimie jitailla jira, bie cartana nana creyentiiai uicomo feca. ²⁸ Cai Nama Jesucristo omoina duenaillasa. Mai. Pablodice.

TESALÓNICAMO ITE CRISTONA HNOTINOMO PABLO IE EMODOMO ORETAGA RABE

Uaiduacino

¹⁻² Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uiñocana omoi jaillana jitaidicai. Iaimaiai omoi uri itatajana omoi uiñocana jaillana jiai jitaidicai.

Cristo dane abido bia, naimiena inoñedinona duere finoite

³ Jusiñamuimo cai jiaa, omoi facaina naimiemo iobillacinona fecacabidicai. Cristona inocana raise jaidomoi. Coniniri isiruicana raise jaidomoi. ⁴ Ie jira marena omoi illana jiaie creyentiai illanomo llocana uiticai. Duere sefuidomoi; iadedi danomo abido jaiñedomoi. Cristona inocana jaidomoi. Iena llocana uiticai. ⁵ Jiainomona birui duere sefuidomoi; ia inocana jaidomoi. Iemona Jusiñamui omoi facaina illana uiñotica. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie comina sedajanomo iitomoi.

⁶ Jusiñamui omoina duere finodinona ico duere finoite. Omoi facaina ibana oite. Iese naimie finoia, naimiemona mare. ⁷ Cai Nama Jesús abido bia, duere sefuillamona jilloitica. Monamona ie siño jaienisa; diga biite. Irai boua isoi ana biitimaci. ⁸ Jusiñamuina inoñedinona diese duere finoitimaci. Cai Nama Jesús rafuena naimaci inoñena jira, naimacina duere finoitimaci. ⁹ Inoñena jira, jaca faifitimaci. Jaca llegi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. ¹⁰ Cristo bille facaise naimiemo iobillacinona fecaitica. Naimieri nana naimiena inotino rajicaitimaci. Omoimo cai lloga rafuena omoi jai inua jira, iese iitomoi.

¹¹ Ie jira omoi facaina jcabidicai. Naimie jitailla isoi, omoina naimie marena itatajana jidicai. Omoina naimie fetuamona, ie uaido mare rafuena finocana omoi jaillana jidicai. Ie uaido naimiena inocana omoi jaillana jidicai. ¹² Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusiñamui, cai Nama Jesucristo diga, caina duenaillamona iese iitica.

2

Jesucristo abido bille rafue

¹ Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue. ² “Cai Nama jai abido bite” raillana omoi cacaia, raise jarire ifeno. Rucaicuierifeno. “Jusiñamui Joreño iena cuemo jai lloite” damie raia, iena inoñeno. Nie lloraima iena lloia, iena inoñeno. “Pablomona cue feiñoga carta iena lloite” damie raia, iena inoñeno. ³ Naie isoide rafue diga omoina jiaino jifueiacania, iena inoñeno. Cai Nama nia niñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; ⁴ iadedi nano jiaie rafuena finoite. Taife dinena naimie billanona, jirarai baifemo iacanite. Jerusalémo Jusiñamui jofomo illanona, “Jusiñamuidicue” raite. ⁵ Omoi dine navui cue ia, bie rafuena omoimo lloticue. ⁶ Jusiñamui Joreño naimie nia

billena rairuillana jai uiñotomoi. Jusiñamui jitaillirui facaise naimie biite. ⁷ Taife maraiñede rafuena birui bainino finotate. Jusiñamui Joreño naimiëna maraiñede rafuena birui marefodo finuana rairuide. Jusiñamui Joreño naimie rairuiñena mei, ⁸ Taife dinena maraiñedimie biite; ia cai Nama Jesús abido ebire bia, firaiñuamona naimiëna meineite. ⁹ Cai Nama Jesús nia abido biñenia, comini jifuellena, Taife uaido bie maraiñedimiedi diga siño rafuena finoite. ¹⁰ Cominina eo maraiñedicinodo jifueite. Naie comini ico faifitimaci. Jusiñamui ie uanaicinona naimaci ñnoñena jira, jilloiacaiñeitimaci. ¹¹ Ie jira Jusiñamui naimacina tainocinona ñnotaite. ¹² Jusiñamui ie uanaicinona naimaci ñnoñena jira, maraiñede rafuena naimaci ebiruilla jira, Jusiñamui naimacina duere finoite.

Jusiñamui omoïna jai fetode

¹³ Jusiñamuina ñnoñedinno isoi Jusiñamui omoïna duere finoñeite. Naimie omoïna jai fetua jira, naimiemo iobillacinona jaca fecacabidicai. Omoï jilloillena, nano dofoconi omoïna fetode. Ie Joreño uaido naimie jitaillacinona omoï finollena, naimie uanaicinona omoï ñnuamona, omoïna fetode. ¹⁴ Ie rafuena cai lluumona, Jusiñamui omoïna jai jillotate. Iemona cai Nama Jesucristo ebirede illanomo jaca iitomoi. ¹⁵ Ie jira, Cristona ñnocana omoï jai. Cai llogacinodo omoï jai. Iena caïmona jai cacadomoi. Cai cartamona iena jiai cacadomoi. ¹⁶ Omoï facaina cai Nama Jesucristomo, cai Moo Jusiñamuimo, jicabidicai. Naimie caina isiruute. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicai. ¹⁷ Naimie omoï comeciaina nia ocuiñotallena jiidicai. Nie isoide rafuena omoï finoiã, naie rafue omoï marena finollena jiidicai. Buena omoï ñaia, omoï marena ñaillena jiai jiidicai.

3

Cai facaina omoï ñjana jitaïdicai

¹ Daje rafue nia lloiacadicue. Cai facaina omoï ñjana jitaïdicai. Cai Nama rafue llocana jaillana jitaïdicai. Omoï ñnua isoi, jiaïno ñnuana jiai jitaïdicai. ² Maraiñedinomona cai jillobillena, omoï ñjana jitaïdicai. Ailluena comini Cristona ñnoñedimaci; ³ ia cai Nama jaca ñnogamie. Omoï comeciaina ocuiñotaite. Maraiñedicinomona omoïna eenoite. ⁴ Cristomo cai duilla jira, cai llogacinona omoï jai ñnuana jai uiñoticai. Iena nia ñnoitomoi. ⁵ Cai Nama Jesús omoïna Jusiñamui omoïna isiruillana uiñotajana jitaïdicue. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuimo omoï facaina jiaïticue.

Maijuillasa

⁶ Cai Nama Jesucristo jitailla jira, jiaïe rafuena nia lloticue. Jiaïe croyente maijiacaiñenia, naimie diga eo nabairiñeno. Iena navui omoïmo lloticue; ia damierie iese ia, naimaci diga eo nabairiñeno. ⁷ Caïmona fueo. Navui omoï motomo iticai; ia cai ucube ollena, jaca maijidicai. ⁸ Guillena ibaïeno guïñedicai; ia nagarui eo maijidicai, omoïna duere cai finoñellena. ⁹ Cristo facaina cai maijia jira, omoïmona ra jamai cai jicallena, caimo uai ite; iadedi caïmona omoï fueollena iese jicañedicai. Omoï ra ollena, omoï maijiana jitaïdicai. ¹⁰ Navui omoï motomo cai illa facaise lloticai: “Bu maijiacaiñenia, guïñena”. ¹¹ Omoï motomo damierie jai maijiñenana jai fididicai. Maijiñeno jai itimaci. ¹² Cai Nama Jesucristomo cai duilla jira, naie isoidinomo maijillena

lloicaí. Uainino maijiamona ucube naimaci uana jitaídicaí. ¹³ Cue amataí, nie isoide mare rafuena finollena sefuiruiño. ¹⁴ Cue jai cuega cartamo ite rafuena bu iinoñenia, nana creyentiaina naimiena uiñota. Naimie meidailena, naimie diga nabairiño. ¹⁵ Naimiena enoiño; ia creyentena naimie nia illamona, naimiena fecuise llofue.

Fuiduacino

¹⁶ Cai Nama omoi jaca uri itatajana jitaídicaí. Naimie omoi diga jaca iite. ¹⁷ Cuena canollena, naimiemo cue llua isoi, jiaimie bie carta cuega; iadedi cue mameci buene dama cueticue. Nana cartamo iese cue mamecina cueticue. Pablodicue. ¹⁸ Cai Nama Jesucristo nana omoína duenaillasa. Mai. Macaibaite.

TIMOTEOMO PABLO NANO ORETAGA RABE

Pablo Timoteona uaiduacino

¹⁻² Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús oretagamiedicue. Ie rafue llollena, naimie cuena orede Naimiena cue cioillena, naimie isoi cue illena, naimie abido billemo ocuridicue. Jusiñamui cuena jiai orede. Naimiedi cai Jilloitaraima. Cue llofuaciinomona Cristona o raise inua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uifocana mai o jai. Ona jai uri itatatiamaiaia. Iena uifocana mai o jai.

Cristo rafuena tainona llofueraini llofuaciinodo jaiño

³⁻⁴ Macedoniamio jaie jaidicue, Efesomo o fiebicallena omo lloticue. Nainomo dajerie Cristo rafuena raise llofueñedimaci; iadedi jiaiforie llofuetimaci. Diga igaiaina faca-facadimaci. Imaci usumatiaia mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai inuamona, marena iticai. Iena llofueñedimaci. Ie jira naimaci uaina llacaita. ⁵ Jusiñamuina comini isiruillena, jiaie cominina jiai naimaci isiruillena, Jusiñamui uaina llofueticai. Naimaci comeciai jeaninana jitaidicai. Jusiñamuina raise naimaci inuana jiai jitaidicai. Ie jira Jusiñamui rafuena llofuecabiticai. ⁶ Dajerie llofueraini iese llofueñedimaci; iadedi jamai ñaitimaci. ⁷ Moisés micori jaie llogacinuaido llofuecabitimaci; iadedi iena llofuiana uifueñedimaci. Naie llogacinuaina ua uifueñedimaci.

⁸ Iena raise llofuegana, Jusiñamuina uifueñedinona naimiena uifotallena, mare. Iena uifoticaia. ⁹⁻¹⁰ Moisés micori llogacinuaidi mareuidinomo jainaiñede. Jaiinomo jainaiñede: Jusiñamui uaina inoñedinomo lloga uaina inorainidinomo, Jusiñamuina jitaifedinomo, jeacino finorainimo, jeare ñacabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aifede riño diga itinomo, inifede ima diga itañaiñuaimo, daje isoide ima diga conini aifuedotinomo, comena fuidinomo, taino llorainimo, taino lluana jifueridinomo, uanai rafue facaisena ifedinomo. Nana Cristo rafue facaina ifedinomo Moisés micori llogacinuai ua jainaiñede; ¹¹ ia naie rafue cuemo jai jainaiñede. Ie mare rafuena cue llollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

Jusiñamui caina duenailla jira, Pabloti iobide

¹² Cuena fetua jira, cai Nama Cristo Jesúri iobidicue. Naimiena cue inollena, naimie cuena uifueamona, cuena fetode, naimie rafue cue llollena. Iena llollena, cue comecina jiai ocuifotade. ¹³ Jaiie naimiena jeare ñaiticue. Naimiena inotinona jiai duere finodicue. Abina cue uifueña jira, naie facaiseconi naimiena nia cue inoñena jira cuena duenaillamona, naimie cuena fetode. ¹⁴ Cuena eo duenaite. Iemona naimiena inoticue. Naimiena jiai isiruiticue.

¹⁵ Bie lludai mare cue uifueamona, nana comini buena inuana jitaidicue. Marañedinona naimaci jeacinomona jilloitallena, eniuemo Jesucristo bite. Ero, nanoca jeacinona finoraímadicue; ¹⁶ iadedi Jesucristo cuena duenaite. Naimiena cue inuamo jaie fecuise ocuride. Nana jeacinona finorainimo fecuise ocuride, naimiena inollena. Naimiena cai inuamona, Jusiñamui

diga jaca iiticaí. Cuen a duenailla jira, biruimona naimiena ñnoitínodi naimie naimacina duenaillana uñnoitímaci. ¹⁷ Jusiñamuidi nanocamie. Jaca fiódaiñeite. Naimiena cionidicaí. Naimie damiede. Jaiena ñede. Naimiena jaca iobocabillasa. Iena jitaídícue.

¹⁸ Ero, Timoteo, cue jito, omo rafue lloiacadícue. Nano o llofueraimana jaiacana facaise ailluena Cristo rafuena llofueraínidi ona jaie llotímaci: “Naimie raise marena llofueite” llotímaci. Iena comecianona, o comeci ocuiñocana o jai, Cristo rafuena rídocana o jaillena. ¹⁹ Cristona ñnocana o jai. O comecina marena finocana o jai. Dajerie naimaci comeciaí uaimo comeciaina facañedímaci. Ie jira Cristona jai ñnoñedímaci. ²⁰ Iese ite Hime-neo. Alejandro jiaí jai daje isoide. Jai ñnoñediaimaiaí. Ie mei iaímaiaína Taife anamo jai itabicaítaticue, duere sefuillena. Iaímaiaí fueollena, Jusiñamuina jeare ñaíñellena, iese itabicaítaticue.

2

Nana comini facaina juiticaí

¹ Diga rafue omo lloíticue; iadedi daje rafue motomo ite. Nanoca rafue. Iena omo lloíticue. Jusiñamui diga omoi ñaía, nana comini facaina jii. Naimaciri iobillacinona Jusiñamuimo feca. ² Uri caí illena, Jusiñamuina raise caí sedallena, Jusiñamui jitailla rafuena caí finollena, illaicomini facaina caí jii. ³ Iese caí jiiia, Jusiñamuimona mare. Naimiedi caí Jilloitaraima. ⁴ Naimiedi nana comini naimaci jeacinomona jilluana jitaide. Uanaicinona naimaci uñuana jiaí jitaide. ⁵ Nana nairaiaí imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie ñimananona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiaí jai nabairedímaci. ⁶ Caí jeacinomona caí eneno illena, Jesucristo nana caí facaina jai fiodaite. Naimie jitailla facaiseconi Jusiñamuidi cominina bie rafuena jai uñotade. ⁷ Bie rafue cue lloillena, Jusiñamui cuena fetode. Judíuainñedinomo cue lloillena, bie rafue naimaci ñnollena, uanaicinona naimaci uñollena, cuena orede. Tainona lloñedícue.

⁸ Ie jira naga roracomo ite iññiaí, caí comini onolliaí a ñuitacabilla isoi, comeciaino jeacino ññenanomona, Jusiñamuimo jiana jitaídícue. Naimaci comeciaino icirillacino ññedemo, Jusiñamuimo jii. Naimaci comeciaino uaitajacino ññedemo, Jusiñamuimo jii. ⁹⁻¹⁰ Riñoniaimo jiaí lloíticue. Roracomo omoi jaia, abí ieduoamo comeciaina facañenamona, omoi ifotiena fino. Jamai ebinai raillano, abí ieduoamona abina finora jitañeno. Jamai ebinai raillano, abí ieduoamona eo raifide ñniraina jitañeno; iadedi mare rafuena omoi finuamona, ebinaitomoi. “Jusiñamuina ñnoticaí” omoi raillanona, naimie jitailla isoi, marena omoi finolle. ¹¹ Rollena comini ofia, ñaññenanomona, uaitañenamona omoi fueo. ¹² Omoi ofia, omoi iññiaína llofuiana jitaíñedícue. Nainomo omoi ñaññena. ññiaí omoi anamo illana jitaíñedícue. Iese omoi riñoniaimo lloiacadícue. ¹³ Jusiñamui Adán micorina nano finua jira, iese lloticue. Adán micori finua mei, Eva micorina jiaí finode. ¹⁴ Taifedi Adán micorina jifueñede; iadedi Eva micorina jifueite. Ie mei naie riño jeacinona finode. ¹⁵ Iemona jilloite; iadedi uruiaí jococana jaite. Riñoniaídi Jusiñamuina ñnoia, jiaíe cominina isirua, Jusiñamui jitailla rafuena finoa, ie abina eenoia, jilloitímaci.

3

Creyentiaina sedaraini illa rafue

¹ Bicinodi uanaicino. Creyentiaina llofueraimana bu jaiacania, naimie comecimo mare jitaillacino ite. ² Bie isoide llofueraimana jaiacadimiena jitaidicue. Naga comini naimie mare raillamie. Dañaiñona airedimie. Abi eenotimie. Ebena iñedimie. Inogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie. ³ Jifairuiñedimie. Fuirirainidimie. Raire icirirainidimie. Ucubena nicidoñedimie. ⁴ Naimie cominina raise sedadimie. Naimie anamo naimaci illanona, naimie uruiaie uaina raise innotadimie. Ie isoidimie llofueraimana jaillana jitaidicue. ⁵ Iese naimie iñenia, ie anamo itinona naimie raise sedañenia, ¿ñiese jiaie creyentiaina raise sedaite? ⁶ Como creyentena jaidimiena creyentiaina llofueraimana fetoñoeno, naie diga naimie abi iedoi raillano. Abi ieduamona, Taife isoi jeacino finoite. ⁷ Llofueraimana jaiacadimiena creyenteñedino: “Mare” raiñenia, naimiena fetoñoeno. Iese naimiena raiñenia, naimie joreñoena jeare ñaitimaci. Iemei Taife ramo jiaie faite, naimie abido danomo uaillena. Ie muidona naimie uaina jaca cacarefiñeitimaci.

Diáconuai illa rafue

⁸ Diáconuai creyentiaie llofueraini isoi marena illa. Inouiganona illa. Jifairaiñena. Ucubena nicidoñena. ⁹ Naimacidi Cristona cai inua rafuena jeanide comeciamaona inua. ¹⁰ Bu omoi fetocania, naimacina nano facaci. Roracomo jiaie rana nano maijita. Iena raise finoia, diáconuaina jaite. ¹¹ Diáconuai ainiaie jiaie inogañaiñuaina illa. Jiaie comini joreñoena ñaiñena. Jirorainina. Naga rafuena marena raise finua. ¹² Nana diáconuai aidi dañaiñorie. Diáconuai uruiaie naimaci uaina raise inua. Diáconuai imaci anamo itinona raise sedajana uiñua. ¹³ Diáconuai marena maijia, comini naimacimo iobillacinona fecaitimaci. Cristo Jesúna inuano, naimiena marefodo jiaie lloitimaci.

Jusiñamuina innotino

¹⁴ Timoteo, raire o dine jaiacadicue; iadedi uicodo bie rafuena omo cueticue. ¹⁵ Are cue riñenia, dani omoi creyentiaie ñiese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicaie. Uanaicinona riidoticaie. ¹⁶ Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaie: Eniruemo Cristodi imana jai bairede. Jusiñamui Joreñodi caina naimie uai siñonana uiñotade. Jusiñamui jaienisai naimiena jiaie cioidimaci. Jiaie nairaiñaimo naimiena lloticaie. Iena cacajamona, ailluena cominidi diga nairaimona naimiena birui innotimaci. Monamo naimie abido jai jaide.

4

Jiaínodi jiaiforie rafuena lloitimaci

¹ Jusiñamui joreño caimo raise lloite: “Jesu Cristo nia abido biñena facaiseconí damerie creyentiaie Cristona faionocaitimaci. Taife ñibeimo ite lloraini lluanacacarefillamona, Janabamona ite llucacino jaitimaci. Taifemona ite llucacino jaitimaci”. ² Naie llorainidi: “Uanaicinona lloticaie” raitimaci;

iadedi taino llocabiitimaci. Naimaci comeciai jai tainomo iite. ³ Hima riño ie aina ollena rairuitimaci. Riño ima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiai uanaicinona uñuanona, iobillanona guillena, naimiedi naga rana finode. ⁴ Nana Jusiñamui comuitaga guille radi mare. Iobillano iena cai feñuanona, guiticai. ⁵ Jusiñamui llua jira, Jusiñamuimo cai jña, nana guille radi jai mare. Iemona marañede rafue jaca caimo comuiñeite.

Jesucristo rafuedo raise ñnocana jai

⁶ Timoteo, cue lluaña creyentiaimo o lloia, Jesucristo ðibeimo raise maijidio. Cristo uaina ñnocana o jailla jira, mare llogacinodo o jailla jira, raise maijidio. ⁷ Jamai rafuemo, jamai ñgaaimo o comecina facañeno; iadedi Jusiñamui jitailla rafuena finocana o jai. ⁸ Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui ðine jairuido o jaillena, o comecina marena jiai raise finotaite. ⁹ Bie lluacinodi uanaicino. Ie jira iena cai ñnua. ¹⁰ Cai jillobillena, cajede Jusiñamuimo ocuridicai. Ie jira duere sefuillano maijidicai. Jeacinomona Jusiñamuidi nana cominina jillobitaacade. Naimiena ñnotinona jai jillotate.

¹¹ Nana creyentiaimo cue lluaña raise llofue. ¹² Naimacina o llofueia, coniruena nia o illamona: “O afemo iticai” naimaci raiadedi, damamai iese raitimaci. Mare illacinodo o jai. Ie mei iese raiñeitimaci. Marena o ñaiamona, marena o illamona, jiaie cominina o isiruillamona, Jusiñamuina o ñnuamona, o jeanide rafuena o finoñenamona, naimacidi fueoitimaci. ¹³ O ðine nia cue rñenia, creyentiai ofia, Jusiñamuina cuegafuiaina ado faca. Iena llono. Iena llofue. ¹⁴ Creyentiaina llofueraini navui ofidemo, Jusiñamuimona o baitajacinona o feñollena, naimaci onolliai o ifogimo jonetimaci onolliai o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fainonocañeno. ¹⁵ Iena eo uiuicai, nana comini Cristona ñnocana o jaillana uñollena. ¹⁶ O comecina raise eeno. Marena raise llofue. Cristo uaina ñnocana o jai. Iese o jaja, jeacino finuamona jilloitio. Iese ona cacadino jai jilloitimaci.

5

Timoteo afemo itino diga ie illa rafue

¹⁻² Eimiaina illamona, o afemo itinona riire llofueñeno; iadedi o moomo o llua isoi, naimacina fecuise llofue. O anafemo itinona o amatiaimo o llua isoi, llofue. O afemo itañaiñuaina o eimo o llua isoi, llofue. O anafemo itañaiñuaina o mirañotiaimo o llua isoi, llofue. Nañaiñuaimo jeare comecina facañeno. ³ Nañaiñuaina canollena, feciñuai comini iñenia, nañaiñuaina cano. ⁴ Feciñomo uruiai ia, naimaci nañaiñona canua, nañaiñño naimacimo duilla jira. Einamacina illamona, iemona nañaiñodi ibana oite. Iese itena, Jusiñamuimona mare. ⁵ Feciñomo uruiai iñenia, da Jusiñamuimo nañaiñño ocuride, naimie nañaiñona canollena. Jusiñamuimo nagarui jicabite. Bie isoide feciñuaina cano; ⁶ iadedi Jusiñamuimo ðuiñede rana ebiruiga feciñona canoñeno. Jusiñamui anamo nañaiñño jai raise iñenamona, Jusiñamuimona nañaiñodi jai fiodaitañaiñño isoide. Fiodaite cominina jaca canoñedicai. ⁷ Ie jira creyentiaimo biena llono, feciñuaina jeare bu ñai raillanona.

⁸ Ie cominina canoñedimie Cristo uaina jai fainonocaide. Naimiedi Cristona ñnoñedimie baifemo eo jearedimie. ⁹ Creyentiaina sedarainina canolle feciñuai mameciaina o joneia, iese jone: Jai jionaidiñaiñuai ðiese

mameci jone. Dajede inirediñaiñuui mamecina jone. ¹⁰ Mare rafue naiñaiñuui finocabilla jira, jiaie cominidi naiñaiñuui mareñaiñuui raillañaiñuui. Ie urui ai raise sedadiñaiñuui. Cominina nafuecabitñaiñuui. Jiai creyentiaina abina iedoño canocabidiñaiñuui. Duidinona canocabidiñaiñuui. Dïese mare rafuena finocabidiñaiñuui mameci jone. ¹¹ Feciñuui ðiese mameci o joneia, nia jionaiñede feciñuui mameciaina joneño. Naiñaiñuui nano llotimaci: “Inina dane oñeiticai. Da Cristona sedaiticai” llotimaci. Ie mei uri inenanomona, imana niciduamona, inina jitaitimaci. Ie jira naiñaiñuui mameci joneño. ¹² Naiñaiñuui navui llucinona jai fainonocaila jira, jiaie comini naiñaiñuui joreñuaina ñaitimaci. ¹³ Naiñaiñuui diga jofomo macariruil-lamona, rairaiedimaci. Eo ñaillaredimaci. Naiñaiñuui ñaiñenacinuaido ñaitimaci. ¹⁴ Nia jionaiñede itiñaiñuui iese inellena, naiñaiñuui inina dane uana jitaidicue. Ie mei uruiarenitimaci. Naiñaiñuui jofona sedaitimaci. Ie mei budi naiñaiñuaina jeare ñaiñeite. ¹⁵ Cristona dajerie fainonocaida, Taife ðibeimo jai jaidimaci. ¹⁶ Creyente cominona feciño iade, da naimie naiñaiñuaina canua. Jiaie creyentiaimo naiñaiñuaina canolle rana jicañena. Ie muidona cominide feciñuaina canorenitimaci.

¹⁷ Creyentiaina llofueraini marena maijia, raise ibauiga. Naimaci lloia, naimaci jiai llofueia, eo raise ibauiga. ¹⁸ Moisés micori jaiie cuegafuiai iena llot: “Trigo oni juillena jurareta saisiia, ie fuena maiñeno, ie guillena”. Guillamona ibana jai ote. Cristo jaiie llot: “Maijidi miedi ibauiga”. ¹⁹ Creyentia llofueraimana damie llogidoia, iena cacareñiño. Mena comini, nibai daje amani comini iese naimiena llogidoia, iemo cacarei. ²⁰ Creyentia llofueraimona bu jeacina finocabia, nana creyentia uicomo naimiemo riire llono, jiaie creyentia daje isoi inellena. ²¹ Dacinodo naga jeacino finora imamo llono. Nagamiemo riidoño llono. Fecuisse damiemo lloño, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiai cidimaci. Ie jira dacinodo llono. ²² Jeacino naimiemo ia, naimie jeacino facaisena o inellena, creyentia llofueraimana jaillena, buna raire fetoño. Jeacinomona oni eneno o i. ²³ Eo o ðuia, da jinuina jiroño. O ðucabilla jira, janore vino jiro, o jebe manollena. ²⁴ Jeacino dajerie finoia, iena uiñoticai, juez isoi Jusiñamui iena nia lloñenia. Jeacino jiaino finoia, iena uiñoñedicai; iadedi jiairuido Jusiñamui lloia, iena uiñoticai. ²⁵ Ie isoide. Mare rafue bu finoia, iena uiñoticai; iadedi birui iena cai uiñoñenia, jicarena finoña jira, jiairuido iena uiñoticai.

6

¹ Jusiñamuina innote maijirainidi naimaci patrones eo inua. Ie mei Jusiñamuina inoñedino Jusiñamuina jeare ñaiñeitimaci. Cai llofuiaicnona jamaiñeitimaci. ² Jesucristona naimaci patrones inoia, maijiraini naimaci uaina jiai inua. Naimaci comeciai facañena: “Patrón creyentena illa jira, ðani comina cai isiruilla jira, raise maijñeiticai”; ia: “Raise maijñitica!” comeciaina facaja.

Uanañedicnona llucinno

³⁻⁴ Cai llogacinodi uanaicno. Cai Nama Jesucristona lloticai. Bie llogacinomona naimie jitaille isoi cai illanona, raise uiñoticai. Jiaicnodo bu llofueia, abi iedote. Abi uiñoñede. Uai eo uaitaiacade. Ie meinocni comini abina uradoidimaci. Daajena comeciaina lloñedimaci. Jiaie comini joreña ñaitimaci. Cai fiiena bitimaci. ⁵ Uai uaitatimaci, naimaci comeciai

maraiñeno illa jira. Uanaicinona jai uiñoñedimaci. “Cristo uai llumona, ail-luena ucubena oiticaí” raillanomo comeciaina facadimaci. “Iemona caimare ititicaí” raillanomo comeciaina facadimaci. ⁶ Te iadedi iese iñede. Cristona eo raise cai ñnuamono, caimo diese ite ra diga caimare iticaí.

⁷ Cai jeicia, jaca buenidicaí. Cai fiodailla mei, cai rana uiñeiticaí. Cai radi benomo fiebicaite. ⁸ Te jirari, cai guille ia, cai iniroi ia, caimare bene cai illa. ⁹ Eo ucuberedinona jaiacadinona Taife eo ramo faite. Taife uaina ñnuanona ucube ollena, ucuberedinona jaiacadinodi diga maraiñede rafuena finodimaci. Ja muidomo imaci abi faifitimaci. ¹⁰ Ucubena ebiruillanona, ucuberedinona jaiacadiño naga jeacinona finocabidimaci. Ucube ollena, dajerie Cristona jai fainonocaidimaci. Te muidona eo duere sefuidimaci.

Jusiñamui uaina ñnocana jai

¹¹ Ero, Timoteo, odi Jusiñamui fetocamiedio. Nana cue como lloga rafuemonona oni eneno o i. Mare rafuedo o jai. Jusiñamui jitailla rafuena finocana o jai. Jesucristona ñnocana o jai. Jiaie cominina isirui. Mare rafue dibeimo o comecina jone. Riicinodo cominina llofueñeno. ¹² Jeacino dibeimo o iñellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca illena. Navui diga cominimo Jesucristona o ñnuana marefodo llotio. ¹³ Te isoide Jesucristo. Poncio Pilato ñine jai naimie itemo, marefodo: “Imiedicue” llote. Jusiñamuidi nana rana cajetade. Naimie caina jaca ciode. Jesucristo caina jiaí jaca ciode. Te jira uanaicinona omo lloticue. ¹⁴ Cai Nama Jesucristo nia abido biñenia, nana omo cue llogacinuai ñno. Jearede rafuena finoñeno, jiaie comini naie llogacinuaina uaitañellena. ¹⁵ Naimie jitaillrui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai moto illaíma. Cai nanoca Nama. ¹⁶ Da jaca naimie fiodaíñeite. Eo isire lligaiñote ra ñinomo naimie ite. Nainomo jaca bu iaírei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaídicue.

¹⁷ Eo ucuberedinomo llono: “Abina iedoñeno. Ucubedi fuirede. Te jira ucubena uamo ocuriñeno; iadedi Jusiñamui ocuri”. Cai comeciái jaisillena, naimiedi caimo rana eo raise fecacabide. ¹⁸ Ucuberedinomo jiaí llono: “Omoi ucube diga mare rafuena fino. Jiaie cominimo ucubena caidiñeno fecajana cano”. ¹⁹ Te muidona iese naimaci finoia, monamo naimaci isiruiga rana iite, jiaíruído iena. Iese naimaci jiaí, jaca itatajacinona marena raise ua uiñoitimaci.

Fuiduacino

²⁰ Timoteo, cue omo llogacinona fañeno raise uiuicaí. Jamai rafuemo cacarefiñeno. “Uanaicinona eo uiñoiticaí” dajerie raitimaci; iadedi uiñoñedimaci. Naimaci ñañana cacarefiñeno. ²¹ Dajerie iena cacajano, Cristona nia uiñoñedimaci. Jusiñamui ona duenaillasa. Jaca ñinori omo rafuena lloticue. Mai. Pablodícue.

TIMOTEO MO PABLO IE EMO DOMO ORETAGA RABE

Uaiduacino

¹⁻² Timoteo, carta omo dane cueticue. ¿Nigacino? ¿Nie isoidio? Pablodicue. Jusiñamui cuena jitailla jira, Cristo Jesús oretagamedicue. Cominimo jaca itatajacinona llovena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uñocana mai o jai. Ona jai uri itatatiamaiaí. Iena uñocana mai o jai.

Jusiñamuimo iobillacinona fecade

³ Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jiaa, o facaisena iobillacinona fecadicue. ⁴ Cue comeci caimareficaillena, ona eo cioacadicue. Navui cue o facadoia, o eiana comeciticue. ⁵ Cristo Jesús o ñnuana dane jiaí comeciticue. O usuño Loidadí ñnote. O ei Eunicedí jiaí ñnote. Ie mei ñnotio. Naimiena o ñnuana jai uñoticue.

⁶ Ie jira o comecina dane ocuiño, Jusiñamui uai o llofuellena. Cue onollí o ifogimo navui joneticue, ona fetollena, naimie uaina o llovena. Jusiñamuimona o baitajacinona naie facaiseconí feñotio. ⁷ Jusiñamuidí cominina o jaciruillana jitañede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade.

⁸ Ie jira cai Nama rafuena o llwana meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefuia, rairuioicañeno i. Jusiñamui o comecina ocuiñotaite. ⁹ Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotañede; iadedí naimie jitailla jira, caina jillotate. Enirue nia finoñena facaiseconí caina jiaie duenaite. Cristo Jesús caina iena jai uñotade. ¹⁰ Cai Jilloitaraimadí Cristo Jesús. Caimo Jesús jai bairia jira, Jusiñamui caina duenaillana jai uñoticaí. Fiodaillamona naimie jai jillode. Iemona jiaí jilloiticaí. Naimie mare rafuemona naimie caina Jusiñamui dibeimo jaca illacinona jai uñotade. ¹¹ Bie rafuena llovena, cuena fetode. Cuena oretaja jira, buena llofueticue. ¹² Ie jira duere sefuidicue; iadedí cue illana meiruiñedicue. Cue ñnogamiena cue uñua jira, naimie bille ñnori naimiedí nana cuemo naimie jai iga rafuena cue llofuellena, cuena raise eenoite. ¹³ Cue llua isoi o i. Uanaicinona lloticue. Cristo Jesús ñnocana o jai. Jiaie cominina isiruicana o jai, Cristo Jesús o jainaiilla jira. ¹⁴ Jusiñamui Joreño caimo illa jira, omo naimie lloga uanaicinona fainonocañeno uiuicaí. Uanaicinona o fainonocañellena, naimie ona canoite.

¹⁵ Diga Asiamo ite cominidí cuena fainonocaidimaci. Naimacimona Figelo cuena fainonocaidé. Hermógenes cuena jiaí fainonocaidé. ¹⁶ Onesiforo daje isoñede. Diga icaiño naimie cue comecina ocuiñotade. Cuena meiruiñede. Cai Namadí Onesiforo jofomo itino duenaillasa. ¹⁷ Romamo Onesiforo navui ria, cuena isire jenuano, cuena baite. ¹⁸ Efesomo jiaie cue ia, naimie cuena jiaí canode. Iena raise uñotio. Cai Nama íco abido bia, cai Namamona naimie iba feñuana jitaidicue.

2

O maijia rafuena raise fuido

¹ Cuen a fainonocaidino isoi iñeno; iadedi cue jito, Cristo Jesús ona canuano, Cristo dibeimo o comecina ocuiñocana jai. ² Diga cominimo cue llua navui cacadio. O uaina inotinomo cue llua lloño, iena jiaie cominina naimaci llofuellen. ³ Cristo Jesús rafue muidona duere o sefua, rairuioicañeno i. Cai Nama rafuena o riidumona, naimie soldado isoidio. ⁴ Ie illaima uai naimie inoiacania, soldadodi soldadoñede rafuena maijiacañena. Ie illaima iobitallena, ie illaima ocuica rafuena finoacanite. Ie isoide. Da Cristo Jesús rafuena o fino, naimiena iobitallena. ⁵ Reglamientos llua isoi naimie raise jifanoñenia, jifanoramadi bue isoide rana cioñede. Ie isoide. Hana o feñollena monamo o jiaia, Cristo Jesús lludo raise o jai. ⁶ Illimo duere maijiramadi maijia jira, naiemona naie guilledi oga. Ie isoide. Duere o maiji, ibana feñollena. ⁷ Cue llua o comecina facacabi. Cai Nama ona canoite, iena uiñollena.

⁸ Jesucristo fiodaillamona jillode. Iena comeci. Naimie usumadi David micori. Jesucristona cue llua jira, ⁹ marañedimie isoi cárcolmo duere jai sefuidicue; iadedi Jesucristo rafue nia llocana jaide. ¹⁰ Ie jira Jusiñamui fetocano facaina duere sefuidicue, Cristo Jesús naimaci inuamona naimaci jilloillena, monamo naimaci jaca illena. ¹¹ Bie llucacacodi uanaicino: Naimie dibeimo cai jaillamona, naimie diga jaca iiticaí.

¹² Naimie muidona cai duere sefua, naimie diga iiticaí, ie cominina naimie sedalle facaiseconi.

Naimiena cai janoia, naimie cana jiaí janoite.

¹³ Naimie raise cai inoñenia, naimie uai meidoñena muidona, naimiedi nia inogamie.

Timoteo illa rafue

¹⁴ O cominimo biena dane lloño, iena comecillena. Jusiñamui facaina naimacimo lloño: Uaina jamai uaitañeno, mare rafuena naicinomona comuiñena jira, naicinona cacadino comeciaina marenaña jira. ¹⁵ Marena maiji, Jusiñamui ori iobillena. O meiruiñellena, naimie o maijia jibuia, marena maiji. Uanaicino o uiñuamona, naimie uaina marena raise llofue. ¹⁶ Jamai ñaiana cacareñiño. Comini jamai ñainoicaia, Jusiñamui jitailla rafuena finocana jañedimaci. ¹⁷ Diga rafue naiemona comuide. Mocolonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiaí jaide. ¹⁸ Uanaicinona fainonocaidiaimaiaí. Coco inua isoi, llofueñediaimaiaí. “Cai fiodaia, cai abi ico jilloñeite” llofuetiaimaiaí. “Cristona cai inua facaise jai jillo dicaí. Cai fiodaia, cai joreño jaca iite” llofuetiaimaiaí; iadedi cai abi ico jillollena inoñediaimaiaí. ¹⁹ Ie ia Jusiñamui comini jaca inocana jaidimaci. Ie cominimo Moisés micori jaie llumona, iaimaiaí finoca rafuena jiaí ñaite: “Jusiñamuidi ie cominina uifote. ‘Jusiñamuina inoticue’ raitimiedi marañede rafuemonu eno illasa” llote. Ie jira iaimaiaimona eno o i.

²⁰ Ero, ucuberedimie jofomo diga guillirue joneuilla ra jai ite. Eo jitairedo rana jai ite. Janore jitairedo rana jiaí jai ite. ²¹ Ie isoide. Jusiñamui dibeimo itinomona naga isoide comini ite; iadedi jeacinomona eno bu ia, Jusiñamui naimiena fetoite, ie eo jitaile rafuena finollena. Jusiñamui dibeimo raise maijiite. ²² Ie jira conirueni comeci; jitailla marañede rafuemonu eno o i. Marena i, Jusiñamui jitailla isoi. Jesucristona inocana jai. Nana

cominina isirui. Uri i. Mare comeciainona nana cai Namana sedadino diga iese i. ²³ Jamai ebena rafuemo iñeno. Naiemona icirillacinodi comuide. Iena uiñotio. ²⁴ Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Riicaiñena. ²⁵ Naimie uaina jitaiñedinona fecuise llofuega. Ie mei Jusiñamui naimaci comeciainuaina nbaibai meidoitaite, uanaicino dibeina uiñollena. ²⁶ Ie mei abi uiñuanona, Taife anamona jilloitimaci. Taifedi naimacina ie anamo jai itatate.

3

Jusiñamui dibeimo iñedinomona abina rairui

¹ Bie llucinomo comecina raise faca. Jesucristo abido bille facaise iairei ia, creyentena illena eo sefuienite. ² Naie facaiseconi comini dani imaci abina isiruitimaci. Ucubena ollena eo nicidoitimaci. Abina iedoitimaci. Abina biruitimaci. Jusiñamuina eo jeare ñaitimaci. Naimaci moo uaina, naimaci ei uaina iinoñeitimaci. Jiaie cominimo iobillacinona jaca fecañeitimaci. Jusiñamuina jaca jitaiñeitimaci. ³ Jiaie cominina duenaiñeitimaci. Comeciaina jaiarenitimaci. Jiaie comini joreñona eo jeare ñaitimaci. Naimaci comeciaina eenoñeitimaci. Ebe isoi naga rana duere finoitimaci. Mare rafuena jitaiñeitimaci. ⁴ Naimaci nabaiñiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeciainuaina jitailla rafuena finoacanitimaci. Jusiñamui rafuena isiruiñeitimaci. ⁵ "Jusiñamuina sedadica" raitimaci; iadedi Jusiñamui uaina jamaitimaci. Bie isoide comini diga nabairiñeno. ⁶ Naimacimona dajerie jiaie jofuemo macaritimaci, naie jofuemo ite riñoniaina jifuianona llofuellena. Diga jearede rafuena finuano, naie riñoniai ebena itimaci. Naimaci comeciainuainuaina raire meidocana uitimaci. ⁷ Naga lloraïma lluomo naiñaiñuainuaina cacareidimaci; iadedi uanaicinona jaca uiñoñedimaci. ⁸ Naimaci comeciainuaina eo marañede. Jusiñamui uaina iinoñedimaci. Jannes, Mambres diga, Moisés micori lloga uai jaiie uaitatiaiamaia. Ie isoi bie comini uanaicinona birui jai jitaiñedimaci. ⁹ Nana comini naimaci rafue jamai ebe isoi finoca rafue uiñuamona, Jannes iaïmaia Mambres rafue jaiie fuilla isoi, naimaci rafue raire fuite.

Timoteo uanaicinona iñuanona jailla

¹⁰ Timoteo, cuena uiñotio. Cue llofuiana uiñotio. Cue illana uiñotio. Cue jitailla rafuena uiñotio. Cristona cue iñuana uiñotio. Icirriñeno fecuise lloticue. Cominina isiruiticue. Duere cue sefui, cue comecina ocuiñoticue. Iena uiñotio. ¹¹ Antioquiamo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade. ¹² Jusiñamui jitailla rafuena finuano, Cristo Jesús uaido jaidinodi duere sefuitimaci. ¹³ Ie facaiseconi maraiñedinodi marañede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jai jifueitimaci. Iese jaitimaci; ¹⁴ iadedi cue llofui uaido iñocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaiie iñotio. ¹⁵ O uruenamona Jusiñamuina mare cuegafuaina cacadio. Naie cuegafuainuaina jilluana caimo llote. Cristo Jesúsna cai iñuamona, jillobidicai. Iena caimo jai llote. ¹⁶ Comini nana naie cuegafuaina cuetimaci; iadedi Jusiñamui jitailla isoi, naga cuetimie cuete. Ie jira nana naie cuegafuainuaina Jusiñamuimona ite. Cominimona iñede. Ie jira naie cuegafuainuaina uanaicinona uiñotica. Cai marañedicinona caimo llote. Cai comeciainuaina marena

illena, Jusiñamui jitailla isoi, caimo llote. ¹⁷ Iese llote, naimiemo cai duillamona, nana Jusiñamui rafuena cai raise uñollena. Raise uñuamona, Jusiñamui rafuena raise llofuerenitcai. Naga Jusiñamui jitailla rafuena jiai raise finorenitcai.

4

¹ Jiairuido Cristo Jesúsdi illaimana eniruemo abido biite. Illaima isoi ie cominina sedajite. Naimiena inoñenamona nia cajedinona duere finoite. Jai fiodaitinona jillotajanona, naimiena inoñenamona, naimacina duere finoite. Jusiñamuidi birui caina jaca ciode. Cristo Jesús birui caina jaca ciode. Iena cue uñuamona, bie uai omo lloiticue. ² Naimiena inoñedinona Cristo duere finoñellena, naimie rafuena naimacimo jaca llono. Comini o dafafia, comini ofia, comini o dine ria, naimacimo iena lloitiosa. Naimaci jitaia, llono. Jitaiñenia, jiai llono. Jeacinona bu finoia, naimacimo llono. Marena naimaci illena, naimacimo llono. Fecuisse jaca llofue. ³ Jiairuido dajerie unaicinona jitaiñeitimaci. Jiaifuenajitaitimaci. Naimacimo dani naimaci cacacana rafuena llollena, diga llofuerainina jenoitimaci. ⁴ Unaicinona fainocaida, #gaiiai icinuaido facajitimaci. ⁵ Timoteo, o comecina eeno. Duere o sefua, rairuioicaiñeno i. Jesucristo rafuena llocana o jai. O llofuiaicinona marena fuido.

⁶ Jai iairei ite cue meinellirui. ⁷ Cai Nama rafuena llocana cue jaillano, iena marena jai riidotique. Cue illa dinori jai fuiacade. Cai Namana fainocaiñedicue. ⁸ Cai Namamona marena cue illa jira, monamo ibana feiñoitique. Iemo jai ocuridique. Iena cai Nama cuejena eenote. Naimie abido billirui iena feiñoitique. Caina raise uñuamona, dama cuemo fecañeite; iadedi nana naimie abido billena jitaidinomo ibana jiai fecaite.

Pablo damierena ñaia rafue

⁹ Timoteo, raise cue dine bi. ¹⁰ Biniemo ite rafuena Demasdi eo ebiruilla jira, Tesalónicamo naimie jaillano, cuena fainocaide. Galaciamo Crescenedi jai jaide. Dalmaciamo Tito jai jaide. ¹¹ Dama Lucas cue diga ite. Marcos o diga ati. Cuena canollena, naimiena jitaidique. ¹² Efesomo Tíquicono oredique. ¹³ O bia, cue fiebide iniroina ati. Troasmo Carpio jofomo fiebide. Cue libros ati, cue rabiai diga. ¹⁴ Alejandro raillamie navui cuena jeare finode. Naimiedi lloeomona rana finoraima. Cai Nama naimiemo iba oite. ¹⁵ Naimiemona o abi rairui. Naimie cue lluna eo jitaiñede. Iena uaitate. ¹⁶ Illaicomini dine cue rafue nano cue riidoia, jaca buna cue facaina riidoñede. Nana cuena fainocaidimaci. Jusiñamuidi naimacimo iba uana jitaiñedicue. ¹⁷ Cai Nama cue facaina ite. Cue comecina ocuiñotade, nana juduainedonomo naimie uai raise cue llollena. Naimie muidona cue fiodaisaillanomona jillobidique. ¹⁸ Cai Nama naga marañede rafuemona cuena eenote, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidique.

Fuiduacino

¹⁹ Diga cominimo cue uai oredique: Priscamo, Aquilamo, Onesíforo jofomo itinomo. ²⁰ Corintomo Erasto fiebide. Miletomo Trófimo duide fainocaidique. ²¹ Rollime nia inenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentiai.

²² Cai Nama o comeci ocuiñotajasa. Naimie nana omoina duenailasa. Mai. Pablocue.

TITOMO PABLO ORETAGA RABE

Uaiduacino

¹ Tito, omo cartana oretaiacadieue. ¿Nigacino? ¿Nie isoidio? Pablodieue. Naimie cominina cue illamona, naimie jitailla rafuena cue finuamona, Jusiñamui anamo llofuecabitieue. Ie rafuena llofuellena, Jesucristo ie oretagamedieue. Jusiñamui fetocanona inotallena, naimacina uanaicinona uinotallena, Jusiñamuina naimaci raise sedallena, cuena oretate. ² Naimie diga jaca cai illemo cai ocurilla jira, Jusiñamuina sedadica. Enirue nia inena facaiseconi, Jusiñamuidi cai jaca illena jaie llote. Naimie taino jaca lloñede. ³ Iemei naimie jitaillarui caina ie rafuena jai uinotade. Naie rafuena cue llollena, naimie cuena oretate. Naimiedi cai Jilloitaraima. ⁴ Tito, bie carta omo cueticue. Cue isoi o inua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiai ona jai duenaitiaimiai. Iena uinocana mai o jai. Ona uri jai itatataimiai. Iena uinocana mai o jai.

Creventiaina sedaraini illacinuai

⁵ Nainomo ite rafue o fuidollena, Creta railla uiasimo ona fainocadieue. Creventiaina sedallena, naga nairai illanomo llofuerainina o fetuana navui omo llotieue. ⁶ Creventiaina llofuerainina o fetoiu, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruai creventiaina itimie. Nana comini naimie uruai mare raillamie. Naimie uruai ie uaina inotimie. ⁷ Jusiñamui facaina naimie maijia jira, creventiai sedaraimadi maremiena illa. Abina iedoñena. Raie icirifena. Jifairuifena. Fuiriruifena. Ucubena nicidoñena. ⁸ Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua. ⁹ Naie uai raise llofuiamona comini comeciaina ocuinotallena, naimie uaina uaitatinona llacaitallena, cai llofui isoi uanaicinona inocana naimie jailla.

¹⁰ Ie isoidinona feto, ailluena comini Cristo rafuena raise inoñena jira. Tainocinuaina ñaicabitimaci. Cominina jifuecabitimaci. Judiuai creventiamona diga comini iese itimaci. ¹¹ Ie jira naimacina llacaita. Naimacidi diga cominina uri itatañedimaci. Uanañedicinona llofuetimaci, ucube bifuiano ollena. ¹² Naimacimona comini rafuena lloraima navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillaredimaci. Rairai edimaci” raite. ¹³ Naimiedi uanaicinona llote. Ie jira creventiamo riire llono, naimaci Jusiñamui uaina raise inollensa. ¹⁴ Judiuai igaiaina naimaci inoñellena, comini lletarafuena naimaci inoñellena, naimacimo riire llono. Damierie uanaicinona jitañedimaci. ¹⁵ Ero, mareuidinomona naga ra jearede. Naimaci comeciadi jai jearena jira, jearede comeciaina facacabidimaci. ¹⁶ “Jusiñamuina uinotica” raitimaci; iadedi Jusiñamuina uinotadimaci. Naimaci finoca rafuemona iena uinotica. Jusiñamui naimacina eo gaiñede. Buena inoñedimaci. Ie jira mare rafuena finuana uinotadimaci.

2

Creventiai marena illena, uanaicinona llofue

¹ Tito, Jusiñamuina ñnoñedino isoi iñeno. Odi uanaicino llofue, naimaci marena raise illana uinollena. ² Uaicimaiaina llofue. Canamacina jiai llofue: Jifaiñeno. Inogamiena jai. Uairico isoi iñeno. Jusiñamui uaina raise ñno. Omoi ecimo itinona isirui. Duere omoi sefua, omoi comeciaina ocuiño. ³ Uaicinuaina llofue. Cañaiñuaina iese jiai llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeñaiñuiai mare rafuedo jaitimaci. ⁴ Naiñaiñuiai inina isiruillena, naiñaiñuiai uruiaina jiai isiruillena, ⁵ uairico isoi iñellena, jearede rafuena finoñellena, jofomo raise maijillena, cominina duenaillena, naiñaiñuiai iniñiaia uaina ñnollena, jiaie comini Jusiñamui uaina jamaiñellena, naie cañaiñuaimona fueoitimaci. ⁶ Einamacimo lloño. Coniruenimo jiai lloño: Ieñede ramo omoi comeciaina facañeno. Uairico isoi iñeno. ⁷ Tito, naga rafue o finua diese, mare rafuedo o jai. O llofuaia, uanaicinona lloño. Jamai ebe isoi llofueñeno. ⁸ Marena llofue. Marena o llofuaia, ¿niese comini o uai uaitaitimaci? Uaitañeitimaci. Iemei o dibeimo iñedino meidaitimaci, caimo jearede rafue iñenia. Ie jira cairi ñaiñeitimaci. ⁹ Patrón anamo itinomo iese lloño: Omoi patrón uaina ñno. Naimie jitailla rafuena raise fino. Naimie uaina oñeno. ¹⁰ Rana fiñeno. Naimie raruiaia raise seda. Iese naimaci ia, naimaci raise maijia, naimaci patrón: “Jusiñamui uai mare” raite. Jusiñamuidi cai Jilloitaraima.

¹¹ Jusiñamui caina duenaillana jai cai uinua jira, naicinona llofue. Naimiedi nana cominina jillotaicade. ¹² Naimie uai caimo llote: “Cue dibeimo iñede rafuena eno fainonocai. Marañede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina ñnocana jai”. Iese cai illana Jusiñamui birui jitaide. ¹³ Jiai caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiai cai Jilloitaraima”. ¹⁴ Cairi naimiedi fodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. ¹⁵ Naie rafuena llofue. Marañede rafue comini finoia, naimacimo lloño. Illaima uai isoi lloño. Cominidi o uaina jamaiñellena, raise llofue.

3

Creyantiaia illacinuiai

¹ “Omoi illaicomini uai anamo i” creyantiaimo dane lloño. Omoi illaicomini llucacina ñno. Mare maijille ia, iena raise fino. ² Jiaie cominina jeare ñaiñeno. Furiñeno. Fecuisse uiuicai. Nana comini diga marena ñaino. ³ Jiaie cai jiai ebe isoidicai. Jusiñamuina ñnoñedicai. Taife caina jifue. Dani cai comeciia jitaillacino railla isoi finoidicai. Diga ie jearede rafuena finoidicai. Jiaie cominina jeare finoidicai. Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai. ⁴ Ie ia Jusiñamuidi maremienana jai fididicai. Naimie caina isiruillana jiai fididicai. ⁵ Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie dibeimo cai comeciaina dobañotocai. Jusiñamui Joreño cai comeciaina marena finode. ⁶ Ie Joreño caimo raise fecade, Jesucristo finua muidona. Jesucristo cai Jilloitaraima. ⁷ Ie jira naimiemona marebicaidicai. Caina duenaillamona, marebicaidicai. Caina ie cominina itatate. Iemona naimie diga jaca illemo ocuridicai.

⁸ Tito, cue llucacino di uanaicino. Jusiñamuina ñnotino marena maijillena, cue llucacino na llo-llocái. Cue llucacino mare. Ie jira nana cominidi iena cacacabillasa. ⁹ Ebona ñaiñeno. Omoi usumatiaí mameciaína jamai sia-siadoño. Moisés micorí llogacinuaina uaitaño. Naicino diga buena oñedicaí, Jusiñamui jitaillacinona caí finollena. ¹⁰ Roracomo comini comeci jiaifocaitatimie ia, naimiemo llono: “Iena finoño”. Dacaiño o llumona naimie ñnoñenia, dane llono. Ie mei ñnoñenia, naimie diga omoi ñaiñeno. Naimie diga omoi nabairiño. ¹¹ Uanaicinodo naimie jai jaiacaiñede. Jeacinona jai finode. Naimie iena jai uiñote.

Fuiduacino

¹² Artemas o dine cue oretaia, Tíquico o dine cue oretaia, Nicópolis railla nairaimo are sedaño raíre bi. Nainomo rollime facaiseconi cue comeci illana jitaide. ¹³ Zenas railla abogado Apolos iaiaiaí diga cano, iaiaiaí oni jaiacana jira. Iaiaiaí jitaile rana fecá. ¹⁴ Dueredino ia, naimacina canollena, creyentiaimo: “Marena maij” jiaí llono. Naimaci jamai iñellena, iese llono.

¹⁵ Cue diga itino naimaci uaina omo oredimaci. Jesucristona caí ñnua jira, caina isiruitinomo cue uaina llono. Jusiñamui nana omoína duenaillana uiñocana omoi jaillana jitaide. Mai. Pablodícue.

FILEMÓMO PABLO ORETAGA RABE

Filemómo Pablodi carta orede

¹ Filemón, bie carta o dine oredicue. ¿Nie isoidio? Pablodicue. Jesucristo rafue cue llumona, cárcelmo iticue. O dine cue uai oredicue. Timoteo cue diga ite. Ie uai jiaí orede. Cai Moo Jusifñamui mo jai cai jainaiaila jira, naimiedi coco ama. Coco diga Cristo facaina o maijia jira, ona isiruiticoco. ² Coco uaina Apiamo jiaí oredicoco. Cristo dibeimo naiñaiño illamona, naiñaiñodi coco miriño. Coco uaina Arquipomo jiaí oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiaí oredicoco. ³ Cai Moo Jusifñamui, cai Nama Jesucristo diga, omoína jai duenante. Iena mai uiñocana omoi jai. Iaimaiái omoína uri jai itatate. Iena omoi uiñocana mai omoi jai.

Filemón Cristona ñnocana jaide

⁴ Jusifñamui diga cue ñaia, o facaina cue jiaia, naimiemo iobillacinona fecadicue. Mare rafuena o finuana cue fidiá jira, naimiemo iobillacinona fecadicue. ⁵ Cai Nama Jesúna ñnocana o jaillana fididicue. Nana creyentiaína o isiruillana jiaí fididicue. ⁶ Cristo dibeimo cai illa muidona, naimiemona diga marecinona feiñoticaí. Cristona o ñnuamona, jiaie creyentiaína o nabaia, omona naie marecinona uiñoitimaci. Naga mare ra uiñocana naimiaci jaillana jitaídicue. ⁷ Cue ama, creyentiaína o isiruilla jira, iobidicue. O muidona creyentiaí comeciaí caimare uri illa jira, cue comeci iocire ite.

Onésimo facaina Pablo ñaite

⁸ Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue; ⁹ iadedi conima coco isiruilla jira, o diga ñaíticue. Jai uaicimadicue. Jesucristo rafuena cue llua muidona, cárcelmona jai ñaíticue. ¹⁰ Onésimo facaina ñaiacadicue. Cárcelmo cue illa facaiseconi, cue muidona Cristona naimie ñnua jira, naimie cue jitona jaide. ¹¹ Omo naimiedi marañede rafue navui finode. O mullaíma naimie illanona, raise maijifñede. Bene aisiamona, Cristona naimie ñnote. Cuená birui eo canode; iadedi birui o diga raise iacade. ¹² O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comecina jiaí oretaiticue. ¹³ O facaina naimie cuena birui canode. Cue diga naimie fiebillana jitaídicue; ¹⁴ iadedi: “Jee” o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitaíñedicue; iadedi dama o comeci jitailla jira, mare rafuena o finuana jitaídicue. ¹⁵⁻¹⁶ O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaíma; ia naimiedi jiaí birui o ama. Naimiena isiruillanona feiño. ¹⁷ O nabaina iticuená cuena o feiñua isoi, naimiena feiño. ¹⁸ Naimie marañede rafuena omo navui finode. Omo naimie nia debia, cue facaina jone. ¹⁹ Iena ibaiticue. Bie carta dama cue cuamona, naimie debiana cue ibajana uiñotio. Omo eo lloñeiticue; iadedi cue muidona Cristona o ñnua jira, ailluena cuemo debedio. ²⁰ Cue ama, coco Nama Cristomo coco jainaiaila jira, cue jitaílle rafuena fino. Ie mei cue comeci uri iite. ²¹ Cue jitailla rafue o finollena uiñoticue. Cue jitailla rafue

baifemo o finollena uñotícue. ²² Jíie rafuena lloiacadícue. O jofomo daje cuarto cuejena fino. Cue facaina o jíia, Jusiñamui jitaia, o ñe jaitícue.

Damíerie imaci uaina jíai orede

²³ Omo Epafraſ ie uaina orede. Jesucristo rafue llua muidona, cárcelmo cue díga naimíe íte. ²⁴ Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue díga maijide. ²⁵ Cai Nama Jesucristo nana omoi creyentíai comeciaina ocuñotajamona omoina duenaillasa. Mai. Macaibaite. Pablodícue.

HEBREOS COMINIMO ORETAGA RABE

Jesucristo rafuena jai cai cacajamona, Jusiñamuiña jai uiñoticaí

¹ Jusiñamuidi caina ie rafuena jai uiñotade. Iena omoimo ja lloiticue. Cai jaiaí micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaina orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaina orede; ² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote. ³ Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisai baifemo faite

⁴ Jusiñamui Jitona naimie illamona, naimie illano Jusiñamui jaienisai illano baifemo faite. Ie illanomona naimie Jusiñamui jaienisai baifemo faiana uiñoticaí. ⁵ Jusiñamuidi: “Cue Jitodio” Cristomo llote; iadedi ie jaienisaimo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisai ie Jito baifemo fañena jira, ie jaienisaimo iena jaca lloñede. ⁶ Ie dajede Jito eniruemo oretaja facaiseconi Jusiñamui llote: Nana cue jaienisai naimiemo iobillacinona fecaja; ⁷ iadedi jiaie rafuedo ie jaienisaina ñaite: Cue ocuilla rafuena naimaci finollena, cue ocuilla diese naimacina oretacabiticue.

⁸ Ie Jitona ñaianona raite:

Cue isoi o illa jira, cominina o sedajafue jaca iite.
Eo marecinodo cominina jaca sedadio.

⁹ Mare rafue finuana jitaídio.

Maraiñedicinona finuana jitaíñedio.

Ie jira ona caimare jai itataticue.

Monamo o abido billanona, cue jaienisai baifemo ona caimare itataticue raite. ¹⁰ Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie finodio.

Mona jiai finodio.

¹¹ Bie eniruedi mona diga ico fuite.

Eniroi fuilla isoi, iñeite;

iadedi odi jaca iitio.

¹² Eniruena mona diga meidotaitio;

iadedi odi jaca daje isoitio.

Jaca iitio

raite. ¹³ Ie Jitomo buena llote; ia ie jaienisaimona damiemo iese lloñede. Ie Jitomo llote:

Illaimana o illamona, cue nabei dine ana rai.

Nana o dibeimo iñedinona o anamo itataitcuc.

¹⁴ Ie jaienisaimo iena lloñede; iadedi naimacina oretacabite, ie Jitona iñotinona canollena. Ie jira nana naiemona, ie Jito ie jaienisai baifemo faiana uiñoticaí.

2

Jusiñamui caina jillotaja rafuena cai jamaiñena

¹ Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai iñuasa. ²⁻³ Ero, Jusiñamui ie jaienisaina jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise iñoñenia, Jusiñamui naimiēna eo duere finode. Jusiñamui jaienisai lloga rafue mare; iadedi Cristo birui lloga rafue jaienisai jaie lloga rafue baifemo faia jira, Cristo rafuena cai iñoñenia, Jusiñamui caina duere finollemona ua jilloñeiticai. Ero, naimie cai jeacinomona caina jillotaiacade. Naie rafuena cai jamaia, iena cai iñoñenia, naimie caina duere finollemona ua jilloñeiticai. Cai Nama Cristo naie rafuena jaie llote. Naimiēna cacadinodi caimo iena jai llotimaci. Cristo rafuedi uanaicinona llotimaci. ⁴ Jusiñamui uai diga jaiñforiede siño rafuena naimaci finuamona, Cristo rafuedi uanaicinona uiñoticaí. Naimie jitailla diese naga creyentemo Jusiñamuidi ie uaina itatate. Naga creyente naimie dibeimo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñoticaí. Ie jira naie rafuena cai iñuasa.

Cai isoi illena, Jesucristo iimana jaide

⁵ Jusiñamuidi ie jaienisaina oretauide, ie jitailla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote. ⁶ Jusiñamuimo David micori iena jaie llote:

Cai jamai bue isoidicaí; iadedi caimo comecina facadio.

Jamai cominidicaí; iadedi caina canodio.

⁷ Caina cominina o finua jira, o jaienisai isoi iñedicaí.

Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

⁸ Nana rana naimie anamo o itatajana jaie llote.

Iese llote; iadedi nana naie lloga rafue nia suiñede, jeacinona Adán micori jaie finua jira. ⁹ Jesúsna dane lloiticue. Naimiēna uiñoticaí. Eniruemo naimie jaie billamona, Jusiñamui ecimona naimie billa jira, Jusiñamui jaienisai illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiēna Jusiñamui abido itatajamona, Jusiñamui naimiēna iobitade. ¹⁰ Jusiñamui nana rana finode. Nana cominina comuitate. Naimiēna iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicaí. Naimie illanomo ico iiticaí. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiēna iñotinodicaina jai raise canorede. ¹¹ Naimie fiodaillamona marebicaidicaí. Naimie dibeimo jai cai illa jira, daajena mooredicaí. Ie jira naimiedi: “Cue cominidomoi” caina meiruiñeno llote. ¹² Jusiñamui facaina

lloraini micoriai llogacinomona naie rafue uanaicinona uifnoticai. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamui mo roitimaci jaie llotimaci. ¹³ Jesúsna dane ñaitimaci:

Ie comini diga naimiedi Jusiñamuina ñnocana jaite.

Jusiñamui cominina damierie jailla jira, naimacidi jiaie naimie comini ñaitimaci. Naimaci ñaia isoi, Jusiñamui cominina birui jaidicai. ¹⁴ Jusiñamuina ñnotinodi cominina jira, cai isoi naimie illena, Jesúsdi comena jaide. Cai fiodailla isoi, naimie jiaie fiodaite. Taife uaina cai ñnoia, jeacino finodicai. Iemona fiodaicana jaidicai. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui dibeimo ifenanomona jai jillodica. ¹⁵ Jesús nia fiodaifienia, nana cai illa dinori fiodaillana jaciruicana jaidicai. Jesús jai fiodailla jira, caina jaciruillacino anamona jillobitade.

¹⁶ Jeacino anamo naimaci ifiena jira, Jusiñamui jaienisaimo ie comecina facañede; iadedi Abraham micori isoi ñnotinomo naimie comecina facade. Naimacina naimie jilloitallena, naimiedi comena jaide. ¹⁷ Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife faimona, naimie fueollena, naimiena orede. Cai illana raise uifnote. Iemona caina dueruite. Jusiñamui jitaillacino finuana raise uifnote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamui jicanote.

¹⁸ Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie ifnoñena jira, caina canorede. Taife uaina cai finofellena, cai comeciaina ocuifnotade.

3

Jesús Moisés micori baifemo faite

¹ Cue amatiai, jeacino anamo omoi jai ifiena jira, ie dibeimo omoina Jesús jai fetua jira, naimie siño jitona jira, naimiemo omoi comeciaina faca. Naimiena ja ñaiticue. Ie rafuena llollena, Jusiñamui naimiena orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima. ² Ie Moo cominina naimie raise sedajanona, naimiedi ie Moo uaina ñnuanonona, iena finode. Nana Israel cominina naimie sedajanona, Moisés micori Jusiñamui uaina ñnuanonona, iena finode. ³ Jusiñamuimona Jesúsdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúsdi Jusiñamui iobide. Cai jillua jira, Jusiñamui cominina jaidicai. ⁴ Buena cai finuamona, naimie cominina jaiñedicai; iadedi naimie caina ie cominina dama itatarede. ⁵ Naimie facaina majjiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise lloite. Naimiemonona Jusiñamui ico llolle uaidi uanaicinona uifnoticai. ⁶ Jusiñamui facaina majjanona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai ñnocana jaia, naimiemo caimare cai ocuria, Jusiñamui ua cominidicai.

Jusiñamuimona abido cai jaiñellena, bie rafuemonona cai fueua

⁷ Jusiñamui Joreño caimo birui lloia, iena cacarei. Ero, Jusiñamui jaie lluana cuetatate:

⁸ Omoi jaiagai isoi ifieno.

Jofue iñenanomo omoi jaiagai ia, cue uaina ñnoñedimaci.

⁹“Naimie uaina raise uiñoticaí” raillanona, cuena facacibitimaci.

Cuarenta años cue siño finoca rana cioidimaci; iadedi jaca ñnoñedimaci.

¹⁰ Naimacimo lloticue: “Omoi diga iciriticue.

Cue díbeimo omoi illamo omoi comeciaina facañedomoi.

Cue lloga uaido jaiacañedomoi”.

¹¹ Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

¹² Cue amatiai, cai jaiagai rafuena cai uiñuamona, cai fueua. Uanai Jusiñamui abido omoi jaiñellena, naimie jai lloga rafuena omoi ñnocana jai. Omoi mona bu raise ñnoiacañenia, naimiemo llono. ¹³ Jusiñamui rafuena omoi raise ñnollena, nagarui conini omoi comeciaina ocuiñota. Omoi mona jeacina ebiruiñellemona, jeacino anamo omoi iñellesa, birui Jusiñamui rafuena raise ñno. Jeacino anamo omoi dane jai, Jusiñamui rafuena ñnoñeitomoi. Iemona naimie ricaiñellafue anamo dane iitomoi. ¹⁴ Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille dinori naimiema cai nano ñnua isoi, cai ñnocana jai, marena caimare iiticaí. ¹⁵ Ie jira naimiema ñno. Bie jai euega:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina ñnoñedimaci

euega. Naimaci isoi iñeno.

¹⁶ Egiptomona Moisés micori anado jaidimaci. Diga icaíño Jusiñamui uaina cacadimaci; iadedi iena raise ñnoñedimaci. ¹⁷⁻¹⁸ Cuarenta años jofue iñenanomo itimaci; iadedi naimiema naimaci ñnoñena jira, Jusiñamui naimaci diga icirite. Naimiema ñnoñena jira, naimacimo Jusiñamui llote: “Omoi mo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fioudimaci. ¹⁹ Jusiñamui uaina naimaci ñnoñena jira, naie Canaán railla eniruemo jaca jaiñedimaci. Naimaci comeciái jaca uri illana uiñoñedimaci.

4

¹ Jusiñamui díbeimo raise cai illamona, Jusiñamui cai comeciái birui uri illana jitaide. Naimie lloga uai nia saíñede. Caimona damierie iese iñellesa, cai jaiagai isoi cai iñellena, abina rairuicana mai cai jailla. ² Jusiñamuidi comini comeciái uri illana jitaide. Cai jaiagaimo iena llote. Diga icaíño naie mare rafuena cacadimaci; iadedi iena naimaci ñnoñena jira, iemona buena oñedimaci. ³ Jusiñamuidi cai comeciái uri illana birui caimo jai llote. Cristo ie mare rafuena jai cacadicaí. Naimie uaina cai ñnua jira, cai comeciái jai uri ite. Cai jaiagai comeciái uri iñede. Moisés micori cuamona iena uiñoticaí. Cuega: Naimaci diga Jusiñamui icirilla jira, naimacimo lloga eniruemo jaiñedimaci. Comeciái uri illana jaca uiñoñedimaci

euega. Jusiñamuidi nana comini comeciái uri illana jitaide. Eniruena naimie finocamo, comini comeciái uri illana jitaide. ⁴⁻⁹ Iena Moisés micori jai euega: Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

euega. Jusiñamuidi nana comini comeciái uri illana nia jitaide. Moisés micori facaise cai jaiagai comeciái uri illana jitaide; iadedi naimiema naimaci ñnoñena jira, naimaci comeciái jaca uri iñede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci ñnoñena jira, naimaci comeciái jaca uri iñede. Josué

mícori illa facaisemona diga años illanona, David mícori comeciaí uri illana jiaí llote:

Naimie uaina birui omoi cacaia, iena ino

llote. Naiemona Jusiñamui cai comeciaí uri illana jitaillana uifnoticai. Naimiena inotinodicaimo naie rafue jai duide. ¹⁰ Jusiñamuina cai inuamona, cai comeciaí jai uri itate. Cai comeciaí uri illena, jiaie rafuedo jaiñedicai. Naimiena cai inuamona, naimie illanomo ico iiticaí. Nana naimie finoca rafuena naimie fuidua mei, nainomo uri iiticaí.

¹¹ Cai jaiagai inoñedimaci. Cai faifñellena, naimaci isoi cai jaiñena; iadedi Jusiñamui uaina inocana mai cai jailli. Jusiñamuina cai inuamona, naimiedi cai comeciaí uri itatate. ¹² Naimiena cai inoñenia, naimie iena uifnote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaimo riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaimo iticinona riire bairetate. Nana cai comeciaina facajacinuaina riire bairetate. ¹³ Jusiñamuimona buna reirinde. Jusiñamui nana caina cide. Nana cai finoca rafuena uifnote. Nana cai comeciaimo iticinona uifnote. Ie jira naimie uaina inocana mai cai jailli

Jesúdi cai facaina Jusiñamui diga nanoca ñairaima

¹⁴ Jesúdi naie uaina cai inuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena inocana jaiticaí. ¹⁵ Taife cai ramo faia, cai comeciaí raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie inoñede. Iemona Taife ramo faiacinona inoñenana naimie uifua jira, jeacinona oñede. Caina canorede. “Naimacina cano” ie Moomo llocabite. ¹⁶ Cai facaina ie Moo abimo naimie illa jira, cai comeciaina naimie ocuiñotaicana jira, Jusiñamuina jaciruiñeno naimiemo cai jia. Naimie caina duenaillamona, cai jeacinona feitaite. Cai comeciaina jiaí ocuiñotaite.

5

¹ Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticaí. Moisés mícorimo Jusiñamui jaie llua isoi, Aarón mícorina Jusiñamui fetuanona, jeacino facaina comini Jusiñamuimo faga toiniaina fecauidimaci. Cominina Jusiñamui feiñollena, imaci ñairaima Jusiñamui diga ñaite. ² Nana comini isoi naimiedi jeacino finuamona, comini facaina Jusiñamui diga ñairaima ñaiana raise uifnote. Jusiñamui dibeimo raise jaiñedinona fecuise canorede. ³ Comini facaina toiniaina fecauide; iadedi naimiemo jeacino illa jira, naimie facaina toiniaina jiaí fecauide.

⁴ Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón mícorina fetuana uifnoticai. ⁵ Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David mícori jaie ciegafuiaimona iena uifnoticai. David mícori Jusiñamui llua jaie cuela: Cue Jitodio. Jai o Moodicue cuela. ⁶ Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

⁷ Eniruemo Cristo ia, iimana naimie jailla jira, duere sefuide. Naimie fiodiacana iaiei ia, Jusiñamuimo eo jide. Naimie fiodiañena Jusiñamui jillotarede; iadedi Jusiñamuimo ado llote: “Cuenta llegi cacaitañeno; iadedi cue comeci jitailla isoi finoñeno. O comeci jitailla isoi fino” llote. Jusiñamui uaina naimie raise inua jira, Jusiñamui naimie jiana cacajano fairiote. ⁸ Naimiedi Jusiñamui Jito; iadedi Jusiñamui naimiena llegi cacatate. Iemona Jusiñamuina inocana jaca jaillana naimie uifote. ⁹ Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena inotinona jillotaite. ¹⁰ Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saifena jira, naimie ifomo illena, jiaimiena jaca fetofede. Ie isoi Jesús uai jaca saifede.

Cristo ñibeimona abido danomo jaiñeno

¹¹ Bie isoide rafuena omoimo lloiacadicue. Bie rafue irerede; iadedi Cristo rafuena omoi raise cacañena jira, omoi comeciai iena raise jitañena jira, omoimo iena raise llonidicue. ¹² Cristo rafuena are omoi cacaja jira, iedo omoi raise jaidomoidena, llofuerañina jaidomoi; iadedi iedo nia raise omoi jaiñena jira, jiaimie omoina llofuiana nia jitaidomoi. Cristo ñibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena inocana nia raise jaiñedomoi. Eo janorede janosa monoi ijina jitaicabide. Einamaci isoi guillena nia jitaifede. Janosa isoidomoi. Creyentena bu como jia, Cristo rafuedo nia eo jaiñede. Iena eo uifofede. Monoi ijina jitaide isoide. Janosa monoi iji jirua mei, jiaie guille guillamona moonaitaite. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi. ¹³ Janosa monoi ijina nia jitailla jira, naimie nia moonaiñenana uifotica. Naimie nia abina uifofede. Jusiñamui jitailla isoi marecinona finuana nia uifofede. ¹⁴ Guilledi moonaitime ie. Ie isoide. Cristo rafuedo raise jaidimiedi Cristo rafuena uifocana jaide. Iemona marecinona finollena, llofuiana uifote. Maraiñedicinona finoñellena, llofuiana jiaie uifote.

6

¹ Diga icaño bie rafuena jai cacadomoi. Cristona nano cai cacaja rafuena raise cai inuamona, jiaie Cristo rafuena raise uifocana mai cai jailla. Cai nano cacaja rafuena cai fueoiacana siadocabiñelli. Cristo ñibeimo caina itatañede rafuedo navui jaidicai; iadedi cai comeciai uai birui jai meidotica. Cristo ñibeimo itatate rafuedo birui jaidicai. Jusiñamuina inuamona, naimie ñibeimo jaidicai. ² Cristo ñibeimo bautizajana jai uifotica. Llofueraimana jaillena fetuana jai uifotica. Creyentia naimaci sedallena, naimacimo cai onolli jonianona, Jusiñamuimo cai jianona, naimaci fetuana jai uifotica. Nana creyentia fiodaillamona jilluana jai inotica. Jusiñamuidi naimiena inoñedinona ico jaca duere finollena jai inotica. ³ Naie isoide rafue mare; iadedi iena cai raise inuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli. ⁴ Uanaicinona omoi comeciai uifiamona, Cristona omoi inuamona, Jusiñamui Joreño omoimo illamona, ⁵ Jusiñamui uaina mare omoi uifiamona, Cristo uai siñonana omoi uifiamona, abido danomo omoi jaiñellena, abina rairuicana omoi jai. ⁶ Cristo ñibeimona omoimona bu sofetena, jiaimie naimiena jillotanide. Jeacinona

finocana naimie jaia, Jusiñamui ie jeacino oni dotañeite. Cristona naimie jitaiñena jira, Cristo fiodaillana jai jitaiñede. Cristona jeare jai finode. Cristo finoca rafuena jamaide. Cristona naimie jitaiñenia, ¿niese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. ⁷ Ero, iena jiaie rafuedo lloiticue. Jusiñamui noci deitacabilla jira, enirue naimie riatcabilla jira, iemo riaru sicanona, iena ie nama raitia, naiemona ie llisillana naimie uamona, Jusiñamui iobide; ⁸ iadedi naie eniruemona riaru sicoñenia, maraiñede. Monaigi cuiraio diga naiemona dama sicoia, maraiñede. Jusiñamui nainomo noci deitate; iadedi naiemona llisillana onide. Naie enirue caimanide. Maraiñede. Ie nama iobiñena jira, iena fañonocaide. Naie enirue isoidomoi. Jusiñamuimona mare rafuena cacadomoi. Iena ñnocana omoi jaia, naimie omoina iobitaite. Iena omoi jitaiñenia, naimiemona duere sefuitomoi.

Jusiñamui llua jira, cai comeciai ocuiñocana jaidicai

⁹ Cue isiruigaomoi, abi rairuillicinona omoimo lloticai; iadedi cai llofuaiacino omoimo duiñenamo cai comeciaina facañedicai. Cristona ñnocana omoi jaillamo cai comecina facadicaí. ¹⁰ Jusiñamui omoina raise uñnote. Naimiena omoi isiruillamona, jiaie creyentiaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi. ¹¹ Omoi comeciainona jiaie creyentiaina omoi canua isoi, Cristo rafuedo nana omoi ille ñnori ñnocana omoi iocire jaillana jitaídicaí. Naimie diga ico jaca omoi ille jira, iese omoi jaillana jitaídicaí. ¹² Cristo rafuedo omoi jaillamona omoi sefuiruiñenana jitaíñedicai. Jusiñamui lloga uaina ñnocana jaidino isoi, omoi jaillana jitaídicaí. Naimiena naimaci ñnuamona, naimie lloga uai fecuise naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jiai oitomoi.

¹³ Ero, Jusiñamuidi Abraham micorimo lloga uaina uñnotomoi. Naimiedi Jusiñamuina jira, uanaicinona llote. Tainona lloñede. ¹⁴ Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiaina eo jebuitaiticue” llote. ¹⁵ Abraham micori naimie lloga uaina ñnote. Iena suillemo fecuise ocuiride. Ie jito Isaac micori, Jusiñamui llua isoi, comuide. ¹⁶ Uanaicino cai llocabillana jiaie comini uñnollena, Jusiñamui mamecina llñnoticai. “Jusiñamui caina ciode” lloticai. “Uanaicinona cai lloñenia, Jusiñamui caina duere finoite” lloticai. Ie jira cai lloga uaina buna uaitañede. ¹⁷ Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uñnuana naimie jitaide. ¹⁸ Naimiedi Jusiñamuina jira, ie uai naimie jai llua jira, naimie tainona llonillana uñnoticai. Ie jira naimie lloga uai naimie finuana uñnoticai. Naimiena cai ñnuamona, naimie anamo cai illa jira, caina naimie eenua jira, cai comeciai ocuiñocana jaidicai. Naimie illanomo ico cai jaca illemo ocuiridicai. ¹⁹ Naie rafuena Jusiñamui llua jira, cai comeciai ocuiñocana jaidicai. Ie lloga uaina naimie finollemo ñnoticai. Monamo Jusiñamui illanomo ico cai illena eo raise uñnoticai. Nainomo fiebillena, barco ie lloelluna illemo dotaja isoi, cai comeciai naganomo iñellena, Jesús caina eenote. ²⁰ Jesús nainomo jai illa jira, naimie muidona nainomo jai iiticai. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saiñena isoi, Jesús cai facaina ñaia uai jaca saiñeite.

7

Melquisedec micori illa isoi, Jusiñamui diga ñairaimana Jesús jaide

1 Iena omoi raise uibiñollena, Melquisedec micori rafuena omoimo lloiticue. Naimie micoridi Salem railla nairai ie illaïma. Naimiedi comini facaina cai Moo Jusiñamui diga ñairaima. Cinco illaimana Abraham micori anafetitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñoticue” llote. 2 Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaïmana anafetitajanona, naimaci rana bairuanona, nana naie ramona, riari uaimona ie décima facaina rana Melquisedecmo fecade. Melquisedec micoridi Salem railla nairai illaïma. Melquisedec mameci oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. 3 Naimie moona, naimie aina, naimie cominina uiñofedicai. Naimie jeiciaruina uiñofedicai. Naimie fiodaillaruina uiñofedicai; iadedi Jusiñamui jito isoi Jusiñamuimona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jaimie iñena jira, naimie ñairaimana nia ite isoide.

4 Ero, cai cominimona Abraham micori cai jaiagai baifemo faite; iadedi Melquisedec micori Abraham micori baifemo faite. Ie jira naimiemo ie décima facaina rana fecade. 5 Moisés micorimona Abraham micori uruai Jusiñamui lloga uaina cacadimaci. Naimacimo Jusiñamui ie sedaja jofu finuana llote. Nainomo maijidinomo nainomo maijiana llote. Abraham micori uruaiimona Leví railla nairaina fetode. Nainomo maijidino comini facaina Jusiñamui diga ñaiuidimaci. Jusiñamui ocuica rafue naimaci maijia jira, naimaci comini ramona décima facaina rana feiñoudimaci. 6 Melquisedec micorimo Abraham micoridi ie rana fecade; iadedi Melquisedec micori Abraham micori comiñede. Leví railla nairai imieñede. Naisomo Abraham micori dine Melquisedec micori billanona, Abraham micorimo marecinona llote: “Jusiñamui ona jaca canoite. O diga jaca iite” llote. 7 Melquisedec micori Abraham micori baifemo faia jira, naie marecinona naimiemo llote. 8 Ero, Melquisedec micorimo Abraham micori rana fecade; iadedi Melquisedec micori fiodaillaruina uiñofedicai. Naimie uai saiñena jira, jaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judiui cominidi fecauidimaci; ia naie ñairaini fiodaicana jaillana uiñoticaï. Naimaci uai sailla jira, jaiño naimaci ifomo meiduidimaci. 9-10 Leví micoridi Abraham jito. Leví micorimona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feiñoudimaci. Leví micori nia comuiñenia, Melquisedec micorimo Abraham micori décima facaina rana fecajamona, Abraham micori Leví ie usumana jira, Melquisedec micoridi Leví nairai baifemo faiana uiñoticaï. Melquisedec micoridi Jusiñamui diga ñairaini baifemo faiana uiñoticaï. Melquisedec isoi Cristo illa jira, Cristodi Leví baifemo faiana uiñoticaï. Cristodi nana naie ñairaini baifemo faiana jiai uiñoticaï.

11 Jusiñamui diga ñairaini finouilla rafuedo Jusiñamui jitailla isoi marebicaiñedicai. Naimaci finouilla rafuedo cai jillobidicaïdena, jiaie rafuena jitañedicai. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiena orede. Caina jillobitallena, naimiena orede, jiaie rafuedo cai jillobiñena jira. Jusiñamui Moisés micorimo jaie llua isoi, comini facaina nano ñairaimadi Aarón micori. Naimiedi Leví railla nairai imie. Naimie jitonaiimona comini facaina ñairainina itimaci.

Iena uiñotomoi. Aarón jitonaiamona Cristo iñede. Aarón maijia rafuemo Cristo duiñede; iadedi Melquisedec rafuemo duide. ¹² Comini facaina ñairainina jaillana jai meidua jira, Jusiñamuidi naimaci rafuena jiai meidote. ¹³ Iena lloiticue. Aarón di Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede. ¹⁴ Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micori jaié jaca lloñede.

¹⁵ Cristo billa jira, Moisés micori lloga rafue meiduana uiñoticaí. Melquisedec micori illa isoi, comini facaina ñairaimana Cristo jaca iite. ¹⁶ Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide. ¹⁷ Jusiñamui lloga uaimona iena uiñoticaí. David micori naimiena jaié cuega:

Melquisedec micori illa isoi, odi comini facaina ñairaimana jaca iitio cuega. ¹⁸ Comini facaina ñairaimana jaillana Moisés micori jaié cuega. Naimona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci. ¹⁹ Naiedo jaillamona, Jusiñamui jitailla isoi marebicaiñedicaí. Iedo birui jaiñedicaí. Jiaie rafuemo birui ocuiridicaí. Cristo finoca rafue muidona, Jusiñamuina cai nabaiillamona, Jusiñamui diga birui ñairedicaí.

²⁰ Jusiñamui llua jira, Cristo cai facaina ñairaimana jaide. ²¹ Leví micori jitonaidi imaci jeiciamona, comini facaina ñairainina jaidimaci. Naga icaíño Jusiñamuidi naimacina ñairainina jaillana fetoiñede; iadedi ie lloga uaina jira, Cristo cai facaina ñairaimana jaide. David micori Jusiñamui llua jaié cuega:

Cue jai llua jira, cue llua fina noiticue.

Cristomo lloticue: “Comini facaina ñairaimana jaca iitio”

cuega. ²² Jesús ñairaimana jaca illa jira, naimie jailla rafue Moisés micori lloga rafue baifemo uaide. ²³ Moisés micori lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaicino ifomo meidollena. ²⁴ Naimie jaca illa jira, Cristo ñairaimana jaca iite. Naimie ifomo jaca buna meidoñeite. ²⁵ Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui díbeimo iacadinona, naimaci jeacinomona, ua jaca jillotarede. ²⁶ Caina canollena, naimie isoide nanoca ñairaimana jitaídicaí. Ie Moo isoi naimiedi mareuidimie. Naimiemo jeacino jaca iñede. Jeacino finouidino díbeimo naimie iñede. Jusiñamuidi ie ecimo naimiena itatate. Ie jira naimie caina canorede. ²⁷ Jusiñamuimo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiai finodimaci. Cristo naimaci isoíñede. Naimie jitailla jira, comini jeacino facaina naimie fiodailla jira, comini facaina dacaíño fiodaite. Naimaci jeacino facaina naimie dane fiodaíñeite. ²⁸ Moisés micori facai ñairainidi jeacinona finocana jaidimaci. Fiodaicana jiai jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

8

Cristo muidona jiaie rafue birui ite

¹ Cristomo ite rafuena lloiticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. ² Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite. ³ Moisés micori naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fodaite. ⁴ Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. ⁵ Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñotici. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaie niacania, Jusiñamui naimiena llofuede: “Monamo iticue; ia cue jofo eniruemo jiai finoitomoi. Sinaí railla anedu navui o ia, ona llofueticue. Ona cue llofuia isoi, cue jofona fino” llofuede. ⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite. ⁷ Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

⁸ Moisés micori lloga uaina cai jaiagai iñnoña jira, Jusiñamui jai llote: Naie cominimo jiaie rafuena ico jiairuido lloiticue.

⁹ Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canuanona, naimacina atidicue; iadedi Moisés micorimo cue lloga rafuedo jaiñedimaci.

Ie jira naimacina fañonocaidicue.

¹⁰ Naimacimo jiaie rafuena ico jiairuido lloiticue.

Iena naimaci uiñuamona, cuena raise iñnoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

¹¹ Nana naimaci cuena uiñnoitimaci.

Ie jira naimacimo: “Cai Namana omoi iño” buna niесе lloñeite.

Jamai bue isoidinomona cuena iñnoitimaci.

Jamai bue isoiñedinomona cuena jiai iñnoitimaci.

¹² Naimacina cue duenaillamona, naimaci jeacinona jaca faitaiticue

llote. ¹³ Jiaie rafuena Jusiñamui jai llumona, Moisés micorimo lloga rafue jai saillana uiñotici. Moisés micori lloga rafue caimo jai duiñede. Cristomona jiaie rafuena birui jai cacadici.

9

Hebreos comini Jusiñamui jofona eniruemo jaie nitimaci. Monamo Cristo birui illanona, Jusiñamui ecimo naimie ite

¹ Jusiñamuidi Moisés micorimo diga rafuena jaie llote. Naie rafuemona cai fueollena, iena lloiticue. Naimiena sedajana llote. Naimie sedalle jofo

finuana jiai llote. ² Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofo jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce lomenico joide. ³ Mena cuartos illena iniroina sebiñoga. Naie baifemo iticuartodi Jusiñamui illano. ⁴ Naie iniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micori jiguida nainomo jiai ite. Jusiñamui uaido naie jiguida dacaiño llisilla jira, nainomo ite. Jusiñamui cuega nofici ibici jiai ite. ⁵ Cajón emodo ibaillabici di ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uñua jira, iena omoimo are lloñeiticue.

⁶ Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci. ⁷ Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabícimo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenaillamona, Jusiñamui naimaci jeacino facaina ibana oñede. ⁸ Jusiñamui Joreño caina llofuiamona, biena birui uñotocai. Naie jofo nia ia, jamai comini fo jainina jira, Jusiñamui diga, cominidi atona nabairinidimaci. ⁹ Bie rafuena birui nia finodimaci. Moisés micori lloga uaido bu jai, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci. ¹⁰ Jusiñamuina naimaci raise sedallena, Moisés micoridi diga guille fimaide. Jiruana jiai fimaide. Naimaci abiaina finollena jiai llote. Nie isoide guille, nie isoide jirulle, niese naimaci abiai finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

¹¹ Moisés micori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicai. Cai comeciái raise jai finobide. ¹² Naimie fiodailla mei, dane jilluanona, Jusiñamui dine monamo naimie abide jaide. Toiniai diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate. ¹³ Marañede rafuena finoia, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jaie llua isoi, toiniái diailla mei, jobaide toiniái ie jusefo oni faianona, Jusiñamui jofomo jairedimaci. Nainomo naimiēna sedallena, fo jairedimaci. Iemona Jusiñamui naimacina duere finoñede. ¹⁴ Toiniaina fañeno Jusiñamuina birui sedadicaí. Cristo fiodaiacana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiēna oretaja jira, naimie fiodaite. Cristodi Jusiñamui Jitona jira, naimiēmo jeacino iñena jira, cai jeacino facaina naimie fiodaillamona, cai comeciaina raise finobitade. ¹⁵ Cristo jai finoca rafue muidona, Cristo

monamo jailla jira, jiaie rafue birui ite. Bie rafuedi comini Jusiñamui diga jaca illena lloste. Nana Jusiñamuina ñnotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiena bu ñnoia, naimie jeacino facaina Jusiñamui birui ibana oñeite. Nana Jusiñamuina ñnotinodi naimie jai llua isoi, naimie diga jaca iitimaci.

¹⁶⁻¹⁸ Jusiñamui jofo jaie finua mei, Moisés micorimo Jusiñamui lloste: “Cue lloga rafuena raise finodomo. Bie jofomo cuena sedallena, faga toinia dirue diga bie jofona llereca. Nana naiemo ite rana jiai llereca. Iena o finuamona iobiticue. Cue lloga uai finocana mai o jai” lloste. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicai. ¹⁹ Ie cominimo nana naimiemo Jusiñamui lloga rafuena Moisés micori llua mei, faga jurareta dirue diga, faga chivo dirue diga, nana naie lloga rafue ciegabiaina llerede. Cominina jiai llerede. Naie dirue jinui diga nano faite. Febecode ra jiairede ñiroi diga maiga. Iemei naie ra diga naie diruena llerede. ²⁰⁻²¹ Jusiñamui jofona dirue diga llerede. Nana nainomo ite rana jiai llerede. Lloste: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”. ²² Moisés micorimo Jusiñamui llua isoi, raise finobillena, nana rana dirue diga llerede. Toinia fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

Cristo fiodailla jira, Jusiñamui cai jeacinona oni dotade

²³ Jusiñamuidi Moisés micorimo toiniaina fajana jaie lloste. Naie llua finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toinia baifemo faia jira, monamo cai jaca illena, jeacinona oni dotallena, Cristo fiodaite. ²⁴ Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. ²⁵ Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite. ²⁶ Cristo iese itena, nano facaise mona diga icaño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite. ²⁷ Nana dacaiño fiodaiticai. Iena uiñoticai. Fiodailla mei, Jusiñamui uicomo iiticai. Naimiena cai ñnoia, caina feñeite. Naimiena ñnoñedinona duere finoite. ²⁸ Dacaiño Cristo jai fiodaillana uiñoticai. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie bille mo iocire ocuritinona monamo Jusiñamui illanomo uite.

10

¹ Moisés micori facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebi-cañedimaci; iadedi Moisés micori lloga uaimona jeacino cai finuana uiñoticai. Jusiñamui cai jeacino oni dotajana uiñoticai. Jusiñamui jaca mareuidimiena uiñoticai. Jusiñamuina nabaillena janore uiñoticai. Cristo

jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicai. ² Naie faga toiniái Jusiñamuimo fecajamona comini marebicaidena, naiena fecarainidimaci. Naimaci jeacino dacaño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci. ³ Naiena fecauillamona, jeacinona finocana naimaci nia jaillana uñotimaci. ⁴ Toiniái dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona faitate. ⁵ Eniruemo jaiie billanona, Jusiñamuimo iena Cristo llote:

Jeacino facaina toiniái fajana jai jitaiñedio.

Ie jira eniruemo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toiniaina jai jitaiñedio.

⁷ Iena cue uñuamona, eniruemo cue billanona, o jitailla rafuena finoiticue.

O facaina lloraini micoriai iena jaiie cuetimaci

llote. ⁸ Cristo luana dane ñaiticue. Cristodi Jusiñamui Moisés micorimo llogacinona ñaite. Jusiñamui jaiie llua isoi, naimiemo cominidi jeacino facaina faga toiniaina jaiie fecauidimaci. Iena Jusiñamui birui jai jitaiñede. ⁹ Cristodi: “Jusiñamui jitailla rafuena finuaibiticue” luamona, Moisés micorimo llogacino jai saillana uñoticai. Jiaie rafue birui illana jiai uñoticai. ¹⁰ Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicai. Jai marebicaidicai.

¹¹ Nana Moisés micori llogacinodo jaiie ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede; ¹² iadedi dacaño Cristo fiodaillamona, Jusiñamuidi nana cai jeacinona faitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaiie. ¹³ Nana naimie dibeimo ifedinona naimie emodofillemo naimie birui ocuride. ¹⁴ Dacaño Cristo fiodaillamona, naimiena cai ñnuamona, Jusiñamuimona jaca marebicaidicai. ¹⁵ Jusiñamui facaina lloraima micori cuegafuemona Jusiñamui Joreño caina iena uñotade. Naimie facaina lloraima micori Jusiñamui llua jaiie iese cuega:

¹⁶ Hebreos cominimo jiaie rafue ico jiairuido lloiticue.

Cue rafuena naimaci uñuamona, cuena raise ñnoitimaci.

¹⁷ Jiai cuega:

Naimaci jeacino jaca faitaiticue.

¹⁸ Cristo jai fiodailla jira, jeacinona Jusiñamui jai faitaja jira, faga toiniaina naimiemo fecajana dane jai jitaiñede.

Jusiñamuina cai nabaili

¹⁹ Cue amatai, Jesús fiodailla jira, Jusiñamuina jaciruiñeno birui nabairedicai. Naimie cai Moo jai illanona, naimie diga meiruiñeno jaciruiñeno birui jiai ñairedicai. ²⁰ Moisés micori facaise nanoca ñairaima fo iticuartomo jaillena, sebiñoga iniroi oni dibeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicai. Naimie diga birui atona nana ñairedicai. ²¹ Cristona jai cai ñnua jira, cai facaina nanoca ñairaimana naimie illa jira, ²² cai mare comeciainomona Jusiñamui diga birui cai ñailli. Naimiena eo cai ñnuamona, cai comeciái jeanillamona, naimie

dibeimo cai bautizamona, naimiena mai cai nabailli. ²³ Cristo caina jilluana inoticaí Monamo naimie diga cai illemo ocuridicaí. Jusiñamui inogamiena jira, naie rafuena inocana mai cai jailli. ²⁴ Jiaie creyentiamo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli. ²⁵ Rollena omoimona damierie oficabiñedimaci. Naimaci isoi omoi ineno; iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iaírei illa jira, naimiena raise inollena, conini omoi comeciái ocuiñocana mai omoi jai.

²⁶ Cristo finoca rafuena bu uñua mei, iena naimie inoñenia, jeacinona naimie finocana jailla jira, Jusiñamui naimie jeacinona feitañeite. Cristo fodaillana bu jamaia, Jusiñamui ie jeacinona feitañeite; ²⁷ iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo inedinona duere finoite. ²⁸ Moisés micori jiaie cueda: “Jusiñamui llotte: ‘Menaimie naimiena daje isoi lloillamona, Moisés micori jlogacinona jamaidimiena dueruñeno meinega’”. ²⁹ Iese duere sefuillana jai llotte; iadedi birui ite lloga rafue bu jitañenia, bai duere sefuite. Jusiñamui jitona bu jitañenia, Jusiñamui birui lloga uaina bu jitañenia, Cristo fodaillana bu jamaia, Jusiñamui Joreña jeare bu ñaia, Jusiñamuimona naimie eo duere sefuite. Cristo fodaillamona, Jusiñamui naimiena inotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitañenia, Jusiñamui naimiena bai duere finoite. ³⁰ Ero, Jusiñamui jai llotte: “Maraiñedinona bu finoia, ibana oiticue. Cuená inoñedinona duere finoiticue” llotte. ³¹ Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi inellena, Jusiñamui lloga rafuena jamaiñeno.

³² Creyentiaína nano omoi jaillamo dane comeciaina faca. Creyentiañedinomona eo duere sefuidomoi; iadedi Cristona inocana jaidomoi. ³³ Omoimona damierie marefomo navui duere sefuidomoi. Omoi jaisitimaci. Omoína jifanododimaci. Omoína jeare finodimaci. Damieriena meinetimaci. ³⁴ Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedino omoi rana bairodimaci; iadedi omoi comeciái nia iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi. ³⁵ Jusiñamuimona iba ico omoi feiñua jira, Cristona nia inocana omoi jai. ³⁶ Jusiñamui jitaillacino omoi finollena, monamo jaca omoi illena, nie isoido ramo omoi jiria, Jusiñamuina nia inocana omoi jai. ³⁷ Jusiñamui biena llua jira, iese suite:

Cristo abido billirui iaírei illa jira, naimiena inocana omoi jai.

³⁸ Naimie nia abido biñenia, omoína cue jai marebicaitaja jira, cuena inocana mai omoi jailli;

iadedi cuena jitañedinori iobiñedicue.

³⁹ Naie isoidino jillobiñeitimaci. Naimaci isoi inedicai. Jusiñamuina inocana cai jaillamona, jaca jillobidicai. Ie jira naimiena inocana mai cai jailli.

11

Jusiñamuina inocana jaidicai

¹ Jusiñamuina cioñedicai; iadedi naimie illana inoticaí. Naimie lloga uaina inocana jaidicai. Naimie lloga uai suillena inoticaí. Ie lloga uai

suillemo ocuridicai. ² Cai jaigaimona damierie iese inocana jailla jira, Jusiñamuimona marebicaidimaci. ³ Jusiñamui finoca rana birui ciodicai; iadedi jaie nano dofoconi jaca buena ifede. Naie facaiseconi dama ie uaido Jusiñamuidi eniruenta finode. Mona finode. Nana rana finode. Nana rana comuitate. Iena inotica.

⁴ Cai jaiajai rafuena ja lloiticue, naiemona cai fueollena. Abel micori Jusiñamuina jaie inuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Cain raise inoñena jira, naimie fecaca rari iobiñede. Iena feiñofede. Abel micori Jusiñamuina inua jira, Jusiñamuimona naimie marebicaide. Abel micori jaie fodaite; iadedi Jusiñamuina cai raise inollena, naimiemona nia fueoitica.

⁵ Enoc Jusiñamuina jaie inote. Naimiedi Jusiñamuina eo iobitate. Moisés micori cuegafuaimona iena uñotica. Jusiñamuina inuamona, Jusiñamuina eo iobitaja jira, naimie fodaifede; iadedi fodaifeno monamo Jusiñamui naimiena naimiena uite. ⁶ Jusiñamuina cai inoñenia, naimiena iobitañedicai. Jusiñamuina cai nabaiaiania, naimiena cai raise sedaiania, naimie illana inotica. Naimiena cai nabaiaiania, cai jitai raillano, caina canollena inoitica.

⁷ Noé micori Jusiñamuina jaie jiai inote. Jusiñamui ico sulle rafuena naimiemo llote. Enirue buillena llote. Iena inuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui lluana Noé micori inua jira, jillode. Noé micori Jusiñamui lluana inote; iadedi naimie facaise ite comini inoñena jira, Jusiñamui raicallafue anamo itimaci. Jusiñamuina naimie inua jira, Jusiñamui uruena naimie jailla jira, Jusiñamuimona Noé micori marebicaide.

⁸ Abraham micori Jusiñamuina jaie jiai inote. Ie moo eniruemona naimie jaianillena Jusiñamui naimiemo llote. Are ite eniruemo naimie jaianillena llote. “Jaie enirue omo iiticue” Jusiñamui llote. Abraham micori inote; iadedi ie jaillinona uifñofede. ⁹ Jusiñamui lloga eniruemo Jusiñamuina inocana jaide. Naie eniruemo ride; iadedi naie enirue naimiemo nia raise duiñede. Chivo itira imona niga iniroimona sebiñoga jofomo naimie jaca ite. Ie jito, Isaac micori, naie isoide jofomo jiai ite. Isaac micori jito, Jacob micori, naie isoide jofomo jiai ite. Jusiñamuidi nana naimacimo daje isoide rafuena llote: “Bie enirue omoimo iiticue” llote. ¹⁰ Abraham micori mare jofona finofede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuride. Monamo Jusiñamui mare finolle illanomo ocuride.

¹¹ Abraham micori aidi Sara micori. Jusiñamuina Sara micori inua jira, Jusiñamui naiñaiño abina maritate. Naiñaiño eo jionaide; iadedi uruesite. Naiñaiño Jusiñamui llua isoi, naiñaiño uruesillana inote. ¹² Abraham micori jiai eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidimaci. Facadonide conillie isoi jebuidimaci. Ailluena ucuai illa jira, naimaci facadonidicai. Ailluena conillie illa jira, iena facadonidicai. Ie isoide. Eo ailluena Abraham micori uruai illa jira, naimacina facadonidicai.

¹³ Abraham micori, Isaac micori, Jacob micori Jusiñamuina inocana jaidimaci. Nana naimacimo Jusiñamui lloga uaina suiñedemo fodaitimaci. Nia fodaifenia, Jusiñamui llogacinona cacadimaci. Iena inotimaci. Ie jira bie eniruemo naimaci jaca illemo comecina facañedimaci; ¹⁴ iadedi monamo jaca illemo comeciaina facadimaci. ¹⁵ Naimaci jaie billa eniruemo

comeciaina naimaci facadena, nainomo abido jaidimaci; ¹⁶ iadedi jiaie illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci inua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

¹⁷⁻¹⁸ Jusiñamuina Abraham micori inua jira, ie jitona comuitate. Jusiñamui Abraham micorimo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micori naimiena inuana raise uifollena, facacite. “O jitona fano” Abraham micorimo llote. Abraham micori Jusiñamuina inuanona, ie jito faiacade. ¹⁹ Ie jito fiодaillemona, Abraham micoridi Jusiñamui naimiena jilloitallena inote. Isaac micori fiодaiñede; iadedi fajamona jillode.

²⁰ Isaac micori Jusiñamuina jiai inote. Naimie fiодaiacania, Jusiñamui ie llogacino finollena inuamona, mena ie urue iaiaimamo ie uaina fecade. Llote: “Jusiñamui luua isoi, jebuicana jaitomico”. ²¹ Jacob micori Jusiñamuina jiai inote. Naimie fiодaiacania, Jusiñamuimo jianona, ie jiguidamo juita naidaidemo, José micori ie mena urue iaiaimamo marecinona llote. Jusiñamui ie llogacino finollena inuanona, llote: “Jusiñamui luua isoi, jebuicana jaitomico. Naimie omicono canoite” llote. ²² José micori fiодaiacania, ie cominimo llote: “Jusiñamui omoina canuano, Egiptomona ico jiairuido omoi jaillena inoticue. Omoi jiaia, cue illaiciaina omoi diga uifio. Canaan railla eniruemo omoi ria, nainomo cue illaiciaina raino”.

²³ Moisés micori moo, ie ei diga Jusiñamuina jiai inotiaimaiai. Hebreos comini jebuiñellena, naie facaiseconi Egipto illaima nana hebreos isaiaina meinana llote. Iaiaimai jito jeicia mei, iaiaimai uruena daje amani fivui reidiaimaiai. Jusiñamuina inuanona, naimie maresana eruaila jira, jaciruifeno naimiena jofomo fo reide. Illaima luuamona Jusiñamui naimiena jillotajana inotiaimaiai. Ie jira Faraón jisa anamo comuide. Faraóni Egipto nairai illaima. ²⁴ Moisés micori Jusiñamuina inote. Naimie eimienamona, naimiedi Faraón jisa ie jitona mamecireaiañede; ²⁵ iadedi naimiedi Jusiñamui naimiena ie cominina Egiptomona jillotajana inote. Jusiñamui naimie fetua jira, ie comini dibeimo naimie iacade. Ie comini diga duere sefuiacade. Jusiñamuina inofedino diga ie comecei jamai iobitaiacaiñede. ²⁶ Faraón jisa anamo naimie comuilla jira, naimiemo eo aillue rana ite; iadedi Egiptomote ebirede ramo ie comeceina eo facañede. Jusiñamuimona iba naimie ico feñioiacana jira, Jusiñamui jito billemo ie comeceina facajano, duere sefuede. ²⁷ Ie jira Egiptomona Moisés micori Faraóna jaciruifeno oni jaide. Jusiñamui naimiena eenuana inote. Jusiñamuina cioiñede; iadedi Jusiñamui illana naimie inua jira, inocana jaide.

²⁸ Jusiñamui ie cominina jillotajana Moisés micori inua jira, Jusiñamui luua isoi, pascua railla rafuena finode. Ie cominimo toica llauda fallena llote. Ie dirue nase fue mo jidellena llote. Naie naio Jusiñamui jaienici nana nano doforanina meinesiñellena, Jusiñamui lluaana finodimaci. ²⁹ Egiptomona naimaci billa mei, jiairede railla monailai ruica dine jaillena, Jusiñamuina inotimaci. Jusiñamui Moisés micorimo lluaana naimaci inuamona, jinui motodo saferedifodo ruica jaidimaci; iadedi Egipto soldaduai daje isoi ruica jaiacadimacimo, nana corobaitimaci.

³⁰ Canaan railla eniruemo hebreos comini rilla mei, Jericó railla nairai dine ridimaci. Jusiñamuina inuanona, Jusiñamui luua isoi finodimaci. Siete digarui Jericó ecimo naimaci macarilla mei, Jusiñamui luua isoi, naie llaigafó

ana bijide. Naie nairaina emodofidimaci. ³¹ Naie facaiseconi Jericómo Rahab micori fioidañede. Naiñaiñodi callirediñaiño. Nana Jericó comini Jusiñamuina inoñena jira, fioidaitimaci; iadedi jofue iñenanomo, nia Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina inote. Mena hebreos comini iaimaiana naiñaiño feiñua jira, Jericó nairaina emodofilla facaise naiñaiñoña meineñedimaci.

³² Diga jiaie comini Jusiñamuina inocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefeé micori, David micori, Samuel micori Jusiñamui facaina jiaie llorainina jiai eo cueñeiticue. ³³ Jusiñamui naimacina canuamona, inotimaci. Ie jira damierie naimaci bacauaina emodofidimaci. Illaia isoi jiaino naimaci cominina raise marena sedadimaci. Jusiñamui llogacino suillana cioidimaci. Leones naimacina riicanamona damierie jillode. ³⁴ Iraimo usillamona damierie jillodimaci. Lloebi diga meiniamona damierie jillodimaci. Jiaino jamai bue isoidino; iadedi jamai bue isoñedinona jaidimaci. Jobaime raise finuamona, jiaino imaci bacauai soldaduaina judaisitade. ³⁵ Dañaiñorie riñoniamona uruiá fioidailla mei, fioidaillamona Jusiñamui damierena jillotate. Illaicomimomona jiaino duere fioidaitimaci. Jusiñamuina fainonocaiacaiñena jira, naimacina meinetimaci. Naimaci fioidaiaiania, monamo Jusiñamui diga ico jaca illena naimaci inua jira, Jusiñamuina fainonocaiñeno fioidaitimaci. ³⁶ Jiaino duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damierena maianona, cárcelmo jonetimaci. ³⁷ Damierie nofici diga fairnuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaino buenidimaci. Naimaci iniroi jamai igoi ie. Dueredimaci. Naimaci iniroi raise iñede. Aime guisoidimaci. Jiaie cominimona duere sefuisoidimaci. ³⁸ Jiaie cominimona jamai bue isoidimaci; iadedi Jusiñamuimona jamai bue isoñedimaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai biita inuidimaci. ³⁹ Jusiñamuina inocana jaidimaci. Naimaci finoca rafuemonona Jusiñamui comini naimaci illana uñoticaí. Jusiñamuina inotimaci; iadedi nana naimacimo Jusiñamui lloga rafue naimaci illa facaise suiñede. ⁴⁰ Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fioidaillena Cristona jai orede. Ie cominina birui cai jiai jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

12

Jesús finoca rafuemo cai comeciaina cai facalli

¹ Cai jaiagai Jusiñamuina inocana jaillana uñoticaí. Ie jira caidi naimaci isoi, Jusiñamuina inocana birui mai cai jailli. Marena riire cai aisiaiania, ailluena rana abiñedicaí. Ie isoide. Jeacinona cai finoñellena, naimina raise cai inollena, jeacino finuacinona mai cai fainonocaili. Nie isoide rafue caimo ia, Jusiñamui jitaillacinona finocana mai duere cai jailli. ² Jesús finoca rafuemo cai comeciaina cai facalli. Cai jeacino facaina naimie fioidailla jira, cai comeciaina naimie ocuiñotajanona, Jesúna inoticaí. Cruzmo marañedimie isoi fioidaite. Fioidaillamona jilluana naimie uñuamona, naimie fioidaite. Ie

Moo ecimo dane illena naimie uiñuamona, iocire fiodaite. Illaimana naimie illamona, ie Moo ecimo birui ite. Jesúmo cai comeciaina facajamona, caimare mai cai jailli. ³ Jusiñamui dibeimo iñedinomona Jesús eo duere sefuide. Ie isoi cai duere sefuia, Jesúmo cai comeciaina facajamona, cai comeciaina ocuiñotacana mai cai jailli. ⁴ Jusiñamui dibeimo iñedinomona duere sefuillamona, Jesús isoi duere nia sefuñedomoi. Omoína nia meineñedimaci. ⁵ Duere omoi sefuia, bie jaie cuegafuiaina feitañeno. Naimie cominina omoi illamona, Jusiñamui llote:

Cue uruiái, omoína cue duere finoía, cuena nia ñino.

Duere sefuillamona, cuena fainonocaiñeno.

⁶ Omoína cue isiruillamona, omoína duere finodícue.

Cue dibeimo omoína raise itatallena, omoína duere finodícue.

Nana cue cominina cue llofuecabillamona, naimacina duere finodícue

llote. ⁷ Naimie jitaillacinona cai finollena, caina duere finode. Ie uruiaina cai illamona, caina duere finode. Ero, nana ie uruiaina isiruillamona, naimaci ie jitaillacinona finollena, naga eniruemo ite moo ie uruiaina duere finocabide. Ie isoide Jusiñamui. Ie jitaillacinona cai finollena, caina duere finocabide. ⁸ Caina ñnotallena, Jusiñamui caina duere finoñenia, naimie comiñedicai. Naimiedi nana ie cominina duere finocabide. ⁹ Cai eniruemo ite cai mootiai caina duere finoía, naimaci uaina ñnoticai. Ie isoide. Cai Moo Jusiñamui caina isiruillamona, caina duere finoía, naimie uaina cai ñnuva. Naimiena cai ñnuamona, monamo naimie diga ico jaca iitícai. ¹⁰ Naimaci comeciái llua isoi, cai eniruemo ite mootiai dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue dibeimo caina itataiacade. ¹¹ Jusiñamuimona duere cai sefuia, iena gaiñedicai. Iena jitaiñedicai; iadedi naiemona cai fueoía, jeacinona dane cai finoñellena, naimie jitailla isoi marecinona finocana jaitícai.

Jusiñamui rafuena cai cacaía, iena cai aruiruiñena

¹² Nie isoide ramo caimo jiria: “Jusiñamui caina nibai canoñede” raitícai. Iemona naimiena fainonocaiacadícai; ia iemo cai comeciaina cai facañena. Jusiñamui rafuena cai sefuirua, duere cai sefuia, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise ñnuamona, cai comeciái ocuiñocana mai cai jailli. ¹³ Jaie rafuedo cai jaiñena; iadedi Cristo rafuedo raise ñnocana mai cai jailli. Iese cai jaia, Cristo rafuedo naimaci jiai raise jaillena, jiaie creyentiaína canoitícai. ¹⁴ Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite. ¹⁵ Jusiñamui caina duenaillamona, nana cominina jillotaiacade. Omoimona buna Jusiñamui duenaillacinona fainonocaiillana jitaiñedicue. Omoimo iese sua, iemona conini gaiñenacino comuired. Iena jitaiñedicue. Omoi comeciái daje isoi lloillana jitaidícue. ¹⁶ Jearede rafuena jaca finoñeno. Esaú micorí jaie finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiéna illamona, ie moo fiodaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiodaiñena facaise dacaiño Esaú aimetailla jira, ie amadona guillena jicade. Iemei naie guille ifome ie moomona feiñolle uaina ie amamo fecade. Naie facaise dama ie jitailla ramo comecina facade. ¹⁷ Ie amamo ie uaina fecaja mei, ie comeci íuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede;

iadedi ie moo ie uai naimiemo jai fecanide. Jusiñamui lloga rafuemo Esau começina facañede. Naimie isoi Jusiñamui rafuena omoi jamaiñeno.

¹⁸ Moisés micori facaise cai hebreos cominimo Jusiñamui ie rafuena jaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude. ¹⁹⁻²⁰ Trompeta ficirenana cacadimaci. Iena çuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toiniai nainomo macaria, nofici diga fairinuamona, naimiena omoi meine” llote. Jusiñamui lluaana cacajamona, eo jaciruitimaci. Moisés micorimo: “Jusiñamui caimo nia lluaana jai jitaiñedicaí” llotimaci. ²¹ Eo jacirede ra illa jira, nana comini diga Moisés jiai jaciruite. ²² Sinaí anedumona lloga rafuedo birui jaiñedicaí; iadedi jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicaí. Monamo Jusiñamui ite; iadedi birui naimiena atona nabairedicaí. Cai fiodaia, naimie dine jaiticaí, naimie diga jaca cai illena. Nainomo ie jaienisaí naimiemo iobillacinona fecacabidimaci. ²³ Ailluena comini diga, Cristona birui inoticaí. Nana caina Jusiñamui fetuanona, cai mameciaí monamo ite rabenicomo jai cueda. Jusiñamui nana comini começiana uifnote. Naimiena inotinomona ailluena jai fiodaitimaci; ia naimie ecimo naimaci joreñuai jiai jai itimaci. ²⁴ Jesús fiodailla jira, Jusiñamuina nabairedicaí. Naimie fiodailla jira, caimo jiaie rafue birui ite. Naie rafuena cai inuamona, cai começiai jai marena iticaí. Jiai cai jeacinona oni dotade. Iena jiai jai feitate. Abel micori jaie fiodaia, naiemona Jusiñamui buna ie jeacinona feitañede; iadedi Jusiñamui Abel micori meinetimiemo ibana ote.

²⁵ Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaíno iena jitaiñedimaci. Iena inoñedimaci. Ie jira Jusiñamui naimacina duere finode. Cristomona jiaie rafue birui cacadicaí. Bie rafuedi Moisés lloga rafue baiñemo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai inua. ²⁶ Moisés micorimo ie rafue llua facaise, Jusiñamui naie eniruena niraidotade. Jusiñamui jairuido jiai llote: “Eniruena dane niraidotaiticue. Ucuaina, fivuina, jitoma diga, jiai niraidotaiticue” llote. ²⁷ Naimie lloga uaimona enirue fuillena uifnoticaí. Monamo ite ra fuillena jiai uifnoticaí. Nana naie rana naimie fuidoite; iadedi naimiena cai inua jira, naimie caina fuidoñeite. Ico cai illinona jai finode. Iena naimie fuidoñeite. ²⁸ Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai inuamona, naimiena cai raise sedajamona, naimiena cai iobitaja. ²⁹ Naimiena inoñedinona Jusiñamui eo duere finolle jira, naimiena jacirullanona naimiena cai inua.

13

Jusiñamuina cai iobitaja

¹ Dani conini jiaie creyentiaína isiruicana omoi jai. ² Abraham micori Jusiñamui jaienisaína uifnoñeno jaie nafuete. Jiaie illanomona jiaie creyentiaí bia, naimaci inillino iñena jira, naimacina nafue. Jusiñamuimona ibana feifnotomoi. ³ Cristo rafue muidona damierie creyentiaí cárcelmo itimaci.

Nainomo omoi jiai itomoidena, naimacina feitaño. Naimacina isiruillamona cano. Damierie creyentiai duere sefuia, naimacina jiai cano. Jaiiruido naimaci isoi nibai duere sefuitomoi. ⁴ Airedimie jiaie riño diga illemo ie comecina facañena. Inirediñaño jiaie iima diga illemo ie comecina facañena. Ie añede riño diga bu ia, ie iniñede iima diga bu ia, maraiñede. Iena finoño. Iena bu finoa, ie jeacino Jusiñamuiimo lloñenia, Jusiñamui naimiēna duere finoite. Naiñaño jiai duere finoite. ⁵ Ailluena ucube ollena, iemo nicifño. Omoimo ite ra diga caimare i. Iena Jusiñamui facaina lloraima jaiē cuela: “Jusiñamui lloite: ‘Omoina jaca canoiticue. Omoina jaca fainonocaiñeiticue’ lloite”. ⁶ Naiena cai uiñuamona, cai comeciaina ocuiñoitica. Jaiē cuela isoi lloitica:

Cai Nama caina canoite.

Ie jira cai comeciai jarire finoñeiticai.

Buena jaciruiñeiticai.

Jaiimie buena caina jaciruitanide.

⁷ Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoi. Cristo dibeimo naimaci illamo omoi comeciaina facajanona, naimaci isoi Jesucristona inocana mai omoi jai. ⁸ Naimie jaca inogamiēna uiñotica. Naimie ie lloga uaina jaiē jaca finode. Iena birui finode. Ico iena jaca finoite. Ie jira naimiēna cai iñua. ⁹ Cristo ieñede rafuedo jaiñeno. Diga jiaie llofuaiacino ite; iadedi iedo jaiñeno. Jusiñamui caina canuamona, cai comeciaina birui ocuiñocana jaitica. Moisés micorimo lloga rafuedo navui jaidica. Diga ra fimaide; iadedi naiedo cai jaillamona, cai comeciai raise illena, buena oñedica. ¹⁰ Cruzmo Cristo fodaillamona, cai jeacino facaina fodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. ¹¹ Moisés rafue llua isoi, nanoca ñairaima toiniaina faja mei, naie dirue dacaño naga año fo iticuartomo uite; iadedi naie toi abi naimaci comini illanomona jino uite. Iena jai jitañena jira, nainomo iena jobaide. ¹² Ie isoide. Cristona comini jitañena jira, ie comini nairaimona jino uillanona, naimiēna meinetimaci. Nainomo jeacino facaina fodaite, comini comeciaina raise finollena. ¹³ Ie jira Moisés micori lloga rafuena cai fainonocaida, dani Jesucristo rafuedo cai jailli. Naimiēna jeare finodimaci. Caina jeare finoia, naimiēna jaca inocana cai jailli. ¹⁴ Beno jaca cai illemo ocuirñedica; iadedi monamo Jusiñamui diga cai jaca illemo ocuiridica. ¹⁵ Jesús finoca rafue muidona, Jusiñamuiimo iobillacinona jaca cai fecaja. Jusiñamuina cai uiñuamona, naimiēmo iobillacinona jaca cai fecaja. ¹⁶ Marecinona finocana mai cai jailli. Jiaie creyente jitañ raillano, omoi raruaimona naimiēna omoi cano. Iena omoi finoia, Jusiñamui omoi iobite.

¹⁷ Omoi llofuerañi uaina iño. Naimaci anamo raise omoi i. Cristo dibeimo omoina raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi iñoia, Cristo dibeimo caimare maijitimaci. Naimaci uaina omoi inoñenia, sunaitimaci. Sunailla jira, naimaci llofuaiacinomona buena oñeitomoi.

¹⁸ Jusiñamui diga omoi ñaia, cai facaina omoi jii. Jusiñamuiimona cai comeciai marena illana uiñotica. Naimie jitailla isoi, mare rafuena finocana jaiacada. ¹⁹ Omoi dine cue raise illena cue facaina Jusiñamuiimo eo omoi jii.

Naimaci marena jaca illana jitaide

²⁰ Jusiñamui conini omoi comeciaina uri itatajana jitaide. Cai Nama Jesús fodailla mei, Jusiñamui naimiēna jai jillotate. Jusiñamui llua isoi,

Jesús fiodaite. Naimie fiodailla jira, Jusiñamui cai jeacinona feitate. Naimie fiodailla jira, naimie anamo cai illamona, caina raise sedarede. ²¹ Jusiñamui ie jitaillacino omoi finuana canoite. Cristona omoi inuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaidicue.

²² Cue amatiai, bie cartana caimare feiño. Eo are rafuena cueñedicue. Janore cueticue. ²³ Cai ama Timoteo cárcelmona jai jino bite. Cue dine naimie raire bia, omoi dine naimiena atiticue. ²⁴ Nana omoi llofuerainimo cue uaina oredicue. Ua nana creyentiaimo cue uaina oredicue. Italamona bitino imaci uaina jiai oredimaci. ²⁵ Jusiñamui omoina jaca duenaillana omoi uiñuana jitaidicue. Mai. Macaibaite.

SANTIAGO ORETAGA RABE

Uaiduacino

¹ Caĩmaci, omoĩmo cartana oredicue. Santiagodicue. Cue mameci jiaicidi Jacobo. ¿Nĩgacino? ¿Nĩe isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiamo omoi duillamona, omoi jai judaisilla jira, omoĩmo cue uaina oredicue.

Ramo omoi jiriadedi, omoi comeciaina mairita

² Amatiai, diga ie ramo omoi jiriadedi, eo iobilla. ³ Ramo omoi jiriadedi, Jusiñamui uaina raise omoi iñuana uifnoitomoi. Iemona omoi comeci mairillemona, iñocana omoi jaitomoi. Biena omoi uifua jira, iobilla.

⁴ Mairicana omoi comeci jai, omoi comeciadi marebicaita. Marebicailamona, omoi comeciimo buena fiebicaiñeite. Nana Jusiñamui llogacinuaina ja muidomo iñoitomoi; ⁵ iadedi omoĩmo rafue ia, niese nibaiana omoi uifnoñenia, Jusiñamuimo jica. Ie mei omoĩmo naimiedi abi uifnoraciona iite. Jusiñamuidi nana naimiemo llotinomo iena caidiñeno icabilla jira, omoĩmo iena jiai iite; ⁶ iadedi omoi jicaia, uai iñuanona jica. Omoi comeci iñnoñenia, jicañeno. Comecina iñnoñedimiedi aifi betaja jorai isoide. Naimie comeci naganomo iite. ⁷ Naimiedi Jusiñamuimona ra feiñollemo tainona sedaite. ⁸ Naie isoidimiedi nana naimie illa dinori ie comeci naganomo iite.

⁹ Naimie ramo jiriadedi, Jusiñamuimona naimie jamai bue isoifñena jira, duerede creyente iobilla; ¹⁰ iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite. ¹¹ Jitoma a ia, eo ecasillamona, safia safenaite. Llríde. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feiñoticaĩ

¹² Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuenta isiruitinona cue illanomo jaca itataiticue”. ¹³ O ramo bu faia, lloñeno: “Jusiñamuidi cuenta ramo faite”. Maraiñede rafue dibeimo naimie iñena jira, naimiedi buna ramo jaca faifñede. ¹⁴ Cai comeci mo naie jitaillacino illa jira, ramo faia uai iñnoticaĩ. Naie facaiseconi caimona ebirena jirari, iena finoacadicaĩ. ¹⁵ Cai jitailla jira, jeacinona finodicaĩ. Jeacinona finocabillanona jaillano, faifiticaĩ. ¹⁶ Ero, cue isiruiga amatiai, Jusiñamui omoĩna ramo faitatañena jira, naimiemona da mare rafue billa jira, dani omoi abina jifueñeno. ¹⁷ Nana mare rafue cai Moomona feiñoticaĩ. Naimiedi monamo iite lligaiñoraniaina jai finode. Naie radi nagarui daje isoi lligaiñofñede; iadedi naimie daje isoifñede. Naimie comeci jacanano danoconi nagarui iite. ¹⁸ Naimie jitailla jira, ie uai lluno, naimie caina ie uruiaina itatate. Ie uruiamona nano doforanidicaĩ.

¿Nĩe isoide rafuena finoacadicaĩ?

¹⁹ Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiai raire icirifñeno. ²⁰ Icirillamona, Jusiñamuidi cai marena jitailla isoi, buna jaca marebicaiñede. ²¹ Ie jira nana maraiñedicinona oni

fainonocai. Jusiñamui uai omoi comecimo fecuise abi iedoñeno nagarui feiñocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede. ²² Cacajamona iena inocana jai. Cacajanona iena omoi inoñenia, dani abina jifuetomoi. ²³ Bu naie uaina cacajamona inoñenia, naimiedi acaranimi eruaidimie isoide. ²⁴ Ie uiecona eruaide. Naimie jailla meinoconi, ie eruailla ie uiecona jai raire feitete. ²⁵ Jusiñamui llogacinona bu eo facajia, iena feitañede. Iena inote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena inua jira, naimie comeci caimare ite.

²⁶ “Jusiñamuina sedadicue” raillanona ie comecina facadimiedi jeare ñaia, marañeno ñaia, dama naimie abina jifuate. Jusiñamuina taino sedade. ²⁷ Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaisecondoni. Jeacinona jiai finoacañeite. Jusiñamui dibeimo inedino isoi iacañeite. Jusiñamui naimie iese sedajia, Jusiñamuimona eo mare.

2

Nana cominimo comeciaina lloitaicadica

¹ Amatiai, cai Nama Jesucristo uai eo ebirede. Naimiena omoi inua jira, naimacimo daje isoi comeciaino lloillamona, nana cominina daje isoi nafue. ² Ero, omoi roracomo mena ima bia, ¿nie imana nafueitomoi? Daimie ucuberedimie. Naimiemo oro ie anillos ite. Eo mare iniroina jitade. ³ Ucuberedimie mo llotomoi: “Bai bene bancomo rai”. Dueredimie mo llotomoi: “Bai bene naidai. Raiacania, eniruemo rai”. ⁴ Iese omoi lloia, damiena jai raise nafuetomoi; ia damiena jai raise nafueñedomoi. Iaimai iniroimo omoi eruaillamona, nafuetomoi. Mare rafuemo comeciaina facañedomoi.

⁵ Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiena naimaci eo inua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”. ⁶ Ero, Jusiñamui dueredinona nafuate; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomoi. Ucuberedinomona duere sefuicabidomoi; ia ucuberedimiena raise nafuetomoi. Maijitallena, juez dine ucuberedino omoina uitatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci. ⁷ Cristomo omoi jainaiaillamona, ucuberedino naimiena jeare jiai ñaitimaci.

⁸ “Cristo llogacino finodicai” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofo ecimo itinona isirui, dama o abina o isiruilla isoi”. Iese omoi ia, cuemona mare; ⁹ iadedi nana cominina daje isoi omoi nafueñenia, jeacinona jai finodomoi. Jai Jusiñamui llogacinona inoñedomoi. Jusiñamui llogacinomona jai marañeno itomoi. ¹⁰ Nana Jusiñamui llogacinuaimona daje llogacinona omoi inoñenia, Jusiñamuimona nana naie llogacinuaina jai inoñedomoi. ¹¹ Jusiñamui caimo jai llote: “O añede riño diga iñeno. O iniñede ima diga iñeno”. Jai llote: “Jaiamiena meineño”. O añede riño diga iñedio; iadedi jaiamiena o meinea, nana Jusiñamui llogacinuai jai inoñedio. ¹² Jaiaruido Jusiñamuidi juez isoi omoimo lloite. Omoi comeciaino iticino diese omoimo lloite. Ie jira marena ñaino. Marena i. ¹³ Ero, omoimo naimie

lloia, jiaie cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiaie cominina birui omoi duenaia, Jusiñamui naie facaise omoina jiai duenaite. Duere sefuillena omoimo lloñeite.

Jusiñamuina cai ñnuamona, diga rafuena cai fnua

¹⁴ Amatai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracinodi naimiena jillotaite? Jillotañeite. ¹⁵ Jiaie rafuedo iena lloiticue. Omoimona daje creyente iniroinia, guille iñenia, ¹⁶ naie creyente omoi dine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? ¹⁷ Ero, Jusiñamui omoi ñnuamona mare rafuena omoi finoñenia, omoi ñnoracino iefede. ¹⁸ Omoimona damie cuemo nibai lloite: “Jusiñamuina raise ñnoticue”. Jai mie cuemo nibai lloite: “Mare rafuena finocabidicue”. Iaimaimo lloiticue: “Jusiñamuina cai raise ñnoia, mare rafuena finocabiticai. Mare rafuena cai finuamona, Jusiñamuina cai raise ñnuana uiñoiticai”. ¹⁹ Dajede Jusiñamuidi illana ñnotio. Iena o ñnuano, mare; iadedi jananiai iena jiai ñnotimaci. Ie jira Jusiñamuina jaciruitimaci. ²⁰ “Jusiñamuina raise ñnoticue” nibai nia raitio. Abina raise nia uiñoñedio. Mare rafue o jiai finoñenia, dama abi o ñnoracinodi iefede. ²¹ ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. ²² Abraham micori ñnote. Mare rafuena jiai finode. Mare rafue naimie finuamona, naimie jai raise ñnote. ²³ Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. ²⁴ Abraham micori rafuemo daje rafuena uiñotica. Dama ie ñnoracino diga jaca bu marebicañede; iadedi Jusiñamuina ñnuano, mare rafuena finuano, marebicaide. ²⁵ Jiaie rafuedo iena lloiticue. Jai e Rahab raillañaño ite. Naiñaño callirediñaño. Mare rafuena finuano, naiñañodi Jusiñamuimona marebicaide. Naiñañodi ie jofomo Josué ie rafuena uiraimaiana feiñote. Naiñaño nairaidi iaimaiana meinellena jenodimaci. Meineñellena, naiñaño iaimaiana reide. Ie mei iaimaiana bainino oretate. Mare rafuena naiñaño finuamona, Jusiñamuimona naiñaño marebicaide. ²⁶ Ero, bumio ie joreño jai iñenia, cajeñede. Ie isoide. Mare rafue bu finoñenia, ie ñnoracinodi iefede.

3

Cai fuiamona jeacinodi comuide

¹ Amatai, omoimona diga comini creyentiana llofuerainina jaiñeno. Jusiñamuidi juez isoi ico lloite. Llofueraini jiaie comini baifemo uiñuamona, Jusiñamui rafuena naimaci eo raise ñnoñenia, Jusiñamui naimacina jiaño baifemo duere finoite. Iese riire naimacimo luana jaciruillano, llofuerainina ailluena jaiñeno. ² Nana caidi diga marañede rafuena finocabidicai. Marañedicinona bu ñañenia, jai marebicaide. Naimie nana ie comeci namarede. ³ Jiaie rafuedo iena lloiticue. Caballos cai jitailla rana finollena, imaci fuemo lloeamona finoca janorede rana joneticai. Ie mei nana caballo ie abina namatadicai. ⁴ Riire aifi aillue botena ñine uiacade; iadedi eo janorede quilla diga, ie jailla dine piloto botena dataoicaide. ⁵ Ie

isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate. ⁶ Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaiacade.

⁷ Nana rana toiredicai; ocainaia, sillinai, ofomaia, eniruemo bicaidino, llicai. Nana toiredicai; ⁸ iadedi jaca bu ie fuena namatanide. Cai fuiai jaca eo marañede. Iemona eo marañede rafue icabite. ⁹ Cai fuiai diga cai Namamo, ua cai Moomo, marecinona lloticai. Caina naimie finuamona Jusiñamuina eruaidicai; iadedi cai fuiai diga naimiena jeare jiai ñaiticai.

¹⁰ Cai fuedi dajede; iade marecinona ñaiticai. Marañedicinona jiai ñaiticai. Amatai, iese cai ñaiñena. ¹¹ Ero, daje pozomona mare jinui, ererede jinui diga, oñedicai. ¹² Amatai, higuera railla riaramona aceitunadi comuiñede. Uvas railla riaramona higo railla riaradi jiai comuiñede. Cuerede jinuiamona mare jinuiña oñedicai. Cai fuiaimona jeacino comuiñellena, cai fuiaina cai namataja.

Ua abi uiñoracino

¹³ Omoimona, ¿bu ua abi uiñote? Naimie ua abi uiñoia, naimie mareña illamona, iena uiñoitomo. Abi iedoño mare rafuena naimie finoia, naimiemo ua abi uiñoracino illana uiñoitomo; ¹⁴ iadedi naimie abi eo uradoia, dama naimiemo ite ramo comeciña facaia, naimie abi uiñoracino diga naimie abina iedoña. Jai tainona llote. Naimie llua isoi iñede. ¹⁵ Naie isoide uiñoracinodi Jusiñamuimona iñede. Bie enirue ie. Comini ie. Taife ie. ¹⁶ Comini abina uradoia, dani naimacimo ite ramo comeciña naimaci facaia, comini uri iñedimaci. Diga marañede rafue naimacimo ite. ¹⁷ Jusiñamuimona ite ua abi uiñoracinodi mare. Bumo ia, uri ite. Riñide. Comeci jinide. Jiaie cominina duenante. Mare rafuena finocabide. Cominina raise nafuete. Abi tainona jifueñede. ¹⁸ Bu uri ia, jiaie cominina uri itatate. Ie jira naimie mareña iite, Jusiñamui jitailla isoi.

4

¿Bue ñellena uri iñedicai?

¹ ¿Bue ñellena fuiriruidomoi? ¿Bue ñellena iciriruidomoi? Omoi comeciñemo marañedicino illa muidona. Omoi comeciñemo marañeno jitaillacino illa muidona. Naie jitaillacino omoi comeciñemo namataacana muidona. ² Rana jitaidomoi. Iena omoi feiñoña jira, naimaci rana fillena, comena meinetomoi. Eo uradoidomoi. Omoi jitailla rana feiñoña jira, fuiridomoi. Omoi jitailla rana Jusiñamuimo omoi jicaña jira, iena feiñoñedomoi. ³ Jiaicaiño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitailla ra feiñoñellena, omoi comeci jaisillena, jicadomoi. ⁴ Jusiñamuina birui raise jitañedomoi; ia naimie dibeimo iñedinona jai jitaidomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Niese iena uiñoñedomoi? Bu naie rafuena isiruillacania, Jusiñamui dibeimo jai iacaiñede. ⁵ Jusiñamui cuetatagafuiaina raise facañedomoi. Naiedi caimo llote: “Jusiñamui omoimo jai fecaca Joreñodi omoi comeciña eo raise namataacade”. ⁶ Caina eo duenalla jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuiaina llote: “Jusiñamuidi abi iedotimiña canoñede; iadedi abi iedotimiña canode”. Naimie dibeimo iacaiñediniena ñaite. Naimie dibeimo iacaiñediniena canuana jiai ñaite.

⁷ Ie jira Jusiñamui anamo omoi i. Naimiena raise omoi ñino. Taife uaina jitañenanona, naimie uaina oni caiño. Ie mei omoi mona naimie oni jaita. ⁸ Jusiñamuina nabaillena, naimie dine iaire omoi i. Ie mei naimie omoi dine iaireno iite. Jeacina finoraini, omoi comeciai iuaillaina meido. Naganomo omoi comeciaina facañeno. Omoi comeciaina marena fino. ⁹ Marañede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino facaina omoi mai sunai. ¹⁰ Jusiñamui dibeimo abina iedoñeno omoi i. Ie mei naimie omoi comeciaina iobtaite.

Jiaño jinafomo jeare ñaiñeno

¹¹ Amatiai, marañede rafuena naimaci finoiadedi, jiaño jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise ñinoñede. Jusiñamui uaina naimie ñinoñenamona, Jusiñamui uaina jiai jamaiñocaide. ¹² Jusiñamuidi marañede rafuena finodimiena duere finoite. Cai jeacina mona caina jillotarede. Cai jeacino facaina caina duere finorede. Ie jira jiaie creyentena jicoñeno.

Ico are caimo suite rafuena uiñoñedicaí

¹³ Jiaie rafuena lloiacadicue. Nibai llotomoi: “Birui jiaie nairaímo jaiticai. Birui cai jaiñenia, ico are jaiticai. Rana fecajamona ucube cai ollena, nainomo daje año iticai”. ¹⁴ Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticai. Dallu bene iticai. Ie mei jai iñedicaí. ¹⁵ Ie muidona omoi llua: “Cai Nama jitaia, nia iticai. Cai Nama jitaia, nie isoide rafuena finoiticai”. ¹⁶ Iena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduadi marañede. ¹⁷ Mare rafuena finuana uiñoñimiedi mare rafuena finoñenia, jeacino jai finode.

5

Ucuberedinomo llucacino

¹ Ucuberedino, daje rafuena omoimo jiaí lloiacadicue. Omoimo ramo jirite. Ja eo duere sefuitomoi. Ie jira cuiri-cuiri ee. ² Omoi raruiaí ja sabite. Omoi mare ñiroi ja sabite, ibuisai guilla jira. ³ Omoi ucube ja ieñeite. Ieñena jira, comini omoi faifillana uiñoitimaci. Abina faifitomoi, iraimo ra boa isoi. ⁴ Ero, ailluena ucube irairuillai iena jai eenotomoi. Naie facaisedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade. ⁵ Omoi illa dinori ailluena raruiaí omoimo ite. Nana omoi comeciai jitailla rafuena finodomoi. Omoi comeci jitailla isoi itomoi. Naie iba ollirui jai ride. ⁶ Maredinona duere finodomoi. Nie isoide rafuena omoimo finoñedimaci. Abina ridoñedimaci; iadedi naimacina meinotomoi. Ie jira Jusiñamuimona ja duere sefuitomoi.

Cai Nama billemo fecuise omoi ocuiri

⁷ Amatiai, cai Nama billemo fecuise omoi ocuiri. Cominidi imaci illimona riana feiñuana sedadimaci. Noci deillemo fecuise ocuirdimaci. Ie mei riana llisillana otimaci. ⁸ Ie isoi cai Nama billemo fecuise ocuiri. Omoi comeciai rucaicuierañeno, cai Nama bille iaire illa jira. ⁹ Duere omoi sefua, Jusiñamui juez isoi omoimo lloi raillano, “Jiaie creyente muidona duere sefuidicue” rañeno. Jusiñamui omoi illana raise uiñoite. ¹⁰ Amatiai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuñedimaci. ¹¹ Naimaci Jusiñamuina faionocañena jira: “Naimaci

comeciadi caimare itimaci” raiticai. Job micorina jiai comecticai. Naimie jaie ite. Naimie eeñeno duere sefuide. Duere sefuide; ia Jusiñamuina faimonocañede. Ie mei ja mudomo nie isoide cai Nama naimiena finuana uiñoticai. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

¹² Cue amatai, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” rait-omoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno; iadedi nie isoide rafuena omoi luamona, uanaicinona jaca llono. Iese llono, Jusiñamui omoina duere finoi raillano.

¹³ Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. ¹⁴ Duidimie ia, naimaci naimieri Jusiñamuimo jillena, creyentiana sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena. ¹⁵ Finuano jiiia, jilloite. Cai Nama naimiena jillotaite. Naimie finoca jeacinona oni jiai dotajite. ¹⁶ Ie jira coninimo omoi marañedicinona llono. Ie mei Jusiñamuimo coniniana omoi jii, omoi duicomona omoi jilloillena. Jusiñamuimo marebicaidimie jiiia, diga rafuena finorede. ¹⁷ Eliana comecitomoi. Jaie ite; ia naimiedi cai isoide. Jusiñamuimo jiiide, noci deñellena. Ie mei daje amani fiemona abimo atomonado jaca deñede. ¹⁸ Ie mei dane jiiide, noci deillena. Ie jira noci deide. Ie mei riarane dane sicode.

¹⁹ Amatai, omoimona damiedi Jusiñamui ie uanaicino dibeimona jaia, dane Jusiñamui dibeimo naimiena bu itataia, eo mare. ²⁰ Iena bu finoia, naimiena ie uañedicinomona itatate. Faifillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santiagodicue.

PEDRO NANO ORETAGA RABE

Tuude cominimo Pedrodi cartana cuete

¹ ¿Nigacino? ¿Nie isoidomoi? Bie carta omoimo oredicue. Pedrodicue. Jiaie cominimotomoto birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. ² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi inollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uifocana mai omoi jai. Jusiñamui omoina uri itatajana uifocana mai omoi jai.

Jesucristo diga jaca cai illemo ocuridicai

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, inocana cai jaillemo jiai ocuridicai. ⁴ Omoi ocurilla-fuedi monamo ite. Faiñitomoi; ia nainomo caimare marena jaca iitomoi. Jusiñamui iese omoina itataite. ⁵ Jusiñamuina omoi inua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uifoitomoi. ⁶ Ieri iobidomoi; iadedi dallu diga rafuemonona duere sefuidomoi.

⁷ Jiaie rafuedo iena lloiticue. Ero, ua oro raise omoi uifollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca inede. Ie isoide. Cristona omoi ua inuana facacillena, diga rafuemonona duere sefuidomoi. Inocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoiri eo iobite. ⁸ Jesucristona jaca cioñedomoi; iadedi naimiena jai isiruitomoi. Naimiena jaca cioñedomoi; iadedi naimiena jai inotomoi. Ie jira eo iocire itomoi. ⁹ Cristona omoi inuamona, jeacinomona jai jillobidomoi. ¹⁰ Jusiñamui facaina lloraini micoriaidi Jusiñamui omoina jai duenaillana jai llotimaci. Jusiñamui omoina jilluana jai llotimaci. Iena naimaci raise cacaiñenia, naiemo comeciaina facauidimaci. ¹¹ Cristo Joreño naimacina uifotajamona, Cristona llotimaci. Cristo duere sefuillena llotimaci. Fiodaillamona naimie jilloillena jai llotimaci. Monamo naimie abido jaillena llotimaci. Bumo iese ico suillena uifoiacaidimaci. Naie facaise illemo comeciaina jiai facaidimaci. ¹² Jusiñamuidi naie rafue naimacimo duifnenana uifotade. Naimacina naie rafue caimo duillana jiai uifotade. Jusiñamui ie Joreñona monamona naimacimo oretajanona, ie uaido naimaci luamona, naimie facaina llorainimona bie mare rafuena birui jai cacadomoi. Jusiñamui jaienisai bie rafuena jiai raise uifoiacaidimaci; ia cai isoi iena uifoiñedimaci.

Naimie jitaillacinona cai finollena, Jusiñamui caina fetode

¹³ Ie jira omoi comeci raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uifoitomoi. Iemo iocire ocuri. ¹⁴ Jusiñamuina omoi nia uifoiñena facaise dani omoi comeci jitaille rafuedo jaisoidomoi. Naimiena omoi jai inua jira, naimiena omoi nia

uiñoñega facaise finoca rafuedo birui omoi jaiñeno. Mare uruiái imaci moo uaina ñnotimaci. Jusiñamui uruiaina omoi jai illa jira, naimie uaina ñno. ¹⁵ Jusiñamui ie uruiaina omoi illena, jai omoína fetode. Naimie mareuilla jira, marena omoi. ¹⁶ Iena naimiedi jai e cuetatate: “Cue mareuidimiena isoi, marena omoi i”.

¹⁷ Cai Moona Jusiñamui illamona, naimiemo birui jidomoi; iadedi juez isoi nagamiemo ico Jusiñamui llua jira, nana omoi ille dinori jaciruicana omoi jai. Nagamiena ie maraiñede finoca rafue diese duere finoite; ia maraiñede rafuena finoñedimiena duere finoñeite. ¹⁸ Omoi einamací rafuedo jai e jaisoidomoi. Naie rafue jamaifue. Naifuemona Jusiñamui omoína jai jillotate. Ibatajamona omoi jeacinomona jillotañede. Ucubedi raire cueruide. Raire cueruide ra diga omoína jillotañede; ¹⁹ iadedi Cristo diruedo naimie dacaiño fiodaillamona, omoína jaca jillotate. Cai comini imaci jeacino facaina mare toica laudana fauidimaci; ia Cristomo jeacino iñena jira, cai jeacino facaina birui dacaiño fiodaite. ²⁰ Caina jilloitallena, enirue nia iñena facaiseconi Jusiñamui Cristona jai e fetode. Naimiema omoi uiñollena, birui bene eniruemo Jusiñamui naimiema oretate. ²¹ Cristo muidona Jusiñamuina ñnotomoi. Cristo fiodaite; ia iemona Jusiñamui naimiema jillotate. Ie mei monamo ie ecimo naimiema dane itatate. Ie jira Jusiñamuina ñnotomoi. Omoi fiodaia, dane jilloillemo jai jai ocuridomoi. ²² Uanaicinona omoi ñnuamona, omoi comeciái jai jeanidimaci. Ie muidona jiaie creyentiaina isiruicana omoi jai. Omoi comeciáimona conini omoi isirui. ²³ Jusiñamui cominina jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iite. Naie uaido naimie cominina jaca iiticaí. ²⁴ Jusiñamui facaina lloraima micori iena jai e cuete:

Nana cominidi raiticiaí isoidimaci.

Safia dallu ebirede; iadedi raiticiaí ie safia diga are iñede.

Ie isoide. Diga rafuena finuanona, dallu iticaí.

Are iñedicaí; ²⁵ iadedi Jusiñamui uai jaca ite

cuete. Naie uaidi mare rafue. Naie rafuena birui jai cacadomoi.

2

¹ Jusiñamui cominina cai illa jira, jiaie cominina gaiñenacinona faínonocai. Nana jifuiacinona faínonocai. Abina caitajacinona feita. Nana abi uradoil-lacinona feita. Jiaie comini joreñona ñaiñeno. ² Ero, raise moonaillena, raise ecairellena, janosa monoi ijina jitaide. Ie isoide. Omoi comeciái raise marena illena, Jusiñamui rafuena jitaídomoi. ³ Cai Nama omoína duenaillana jai omoi uiñuamona, naimie uaina ñnocana jai.

Cristodi jofomo ite nanoca nofici isoide

⁴ Ie cominina raise omoi illena, Jusiñamui rafuena finocana jai. Naimie omoína jai fetode. Naimiemo omoi raise duillana jitaide. Iena omoi raise uiñollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofu nillana tainede. Cristodi naie nanoca nofici isoide. Cai nairai Cristona jai e jitaíñedimaci; iadedi Jusiñamuimona naimie maredimiena jira, Jusiñamui naimiema fetode. Caidi jiaie noficiái isoidicaí. Ie jofona nillena isoillena, Jusiñamui caina fetode. ⁵ Naimiema cai jai ñnua jira, naimie cominina jai jaidicaí. Naimie diga jai atona ñairedicaí. Naimie diga jiaie comini facaina jai ñaicabiticaí. Naimiema cai raise sedallena, Jesucristo

caina canuamona, Jusiñamui jitaillacinona finocana jaidicai. ⁶ Jusiñamui facaina lloraima iena jaie cuela:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiena jai fetodicue. Naimiedi eo mare.

Naimiena inuamona, comini iobitimaci

cuela. ⁷ Naimiena omoi inoia, Jusiñamui omoina iobitaite. Naimiena omoi inoñenia, faifitomoi. Jusiñamui facaina lloraima micori iena jaie cuela:

Jofona finoraini jitaifiena noficidi nana naie jofomo ite noficiai baifemo jai faiga

cuela. Ie isoide. Cai nairai Cristona jitaifede; iadedi Jusiñamui naimieri eo iobide. ⁸ Dane cuela:

Nine naimaci macaria, naie noficimona ecaitaillamona, uaitimaci

cuela. Cristona cuete. Cristo uaina naimaci inoñena jira, Jusiñamui llua isoi faifitimaci.

Pedro Jusiñamui fetocanona llofute

⁹ Jusiñamui jai fetocanodomoi. Naimiemo omoi jai duillamona, naimie diga atona ñairedomoi. Jusiñamui ua cominidomoi. Naimiena omoi nia inoñenia, jeacino anamo omoi illa jira, jitredeinomo itomoi isoidomoi. Naiemona omoina jai jillobitade. Naimie anamo jai omoi illamona, useredinomo jai itomoi isoidomoi. Eo mare rafue omoimo naimie finua jira, iena llocana omoi jai. ¹⁰ Jaie Jusiñamui cominifedomoi; iadedi birui Jusiñamui cominidomoi. Naimie omoina duenaillana jaie uiñofedomoi. Birui iena uiñotomoi.

Pedro Jusiñamui jitaillacinona finocana cai jaillana llofute

¹¹ Cue isirui ganodomoi. Jusiñamui illanomo omoi birui jainaiaila jira, eniruemo jaca ifeitomoi. Eniruemo jaca omoi ifena jira, jeacinona finocana jaiñeno. Jeacino omoi comeaiina namataacana jira, iena eburuiñeno, naie anamo omoi i raillano. ¹² Jusiñamuina inoñedinomo motomo omoi illamona, mare rafuena finocana jai. Omoina birui jeare ñaitimaci; iadedi omoi marena illana naimaci uiñuamona, Jusiñamuina ico naimaci inoia, naimiemo iobillacinona fecaitimaci. ¹³ Cai Namamo omoi duilla jira, illaicomini anamo raise i. Riai diga omoi nanoca illaima uaina ino. ¹⁴ Naimacina omoi illaicomini fetua jira, omoi gobernadores uaina ino. Maraiñede rafue omoi finoia, omoina duere finoitimaci; iadedi mare rafuena omoi finoia, omoi iobitimaci. ¹⁵ Jusiñamuidi mare rafuena omoi finuana jitaide. Iena omoi finua jira, omoina ebena ñaitino uaina llicaitaitomoi. ¹⁶ Jusiñamui anamo cai illamona: “Jiaie illaima uaina inoñeiticai” raiñeiticai. Cai enirue illaima uaina cai inoñenia, jeacinona finodicai. Jusiñamui dibeimo cai illa jira, naimie jitaillacinona finocana cai jailli. ¹⁷ Nana cominimo marena fino. Nana creyentiaina isirui. Jusiñamuina jacirui ocaida ino. Riai diga omoi illaima uaina ino.

Cristo duere sefuilla rafuemon a fueoitica

¹⁸ Patrón anamo damierie itomoi. Omoi patrón ocuica uaina inocana omoi jai. Omoi patrón marena fecuise ocuica, naimie uaina ino. Naimie raire iciria, naimie ocuica uaina jai ino. ¹⁹ Maraiñede rafuena omoi finoñenia, omoi patrón omoina duere finoia, Jusiñamuimo omoi comeaiina facajanona, ibana ofeno. Ibana omoi ofenia, Jusiñamuimona mare. ²⁰ Maraiñede rafuena omoi finoia, omoi patrón mona duere sefuitomoi; iadedi maraiñede rafuena omoi finoñenia, omoi patrón omoina duere finoia, ibana omoi ofenia,

Jusiñamuimona mare. ²¹ Duere omoi sefuia, ibana oñeno. Iese omoi illena, Jusiñamui omoïna fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. ²² Naimiedi marañede rafuena jaca finoñede. Tainona jaca lloñede. ²³ Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoïna ico duere finoiticue” rañede. Naimiedi Jusiñamui naimacina ico raise duere finollena uiñote. ²⁴ Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodicai. ²⁵ Sedañega toica llaudaiai isoi jaie ebena jaisoidicai. Cai sedaraima anamo jai iticai. Naimiedi cai comeciaina jai eenote.

3

Pedrodi inirediñaiñuaina, airedino diga llofuete

¹⁻² Inirediñaiñuai, omoïmo jai lloiacadicue. Omoi iniñiai uaina ñino. Nibai birui Cristo rafuena ñinoñedimaci; iadedi omoi marena illamona, Cristo dibeimo naimacina itataitomoï. Jusiñamui uaina omoi ñnuamona, omoi marena illamona, damierie Cristona ñnoitimaci. ³ Dañaiñorie abina eo finocabidimaci, naiñaiñuaina jiaie comini ebinallena. Naiñaiñuai ifotiena eo finocabidimaci. Eo raifide rana jítacabidimaci. Eo ebirede raifide iniroina jítacabidimaci. Naie isoide ra comeciina marena itatañede; ia Jusiñamui jitaillacinodo jaillamona, comeci marena ite. Jiaie comini omoïna ebinai raillano, iese omoi iñeno; ⁴ iadedi jiaie comini omoïna ebinallena, omoi comeciaini marena fino. Omoi iniñiai uaina oñeno. Naimaci jitailla rafuena fino. Omoi comeciaini iese ia, Jusiñamuimona eo mare. ⁵ Cai jaigai facaise Jusiñamuina ñnotiñaiñuai iese itimaci. Cue birui llofuia isoi, naiñaiñuai abina jaie finodimaci. Naiñaiñuai iniñiai uaina ñnotimaci. ⁶ Iese Sara micori ie ini Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jaia, buena omoi jaciruiñenia, naiñaiño isoi iitomoï. Iemona naiñaiño uruiaina jaitomoï isoitomoï.

⁷ Airedino, omoïmo jai lloiacadicue. Omoi ainiaïmo comeciaina faca. Cai isoi naiñaiñuai marañena jira, naiñaiñuaina isiruillamona, naiñaiñuaina marena raise seda. Jusiñamui omoïna duenaillamona, naimie cominina jai jaidomoï. Omoïna jai jillotate. Omoi ainiaïna omoi raise sedañenia, Jusiñamuimo daajena raise jñnidomoïco.

Cristo dibeimo cai illa rafue

⁸ Daje isoi comeciaini lloicana jai. Coninina duenai. Naga creyentena isirui. Jiaïnona cano. Abina iedoñeno. ⁹ Omoïna jiaie comini duere finoia, ibana oñeno. Omoïna naimaci jeare ñaia, ibana oñeno; iadedi naimaciri marena ñaïno. Mare rafuena cai finollena, Jusiñamui caina fetode. Iese cai jaia, Jusiñamui dinena: “Mare” caina raite. ¹⁰ Jusiñamui facaina lloaraima micori iena jaie cuga:

Marena uri jaca bu iacania, jeare ñaiñeno.
Tainona lloñeno.

¹¹ Jearede rafue finuana faïnonocai. Mare rafuedo jai.

Omoi ecimo itino diga, uri icana omoi jai.

¹² Naimie jitailla rafue omoi finoia, Jusiñamui iena uiñuamona, omoïna raise sedade.

Naimie diga omoi ñaia, iena cacade;

iadedi marañede rafue bu finoia, Jusiñamui naimie diga icirite.

13 Mare rafuena omoi finocana jaja: “Maraiñede rafuena naimaci finua jira, naimacina duere finoitica!” rainidimaci; 14 ia mare rafuena omoi finuamona omoi duere sefuia, Jusiñamui omoína canoite. Omoína duere finodinona jaciruiñeno. Jarire iñeno; 15 ia omoi comeciái jitaillamona Cristona seda. Naimiedi cai Nama. “¿Bue ñellena Cristona ñnotomoi?” omoimo bu jicanoia, uaina raise ono. Fecuisse iciriñeno, uaina ono. 16 Mare rafuena finocana jai. Omoína jiaíno jeare ñaía, mare rafuena omoi finocabillamona meidaitimaci. Omoi marena illamona, tainona naimaci lluana bairenite. 17 Mare rafuena omoi finuamona, Jusiñamui jitaillamona omoi duere sefuia, dama iese duere sefuitomoi; ia maraiñede rafuena omoi finuamona omoi duere sefuia, omoi muidona. 18 Cristomo omoi comeciaina faca. Dacaiño cai jeacino facaina naimie fiodaite. Naimie mareuidimie; iadedi maraiñedino facaina fiodaite. Jusiñamui díbeimo caina itataiacade. Naimiena meinetimaci; iadedi naimie Joreño jaca ite. 19 Ie Joreñodo naimie jaillanona, jaié fiodaitino imaci joreñuai eenoranomo ie finoca rafuena lluaide. Naimaci nia fiodaiñenia, Jusiñamuina jaca ñnoñedimaci; ia Cristo ie finoca rafuena naimaci joreñuaimo lluaide. 20 Jusiñamui rafuena jaié ñnoñedimaci. Noé micori facaise Jusiñamuidi naimaci naimiena ñnuamo fecuisse ocuiride. Jinuimona jillobillena, Noé micori ie balsana finode. Ocho digamie jillobidimaci. 21 Ie isoide. Omoi bautizaia: “Jusiñamui díbeimo jai itica!” llotomoi. “Jecinomona jai jillobidica!” llotomoi. Omoi abimo ite jearenamona jillobiñedomoi; iadedi omoi comeciái jai marena ite. Fiodaillamona Jesucristo jillua muidona, jillobidica. 22 Naimie jillua mei, monamo abido jai jaié. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

4

Jusiñamuimona cai feiñoga uai diga, naga jaié creyentena cai canua

1 Cai isoi naimie illamona, Cristo duere sefuide. Naimie duere sefuide; ia jeacinona finoñede. Duere omoi sefuia, naimie illamo omoi comeciaina faca. 2 Nana omoi ille dinori comini jitaillacinodo jaiñeno; iadedi Jusiñamui jitaillacinodo omoi jai. 3 Jusiñamuina uiñoñedino isoi jaié bie isoide rafuena finouidomoi: Omoi aiñede riñoniai diga isoidomoi. Omoi iniñede iñiaí diga isoidomoi. Jearede rafuena ebiruitomoi. Jifairuidomoi. Jiruana ebiruitomoi. Jusiñamui rairuica jiraraina sedauidomoi. 4 Naie isoide rafuena omoi jai finoñenia, Jusiñamuina uiñoñedínodi omoi ri rajicaidimaci. Omoína jeare ñaitimaci. 5 Iese itimaci; iadedi Jusiñamui uicomoi ico iitimaci. Naimacina duere finoite. Nia fiodaiñedinona duere finoite. Jai fiodaitinona jaié duere finoite. 6 Naimaci nia fiodaiñena facaise, Jesucristo rafuena cacadimaci. Jeacino muidona nana fiodaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

7 Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jillena, iese omoi jai. 8 Coninina isiruicana omoi jai. Omoi isiruillano jaié rafue baifemo faite. Jiaimie diga nicino ia, naimiena omoi isiruillemona, naicinona raire feitaitomoi. 9 Jaié cominina jafueoicaida feiñoñeno; ia caimare feiño. 10 Creyentaina omoi jailla facaise Jusiñamuimona omoi uaina feiñotomoi. Naimie díbeimo omoi maijillena feiñotomoi. Nagamiemo daje isoide uai iñede. Omoi uai diga, naga jaié

creyentena cano. ¹¹ Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesu-cristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaidecua.

Cristo dibeimo cai illamona, duere sefuitica

¹² Cue isiruiganodomo. Eo duere omoi sefuia, rajicaifeno. Creyentiaina omoi jailla jira, duere sefuitomo. Jusiñamuidi Cristona raise omoi inuana facacite. ¹³ Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomo. ¹⁴ Creyentiaina omoi illamona, omoina bu jeare ñaia, caimare omoi i. Iemona Jusiñamui Joreño omoimo illana uiñoitomo. Naimie: “Mare” omoina raite. ¹⁵ Jiaínodi cominina meinetimaci. Rana fidimaci. Marañede rafuena finodimaci. Naimacimo duide rafuena abimo ofeno. Naie isoide rafuena bu finoia, duere sefuie. Iena omoi finoeno. Naie isoide rafuena omoi finuamona omoi duere sefuillana jitañedicua. ¹⁶ Creyentiaina omoi illamona omoi duere sefuia, ieri meiruiño; iadedi creyentiaina omoi illamona, iobillacinona Jusiñamuimo feca.

¹⁷ Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite. ¹⁸ Jusiñamui facaina lloraima micori iena jaie cueda: “Mareuidinodi niadedi jillobiñedinamacimo, ¿niese comeciaina jearedinodi jillobitimaci? ¿Niese marañedinodi jillobitimaci? Nibai jaca jillobiñeitimaci” cueda. ¹⁹ Iena omoi uiñuamona, mare rafuedo jai. Jusiñamui jitaillamona duere omoi sefuia, mare rafuedo jai. Jusiñamui caimo finuana omoi uiñuamona, naimie anamo raise i. Naimie omoina raise eenoite. Ie lloga uaina jaca finoite.

5

Pedro creyentiaina nia llofue

¹ Creyentiaina llofueraini, omoimo rafuena lloiacadicua. Cuedi jiaie llofueraimadicua. Cristo fiodalana ciodicua. Naimie ebire abido bia, jiaie creyentiaie diga iena cioiticua. Iese cue illamona, omoimo lloiacadicua. ² Omoi anamo ite creyentiaina raise seda. Naimacina raise llofue. Jiaimie railla jira, llofueño; iadedi omoi jitailla jira, llofue. Rana ollena llofueño; iadedi iocire llofue. ³ Omoi anamo itinona riire llofueño; iadedi mare rafuedo omoi jaillamona, naimacina llofue. ⁴ Cai creyentiaie nanoca sedaraimadi Cristo. Naimie abido bia, naimiemona ibana feiñoitomo. Naimie diga jaca iitomo.

⁵ Conirueni, omoi llofueraini uaina raise ino. Coninimona abina iedoño. Jusiñamui facaina lloraima micori iese jaie cueda: Bu abina iedoia, Jusiñamuimona marañede; iadedi bu abi iedoñenia, Jusiñamuimona mare. Jusiñamui naimiena duenaite

cueda. ⁶ Iese illa jira, cai Jusiñamui siñona jira, naimie anamo abina iedoño mei raise omoi i. Iemona naimie jitailliruido omoina iobitaite. ⁷ Nie isoide rafue ia, Jusiñamui omoina canocabillana omoi uiñuamona, omoi comeciari jarire finoño. Naimie omoina eenoite.

⁸ Ebona jaiñeno. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide. ⁹ Naimie ra faia uaina inoñeno; ia Cristona inocana jai. Omoi duere sefuilla isoi, nana jiaie creyentiaie duere sefuidimaci. Iena omoi uifnuamona, omoi comeciaie ocuiñocana jai. ¹⁰ Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iiticaie. Dallu birui duere cai sefuia, Jusiñamui cai comeciaina raise finoite. Cai comeciaina raise ocuiñotaite. ¹¹ Illaimana naimie illamona, caina jaca sedade. Naimiemo iobillacino cai fecacabillasa. Iena jitaide.

Naga creyentiaimo carta oria rafue

¹² Silvanona uifnotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise inogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uifnuamona, bie rafuena inocana jai.

¹³ Babiloniamoi ite creyentiaie omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiaie orede. Cristomo naimie jai duilla jira, naimie cue jitona eruaide. ¹⁴ Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uifnocana mai jai. Macaibaite. Pedrodicue.

IE EMODOMO PEDRO ORETAGA RABE

Pedro creyentiaimo carta orede

¹ ¿Nigacino? ¿Nie isoidomo? Bie carta omoimo oredicue. Simón Pedrodicue. Jesucristo dibeimo maijamona, ie rafuena lloticue. Cuen a ore-tajamona, ie lloga uaina finodicue. Cai isoi jai #notomoi. Cai Jusiñamui marena illa jira, Jesucristo marena illa jira, Jesucristo omoina jillotaja jira, jai #notomoi. Jusiñamuimona cai isoi omoi illa jira, bie carta omoi dine oredicue. ² Jusiñamuina omoi uiñuamona, cai Nama Jesús omoi uiñuamona, iaiaiaia omoina duenaillana uiñocana jai. Iaiaiaia omoi uri itatajana uiñocana jai.

Creyentia marena illa rafue

³ Jesús siñona illamona, bene cai marena illena, naimiedi nana rafue caimo jai iga. Naimiena cai uiñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode. ⁴ Naimie iese illamona, eo mare rafuena caimo jai llote. Jiaie rafue baifemo faite. Bie rafue muidona jeacinomona jillobidicai. Cai comeciaia jaie jitailla jira, faificana jaidicai; iadedi naimie rafuena cai #nuamona, naimie illa isoi, icana jaidicai. ⁵ Jesucristona jai #notomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uiñocana jai. ⁶ Jearede rafue finocana jaiñeno; iadedi omoi comeciaina eeno. Iena oculiñocana jai. Jusiñamuina sedacana jai. ⁷ Jiaie creyentiaina isiruicana jai. Nana cominina isiruicana jai. ⁸ Naie isoidicinona jitaidomoi. Iedo omoi raise jaia, cai Nama Jesucristona eo raise uiñocana jaitomoi; ⁹ iadedi iedo omoi jaiñenia, abina nia raise uiñoñedomoi. Omoi jeacinomona jai jilluana jia; jai feitatomoi. Mare rafuena finocana jaillena, omoi jeacinomona jillobidomoi. Iena feitañeno. ¹⁰ Cue amatiaia, naie isoidicinona finocana jai. Iemona Jusiñamui omoina fetuana raise uiñoitomoi. Abido danomo jiaia jaiñeitomoi. ¹¹ Iese omoi jaia, cai jilloitaramana naimie illamona, cai Nama Jesucristo ie illanomo omoina eo marena feiñoite. Nainomo naimie anamo jai iitomoi.

¹² Ie jira bie isoide rafuena diga icaño omoimo lloiticue. Bie rafuena uiñotomoi. Bie rafue uanaicinona jai raise uiñocaidomoi. ¹³⁻¹⁴ Cai Nama Jesucristo cuemo jai llua jira, raire cue fiodaillena uiñoticue. Nia cue fiodañenia, bie rafuena omoimo diga icaño lloiticue. Iese omoimo cue lloia, cuemona mare. ¹⁵ Bie rafue omoi raise nagarui uiñollena, omoina birui canoiticue. Cue fiodaile mei, nagarui bie rafuena omoi feitañenana jitaidicue. Ie muidona bie rafuena jai cueticue.

Pedro Cristona ebirenana jaie cide

¹⁶ Jamai rafue omoimo lloñedicai. Omoina jifueiacañedicai. Cai Nama Jesucristo siñonana lloticai. Naimie abido billena jiaia lloticai. Naimiena ebirenana jaie cidicai. ¹⁷⁻¹⁸ Eniruemo naimie jaie ia, anedu muidomo naimie diga jaidicai. Jusiñamui nainomo jiaia illa jira, naie illano mare. Naie faicase Jusiñamui lluaana cacadicai. Jusiñamui naimiena iobitaiacade. Ebire llote: “Bimie cue isiruiga Jito. Naimieri iobidicue”. Iena jaie cai cuanona, birui naimie siñonana lloticai. ¹⁹ Naiemona Jusiñamui facaina jaie lloraini micoriaia lloga rafue suillena jai raise uiñoticai. Naimaci lloga rafuemo omoi comeciaina faca. Lamparín jitiredinomo llagaiñua isoi, naie rafue cai

comeciaina uanaicinona uifnotade. Monairaicuduna cai cioia, iairei monaille ua illana uifnoticai. Ie isoide. Cristo dane baireia, iena raise uifnoticai. Jusiñamui facaina lloraini micoriai rafuena cai uifnuamona, uanaicinona ua uifnoticai. ²⁰ Biena uifnoticai. Dani comeciaimona Jusiñamui facaina lloraini micoriaidi naimaci lloga uaina llofueñedimaci. ²¹ Dani naimaci comečiai jamai facajamona naie rafuena ofñedimaci; iadedi Jusiñamui Joreño naimacimoi illamona, naimacina iena uifnotajamona, Jusiñamui rafuena jino llotimaci.

2

Pedro tainona llofuerainina llote

¹ Cai jaiagai facaise tainona llofueraini itimaci. Birui ie isoide. Omoi motomo tainona llofueraini iitimaci. Jusiñamui rafuena raise llofueñeitimaci; iadedi naie rafuemona omoina itataiacanitimaci. Naimaci facaina Jesucristo fodaite; iadedi: “Jesucristo cai Nama” raiñeitimaci. Naimaci finolle rafue muidona, raie ebena faifitimaci. ² Naimaci jearede rafuede ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci. ³ Ucube ollena, naimaci tainona llofuiacinodo omoina jifueiacanitimaci; iadedi Jusiñamui ricaillafue anamo jai itimaci. Jusiñamui naimacina ico duere finoite.

⁴ Naimie ecimo ite jaienisaimona damierie jeacino jaie finua jira, Jusiñamui naimacina jai oni dotade. Naimie ricaillafue anamo naimaci jai illamona, naimacimo ite uai jai ifñede. Jitiredinomo jai itimaci. Naimacina duere finoite, nana comini Jusiñamui dne illirui ia. ⁵ Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo llote; iadedi Jusiñamuina inoiacaiñedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. ⁶ Sodoma railla nairai, Gomorra railla nairai diga, Jusiñamuidi bootate. Naimiena naimaci inoñena jira, naimacina fuidode. Naiemona naimiena inoñedinodi fueua. ⁷ Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite. ⁸ Naimaci motomo naimie illamona, nagarui naimaci marañede rafue naimie ciuamona, naimie comeci uri ifñede. ⁹ Naimiena jaie inoñedinona Jusiñamui jai duere finode; iadedi Jusiñamui naimiena inotino ramo faiamona jilloitajana uifnote. Jusiñamui naimiena inoñedinono naimie ricaillafue anamo illana jiai uifnote. Ico naimacina duere finoite.

¹⁰ Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaia jahiruifno jeare ñaitimaci. ¹¹ Jusiñamui jaienisaia uai naimaci baifemo faite; iadedi Jusiñamui illanomo naimaci illamona, bie tainona llofuerainina jeare ñañedimaci. ¹² Ocainaijai abina raise uifnoñena muidona, cai rillena naimacina faticai. Bie tainona llofueraini ocainaijai isoidimaci. Naimaci raise uifnoñega rafuena jeare ñaitimaci. Ocainaijai faifilla isoi, faifitimaci. ¹³ Jiaie cominina naimaci duere finua dinori duere sefuitimaci. Birui ite rafuena nagarui eburuitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci eburuilla jira, raise conini diga nabairinidomoi. ¹⁴ Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise inoñedinona

jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci. ¹⁵ Cristo rafuena fañonocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jiaie lloiacaiñede; iadedi jiaie rafuena llolena, jiaie nairai dine jaide. ¹⁶ Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

¹⁷ Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeciai daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiredinomo jaca iitimaci. ¹⁸ Jamai ñaia diga abina iedotimaci. Uanañede rafuemona, como Cristomo inotinona ramo faitimaci. “Jearede rafue finuana mare” raitimaci. ¹⁹ “Cai jitailla rafuena finoredica” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci. ²⁰ Cai Nama Jesucristo. Naimiedi cai jilloitaraima. Naimiena naimaci jiaie inuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci. ²¹ Cristo rafuena jiaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fañonocaillamona, eo jai fodo jaidimaci. ²² Cai comini iena iese llocabitimaci; “Jico ciciua mei, ie ciciuana dane abido guite. Chanchona cai jocua mei, ie jearede illanomo raire abido jaicabide”. Cristo rafuemona danomo abido jaidinodi daje isoidimaci.

3

Pedro cai Nama Cristo dane billena llofuete

¹ Cue isiruiganodomo. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue. ² Jusiñamui facaina jiaie lloraini micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai llotica. Naimie muidona jillobidomoi. Bie rafuemo omoi comeciai facajana jitaidicue. ³ Biemo nano omoi comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci. ⁴ Jicanoitimaci: “¿Niese Cristo nia abido biñede? Enirue finua facaisemona nana ra daje isoi comuicana jaide. Cai mootiai jai fiodaicana jaidimaci. Cristo jaca biñeite”. ⁵ Iese raitimaci; iadedi iese iñede. Jiaie suide rafuemo comeciaina facaacañedimaci. Jusiñamui jiaie lluaamona, ie uaido mona finode. Enirue jiai finode. Jinuimona iena inuamona, jinuimona eniruedi bairede. ⁶ Jinui diga Jusiñamuidi Noé micori facaie cominina jiaie fuidode. ⁷ Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena inoñedinona iese duere finoite. Ie uai jai llote; ia nia suiñede.

⁸ Cue isiruiganodomo. Biena feitañeno. Ie lloga uai jaca suite. Cai Nama-mona daruidi mil años isoide. Naimiemona mil añodi daruibicaide isoide. ⁹ Damierie comeciai facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiena inuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede. ¹⁰ Firiraima billa

isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite. ¹¹ Bie rafue suillena uiñoticaí. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa. ¹² Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite. ¹³ Naimie jai llua isoi, jiaie mona, jiaie enirue diga illena sedadicaí. Nainomo Jusiñamui jitailla isoi marena jaca iiticaí. Nainomo mare rafue finocana jaiticaí.

¹⁴ Cue isirui ganodomoí. Bie rafue nia suiñena jira, naimie abido nia biñena jira, jeacino finoñeno i. Uri icana omoí i. Iese omoí ia, naimie abido bia, omoína: “Mare” raité. Omoíri iobite. ¹⁵ Raire abido cai Nama biñena, naimiedi comíni naimiena ñnuamo ocuride. Iena uiñoticaí. Cai isirui ga ama Pablo, bie isoide rafue omoímo navui cuete. Cristo naimiena uiñotaga rafue diese cuete. ¹⁶ Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue irirede. Cristo rafuena raise uiñoñedino, Cristona raise ñnoñedino iena tainonana llofuecabitimaci; iadedi iemona faificana jaidimaci. Jiaie Cristona cuegafuiaína tainonana llofuecabitimaci.

¹⁷ Bie rafue birui uiñotomoí. Iena omoí uiñuamona, jearede rafue finocabidino rafuedo jaiñeno. Abido danomo omoí jaiñellena, iemona abina rairui. ¹⁸ Cai Nama cai duenaillana uiñocana jai. Naimiedi cai Jilloitaraima. Naimiena omoí uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

JUAN NANO FUEÑE ORETAGA RABE

Jusiñamui diga cai jaca illena, Juan cuete

¹ Cue uruiaina omoi isoilla jira, omoimo cartana oredicue. ¿Ñie isoidomoi? Nano dofoconi itimiena lloiacadicue. Naimiedi Jesucristo. Jiaie llofueoicagano diga, jaie cai motomo naimie illamona, naimie llofuiana cadacicaí. Naimiena ciodicaí. Naimiena jiai jetadicaí. Caina Jusiñamuina uñtotade. Jusiñamui diga cai jaca illena, jiai caina llofue. ² Jusiñamui dinena billanona, imana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodicaí. ³ Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui jito Jesucristona, cai diga omoi nabaillena jiai jitaidicue. ⁴ Omoi comeciaí caimareficaillena, omoimo bie rafuena cueticue.

Jusiñamuidi jaca mareuidimiena jira, useredinomo ite isoide

⁵ Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, useredinomo ite isoide. Naimie comecidi jaca jeanina jira, jitiredinomo ñede isoide. ⁶ “Jusiñamuina nabaídicaí” cai raia, iadedi jeacínona finocana cai jaia, tainona lloticaí. Uanaicnodo nia jaiñedicaí. ⁷ Jusiñamui jeacino jaca finoñede. Naimie isoi jeacino finoñeno cai jaia, coninina nabaídicaí. Jesucristo fiodaillamona, naimie diaillamona, Jusiñamui cai jeacínona oni dotade. Iena feitate. ⁸ “Caimo jeacino jaca ñede” cai raia, dani cai abina jifueticaí. Uanaicnodo nia jaiñedicaí. ⁹ Naimiemo cai finoca jeacino cai lloia, Jusiñamui cai jeacínona dotaite. Nana cai marañedícínona dotaite. Naimie ñnogamiéna jira, naimie maremiéna jira, iese finoite. ¹⁰ “Omoimo ite jeacino” Jusiñamui llote; iadedi: “Jeacino finocabiñedicaí” cai raia, “Jusiñamui tainona llote” raiticaí. Iemona naimie uaina jai uaitaticai.

2

Cai facaina riidotimiedi Cristo

¹ Cue uruiái isoi cue mamecaomoi. Jeacino finocana omoi jaiñellena, omoimo birui cueticue. Jeacínona omoi finuana jitañedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiéna jira, cai facaina caina riidoite. ² Cai jeacino facaina naimie fiodaite. Iemona Jusiñamui riicaillifue anamona jillobidicaí. Jesucristo cai facaina fiodaite; ia nana comini facaina jiai fiodaite. ³ Jusiñamui llogacínona cai ñnuamona, naimiena cai uñnuana jai uñnoticaí. ⁴ “Naimiena uñnoticue” raitimiedi ie llogacínuaí ñnoñenia, naimiedi tainona lloraíma. Uanaicnona uññoñede; ⁵ ia Jusiñamui llogacínuaína ñnotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uñnoticaí. ⁶ “Cristona nabaídicaí” raitimiedi, Cristo isoi, mare rafuena finoite.

Cristo rafuedo jaidomoi

⁷ Cue isiruiganodomoi. Creyentiaína omoi jailla façaise bie rafuena cadomoi. Ie jira jiaie rafuena birui omoimo cueñeiticue; ⁸ ia naicínona abido dane lloiticue. Cristo iedo jaide. Iedo jiai jai jaidomoi. Jeacino anamo

omoi jaie illamona, jitiredinomo itomoi isoidomoi; ia Cristo rafuena omoi jai uñuamona, useredinomo jai itomoi isoidomoi. ⁹ “Cristo rafuedo jaidicue” raitimiedi jaie creyentena enoia, Cristo rafuedo nia jaiñede. Jitiredinomo naimie nia ite isoide. ¹⁰ Jiaie creyentena bu isiruaia, Cristo rafuedo raise jaide. Iedo naimie jaia, jiaimiēna jeacinona finotañeite; ¹¹ iadedi jiaie creyentena bu enoia, jitiredinomo nia ite isoide. Jeacino anamo nia ite. Uisindimie ie jaillnona raise uññoñena isoi, Jusiñamui dine rillena raise uññoñede. Ie isoi abina uññoñede.

¹² Cue uruiaí isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

¹³⁻¹⁴ Einamaci, Jusiñamuina are omoi jai ñnuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabil-lamona, marañedimienā omoi jai anafefitaja jira, omoimo bie cartana cueticue. Naimiedi Taife. Uruiaí, Jusiñamui uaina omoi como ñnuamona, omoimo bie cartana cueticue. ¹⁵ Omoi ecimo marañede rafuena ebiruiñeno. Iena bu ebiruaia, cai Moo Jusiñamuina isiruiñede. ¹⁶ Cai comeciaino ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruaia diga, abi ieduacinodi Jusiñamui ieñede. ¹⁷ Jusiñamui ieñede rafue jaca fuite. Naie isoide rafuedo jaidinodi jai faifitimaci; iadedi Jusiñamui jitaillacinona finodimie Jusiñamui illanomo jaca iite.

Cristona abi caitadino rafue

¹⁸ Cue uruiaí isoidomoi. Jesucristo abido billirui iaiei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iaiei illana jai uññotomoi. ¹⁹ Cai creyentiaí motomo nano itimaci; ia Cristo díbeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caimona naimaci jailla jira, Cristomo naimaci duññenana jai uññoticaí. ²⁰ Jesucristomona Jusiñamui Joreñona jai omoi feiñua jira, nana omoi Jusiñamui díbeimo ite rafuena jai uññotomoi. ²¹ Ie jira uanaicinona bu llofueia, iena uññotomoi. Uanañedicinona bu llofueia, iena jai uññotomoi.

²² Tainona llofuerañina jaca cueticue. “Cristo cai jilloitaraimañede” llotinodi taino llofuerañi. “Jusiñamuidi cai Mooñede” llotinodi taino llofuerañi. ²³ Cristona ñnoñedinodi Jusiñamuina jai ñnoñedimaci. Cristona ñnotino Jusiñamuina jai ñnotimaci. Jusiñamui Joreño omoimo illamona, iena jai uññotomoi. ²⁴ Ie jira creyentiaina omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jai raise nabaitomoi. ²⁵ Jusiñamui caimo jai llua isoi, naimie diga jaca iiticaí. ²⁶ Omoina damierie jifueiacana jira, bie rafuena jai cueticue. ²⁷ Jusiñamui Joreñona jai feiñotomoi. Omoina Jusiñamui rafuena naimie uññotaja jira, jaie rafuena llofuerañina jai jitaññedomoi. Jusiñamui Joreño uanaicinona omoina uññotacabide. Naimie omoina uññotaja isoi, Cristona nabaicana omoi jai. ²⁸ Cristo íco abido biite. Omoi jacinaiñellena, naimienā omoi meiruiñellena, naimienā birui raise omoi nabai. ²⁹ Jusiñamui maremiēna cai uññuamona, nana mare rafuena finocabidino naimiemo duillana jai uññoticaí.

3

¹ Jusiñamui caina isiruillamona, naimie cominina jai jaidicai. Iemo omoi comeaiaina facajana jitaidicue. Naimiena naimaci uiñoñena jira, Jusiñamuina ñnoñedino cai uiñoğa rafuena jiai raise uiñoñedimaci. ² Ero, birui Jusiñamui cominidicai. Cristo dane bia, cai illena nia raise uiñoñedicai; ia naimie illa isoi cai ico illena jai uiñoticaí. Ico naimiena cai cioillemona, iena raise uiñoticaí. ³ Iemo cai ocuirillamona, naimie marena illa isoi, cai comeai marena itataja. ⁴ Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode. ⁵ Jusiñamui dinena Cristo billanona, imana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino dibeimo naimie jaca iñede. ⁶ Naimiena nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiena nia raise uiñoñede. ⁷ Cue uruiái isoidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoína jifueñellena, abina rairui. Jesucristo jaca maremie. Mare rafuena finocana cai jaia, naimie isoi mareniticaí; ⁸ ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafetailena. ⁹ Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide. ¹⁰ Iemona Jusiñamui dibeimo itinona raise uiñoticaí. Taife dibeimo itinona jai raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jiai duiñede.

Coninina cai isiruilla rafue

¹¹ Creyentiaína omoi jailla facaise: “Coninina isirui” raillana cacadomoi. Jiaie creyentiaína nia omoi isiruiñenia, Jusiñamuimo nia duiñedomoi. ¹² Caín micorimona cai fueua. Naimie ie amana isiruiñena jira, Taife naimiena ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finoñede. Uradoillamona ie amana meinete. ¹³ Ie isoide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinaiñeno. ¹⁴ Cristona nia cai ñnoñena facaise jeacino anamo cai illa jira, Jusiñamuimona fiодaitino isoidicai. Jiaie creyentena cai isirui, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite. ¹⁵ Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede. ¹⁶ Cristomona cai fueua. Naimie jitailla jira, cai facaina fiодaite. Iemona jiaie creyentiaína cai isiruillana uiñoticaí. Ie jira naimaci facaina naimaci ramo jiriñellena fiодaiacaniticaí. ¹⁷ Jiaie creyentiaína cai isiruillamona, naimacina canoiticaí. Omoimo ra ia, jiaie creyentemo ra iñenia, naimiena omoi canoñenia, Jusiñamuina raise isiruiñedomoi. ¹⁸ Cue uruiái isoidomoi. “Jamai uaido jiaie creyentiaína isiruiticaí” cai raiñena; iadedi cai finoca rafuemona naimacina cai canua.

Jusiñamuimo jaciruiñeno jüredicai

¹⁹ Jiaie creyentiaína isiruicana cai jaia, Jusiñamui cominina cai illana raise uiñoticaí. Jusiñamui muidona cai comei uri ite. ²⁰ Cai começimo iticinona uiñoticaí. Siñonamiena jira, Jusiñamui iena jiai uiñote. ²¹ Cai começimo jeacino iñenia, Jusiñamuimo jaciruiñeno jüredicai. ²² Naimie llogacinona cai ñnoia, naimie jitaillacinona cai finoia, naimiemo cai jicaca rafuena birui feiñoticaí. ²³ Naimie Jito Jesucristo cai ñnuana jitaide. Cristo llua isoi, coninina cai isiruillana jiai jitaide. ²⁴ Naimie llogacinuaina cai ñnoia,

naimiena nabaidicai. Caina jiai nabaide. Naimie Joreño caimo illamona, naimie caina nabaillana jai uifoticaí.

4

Juan tainona llofueraínina llua rafue

¹ Omoína isiruiticue. Naga llofueraíma uaina inoñeno. Ailluena tainona llofueraíni birui illa jira, Jusiñamuimona naimaci feiñoga uaina nica naimacina facaci: ² “Jusiñamui dinena Jesucristo billanona, imana jaide” naimaci lloia, Jusiñamuimona naimaci uaina otimaci; ³ ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimieimona naimaci uaina otimaci. Naimie billena jai fididomoi. Comini comeiaina feidocana birui jaidimaci. ⁴ Ero, Jusiñamuimo jai cai duillamona, Jusiñamui caimo ite. Taino llofueraíni díbeimo omoi jaiñena jira, naimaci llofuiana oñedomoi. Naie taino llofueraíni Jusiñamuina inoñedinomo duidimaci. Naimaci ecimo ite rafuena llofuecabitimaci. Jusiñamuina inoñedinomoi naimaci llofuiana ebiruitimaci. ⁶ Jusiñamuimo jai duidicai. Jusiñamuina inotino cai llofuiana cacaacadimaci; ia Jusiñamuina inoñedinomoi cai llofuiana cacaacañedimaci. Iemona Jusiñamui uaina llofueraínina uifoticaí. Iemona tainona llofueraínina jiai uifoticaí.

Jusiñamui caina isiruilla rafue

⁷ Omoína isiruiticue. Coninina cai isiruilla. Jusiñamui caina isiruillamona, caina jainona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci. ⁸ Jusiñamuimo cai duillamona, caina jainona naimie isiruitaja jira, jainona isiruiñedinomoi Jusiñamui rafuena nia uiñofede. ⁹ Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iticai. Ie finoca rafuemonona Jusiñamui caina isiruillana jai uifoticaí. ¹⁰ Jusiñamuina cai isiruillana ñañedicue; ia Jusiñamui caina isiruillana ñañiticue. Cai jeacino facaina fiodaillana, ie Jito eniruemo orede. Iemona cai jeacinaonona feitate. Iemona isiruillana raise uifoticaí. ¹¹ Caina Jusiñamui isiruilla isoi, coninina cai isiruilla. ¹² Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uifoticaí. Naimiena isiruicana jiai jaidicai. ¹³ Naimie Joreño caimo itatajamona, naimiena cai nabaillana uifoticaí. Caina naimie nabaillana jiai uifoticaí. ¹⁴ Bie rafuena jiai uifoticaí. Jusiñamui ie Jitona eniruemo jai orete. Naimiena inoñedinomona jilloitallena, naimiena oretate. Naimie Jitona ciodicai. Ie jira iena birui lloticai. ¹⁵ “Jusiñamui Jitodi Jesús” llotimiedi Jusiñamuina nabaide. Jusiñamui naimiena jiai nabaide. ¹⁶ Ie jira Jusiñamui caina isiruillana uifoticaí. Caina jainona naimie isiruitade. Iedo cai jaillamona, caina nabaide. Naimiena jiai nabaidicai. ¹⁷ Iemona Jusiñamuina isiruicana jaiticai. Naimie uicomoi iconana cai ille facaise naimiena jaciruiñeticai. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñedicai. ¹⁸ Jusiñamuina cai isiruia, naimiena jaciruiñedicai. Eo raise naimiena cai isiruia, ¿niese naimiena jaciruiticai? Naimiena cai jacirua, naimie caina duere finuana jaciruiticai. Jusiñamuina jaciruitimiedi Jusiñamuina nia raise isiruiñede. ¹⁹ Nano Jusiñamui caina isiruilla jira, caidi naimiena isiruiticai. ²⁰ “Jusiñamuina isiruiticue” raitimiedi jiaie creyentena enoia, jai taino llote. Creyentena ciodi; ia naimiena isiruiñede. Jusiñamuina cioñede. ¿Niese ie

cioiñenamiena isiruite? ²¹ Jusiñamui iena caimo jai llote: “Cuenta isiruitimie jiaie creyentena jiaie isiruite”. Ie jira coninina isirui.

5

Taife ie rafuena anafefitacai

¹ Jusiñamuimona Jesús billana cai ñnoia, Jesús cai Jilloitaraimana cai ñnoia, Jusiñamui cominina jaídicaí. Jusiñamuina cai isiruiá, nana naimie cominina jiaie isiruiticai. ² Jusiñamuina cai raise isiruiá, naimie llogacinuaina cai ñnoia, naimie cominina jiaie isiruiticai. ³ Jusiñamuina cai isiruiá, naimie llogacinuaina jiaie jai ñnoticai. Naimie uai raise ñnuamona, iena finollena sefuiruñedicai. ⁴ Jusiñamui dibeimo itinodi Taife ie rafuena anafefitacimaci. Jitona cai ñnuamona, Taife ie rafuena anafefitacai. ⁵ Jesúdi Jusiñamui Jitonana cai ñnuamona, Taife rafuena anafefitacai.

Jesucristodi Jusiñamui Jito

⁶ Jesucristona dane ñaiticue. Naimiedi Jusiñamui Jitona ñnoticai. Naimie bautizajamona, naimie fiodaillamona naimiedi Jusiñamui Jitonana uñnoticai. ⁷ Uanaicnona naimie uñnuamona, Jesucristo bautizaja facaise Jusiñamui Joreño caina iena jiaie uñnotade. ⁸ Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uñnoticai. ⁹ Jesús bautizaja facaise “Jesúdi cue Jito” Jusiñamui caimo llote. Jesúna comini lloia, iena feiñoticaí. Comini llua baifemo Jusiñamui llua faia jira, Jusiñamui llua jiaie ua feiñoticaí. ¹⁰ Jesúdi Jusiñamui Jitonana cai ñnuamona, cai comeciaí daje isoi lloide; ia Jusiñamui ie Jitona llua ñnoñedinodi: “Jusiñamui taino llote” raitimaci. ¹¹ Biena ñaiticue. Jusiñamui naimie diga caina jaca itataiacade. Naimie Jitona cai ñnuamona, iese caina jai itatate. ¹² Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca iñeitimaci.

Jusiñamui caina raise uñnote

¹³ Jusiñamui diga ico omoi jaca illena omoi raise uñollena, bie cartana jai cueticue. ¹⁴ Jusiñamuina cai ñnuamona, naimiena jai jaciruiñedicai. Naimiemo cai jiaie, naimie jitalla isoide rafuena cai jicaia, naimie caina cacajana raise uñnoticai. ¹⁵ Iese cai jiaie, naimie jaca fairiua jiaie uñnoticai. ¹⁶ Jiaie creyente jeacino finuana omoi cioia, naimie facaina Jusiñamuimo jiaie. Iemona Jusiñamui dibeimo naimiena dane itaitomoi. Jusiñamui rafuena jamaidimie facaina omoi jiaie lloñedicue. Naimie faificana jaiacade. ¹⁷ Jusiñamui llogacinona bu ñnoñenia, jeacino jai finode; ia naimie facaina omoi jiaie, Jusiñamui iena feitaite. Faificana jaiacadimie facaina omoi jiaie lloñedicue. ¹⁸ Jusiñamui comini jeacinona finocana jaiñedimaci. Naiemona Cristo caina eenote. Ie jira Taife caina duere finonide. ¹⁹ Jusiñamuimo jai duidicai. Naimie anamo jai iticai; ia naimiena ñnoñedino Taife anamo jai itimaci. ²⁰ Jusiñamui Jito jaiie eniruemo billana uñnoticai. Iemona caina nanoca Jusiñamuina uñnotade. Naimiena cai ñnuamona, nanoca Jusiñamuimo jai duidicai. Jesucristomo jiaie jai duidicai. Ie jira Jusiñamui diga ico jaca iiticai. ²¹ Cue uruiaí isoidomoi. Daje rafuena nia lloiticue. Jiraraimona abina rairui. Jusiñamui ieñede rafuedo omoi jaiñeno. Mai. Juandicue.

JUAN IE EMODOMO ORETAGA RABE

Uanaicinona coninina cai isiruilla

¹ Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiaimo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci. ² Naie uanaicinona cai uiñua jira, omoina isiruiticai. Iena uiñocana jaca jaiticai. ³ Cai Moo Jusiñamui ie Jito Jesucristo diga, caina jaca duenaite. Iaimaia: caina jaca uri itataite. Uanaicinona cai uiñuamona, ia:maia:ina cai isiruillamona, iese iit:icai.

⁴ Caimo cai Moo llua isoi, uanaicinodo o uruiaimona dajerie jailla jira, iobidicue. ⁵ Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñoticai. Coninina cai isiruillana ñaiticue. ⁶ Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui lluacinona cacadomoi. Coninina cai isiruillana cacadomoi.

Diga taino lloraini ite

⁷ Diga taino lloraini illa jira, iena ñaiticue. Jesucristo monamona jai billanona, imana jaiñenana llofuecabitimaci. Bu iese llofueia, cominina jifue. Naimiedi Cristona abi caitadimie. ⁸ Cristo rafuedo omoi jailla jira, Jusiñamuimona buena omoi faifiñellena, omoi abina rairui. Jusiñamuimona ibana feiñotomoi. ⁹ Cristo llogacinona bu fainonocaia, Cristo rafuedo bu jaiñenia, Jusiñamuina ua uiñofede; iadedi Cristo rafuedo bu jaia, cai Moo Jusiñamuina uiñote. Ie Jitona jiai uiñote. ¹⁰ O jofomo Cristo rafuedo jaiñedimie bia, Cristo rafuena cue llofua isoi naimie llofueñenia, naimiena nafueñeno. “Jusiñamui ona canuamona, marena o jai” lloñeno. ¹¹ “Marena jai” o lloia, naimie marañede rafue facaina jai itio.

Rafuena nia lloiacade

¹² Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuridicue. Danomo cai rillamona ñaiticai, cai comeciai caimarecaillena. ¹³ O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

JUAN IE EMODOMO JIAIE ORETAGA RABE

Gayo mare rafue finocana jaide

¹Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uiñua jira, ona isiruiticue. ²Cue isiruigamiedio. Nana o finua rafue marena jaillana jitaaidicue. O ecairenana jiaie jitaaidicue. O comeci marena illana jai uiñoticue. ³Cue dine dajerie creyentiaie bite. Uanaicinodo omoi jaillana llote. Cristo rafuedo omoi jaillana llote. Ie jira iobidicue. ⁴Uanaicinodo omoi jailla jira, eo iobidicue. Cue muidona Cristona omoi inua jira, cue uruiaidomoi isoidomoi. Uanaicinodo omoi jailla jira, eo iobidicue. ⁵Cue isiruigamiedio. Naga icañio jiaie creyentiaina o canoia, eo mare. Nia o uiñoñega creyentiaie o illanomo ria, naimacina o canoia, ua eo mare. ⁶Naie isoide creyentiaina o isiruillana jiaie fididicue. Rollena creyentiaie ofia, ona marena ñaitimaci. Naimaci jaillinomo naimaci jaia, naimacina o canoia, Jusiñamui jitailla isoi, ua eo mare. ⁷Naimie rafue lua muidona, jai macaritimaci. Jusiñamuina uiñoñedinomona jaca buena feiñoñedimaci. ⁸Creyentiaina cai illa jira, naimacina cai canua. Naimacina cai canua jira, uanaicinona llocana jaidecai.

Diótrefes marañede

⁹O dine ite creyentiaimo cartana jai oredicue. Diótrefesna janore ñaiacadicue. Naimiedi eo uicoidimie. Naimiedi cue uaina uiñoiacañede. ¹⁰O dine cue ria, naimie finoca rafuena omoiimo lloiticue. Cuena jeare ñaite. Jiaie illanomona bite creyentiaina feiñoiacañede. Naimaci feiñuana rairuide. Roracomo naimaci bia, naimacina jino dotade.

¹¹Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uiñoñede.

Demetrio marena ite

¹²Nana creyentiaidi Demetriona marena ñaitimaci. Uanaicinodo naimie jaide. Iese naimiena jiaie ñaiticaie. Cai llucinodi uanaicinona uiñotio.

Rafuena nia lloiacade

¹³Diga rafuena cueiacadicue; iadedi cueñeiticue. ¹⁴Raire ona cue cioillemo ocuridicue. Ie mei ñaiticoco. ¹⁵Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

JUDAS ORETAGA RABE

Judadi Jusiñamui fetocanomo cartana orede

¹ Cue nabaiñiai, bie carta omoi dine oredicue. ¿Nie isoidomoi? Judadicue. Ie rafuena lollena, Jesucristo dibeimo jai maijidicue. Jacobo cue ama. Jusiñamui omoïna jai fetuana cue uiñuamona, bie cartana oredicue. Cai Moo Jusiñamui omoïna isiruite. Jeacinona omoi finoï raillano, Jesucristo omoïna jai sedade. ² Jusiñamui omoïna eo duenaillana omoi uiñocana omoi jaillana jitaïdicue. Naimie omoi comeciaina raise uri itatajana omoi uiñocana omoi jaillana jitaïdicue. Naimie omoïna eo isiruillana omoi uiñocana omoi jaillana jitaïdicue.

Tainocinona llofueraini ite

³ Cue isiruigano, omoïmo Jusiñamui caina jai jillotaja rafuena iocire cueia-cadicue; iadedi jiaie rafue birui illa jira, omoïmo cueticue. Jusiñamuimona cai feiñoga rafuena omoi eo riiduana jitaïdicue. Naie rafuena Cristo oretaganomona cacadicaï. Naie rafuena meidonidicaï. Ieconï duide. Jusiñamui jiaie rafuena lloñeite. ⁴ Caimo ite rafuena omoi eo riiduana jitaïdicue. Cai creyentiaï motomo dajerie tainocinona llofueraini illa jira, iena jitaïdicue. Uanaicïnona llofuecana naimaci illamo cai comeciaina facadicaï; iadedi Jusiñamui jitaïllacïnona finoñedimaci. “Jusiñamui caina duenaillamona, jeacino finocana cai jaia, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoiticue” Jusiñamui jaiie llote. Naimie duere sefuillacïno anamo jai itimaci.

⁵ Iemona omoi raise fueollena, bie rafuemo omoi comeciaina faca. Bie rafuena navui llofueticaï. Iena raise cacadomoi; iadedi iena dane uibiño. Iena lloiticue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci iñoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaïllena llote. Iemona naimaci fiodaïtimaci. Ie isoide. Naimiena birui omoi iñoñenia, omoïna duere finoite. ⁶ Ero, bie rafuemona omoi fueua. Jusiñamui ecïmo ite jaienisaimona dajerie imaci illanona jaiie jitaïñedimaci. Naimie isoi iacadimaci. Naimaci illano naimie ecïmo jaiie itimaci. Naimaci jitaïlla rafuena naimaci finollena, naimie ecïmo illana fainonocaidimaci. Iemona naimie naimacina jai oni dotade. Naimie illanomo dane iñeïtimaci. Naimacïmo ite uai jai iñede. Naimie ricaiïllafue anamo jai itimaci. Naimie dine nana comini illirui ia, naimacina duere finoite. Naimacïmona omoi fueua. Jeacinona Jusiñamui dibeimo itïno finoïa, Jusiñamui naimacina duere finoite. ⁷ Ero, bie rafuemona omoi fueua. Sodoma railla nairai micoriaï maraiñedicïnona jaiie eo finouidimaci. Gomorra railla nairai micoriaï dajie isoidimaci. Nainomo ianori ite nairaiï dajie isoidimaci. Naimaci aiñede riñoniaï diga itimaci. Naiñaiñuai iñiñede iñiaï diga itimaci. Coninina aïfiedotimaci. Iemona Jusiñamui naimacina jaiie duere finode. Nana naimaci illanona raise jaiie jobaitate. Naimacïmona omoi fueua. Jusiñamui nana jeacinona finodinona duere finoite.

⁸ Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaia jeare ñaitimaci. ⁹ Miguelna mameciredede jaienici isoi iñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raiacade. Taife diga Moisés micori abina uaitate. Taife Moisés micori abina bairoacade. Miguel iena jiai jitaide. Miguel Taife diga riire ñaite; iadedi Taifena jeare ñañede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”. ¹⁰ Naie taino llofueraini iese iñedimaci. Jusiñamui jaienisaia jeare ñaitimaci. Ocainaiaia imaci comeciaia uiñuacinodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci. ¹¹ Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori diga icirite. Icirillamona Caín micori ie ama micorina jaie meinete. Caín micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai juduaia cominua jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori iñoñena jira, Jusiñamui naimie micorina meinete. Jusiñamui uaina naie taino llofueraini iñoiacaiñena jira, jiai faifitimaci. ¹² Dani omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enrue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riara isoidimaci. Llisilla facaise riara llisiñenia, maraiñede. Riara llisiñenia, iena oni aiñodicai. Maraiñena jira, safenaite. Naimaci maraiñena jira, naie taino llofueraini jiai safenaitimaci. ¹³ Naie taino llofueraini jearede rana finocabidimaci. Eo bagode monaillai isoidimaci. Monaillai eo bagoia, monaillai fuemo jearede rana oni ñaicosite. Ucuaina eruailamona naiona cai macarillana uiñotica; iadedi ucudu ana feia, cai macarillana raise uiñofedicai. Naie taino llofueraini ana fede ucudu isoidimaci. Comini uanaicinona uiñotañedimaci. Naimaci llofuiacinomona Jusiñamui jitailla rafuedo cai raise jaillana uiñofedicai. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

¹⁴ Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisaia diga biite, ¹⁵ nana naimiena iñoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote. ¹⁶ Naie taino llofueraini creyentiaina sedarainina uaitaside. Jusiñamuina jeare ñaoidimaci. Dani naimaci jitailla rafuena finoidimaci. Eo abina biriuidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

¹⁷ Cue isiruiga amatiai, cai Nama Jesucristo oretagano jai llogacinona omoi começi. ¹⁸ Raitimaci: “Jesucristo nia abido biñena facaiseconi naimie uaina iñoñedino jaca iitimaci. Naimaci jearede jitaillacinodo jaitimaci” raitimaci. ¹⁹ Naie taino llofueraini comini comeciai daje isoi lloillana itañañedimaci. Jusiñamui dibeimo iñede rafuena gaidimaci. Jusiñamui Joreño naimacimo iñede.

²⁰ Cue isiruigano, naimaci isoi omoi iñeno; iadedi Jusiñamui rafue iñocana mai omoi jai. Naie rafuedi mare. Jusiñamui Joreño omoïna canuacinodo Jusiñamuimo omoi jii. ²¹ Jusiñamui omoïna isiruillacinona uiñocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenailla jira, naimie ecimo jaca iiticaï. ²² Diga comini naie taino llofueraini rafuedo jaidimaci. Iemona dajerie Jusiñamui uaina raise nia iñoñedimaci. Naimacimo llono: “Mai iño. ²³ Dajerie cominina Jusiñamui duere sefuillacinomona jillote”. Taino llofueraini rafuedo naimaci jailla jira, niadi faiftimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruioicaïda duenaï.

Jusiñamuimo iobillacinona cai fecacabillasa

²⁴ Jusiñamuidi omoïna jeacinona finoñenana itatarede. Naimie uicomo omoïna ico itataite. Omoïna jeacinona omoi jaca finoñedena nainomo itataite. Nainomo iocire iitomoi. ²⁵ Jusiñamuidi jaca dajede. Cai facaina cai Nama Jesucristo fodaillamona, caina cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaïbaite. Judadícue.

JUAN ICO SUILLE RAFUENA CUIAFUE

Jesucristo ico suille rafue luana cueticue

¹ Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo lollena, Jusiñamui naimiena bie rafuena uiñotade. Jaiiruido ico ebena suille rafuena uiñotade. Cuen a iena uiñotallena, iena cuemo lollena, ie jaienici cue dine oretate. ² Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jai jai cueticue. ³ Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iairei illa jira, iemo raise cacarei.

Siete creyentiai illanuaimo bie carta oredicue

⁴ Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaidicue. Iena omoi uiñollena, biena cueticue. Jusiñamui ie Joreño diga, Jesucristo diga, omoina duenaicabide. Omoina uri itatacabite. Iena omoi uiñocana mai omoi jai. Jusiñamui jaiie jaca ite. Birui naimie jaca ite. Ico jaca iite. Ie Joreño naimie abimo illamona, omoina bie rafuena raise cacataite. Iena inotaite. ⁵ Ie Moo uaina raise inuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naimona jillode. Naimie dane fiodañena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade. ⁶ Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaidicue.

⁷ Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaiie meinete nairaidi naimiena cioitimaci. Duere sefuillana jacinaillamona nana comini eecuitimaci. Iese jaca suite.

⁸ Cai Nama Jusiñamui cuemo llote: “Jaca bue nia iñenia, jaiie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iiticue. Siño jitodicue”.

Juan Cristona ciode

⁹ Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iitica. Naimie cai comeciaina ocuiñotajamona iemo birui ocuiridicai. Jusiñamui uaina cue llua jira, Cristo rafuena cue llua jira, duere cue sefuillena, Patnos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci. ¹⁰ Jusiñamuina cue sedajamona, naimie Joreño cuena namatajamona, inñenamona nicarilla isoi cue jinafo dine damie ado lluaana cacadicue. Trompeta isoi ie uaidi ficirede. ¹¹ Cuemo llote:

—O cioacalle rafuena cueno. O cacacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramomo, Sardimomo, Filadelfiamo, Laodiceamo. Dese illanuaimo oreta —llote.

¹² Cuemo llotimiena cue cioillena, jinafo dine erodaticue. Siete oromona finoca lampariniai ciodicue. Naga lamparín ie oromona finoca rairacomo

raide. ¹³ Naie lamparíniai motomo imana eruaidimiena ciodicue. Naimiedi Cristo. Areroina jitade. Oromona finoca cinturóna jitade. ¹⁴ Naimie ifotirai userede iniroi isoi eo userede. Naimie uisi irai boa isoi eruaide. ¹⁵ Naimie eillidi bronze eo dua isoi quenirede. Naimie uai aillue ille tua isoi eo ficirede. ¹⁶ Ie nabeillimo siete ucuduna lliide. Naimie fluemo nagafebei eo jairede loebi ite. Naimie uieco eo quenirede, jitoma eo lligaiñua isoi.

¹⁷ Naimiena cue ciuamona, naimie uicomo fioidaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaie jaca iticue. Ico jaca iiticue. ¹⁸ Jaie fioidaiticue; iadedi naiemona jaie jillodicue. Jaca iiticue. Dane fioidaiticue. Cue uai siñona jira, comini fioidaillirua lloticue. Cuena inoñedino fiodailla mei, naimaci joreñuai illinona jiai lloticue. ¹⁹ O como ciua rafuena cueno. Omo cue ja llole rafuena cueno. O ciolle rafuena jiai cueno. ²⁰ Ailluena rafue omo lloticue. Ona iena uifnotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofueraini isoide. Bie siete lamparíniaidi bie siete illanomo ite creyentiai isoide. Bie creyentiaina ja ñaiacadicue —raite.

2

Cristo Efesomo ite creyentiaimo lloga rafue

¹ Cristo cuemo llote:

—Efesomo ite creyentiaimo lllena, nainomo ite llofueraimamo cue lluaña cueno: “Cue nabeillimo siete ucuduai ite. Siete oromona finoca lamaríniai motomo iticue. Omoína ñaiticue. Omoi llofueraima cue anamo ite. Omoi motomo cue illamona, cuena nabaidomoi. ² Omoi motomo cue illa jira, omoi illana raise uifnoticue. Omoi comeciai ocuiñocana icirñeno itomoi. Marañedicinona finoraini diga nabairiñedomoi. Omoi motomo damierie ‘Cristo oretagacai’ raitinona facaciamona, naimaci tañona llorañina uifnotomoi. ³ Omoi comeciai ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena inocana nia jaidomoi. ⁴ Iese itomoi; iadedi omoi abi rafue cuemona birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi. ⁵ Iemo omoi comeciaina faca. Cue dibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue dibeimo omoi comeciai dane raise iñenia, omoína duere finoiticue. Iemona omoi lamparín oni uiticue. Omoi creyentiaina ñaiticue. Cue dibeimo raise omoi iñenia, jiairuido omoi illanomo creyentiai iñeitimaci. ⁶ Omoína marecinona jiai lloticue. Nicolaítas railla comini finoca rafuena gaiñedomoi. Iena jiai gaiñedicue. Eo marañede rafuena finocana jaidimaci. ⁷ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai inua. Cuena raise inotinomo Jusiñamui illanomo ite riarana iiticue. Ie lillimona jaca iitimaci” cueno.

Cristo Esmirnamo ite creyentiaimo lloga rafue

⁸ Cristo cuemo llote:

—Esmirnamo ite creyentiaimo lllena, nainomo ite llofueraimamo cue lluaña cueno: “Jaie jaca iticue. Eniruemo jaie cue ia, fioidaiticue; iadedi naiemona jai jillodicue. Jaca iiticue. ⁹ Cue cominina omoi illa jira, duere sefuidomoi. Omoi duerenana uifnoticue. Benomo dueredomoi; iadedi Jusiñamuimona duenidomoi. Naimie dine ico omoi ia, buerenitomoi. Damierie omoína jeare ñaiana uifnoticue. Naimacidi judíuai comini; iadedi

cue dibeimo iñediñaci. Taife anamo itimaci. ¹⁰ Ico omoi duere sefuia, jaciruiñeno. Taife cárcelmo omoimona damieriena itataite. Abido danomo omoi jaillena, iese omoina duere finoite. Diez digarui duere sefuitomoi. Omoi ille ñinori cuena ñnocana omoi jai. Duere sefuillamona bu fiodaia, cue diga jaca iite. ¹¹ Jusiñamui Joreñomona cue lloga rafue ite, omoi creyentiañ iena. Bie rafue bu cacajia, iena jiai ñnua. Jusiñamuidi cuena raise ñnotinona naimaci jeacino facaina ibana oñeite. Iraimo faifiñeitimaci; ia Jusiñamui ñine jaca iitimaci” cueno.

Cristo Pérgamomo ite creyentiaimo lloga rafue

¹² Cristo cuemo llote:

—Pérgamomo ite creyentiaimo llollena, nainomo ite llofueraimamo cue llua cueno: “Nagafebei eo jairede lloebi cuemo ite. ¹³ Omoi illana uiñoticue. Taife anamo itino motomo itomoi; iadedi cuena ñnocana ñia jaidomoi. Omoimona Antipas micorina navui meinetimaci. Naimie micoridi cue rafuena raise llofueide. Naie facaise cuena fañnonocaiñedomoi; ¹⁴ iadedi cuemona janore rafue omoi diga birui ite. Omoimona damieredi Balaam micori llofuiañinodo jaidimaci. Balaam micori Balac micorimo jaie llua jira, omoi jaiagai jeacino finodimaci. Balac cominimo omoi jaiagai diga nabairillena llote. Ie jira omoi jaiagai jiraraimo fecaca guillena naimaci diga guitimaci. Iemei naimacimona ainiaina otimaci. Jusiñamuina ñnoñedinomona ainiaina otimaci. Naiemona jearede rafue comuide. Omoimona birui damierie iese isoidimaci. Cuena ñnoñedinomona ainiaina otimaci. ¹⁵ Omoimona damierie nicolaitas railla llofuiañinodo jiai jaidimaci. Naimaci llofuiañinodi uanañediñino. ¹⁶ Naie llofuiañinomona eneno mai omoi i. Iedo jaiñeno. Naie llofuiañinodo jaidinomo: ‘Omoi comeciai iuai dane meido’ llono. Iena naimaci finoñenia, cue dibeimo naimaci raise icaiñenia, cuemo ite lloebi diga cuena ñnoñedinona duere finoiticue. ¹⁷ Jusiñamui Joreñomona cue lloga rafue ite, omoi creyentiañ iena. Bie rafue bu cacajia, iena jiai ñnua. Judiuai jaiagaimo maná railla guille cue illa isoi, cuena raise ñnotinomo monamo jai ite maná isoi iiticue. Biena ñaiticue. Imaci comeciaina ocuiñotajacinona iiticue. Cue cominina naimaci illamona, naimacimo userede noñicina jiai iiticue. Nainomo mameci ite. Dani naiena feiñotino naie mamecina uiñoitimaci” cueno.

Cristo Tiatiramo ite creyentiaimo lloga rafue

¹⁸ Cristo cuemo llote:

—Tiatiramo ite creyentiaimo llollena, nainomo ite llofueraimamo cue llua cueno: “Jusiñamui Jitona cue illanona, bie rafue omoimo lloiacadicue. Cue uisi irai isoi boode. Cue eilli bronce eo dua isoi quenirede. ¹⁹ Omoi finoca rafuena uiñoticue. Jusiñamuina omoi isiruillana uiñoticue. Jiaie cominina omoi isiruillana uiñoticue. Cuena omoi ñnuana uiñoticue. Jiaie creyentiaimo omoi canocabillana uiñoticue. Duere sefuidomoi; iadedi omoi comeciai ocuiñuana uiñoticue. Navui iese icana jaidomoi. Birui bai lliai jaidomoi; ²⁰ iadedi cuemo omoi diga rafue ite. Omoi motomo marañede riño ite. Jezabelna ñaiticue. Naiñaiñona omoi oni dotañena jira, cuemo omoi diga rafue ite. ‘Jusiñamui rafuena jino llua uai cuemo ite’ naiñaiño llote. Uanañedinocina llofuecabilla jira, omoimona damieriena jifueite. Jearede rafuena llofuecabite. Omoi añede riño diga illana llofueite. Omoi ñiñede ñima diga illana llofueite. Jiraraimo fecaca guille guillena llofueite. Iena guilla jira, omoimona damierie naie jiraraña sedade. Iese naiñaiño

llofuecabite. ²¹ Naiñaiño comeci iuai meidollena are sedadicue; iadedi naiñaiño naie jearede rafuena fainonocaiacaiñede. ²² Naiñaiño duere sefullena, naiñaiñona duitaiticue. Naimaci comeciai iuai naimaci meidoñenia, naiñaiño llofuiacinodo jaidinona jiai eo duere finoiticue. ²³ Naiñaiño dibeimo itinona meineiticue. Nana creyentiaidi nana comini comeciai iuaillaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi. ²⁴ Jezabel llofuiacinodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue; ²⁵ iadedi cue nia abido biñenia, cuemona omoi uiñoga rafuena ñnocana mai jai. ²⁶ Cue Moomona cue uaina feñoticue. Cuena raise ñnuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci. ²⁷ Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llaila isoi. ²⁸ Cuena ñnotinomo monairaicuduna jiai iiticue. ²⁹ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cueno.

3

Cristo Sardimo ite creyentiaimo lloga rafue

¹ Cristo cuemo llote:

—Sardimo ite creyentiaimo llollena, nainomo ite llofueraimamo cue lluana cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. ‘Cristona raise ñnoticai’ raitomoi; iadedi omoi comeciaimona raise iñedomoi. ² Cue dibeimo raise dane i. Cuena dane raise ñnocana jai. Cuena jai fainonocaiacadomoi. Jusiñamui omoi finoca rafueri iobiñede. ³ Cue rafuena jai cacajamona, iena ñnotomoi. Iedo dane jai. Omoi comeciai iuaina dane meido. Cue dibeimo dane raise omoi iacaiñenia, ñiriraima bainino billa isoi, omoina duere finollena, ebena biiticue. Omoi ñne cue billiruina uiñoñeitomoi. ⁴ Omoimona damierie jearede rafuena finocana jaiñedinomoi. Jusiñamuiomona naimaci comeciai marena jira, cue ñne naimaci illena, userede ñiroina jitaitimaci. ⁵ Cuena ñnocana jaidinodi userede ñiroina jitaitimaci. Cuemo ite rabenicomona naimaci mameciaina doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaimo iena jiai lloiticue. ⁶ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cueno.

Cristo Filadelfiamo ite creyentiaimo lloga rafue

⁷ Cristo cuemo llote:

—Filadelfiamo ite creyentiaima llollena, nainomo ite llofueraimamo cue lluana cueno: “Mareuidimedicue. Uanacinona jaca lloticue. David micori jitona cue illamona, illaimana cue illa jira, siño uai cuemo ite. Ie muidona cue jitailla diese cominina feñoticue. Jusiñamui illanomo naimaci illena, naimacina feñoticue. Cue jitailla diese cominina feñoñedicue. ⁸ Omoi finoca rafuena uiñoticue. Omoimona cue canua jira, jaca buna cue rafuena omoi lluana itatanide. Jamai bue isoidomoi; iadedi cue rafuena ñnocana jaidomoi. Cuena janoñedomoi. ⁹ Omoi ñne damierie Taife anamo itimaci. Naimacidi judiui; iadedi cue dibeimo iñedinomoi. Tainona llocabitimaci. Ero, omoi ñne naimacina cue bitatajamona, omoina cue isiruillana uiñoitimaci. Cue

dibeimo naimaci jailla mei, cuemo iobillacinona fecaitimaci. ¹⁰ Nana cuena inoñedinona ico eo duere finoiticue. Iemona cuena naimaci inoñenana uñoiticue. Omoi duere sefuiñellena, naie facaisemona omoina jillotaiticue. ¹¹ Eniruemo ebena abido biiticue. Cuemona ibana omoi feiñoñeni raillano, cue dibeimo inocana omoi jai. Cue dibeimo raise omoi jaiñena, cuemona jaiamie omoi facaina ibana feiñoite. ¹² Cuena raise inotino comeciaina ocuiñotaiticue. Cue illanomo jaca iitimaci. Cuemo naimaci duilla jira, cue jiaie mamecina naimaci abimo cueiticue. Jusiñamui mamecina naimaci abimo cueiticue. Jusiñamui illano mamecina naimaci abimo cueiticue. Naimie illanodi comue Jerusaléna mameciredede. Naimiemona, monamona ico ana biite. ¹³ Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai inua” cueno.

Cristo Laodiceamo ite creyentiaimo lloga rafue

¹⁴ Cristo cuemo llote:

—Laodiceamo ite creyentiaimo lllollena, nainomo ite llofueraimamo cue llwana cueno: “Siño Jitodicue. Cue lloga uaina jaca finocabidicue. Ua-naicinona jaca llocabiticue. Cue uaido Jusiñamui nana finode. Nana comuitate. ¹⁵ Omoi finoca rafuena uñoiticue. Cue rafuedo jaillana nia fainonocañedomoi; ia cue rafuedo eo raise jaiñedomoi. Janore inocana jaidomoi. ¹⁶ Omoi finoca rafuena cue gaiñena jira, cuemona omoina oni dotaiticue. ¹⁷ ‘Ucuberedicai’ raitomoi. ‘Raruiairedicai. Nana cai jitailla ra caimo ite’ raitomoi. Cuemona iese iñedomoi. Cuemona dueredomoi; ia iena uñoñedomoi. Cuemona caimare iñedomoi. Cuena omoi raise inoñena jira, uisinidino isoidomoi. Taimiedomoi isoidomoi. ¹⁸ Ie jira omoina dajerie rafuena llofueiticue. Cuemona omoi eo duerena jira, omoi comeciari raise iñena jira, omoimo fiebidicinona cuemo jica. Cuemona ono. Omoi duenillena, cuemona eo mare oro isoide rana ono. Omoi taimieñelle isoifnellena, cuemona omoi meiruiñellena, userede iniroi isoide ra cuemona ono. Omoi uisina cioille isoillena, cuemona manue ono. Omoi comeciaina ñaiticue. Cuena raise omoi inoia, buena omoi comeciaino fiebiñeite. ¹⁹ Cue isiruigano cue dibeimo raise illena, naimacimo riire llocabiticue. Cue uaina naimaci inollena, naimacina jiai duere finocabidicue. Ie jira cue dibeimo raise omoi i. Jeacino omoimo ia, iena fainonocai. ²⁰ Ero, nase tuticue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie diga guiticue. Omoi comeciaina ñaiticue. Cue rafuena omoi cacajia mei, iena omoi inoia, cuena feiñoitomoi. Iemona conini nabaiticai. ²¹ Eniruemo cue Moo jitailla rafuena jaiie cue fuidua mei, naimie ecimo abido jai iticue. Cueri naimie iobillamona, illaimana cue illamona, naimie ecimo jai iticue. Ie isoide. Cuena raise inotino monamo cue ecimo itaiticue. Cue cominina naimaci illa jira, naimacina iobitallena, cue ecimo naimacina nabaiticue. ²² Jusiñamui Joreñomona cue lloga rafue ite, omoi creyentia iena. Bie rafuena bu cacajia, iena jiai inua” cueno.

4

Juan Jusiñamui illanomo ciua rafue

¹ Dallu illanona monamo cue eruaia, jiaie rafuena cidodicue. Nainomo Jusiñamui illanomo econoga nasena cidodicue. Ailli cue diga ñaitimiedi cuena uaidote. Naimie uai trompeta isoi ficiredede. Llote:

—Monamo bi. Jaiiruido sulle rafuena omo acataiticue.

² Jusiñamui Joreño anamo cue illamona, nicairilla isoi Jusiñamui illanona ciodicue. Nainomo naimie ana raillana ciodicue. ³ Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciode. Cornalina railla noficina eruaide. Cornalina jiairede. Naie illano ecimo ameona ciodicue. Ameo mocorena jira, esmeralde railla noficina eruaide. ⁴ Naie illano ecimo veinticuatro rarabici jiai ite. Nainomo userede iniroina jitajanona veinticuatro einamací ana raidimaci. Naimaci ifogimo oromona finoca nuicirai ite. ⁵ Jusiñamui illanomona boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode. ⁶ Jusiñamui illano uicomo vidriona eruaide joraina ciodicue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite. ⁷ Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majañona eruaide. ⁸ Nagamñaimo seis iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotimaci:

Mare, mare, mare.
Cai siño Nama Jusiñamuidi eo mareuidimie.
Jaie jaca ite. Birui ite. Ico jaca iite.

⁹ Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia, ¹⁰ naie veinticuatro einamací Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona, ¹¹ rotimaci:

Cai Nama Jusiñamui, ona eo iobitaicadicaí.
Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidicaí.

5

Juan Jusiñamui illanomo ferinoga rabe illana ciode

¹ Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuela rafue jai ite. Siete nitaca ra illamona, naie rabe raise ibaibide. ² Jusiñamui ie nanoca jaienici ado llua cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

³ Monamo itinomona, enirue itinomona, jai fioidaitinomona, bumio ie uai iñede, naie rabe oni econollena. Naie rabe facanidimaci. ⁴ Jaca bumio naie uai iñena jira, eo eedicue. ⁵ Naie facaise naie veinticuatro einamacimona damie cuemo llote:

—Mai eñeno. Judá nairai ie Leónna mameciredimiedi iena econorede. Naimiedi David micori comini imie. Ie dibeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

⁶ Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreña jai orede. ⁷ Naie

facaise Jusiñamui ie nabellimona naie rabena ote. ⁸ Iena naimie ua mei, naie cuatro cajedino, naie veinticuatro einamaci diga, naimiena sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamui comini jiacino mamecido ite. ⁹ Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fiodailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

¹⁰ Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jairuido eniruemo ite cominina sedaitimaci.

Ie jira naie rabena oni suiñoredio.

¹¹ Iemei dane eruaillamona, naimie ecimo eo ailluena Jusiñamui jaienisaina ciodicue. Naie cuatro cajedino ecimo, naie veinticuatro einamaci ecimo itimaci. Diga illa jira, facanide. ¹² Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiena eo abina uifnotajamona, naimiena jiai iobitaiacadicaí.

Naimiena cai ñnuanona, naimiemo iobillacinona feacaacadicaí.

¹³ Ie facaise nana comini, nana Jusiñamui comuitaga ra diga, lluaana cacadicue. Monamo itino, enirue itino, jai fiodaitino, monaillaimo itino lluaana cacadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca feacaacadicaí. Caina jaca sedallesa.

¹⁴ Naie cuatro cajedino raitimaci:

—Ie isoi jiai lloiacadicaí.

Ie facaise naie Llauda isoidimiena sedallena, naie veinticuatro einamaci ana bitadatimaci.

6

Juan siete nitaca ra oni suiñuana ciode

¹ Toica Llauda isoidimienmo iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi gurua uai isoi lluaana cacadicue. Naimie llote:

—Mai bi.

² Naimie llua mei, userede caballo billana ciodicue. Caballo emodo itimienmo sicuira ite. Illaimana jira, naimie ifogimo nuicirai jide. Ie bacauai anafitallena, oni jaide.

³ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁴ Naimie llua mei, jiairede caballo billana ciodicue. Caballo emodo itimienmo are loebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

⁵ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite. ⁶ Naie cuatro cajedino motomona damie llote:

—Guille raise ifena jira, comini aime gutimaci. Daje kilo trigo ie core darui maijia ua ucube diese raifide. Iemona llomenicono finoia, dacaino guille raifi ite. Tres kilos cebada ie core darui maijia ua ucube diese raifide. Iena damie oia, iemona llomenicono finoia, dacaino amani guille raifi ite. Illimo riaro nia ite; ia iena iballena ucube baiñede. Ie muidona aime gutimaci —llote.

⁷ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁸ Naimie llua mei, liai usereide caballona ciodicue. Ie emodo itimie mamecidi fiodaitadimie. Jusiñamui uai naimiemo illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiaimona fiodaitimaci. Atuedo meinetasiñeite; iadedi eo ailluena meinetasite. Riai uaimona ie cuarta facaina comini fiodaitimaci.

⁹ Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidica” naimaci llua jira, Jusiñamuina inoñedino naimacina meinetimaci. Jai fodaillamona naimaci joreñuai Jusiñamui illanomo jai itimaci. ¹⁰ Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

¹¹ Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meinetimaci. Naimacina meinia mei, ibana oiticue.

¹² Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo jitireficaide. Fivuidi diruena eruaide. Jiairede. ¹³ Riirede aifi riaro ana llutaja isoi, monamona eniruemo ucuai llude. ¹⁴ Ferinoga rabe oni uilla isoi, mona iñebicaide. Naga anedu, naga uiasi diga jiaí oni jaide. ¹⁵ Ie jira illaicomini, jamai bue isoñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu moto reiritimaci. ¹⁶ Anedumo llotimaci. Noficimo llotimaci:

—Caina iballena, cai emodomo ana uai. Jusiñamui ricaiillafuemono caina reirita. Llauda isoidimie ricaiillafuemono caina reirita. ¹⁷ Iaimaiaí ricaiillarui jai ite. Naiemona buna jillobinide —llotimaci.

7

Juan ailluena Israel comini Jusiñamui sello diga nitajana cide

¹⁻² Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiaí beicimo itiaimaiaí. Aifi biñellena itimaci. Ie muidona monaillai dine aifi iñede. Aifi iñena jira, amenaiaí nirañiñede. Eniruena monaillai diga marañeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaímo ado llote:

³ —Eniruenta aifi diga maraiñeno nia finoñeno. Monailaina maraiñeno nia finoñeno. Amenaiana maraiñeno nia finoñeno. Jusiñamui ðibeimo itino uiecuai itofiai sello diga nia cai nitañenia, eniruenta maraiñeno finoñeno.

⁴ Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci. ⁵ Judá micori cominimona doce mil ite. Rubén micori cominimona doce mil ite. Gad micori cominimona doce mil ite. ⁶ Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite. ⁷ Simeón micori cominimona doce mil ite. Leví micori cominimona doce mil ite. Isacar micori cominimona doce mil ite. ⁸ Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

Juan ailluena comini userede iniroina jitajana ciod

⁹ Naie facaise ailluena cominina ciodicue. Ailluena jira, naimacina facadonicue. Naga nairaiaimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite. ¹⁰ Ado llotimaci: Bie Llauda isoidimie jaie fiodaillamona, cai jeacinomona Jusiñamui caina jai jillotate.

¹¹ Naie facaise nana Jusiñamui jaienisai naimie ecimo naidallana ciodicue. Naie veinticuatro einamací ecimo, naie cuatro cajedino ecimo jiai naidaidimaci. Naie facaise Jusiñamui uicomo ana bitadajanona, naimiena sedadimaci. ¹² Raitimaci: Bie comini isoi omo iobillacinona jiai fecaacadicaí. Odi mareuidimedio. Abina eo uifotio. Odi jaca siño jitodio. Ie jira iese lloticaí.

Ona jaca cai iobitajasa.

¹³ Naie facaise naie veinticuatro einamacimona damie cuemo jicanote:

—¿Userede iniroina jitadinodi nímaci? ¿Ninena bitimaci?

¹⁴ Uai oticue:

—Uifioñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina ifioñedino meinegano.

Naimaci iniroina jai jocoritimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiai ñaiticue. Llauda isoidimie fiodailla jira, naimaci comeciái jai jeanide. ¹⁵ Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite. ¹⁶ Dane duere sefuiñeitimaci. Nana naimaci jitaiilla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. ¹⁷ Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eefñeitimaci. Dane sunañeitimaci.

8

Juan Llauda isoidimie iraié nitaca ra oni suiñuana ciod

¹ Toica Llauda isoidimie iraié nitaca ra oni suiñuanona, media hora monamo tii raiñoicaide. ² Iemei siete Jusiñamui jaienicí naimie uicomo illana

ciodicue. Nagamiemo daje trompetana fecade. ³ Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina inotino jiacino Jusiñamuimo jaide. ⁴ Jobaillamona Jusiñamui uicomo a jaide. Nana Jusiñamuimo jiacino diga a jaide. ⁵ Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶ Iemei naie siete jaienici naimaci trompetas fillena llinote. ⁷ Damie ie trompetana fite. Filla jira, monamona janorede hielo, boode ra diga, dirue diga, eniruemo uaide. Atuedo enirue boofede; ia ailluena boode. Riaí uaimona ie tercera facaina boode. Nainomo nana amenaiaí boode. Nainomo nana raiticío boode.

⁸ Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. ⁹ Iemona monaillai diruena jaide. Atuedo iese jaiñede; ia ailluena iese jaide. Riaí uaimona ie tercera facaina diruena jaide. Ie muidona ie tercera facaina lliciaí fiodaite. Nainomo ite botemona ie tercera facaina jiaí anabaite.

¹⁰ Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniaí, ie tercera facaina jorainiaí diga erireficaide. ¹¹ Ie muidona naie ucudu Ajenjona mameciredede. Riaí uai oni dobaiñuamona “Eriredimie”. Iemona jinui erireficaide. Iena jiruamona, ailluena comini fiodaitimaci.

¹² Jiaie jaienici ie trompetana fite. Filla jira, jitoma, fivui diga, ucuaí diga, fuiride. Iemona aremona cuatro horas raise usenide. Naiona cuatro horas eo jitirede.

¹³ Iemei jaienici ado cuirioillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

9

¹ Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. ² Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide. ³ Uilliemona fioduaina eruaillanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduaí eruaidinodi maitimaci. ⁴ Raiticío naimaci guillena, ibena naimaci guillena Jusiñamui rairuide. Naimie jitaila jira, naimie sello diga nitañeganona duere finodimaci. ⁵ Jusiñamui jitaila jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite. ⁶ Iese ico sua, eo duere comini sefuilla jira, fiodaillana jitaitimaci. Naimaci abina meineacanitimaci. Fiodaicanitimaci; ia fiodainitimaci.

⁷ Fioduaí jibaimie dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uecuai cominina eruaidimaci. ⁸ Naimaci ifotie arena illanona, riño ifotiena eruaide. Naimaci

isiduai leones isiduaína eruaide. ⁹Naimaci abiaimo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci. ¹⁰Naimaci omacai acaido isoide. Naie diga maillanona, cinco fivui cominina duere finoitimaci. ¹¹Naimaci illaimadi naie ana ifona sedadimie. Judíuái uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodimie. ¹²Daje duere sefuilla rafue jai fuite. Mena nia suiñede.

¹³⁻¹⁴ Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suiño —llote. ¹⁵⁻¹⁶ Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riai uaimona ie tercera facaina meinetimaci. ¹⁷ Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocorede. Daje facaise borarede. Caballos ifogíai leones ifogíaina eruaide. Naimaci fuemona boode radi, uillie diga, azufre boa isoi jino bite. ¹⁸⁻¹⁹ Naimaci fuemona bite rado ailluena cominina meinetimaci. Ie tercera facaina meinetimaci. Caballos omacai jaiona eruidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

²⁰ Iese ie tercera facaina meinetimaci; ia fiebidino naimaci jeacinomona naimaci comecai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, broncemona, noficimona, amenamona finoca jiraraiaina nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci. ²¹ Conini meinecabitimaci. Aimaniai dine jaicabidimaci. Naimaci aiñede riño, naimaci iniñede ima diga icabitimaci. Rana ficabidimaci. Jeacinona finocana nia jaidimaci.

10

Juan Jusiñamui jaienici, econoga rabenico diga, billana ciode

¹ Ie facaise Jusiñamui illanomona eniruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide. ² Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide. ³ León eo irilla isoi, ado llote. Naie facaise siete gurua ñaia isoidino uai cacadicue. ⁴ Naimaci lluana cacaja mei, iena cueiacadicue; iadedi monamona damie cuemo llote:

—Naie lluana lloñeno. Iena cueñeno.

⁵ Naie jaienici ie nabei onolli mona dine ñuitajanona, ⁶ Jusiñamui llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monaillai nainomo ite ra diga jiai finodio. Cue baifemo o faia jira, uanaicinona cue lluana uiñotio. O lloga uaina jaca suite. ⁷ Iraie jaienici ie trompeta ja fite. Filla mei, bie facaise Jusiñamui ie facaina lloraini

mícoriaimo jaie lloga rafue suite. Comini naie rafue jaie raise cacaiñedimaci; ia iena ja raise cacaitimaci —llote.

⁸ Monamona cuemo ailli llotimie dane llote:

—Jaenici onollimo econoga ite rabenicono llinuai.

⁹ Te jira jaenici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

¹⁰ Llinua mei, iena guiticue. Ciifo isoi naimerede rana cacadicue; ia guilla mei, erirede ra isoi cue jebemo ite. ¹¹ Cuemo dane llote:

—Omo cue llole rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

11

Juan menamie Jusiñamui rafuena lluaa cacade

¹ Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca. ² Cue jofo ecimo ite taibirina facañeno. Naie illano judiuañedinomo jainaiaide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. ³ Naie facaise menamiemo cue uaina iiticue. Iaimaiaí cue llole rafuena daje amani años abimo atomonado lloitiaimaiaí. Comini comeci iuai meiduana iaimaiaí jitailla jira, sunaillamona, ebinide iniroina jitaitiaimaiaí —llote.

⁴ Iaimaiaí mena olivos railla rira mamecido itiaimaiaí. Enirue Namana Jusiñamui illanona, naimie uicomo mena ite lamparin ie rairaco mamecido itiaimaiaí. ⁵ Iaimaiaína duere bu finoacania, naimiena meineitiaimaiaí. Iaimaiaí fueмона boode ra billanona, naimiena meinetiaimaiaí iaimaiaína duere finodino iese fiodaitimaci. ⁶ Iaimaiaí Jusiñamui rafue llole facaiseconi noci deitañellena, iaimaiaímo Jusiñamui uai iite. Jinui diruena jaitallena iaimaiaímo uai iite. Iaimaiaí jitaicabilla facaise, diga isoide rafue finuamona cominina duere finoitiaimaiaí; ⁷ iadedi Jusiñamui rafue iaimaiaí llua mei, eo ana ite ifomona ocañana eruailanona, Taife jino biite. Jino billanona, iaimaiaí diga fuirite. Iaimaiaína anafefitaja mei, iaimaiaína meineite. ⁸ Raiafomo joneñetimaci; iadedi iaimaiaí abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitañena jira, Sodoma jaie ite nairai isoidimaci. Egipto jaie ite nairai jiai isoidimaci. Jerusalémo Jesúsna jaie jiai meinetimaci. ⁹ Raiafomo iaimaiaí joniana rairuitimaci. Darui amani abi atomonado ailluena comini, naga nairaiaimona iaimaiaína jibuisaibitimaci. ¹⁰ Nana eniruemo ite comini iaimaiaí fiodaillari iobitimaci. Iaimaiaímona comini duere sefuilla jira, iaimaiaí jai fiodailla jira, iobitimaci. Rafuena finuanona, dani coninina rana fecaitimaci. ¹¹ Darui amani abi atomonado illanona, fiodaillamona iaimaiaína Jusiñamui dane jillotaite. Ie muidona naidaitiaimaiaí. Nana iaimaiaína ciodino eo jacinaitimaci. ¹² Naie facaise monamona damie iaimaiaína uaiduana cacadiaimaiaí. Llote:

—Bene mai bi.

Ieconí iaimaiaína enoidimacidi uillie motomo monamo iaimaiaí jaillana ciodimaci. ¹³ Naie facaise aillue ñuisaño suide. Ie jira janore facai Jerusalén

goide. Riai uaimona ie décima facai goide. Naiemona siete mil comini fiodaitimaci. Fiodaiñedino jacinai llamona:

—Jusiñamuidi ua siño jito —lloitimaci. ¹⁴ Mena duere sefuilla facaise jai fuite. Nia daje suiñede; ia raire suite.

Juan irai e trompeta fillana cacade

¹⁵ Naie facaise jai e jaienici ie trompetana fite. Monamo itino ado lloitimaci: Jusiñamui, Cristo diga, illaima isoi, eniruemo ite cominina biruimona jaca sedaite.

Naie comini naimie anamo raise itimaci.

¹⁶ Naie veinticuatro einamaci Jusiñamui ecimo illanona, naimie uicomo ana bitadajanona naimiena sedadimaci. ¹⁷ Lloitimaci:

Jusiñamui, cai Nama, omo iobillacinona fecaacadicaí.

Siño jitodio. O jitailla rafuena jaca finodio.

O uaido bie cominina jai sedadio.

¹⁸ Ona naimaci inoñenamona, o diga iciritimaci; iadedi naimacina emodofidio.

Bie facaise jai fiodaitino jillotajamona, ona naimaci inoñena jira, naimacimona ja ibana oitio.

Jearede rafuena naimaci finua jira, naie facaise ona inoñedinona duere finoitio.

O dibeimo maijidino, o facaina lloraini, nana ona inotino omona ibana feiñoitimaci.

Nibai jamai bue isoidimaci.

Nibai jamai bue isoiñedimaci; iadedi omona ibana feiñoitimaci.

¹⁹ Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Iecon boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

12

Juan daje riñona, eo aillue jai o diga, ciod

¹ Naie facaise monamo daje riñona ciodicue. Naiñaiñona cue cuamona, Jusiñamuidi eniruemo itinomo ico suille rafuena cue uñuana jitaide. Naiñaiño iniroidi; jitoma isoi bairede. Naiñaiño eilli anamo fivui ite. Naiñaiño ifogimo nuicirai isoi doce ucuduai ite. ² Jai uruesite. Jocoacana jira, como isirede. ³ Ie facaise monamo jaiimiena ciodicue. Naimiedi Taife. Naimie illamona jiaie rafue suillena uñoticue. Naimiedi eo aillue jaiona eruaidi. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riaí uaimona naimiedi dragón. ⁴ Naimie omacai diga ailluena ucuaína eniruemo ana butade. Riaí uaimona ie tercera facaina butade. Ie uruena gutallena, riño uicomo naidaita naiñaiño jocollena sedade. ⁵ Naiñaiño imana jocode; ia jai naimiena gutañede. Nana nairai naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiena uite. Ie ecimo Jusiñamui naimiena itatate. ⁶ Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

⁷ Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jai fuiridimaci. Jusiñamui jaienisai illaíma mamecidi Miguel. ⁸ Naimaci dinena emodofidimaci. Jai o

ie jaienisaí anafefilla jira, Jusiñamui illanomo naimaci illano jai iñede. ⁹ Eniruemo jaiona eruaidimie ie jaienisaí diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifuate. ¹⁰ Monamo damie ado lluana jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise ñnoñenia, jeacinona bu finoia, Jusiñamui uicomo birui naimie finocabilla isoi, Taife caina llogidoñeite. ¹¹ Toica Llauda isoidimie naimaciri fiodailla jira, naimie rafuena naimaci lluamona, Taifena emodofidimaci. Fiodaitimacina, naie rafuena llocana jaiacadimaci. ¹² Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitimaci. Naimie eo icirite. Nainomo naimie are iñellena uiñote. Naimie icirillamona eniruemo itino eo duere sefuitimaci — llote.

¹³ Eniruemo jaiona eruaidimie dotajamona, naiñaiñona duere finollena, naimiedi imana jai jococa riñona racade. ¹⁴ Naimiemona jilloillena, Jusiñamui mena iaico, majaiño iaico isoi, naiñaiñomo ite. Feianona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide. ¹⁵ Ie facaise jaiona eruaidimie fuemona eo ailluena jinui bite. Ille isoi tote, naiñaiñona corobaitallena; ¹⁶ ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede. ¹⁷⁻¹⁸ Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino ñnotino diga, nana “Jesúmo duidicaí” raitino diga, jobairiacade.

13

Juan mena rirede ocainana ciodo

¹ Naie facaise monaillai fuemo cue naidailanona, daje rirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiaimo Jusiñamuina jeare ñaia mameci ite. ² Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimiedi ie siño uaina fecade. ³ Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicaillamona, nana eniruemo ite comini naimie dibeimo jaidimaci. ⁴ Ocainamo ie uaina aillue jaiona eruaidimie fecaja jira, jaiona sedajana, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofnide.

⁵ Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade. ⁶ Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite. ⁷ Taife uai naimiemo illa jira, Cristona eniruemo ite ñnotino diga jobairite. Naimacina emodofide. Iemona nana comini naga nairaiaimona naimie anamo itimaci. ⁸ Nana Jusiñamui rabenicomu cueñega mameciaí diese ocainana sedaitimaci. Jusiñamuidi naimaci mameciaina naimiemo ite rabenicomu eniruena ña finoñena facaise jaca cueñede; ia Toica Llauda isoidimie fiodailla jira, Jusiñamui

naimiēna #notino mameciaina naie rabenicomo jai cuete. Naimie illanomo jaca illena, naimaci mameciaina cuete.

⁹ Omoi jeforena jira, raise fueollena, bie rafuemo cacarei. ¹⁰ Duere sefuillena, naie facaise cárcelmo Cristona #notinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona #notino comeiaí ocuiñocaida #nocana jailla.

¹¹ Naie facaise jiaie riirede ocaina eniruēmona billana ciodicue. Toica Llauda isoi naimiēmo mena sigai ite. Aillue jaió isoi ñaite. ¹² Monailaimona bite ocaina uai eniruēmona bite ocainamo jiaí ite. Ie uai diga, nana cominina monailaimona bite ocainana sedatate. ¹³ Eo siño rafuena finocabite. Comini cioillena, monamona eniruēmo boode ra ana bitatate. ¹⁴ Siño rafuena finuamona, Taife jitailla jira, eniruēmo itinona jifuate. Iena naimaci sedalena, cominina monailaimona bite ocaina joreño finuana ocuide. Monailaimona bite ocaina lloebi diga navui bofiamona jai jillode. ¹⁵ Joreño finua mei, eniruēmona bite ocaina iena ñaitatate. Iena bu sedañenia, ocaina naimiēna meiniana ocuide. ¹⁶ Nana cominimo naimie númerona cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoiñedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo iñedinomo cuetatate. ¹⁷ Iese bumó iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate. ¹⁸ Iena raise cacaillena, iemo omoi comeciaina faca. Abina uñotimie bie númerona uñoite. Come mamecido iite. Bie númerodi seiscientos sesenta y seis.

14

Juan 144,000 comini ruana cacade

¹ Naie facaise Jerusalémo Sion railla anedu muidomo Toica Llauda isoidimie naidailana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cuela. ² Monamona damie ñaiana cacadicue. Aillue ille surua isoi, eo ficirede. Eo gurua isoi jiaí ficirede. Ailluena comini arpas tailla isoi, naimie ñaiana cacadicue. ³ Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamací nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruēmona naimaci díbeimo iñedinomona jai jillodimaci. ⁴ Bie ciento cuarenta y cuatro mil comini jearede rafuena ebiruiñedinomaci. Llauda isoidimie rafuena #nocana jaidimaci. Llauda isoidimie fiódaiilla jira, eniruēmo itinomona naimacidi nano jillodino Jusiñamui iena, Llauda isoidimie iena. ⁵ Cristo rafuedo jeacinona finocabiñeno raise jaidimaci.

Juan daje amani jaiēniaí rafue lluaana cacade

⁶ Naie facaise mona motomo jaiēnici feiana ciodicue. Naga nairaimo, nana eniruēmo itinomo mare rafuena lluaide. ⁷ Ado llote:

—Jusiñamuina #nuanona naimiēna seda. Naimiēmo iobillacinona feca. Naimiēmo #noñedinona ja duere finoite. Monana, eniruē diga, monaillai diga, ille diga, naimie finua jira, naimiēna seda.

⁸ Jiaie jaiēnici billanona llote:

—Babilonia railla nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamo jaiie itino isoi, Jusiñamuimona duere sefuitimaci.

⁹ Naie facaise jiaie jaienici billanona, ado llote:

—Monailaimona bite ocaimana bu sedaia, ie joreñaona bu sedaia, ie uieco itofemo, ie onollimo ocaina cuetataga ra bumona ia, ¹⁰ Jusiñamui riicailafuemona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci. ¹¹ Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fioidañeno jaca duere sefuitimaci —llote.

¹² Bie rafue suille facaise Jusiñamui lloga uaina raise inuanona, Jesús díbeimo raise illanona, comeciai ocuifocana naimaci jaille.

¹³ Iemei monamona Jusiñamui Joreño llote:

—Biena cueno: “Biruimona Jesúsna inuamona, meineganodi caimare iitimaci. Jesús díbeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feñoitimaci”.

Juan Jusiñamui eniruemo itinona duere finua rafuena cacade

¹⁴ Naie facaise monamo cue eruaia, userede uilliena ciodicue. Uillie emodo Cristo raide. Imana eruaide. Naimie ifogimo oromona finoca nuicirai ite. Ie onollimo jairede lloebi ite. ¹⁵ Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite. ¹⁶ Jaienici llua isoi, ie lloebi diga Cristo cotade. Nana iena finode. Cominina duere finode. ¹⁷ Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite. ¹⁸ Teconi Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimiemo ado llote:

—Jai einailla jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite. ¹⁹⁻²⁰ Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicailafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

15

Juan siete jaienisai cominina duere finoacana ciodie

¹ Naie facaise monamo jiaie rafuena ciodicue. Ieri eo rajicaidicue. Iena cue ciuamona, Jusiñamuidi eniruemo itinomo suille rafuena cue uifuaana jitaide. Siete jaienisaina ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie riicailifue saite.

² Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monailaimona bite ocaimana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona, ³ jai emodofilla jira, Moisés micori ie ruana rotimaci. Moisés

micori Jusiñamui facaina jaie maijuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

—Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

⁴ Cai Nama, nana comini ona jaciruillamona, ona ñnoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

⁵ Jusiñamuina sedajanomo dane eruaidicue. Ie fo iticuartomo cidicue.

⁶ Naiemona siete jaienisai billana cidicue. Nagamie cominina duere finoacade. Eo userede linomona finoca ñniraina jitade. Oromona finoca cinturones naimaci jogobemo jitade. ⁷ Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite. ⁸ Jusiñamui ebirede siño uai illamona, ie sedajanomo uillie eo illana cidicue. Bie siete jaienisaimo ite rafue nia suiñena jira, Jusiñamuina sedajanomo buna fo jainide.

16

Juan eniruemo copas oni totajanona cide

¹ Ie sedajanomona Jusiñamui naie siete jaienisaimo ado llote:

—Cue ricaiillafue omoi copamo illa jira, eniruemo itinona duere finollena, omoi copas oni tota.

² Daje jaienici iena finode. Eniruemo ite cominina duere finode. Monailaimona bite ocaina cuetataganona jiai duere finode. Ocaina joreñona sedadinona duere finode. Naimaci abiaimo jodollaiaina comuitate. Iemona duere sefuidimaci.

³ Iemei jiaie jaienici ie copa oni totajamona, monaillaina duere finode. Nana monaillaidi fiodaitino dirue isoi jaide. Eo jearedena eruaide. Nana nainomo ite cajedino fiodaitimaci.

⁴ Iemei jiaie jaienici ie copa oni totajamona, nana illiai, nana jorainiai diga, duere finode. Diruena jaide.

⁵⁻⁶ Naie facaise nana jinuina sedacabide jaienici llote:

—Jusiñamui, o jaca mareuidimiedio. Ona ñnotinona eniruemo itino meinia jira, o facaina llorainina naimaci meinia jira, naimacina o raise uñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷ Jusiñamuimo caimare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

⁸ Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci. ⁹ Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uñnotimaci; ia naimie dibeimo naimaci comeciai iuaina meidoiacañedimaci. Jeacinona finuana fañonocaiacañedimaci. Naimiemo iobillacinona feacaicañedimaci.

¹⁰ Naie facaise jiaie jaienici ie copamona ie duere sefuillacinona monailaimona bite ocaina sedajano dine totade. Ie muidona nana enirue jitreficaide. Eo duere sefuillamona, comini imaci iifena añitimaci. ¹¹ Duere

sefuillamona, Jusiñamuina jeare ñaitimaci. Naimaci abiaimo ite jodollaiai isirede; iadedi naimaci comeciai iuaina meidoñedimaci. Jeacinona finuana faionocaiñedimaci.

¹² Naie facaise jiaie jaienici ie copamona ie duere sefuillicinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaiai illaicomini, imaci soldaduai diga, ruica dine raise birenitimaci.

¹³ Naie facaise aillue jaio fuemona, monaillaimona bite ocaina fuemona, naimie facaina lloraima fuemona, daje amani jananiai billana ciodicue. Nagamiemona daje janaba bite. Nai jananiai jerocina eruai. ¹⁴ Taifemona bite. Siño rafuena finocabite. Nana illaicomini, imaci soldaduai diga uaidol-lena, naimacina oreite. Danomo ofillena illaicomini uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uiñoitimaci. ¹⁵⁻¹⁶ Armagedón railla illanomo ofitimaci. Naie illano mamecidi judíuai uai mameci. Ieconí cai Nama cuemo lote:

—Fíriraíma isoi ebena biiticue. Cue billemo ocuridimie iocire iite. Cue billemo naimie ocuria, cue bia, naimie cue jitaillacinona finuamona, naimie meiruñeite.

¹⁷ Naie facaise jiaie jaienici jafaici dine ie copamona ie duere sefuillicinona totade. Ieconí ie sedajanomona Jusiñamui llote:

—Bie duere sefuillicino diga, cominina cue duere finoacanacino ja fuite.

¹⁸ Ieconí boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona íese ñuisaño jaca suiñede. ¹⁹ Iemona nanoca nairaí illano daje amani facaina goide. Nana jiaie illanuai jiaí goidimaci. Jusiñamuidi Babilonia railla nairaina raise uiñuamona, nana ie riicaillafuemona iena eo duere finode. ²⁰ Naie ñuisañomona naga uiasi jai cioiñena. Naga anedu jiaí cioiñena. ²¹ Monamona noci deilla isoi, hielo jiaí ana jurude. Naga hielo cuarenta kilos níbaí merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

17

Juan eo marañede riñoa duere sefuillana ciode

¹ Naie facaise naie siete copas diga ite jaienisaímona cue dine damie billanona cuemo lote:

—Cue diga bi. Eo marañede riño duere sefuillana omo acataiticue. Monailai emodomo naiñaiño jai raide isoide. Naiñaiñodi nanoca nairaí illano mamecido ite. Nana illaicomini naie nairaí anamo itimaci.

² Naiñaiñoa sedajamona, naiñaiño diga, illaicomini jearede rafuena finocabidimaci. Naiñaiñoa nabaillamona, eniruemo ite comini jearede rafuena eo eburitimaci —llote.

³ Nicairilla isoi, jaienici cue joreñoa uillanona, jofue iñenanomo cue joreñoa uite. Eo jiairede riñede ocaina emodomo naie riño raillana ciodicue. Jusiñamuina eo jearede ñaiacino ocaina abímo eo ite. Ocainamo siete ifogiai ite. Diez sigai jiaí ite. ⁴ Naie riño jiduirede iniroi, jiairede iniroi diga jitade. Eo raífide quenirede ra diga, naiñaiño abí eo finobide. Dajerie ra oromona finoca. Dajerie perlas railla ramona finoca. Ie diga ie abí eo finobide. Naiñaiño onollimo oromona finoca copana uite. Nainomo eo marañede jearede rafuena finocana uite isoide. ⁵ Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodicue. Cuemona eo jearede rafue comunicana

jaicabide. Cue muidona comini jearede rafuena finocabide”. ⁶ Naiñaiñodi ailluena Jusiñamuimo duidinona, ailluena ua Jesúna inotinona meinetajana eo ebiruite. Naiñaiñona cue cioia, eo rajjicaidicue. ⁷ Jaienici cuemo jicanote:

—¿Bue ñe rajjicaidio? Naiñaiñomo ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue. ⁸ Naie ocaina navui ite; ia birui jai iñede. Ico enruemona, eo ana ite ifomona, dane biite; iadedi faifite. Ieri Jesucristona inoñedino rajjicaitimaci. Jesucristona naimaci inoñena jira, monamo Jusiñamuidi ie rabenicomo enruena nia finoñena facaise naimaci mameciaina jaca cueñede. Naimie illanomo jaca iñeitimaci. ⁹ Ocaina rafuena omo ja lloiticue. Jusiñamui ona uifotajanona iena cacaitio. Bie siete ifogidi siete anedu mamecido ite. Riño nainomo raide. ¹⁰ Ie siete ifogidi siete illaicomini mamecido ite. Naimacimona cinco illaicomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dallu sedaite.

¹¹ Ifomona bite ocainana dane lloiticue. Cominina jiai sedaite; ia bie siete illaicomini sedajacinomo duite. Cominina naimie sedaja mei, naimie faifite. ¹² Ie diez sigaidi diez illaicomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci. ¹³ Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci. ¹⁴ Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiema jira, naimacina emodofite. Ie cominina naimie fetode. Naimiema inotimaci. Jai emodofitimaci —llote.

¹⁵ Jaienici nia llote:

—Riño monaillai emodomo raillana ailli cidio. Monaillaidi nana comini mamecido ite. Naga nairai mamecido ite. ¹⁶⁻¹⁷ Naie diez illaicominidi, ocaina diga riñona enoitimaci. Naiñaiñona duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño iniroina oni dotatajanona, naiñaiño taiñaiñona iite. Naiñaiñona meineitimaci. Ie llicisina riitimaci. Ja muidomo iraimo naiñaiñona dotaitimaci. Iese naiñaiñona duere finuanona, naiñaiñona fuidoitimaci. ¹⁸ Bie riñodi nanoca nairai illano mamecido ite. Naie nairai anamo nana enruemo ite illaicomini iitimaci —llote.

18

Juan Babilonia railla nairai illano goilla rafuena ciodo

¹ Ie facaise monamona jiaie jaienici ana billana cidicue. Naimie uai siño. Naimie uai siñona jira, enruena lligaiñote. ² Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai iñedimaci. Nainomo Taife jaienisai birui itimaci. Jananiai nainomo birui itimaci. ³ Nia goiñenia, bie nairai jeacinona eo finuamona, nana nairai iena ebiruitimaci. Bie nairaina nabaillamona, nana illaicomini jearede rafuena jiai finocabidimaci. Jearede rafuemona nana rana fecaraini bie nairaimona ailluena ucubena ganacabidimaci —llote.

⁴ Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i.

⁵ Bie nairai jeacino eo finocana jaidimaci; iadedi iena Jusiñamui uifnuamona,

naimacina jai duere finoacade. ⁶ Jusiñamui, naimaci finua diese ibana ono. Naimacina ua eo duere fino. ⁷ Jeacino finuamona iobidimaci. Iemona abi iedotimaci. Jeacino finuana eo ebiruitimaci. “Illaicomindicai. Nana cai jitailla ra caimo ite. Feciño isoi duere jaca sefuiñeticai” comeciaina facadimaci; ⁸ iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fiodaitimaci. Naimaci jofue booite. Jusiñamui siño jitona jira, naimacina raire fuidoite —lote.

⁹ Bouamona uillie naimaci cioia, sunaillamona, naie nairai diga nabairite illaicomini eo eeditimaci. ¹⁰ Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

¹¹ Naimaci rana naie nairai jai oñena jira, rana fecaraini eo sunaillamona eo eeditimaci. ¹² Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabriciai, elefante sigainiai, jofona nille ra, bronce, lloeona, mare nofici, ¹³ guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci. ¹⁴ Sure illamona lloitimaci:

—Caimona omoi comeciiai jitailla rana ja oñeitomoi. Omoi ebiruiga rana ja oñeitomoi.

¹⁵ Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eeditimaci. Sunaitimaci. ¹⁶ Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca rana eo ebiruitimaci; ¹⁷ iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijuuidino diga, nainomo jaidino diga, botedo rana fecaraini diga, ¹⁸ aaremona uilliena ciuamona, naie nairai bouana fidiano, lloitimaci:

—Naie nairai nana jiai nairaiiai baifemo navui faite. Jiaie nairai ie isoi ebinide.

¹⁹ Sure illamona, naimaci ifogimo imuicina faianona, eeditimaci. Lloitimaci: —Bie nairai eo duere sefuide. Bie nairaimona boteredinodicai navui ailluena ganadicai. Bie nairai jai raire fuite.

²⁰ Naie facaise monamona damie lote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹ Naie facaise jiaie jaienicimo siño uai illanona, eo aillue nofici llinuanona, monaillaimo iena faite. Lote:

—Bie nofici dane cai cioñena isoi, Babilonia railla nairai dane iñeite. Jusiñamui iena eo riire fuidoite. ²² Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberñeite. Llomenicono finollena, buna dane maijiñeite. ²³ Nainomo naiona lamparñiai dane booñeite. Rafue dane iñeite. Eo caimare iobitaja rafue dane iñeite. Iraisiñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira,

ailluena nairaiaina navui jifuecabidimaci. ²⁴Naie nairai ailluena Jusiñamuina ñnotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

19

¹Je facaise monamo eo ailluena comini ado lluana cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi siño jitodio.

²O anamo itinona raise uñuamona, uanaicinona o uñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade;

iadedi iba jai otio.

³Iemei dane llotimaci:

—Ona cai iobitajasa. Duere sefullena, naie nairai jaca boode. Naimaci jaca duere sefuitimaci —llotimaci.

⁴Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiena sedadimaci. Llotimaci:

—Omo! llucino mare. Ie isoi jai lloiacadica. Jusiñamuina cai iobitajasa.

⁵Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiena ñnotino naimiena iobitajasa.

Jamai bue isoidino naimiena iobitajasa.

Jamai bue isoiñedino naimiena iobitajasa.

Juan Toica Llauda isoidimie aina ua rafuena cacade

⁶Naie facaise monamo eo ailluena comini lluana cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

⁷Eo iobidica. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

⁸Mare iniroi naiñaiño jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini

diga, naimie caimare jaca iite. Naie mare iniroidi, Jusiñamui jitaillacinona finuamona, naimie ñnotino imaci mare finoca rafue isoide.

⁹Jaienicí cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”. —Iemei llote:

—Jusiñamui iena lua jira, uanaicinona omo lloticue.

¹⁰Jaienicí uicomo eillimo ana bitadaticue, naimiena sedallena; ia cuemo llote:

—Dama ite. Cuenas sedaño; ia dama Jusiñamuina seda. Jesús ie dibeimo itinona uanaicinona jai uñotade. Ie jira naga o diga naimiena ñnotino isoi, Jusiñamui facaina jai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

Juan userede caballo emodomo itimiena cide

¹¹ Naie facaise mona ecorillana ciodicue. Nainomo userede cabalona ciodicue. Naie emodomo itimiemo mena mameci ite. Inogamiēna mameciredē. Uanaicinona Llocabitimiēna jiai mameciredē. Naimacina raise uñuamona, naimie dibeimo iñedinona duere finollena, naimaci diga jobairite. ¹² Naimie uisidi irai isoide. Illaimana jira, naimie ifogimo ailuena nuicirai ite. Naimiemo cuega mamecina buna uñofēde. Dama naimie iēna uñote. ¹³ Naimie jitaca iniroi ie dibeimo iñedino diruemo mutaca. Jusiñamuina naimie uñotaja jira, Jusiñamui Uairedimiēna mameciredē. Naimiedi Jesucristo. ¹⁴ Naimie jinafona soldaduai isoi Jusiñamui facaina itino monamona billana jiai ciodicue. Eo mare userede jeanide iniroina jitaðimaci. Userede caballuai emodomo itimaci. ¹⁵ Eniruemo ite nairaiaina emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riicallifue anamo itinona eo duere finoite. ¹⁶ Naimie iniroimo, naimie idaimo jai cuega: “Nanoca Illaima. Nanoca Nama”.

¹⁷ Naie facaise jaiēnici jītoma lligaiñuanomo ciodicue. Nana inoniaina uaidote:

—Llicisina mai riabi. Jusiñamuidi ailluena cominina ja meiniamona rille eo iite. ¹⁸ Naimacina emodofillamona, ailluena llicisi ja iite. Ailluena cominina ja meineite. Illacomini itimaci. Soldaduai illacomini itimaci. Caballuai itimaci. Caballuai emodomo jaicabidino itimaci. Diga comini ite. Jamai bue isoidino itimaci. Jamai bue isoifedino itimaci. Patrones anamo itino itimaci. Patrones anamo iñedino itimaci. Naimaci llicisi mai riabi —llote.

¹⁹ Naie facaise monaillaimona bite riirede ocainadi enirue illacomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci. ²⁰ Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreña sedadinona jifuecabite. Naie iaimaiaina gaitaja mei, eo boode iraimo iaimaiaina cajena dotadimaci. Azufre boa isoi irai boode. ²¹ Caballo emodomo itimiedi ie fuemo ite lloebi diga iaimai ai soldaduaina meinete. Jaiēnici llua isoi, inoniai naimaci llicisina ritimaci. Iemona eo monidimaci.

20

Juan mil años Taife maiana ciodē

¹ Naie facaise monamona jaiēnici billana ciodicue. Eniruemo eo ana ite ifo llave naimiemo ite. Aillue lloeo ie onollimo ite. ² Aillue jaiona eruaidimiēna gaitade. Naimiedi Taife. Ri ai uaimona Satanás. Jiaici dragón. Mil años iese illena lloeo diga naimiēna maite. ³ Ana ite ifomo naimiēna dotade. Llave diga ifona ibaide. Cominina ramo fañellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiēna jino oretaitē, cominina ramo faillena.

⁴ Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamai duere sefuillicinona lloitimaci. Ie facaise jai meineganona jiai ciodicue. Eo duere sefuilla facaise “Jesús cominidica!” naimaci llua jira, Jusiñamui uaina naimaci llua jira, naimaci ifogiaina jaitajanona, naimacina meineganodimaci. Monaillaimona

bite ocainana sedañedimaci. Ie joreñaona sedañedimaci. Ie cuetataga ra naimaci uiecomo, naimaci onollimo iñede. Navui fiodaitimaci; ia iemona bie facaise jai jillobitimaci. Imaci abiai diga Jusiñamui naimacina jillotaite. Cristo diga mil años eniruemo itinona sedaitimaci. ⁵ Naimacidi nano jillodino. Naie mil años nia fuiñenia, jiaie jai fiodaitino nia jilloñeitimaci; ia mil años fuilla mei, jilloitimaci. ⁶ Nano jillodino caimare marena iitimaci! Dane fiodaiñenamona Jusiñamui illanomo jaca iitimaci. Faiññeitimaci. Cominina sedajanona, comini Jusiñamuina raise uiñollena, comini Cristona raise uiñollena, naimacina canoitimaci. Cristo diga mil años naimacina sedaitimaci.

⁷ Bie mil años fuilla mei, Jusiñamuidi ana ite ifomona Taife jino oretaite. ⁸ Nana eniruemo ite nairaiaina jifuiabite. Gog railla illaicominina, Magog railla nairaii diga, jifueite. Naimaci nairaiaina ofitaite. Eo ailluena naimaci illa jira, conilliena cai facadonina isoi, naimacina facadonidicue. Jusiñamuina inotino diga jobairillena, ofitimaci. ⁹ Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruiğa nairaina, ciribitaitimaci. Naie facaise monamona boode ra billanona, jobairiacadonina fuidoite. ¹⁰ Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaie dotade. Naimie facaina tainona lloraime jaie dotade. Nainomo ua jaca duere sefuitimaci

Juan aillue rairabicina cide. Nainomona Jusiñamui duere finollicinona llwana cacade

¹¹ Naie facaise aillue userede rairabicina ciodicue. Illaimana naimie illamona, nainomo Jusiñamuina jiai ciodicue. Naimie siño illamona, mona enirue diga jai iñede. ¹² Naie facaise Jusiñamui uicomo nana fiodaitino naidailana ciodicue. Jamai bue isoñedino itimaci. Jamai bue isoidino itimaci. Naimacimo juez isoi Jusiñamui llollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cuela. Iemei Jusiñamui jiaie rabenicono jibuide. Naimie diga jaca ille comini mameciai nainomo jai cuela. Naimaci mameciai nainomo iñenia, naimaci finoca rafue diese Jusiñamui naimacimo duere sefuillena lote. ¹³ Monaillaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite. ¹⁴ Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci. ¹⁵ Monamo ite rabenicomo cueñega comini mameciai diese itinona iraimo dotaite.

21

Juan comue monana, comue enirue diga cide

¹ Birui ite mona, birui ite enirue diga jai iñede. Monaillai jiai jai iñede. Iemei comue mona ciodicue. Comue eniruena jiai ciodicue. ² Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede. ³ Jusiñamui illanomona damie ado lloite:

—Comini motomo Jusiñamui illano jai ite. Naimaci diga naimie iite. Naimie comininitimaci. ⁴ Naimaci illanomo naimie iite. Naimacina naimie nabaiillamona, naimie jitaila jira, naimacina caimadoite. Dane eñeitimaci. Fiodaiñeitimaci. Sunaiñeitimaci. Duere sefuiñeitimaci. Birui ite rafuemo comechiaina naimaci nainomo facañena jira, ie facaise sunaiñeitimaci —lote.

⁵ Jusiñamui llote:

—Ero, nana ra comuena birui finoiticue. Cue llucino uanaicinona jira, cue llucinona cue finua jira, bie rafuena cueno.

⁶ Iemei cuemo llote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeciai eo caimare itataiticue. Ibatañeno cue diga illena, naimacina jaca itataiticue. ⁷ Cuena raise inotinona iese itataiticue. Jaca naimaci Jusiñamuiniticue. Naimaci jaca cue cominitimaci. ⁸ Jiaño jaca eo boode iraimo jaca iitimaci. Azufre boa isoi irai boote. Naiemona jaca jilloñeitimaci. Cuemona eneno jaca iitimaci. Diése nainomo iitimaci: abido danomo jaidino, cuena raise inoñedino, jearede rafue finocabidino, cominina meinotino, añede riño diga icabitino, inñede iima diga icabitino, aiñiaia, jiraraina sedacabidino, tañona llocabitino —llote.

Juan comue Jerusaléna llote

⁹ Naie facaise naie siete jaienisaïmona damie cue dine bite. Naie jaienisaïmaci copamo cominina duere finollicinona navui ite isoide. Naimie cuemo llote:

—Cue diga mai bi. Iima ie aina jai ua isoi, Toïca Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

¹⁰ Nicairilla isoi, Jusiñamui Joreño cue joreñoa eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare. ¹¹ Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruailla jira, enefebecodo cide. ¹² Ie llaigafo eo a ite. Eo jedaciede. Doce nasiaï ite. Naga nasemo daje jaienici ite. Israel micori uruiaï mameciaï naie nasiaïmo cuega. Doce uruiaï illa jira, naga naserie daje mameci cuega. ¹³ Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beici dine eruaide llaigafomo daje amani nase ite. ¹⁴ Naie llaigafo anamo doce nofici ite. Nainomo Toïca Llauda isoidimie ie doce llofueoicaïgano mameciaï cuega.

¹⁵ Cue diga ñaite jaienicimo oromona ra facara ite. Naie nairai facallena ite. Ie nase, ie llaigafo diga, facallena ite. ¹⁶ Naie nairaina naimie facajamona, nagafebei daje isoi illana uifnoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. ¹⁷ Ie llaigafona jiai facade. Sesenta y cuatro metros a ite. Comini facaja isoi, jaienici iena facade.

¹⁸ Ie llaigafo jaspe railla noficimona finoca. Bie nairai difai oromona finoca. Enefebecodo cide. ¹⁹ Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo cide. Iemei zafiro. Mocorede. Jiaie ágata. Mocorede. Jiaie esmeralda. Mocorede. ²⁰ Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafo anamo ite noficiaï doce diga ite. ²¹ Ie doce nasiaïdi perlas. Userede. Naga nase daje perlamona finoca. Bie nairai naisuaïdi difai oro. Enefebecodo cide.

²² Bie illanomo Jusiñamuina sedajanona cioñedicue. Nana bie illanodi naimie sedajano. Cai Nama Jusiñamui, Toïca Llauda isoidimie diga, nainomo illa jira, iaïmaïaï uicomo sedaiticaï. ²³ Jusiñamui siñoa jira, nainomo comini

jitomana jitaiñeitimaci. Fivuína jitaiñeitimaci. Jusiñamui, Llauda isoidimie diga, iena lligaiñoite. ²⁴ Nana comini iaímaiaína nabaicana jaitimaci. Nana illacomini iaímaiai dine billanona, iaímaiaimo iobillacino jaca fecaitimaci. ²⁵ Bie nairai nasiai jaca ibaiñeite. Nainomo naionadi jaca iñeite. ²⁶ Iaímaiaimo iobillacinona fecallena, nana comini nainomo biitimaci. ²⁷ Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimiemo ite rabenicomo cuega mameciai itinodi nainomo biitimaci. Bie rabenicomo Jusiñamui illanomo jaca iitino mameciai jai cueba.

22

¹ Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. ² Nanoca naiso motodo tote. Nagafebelle dine jaca itataite amenaiai ite. Naga fivui llisillamona, naga fivui llisilla ite. Ie ibiai illamona, comini caimare marena itimaci. ³ Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. ⁴ Naimiena marefodo cioitimaci. Naimiemo naimaci duillamona, naimaci uiecuai itofiaimo naimie mameci cueite. ⁵ Nainomo naionadi iñeite. Lamparina jitaiñeitimaci. Jitomana jitaiñeitimaci. Cai Nama Jusiñamui naimacina lligaiñoite. Illacomini isoi jaca iitimaci.

Juan Jesucristo billirui iaírei illana cacade

⁶ Jaienici cuemo llote:

—Bie lluacinodi uanaicino. Naimie facaina llorainimo ie rafuena lollena, ie uaina itatate. Naimiena ñnotinona ico suille rafuena ja uifnotaiacade. ⁷ “Raire biiticue” Cristo llote.

Bie rabenicomo ite ico suille rafuena ñnotinodi caimare iitimaci.

⁸ Juandicue. Bie rafuena cacadicue. Iena ciodicue. Iena cue cacaja mei, iena cue ciua mei, iena cuemo acataga jaienici uicomo ana bitadicue. Naimiena sedaacadicue; ⁹ iadedi cuemo llote:

—Dama ite. Cuena sedañoeno. O diga, naimie facaina lloraini isoi, bie rabenicomo ite llogacinona ñnotino isoi, naimie dibeimo jiai maijadicue. Dama Jusiñamuina seda. ¹⁰ Bie rafue suillirui iaírei illa jira, iena jino llono. Iena uifnota. ¹¹ Bie rafuena bu ñnoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie ñnoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

¹² Jesucristo cuemo llote:

—Ero, raire biiticue. Naimie finoca rafue diese nagamiemo ibana fecaiticue. ¹³ Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitudicue. ¹⁴ Naimaci ñniraina naimaci jocoia, caimare iitimaci. Naimaci comecina ñaiticue. Ie jeacinona oni dotacemie jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; ¹⁵ ia naimacina jeacinona naimaci faionocaiñenia, Jusiñamui illanomo marañede rafuena finocabidino, aima dine jaicabidino, aifede riño diga icabitino, inifñede ima diga icabitino, cominina meinettino, jiraraina sedacabidino, tainona llocabitino duiñeitimaci. ¹⁶ Creyentiaína bie rafuena

uiñotallena, cue jaienicí o ðine jai oretaticue. David micorí ie jitodicue. Monairaicudu bairia isoi, Jusiñamui jitaillacinona cue finollena, baireitícue —llote.

¹⁷ Bie facaise Jusiñamui Joreñodi, Cristo jai oga ai railla comíni diga, naimiena nia ñnoñedinona uaidote:

—Bie rafuena mai cacarei. Iena mai ñno. Iena bu ñnoia, jiaimíemo iena lluai: Iena mai cacarei. Iena mai ñno.

Jiroacadimíemo llotícue:

—Mai jiruaibi. Bie jinua raifñede. Biena o jiroacania, jaca iitio. Iese llotícue; ia ie comecina ñaitícue. Bie rafue ñnuana ñaitícue. ¹⁸ Bie íco suille rafue ite rabenicono bu facajia, naimíemo rafuena lloiacadícue. Bie rafue baifemo bu lloia, bie rafuena bu meidoia, bie rabenicomu ite duere finuacino isoi, Jusiñamui naimiena duere finoite. ¹⁹ Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai llotícue.

²⁰ Cristo raite:

—Bie rafue jaca suite. Ua raire biitícue.

Iena raire suillena jiaí jitaídícue. Cai Nama Jesús raire billena eo jitaídícue.

²¹ Naimie duenaillacinona nana Jesucristona ñnotino uiñocana jaillana jitaídícue. Macaibaite. Juandícue.